

13.010

TROIS  
DIALOGUES DV  
Sr. ARCHANGE TVCCARO  
DE L'ABBREVZO, AV ROYAVME  
DE NAPLES.

LE PREMIER Dialogue traite des exercices Gymnastiques, dont les Anciens vsoient avec leur declaration & distinction, & vne dispute du blasme & de la loüange du bal ou de la dance.

LE SECOND contient plusieurs beaux discours du saut appellé par les Anciens Cubistique, & l'art & les reigles qui s'y doiuent obseruer pour en auoir la parfaicte intelligence, avec les figures & demonstrations.

AV TROISIEME est fort amplement discoursu des exercices que l'homme peut faire, selon sa nature & complexion, & comme il en doit vser pour rendre le corps agile, vigoureux & sain.

PAR TRES-CHRESTIEN ROY DE FRANCE ET  
DE NAVARRE, LOUIS XIII.

6839.




A TOURS,

Chez GEORGES GRIVEAU, tenant la boutique au Carroy des Chapeaux.

---

M. DC. XVI.

1616



[illegible]

REVOT A

THE UNIVERSITY OF CHICAGO  
LIBRARY



## AV ROY.

SIRE,



Il n'y a rien qui represente mieux les affections de l'esprit, que les actions & mouuemens du corps: Celuy qui a la dexterité de se tourner ou il veut avec facilité & promptitude, qui porte tout son corps allegrement & dispostement ou sa volonté le guide, & qui prend son repos dans les exercices de la danse, de la chasse & des armes, reçoit deux contentemens indiciblement grands; L'un d'acquérir cette reputation d'estre doué & muny d'un esprit vif, grand, genereux & capable: L'autre de conferer à sa santé les plus doux & vtils moiens de sa conseruation.

SIRE, vos suiets admirent tous les iours la beauté, grandeur & force de vostre ame, par les belles, grandes, & fortes actions de vostre corps qui ne se donne repos que pour se donner à ouïr & digerer les plaintes de son peuple, & luy fournir d'une main salutaire les remedes tres-heureux à ses maux & miseres: Ce liure, SIRE, qui est vn vif pourtraict de diuers exercices du corps, est d'autant plus digne d'estre veu de vostre Majesté, qu'elle est plus auantagée en force d'esprit & de

## EPISTRE.

corps que tous les Rois de la terre : La contemplation des figures qui marquent les proportionnez mouuemens du corps donnera plaisir à vos yeux & contentement à vostre esprit : A ce dessein, SIRE, l'ay tiré ce tresor des Tenebres, pour luy faire voir le iour, & du tumbeau pour luy redonner la vie sous les fauorables auspices de vostre Majesté : le prie ce grand Dieu la seure guide & garde des Rois, de continuer ses benedictions spirituelles & temporelles sur vostre Majesté, afin que longuement & heureusement, cherchant son honneur & seruant à sa gloire vous soiez reconneu le Soleil rayonnant de vos Royaumes qui dissipe tout ce qui se peut opposer à vos iustes & saintes resolutions. Ce sont les vœux de celuy qui met sa premiere felicité d'estre veritablement de vostre Majesté,

SIRE,

*Le tres-humble, tres-obeissant*

*& tres-fidele sujet,*

GEORGES GRIVRAY.





# LE PREMIER DIALOGVE.



PREZ que le tres-magnanime & tres-inuincible Roy Charles neufiesmè de ce nom, eut en tout contentement pris plaisir aux ioyeux esbats des nopces tant desirees de la Royne Ysabel sa nouuelle espouse, sœur, niece, & cousine de tant de Roys & Empereurs, celebrees à Mezieres, avec grande pompe & magnificence: Il ne voulut par son partement si tres-tost finir telles rejoyssances, ains de nouveau les daigna luy mesmes accroistre & augmenter par vne infinité de ieux & recreations qui se feirent lors en Court. Puis partant de là avec resolution de veoir & visiter tout son Royaume, il luy print fantaisie de sejourner quelque tēps en la maison & chasteau de Honoré sieur de Fōtaines, maison située en la prouince de Touraine, la plus belle & la plus fertille qui soit en Frāce, & laquelle à bon droit est nommee le vray iardin d'icelle; tant pour la douceur de l'air, & bonté des eaux, que pour l'abondant & fructueux rapport de tout ce qui est requis à vne terre grasse & fertille; remplie de force belles campagnes, de grandes & hautes forests, de grands & spacieux vergers; brief d'une veuë si belle & si agreable, qu'il semble (qu'à veoir, & la Prouince,

& la cōtree de ceste maison) que nature se soit pleuë là pour y sejourner, tant ce lieu est plaisant & gracieux. En ce lieu ledit sieur de Fontaines, Cheuallier d'illustre & tres-noble famille, Gentil-homme aussi vertueux & accomply qui s'en vit oncques, prepara si magnifiquement toutes choses pour receuoir sadite Maieité, qu'outré infinis passetemps, il luy donna le plaisir de toutes sortes de chasses, que le Roy mesme confessa n'en auoir iamais eu vn si grand. Cest exercice luy pleut d'autant, (à la verité) comme estant celuy que ce Prince aimoit naturellement sur tous les autres. Or cependant que ledit sieur de Fontaines essaioit par toutes sortes de chasses, ores dans les larges & spacieuses campagnes, ores dans les espaisies & grandes forests, accroistre de iour en iour les passetemps à sa Maieité; Sa tres-noble & tres-vertueuse espouse Anne de Bueil, fille de l'illustre Loys de Bueil Comte de Sanserre (duquel la renommee durera à iamais pour ses grandes & rares vertus,) & de laquelle de la Trimouille, Dame de grande reputation, donnoit si bon ordre en sa maison, par sa seule prudence & dextérité naturelle, à ce que tous ceux qui y arriuoient durant le tēps que le Roy y seiourna, fussent humainement receus selon leurs qualitez, avec toute magnificence & grandeur; si qu'il ny eut vn seul qui n'admirast infiniment sa generosité & velleur de son courage, & qu'il ne luy en demeurast perpetuellement obligé: Là venoient infinies sortes d'honnestes compaignies pour veoir ce magnifique passetemps: Et sur tout y vint vne troupe d'Italiens & François, qu'il estoit impossible en voir vne plus parfaite & accomplie, tant ils sçauoient fort bien représenter ce qu'ils vouloient en l'vne & en l'autre langue, que vous les eussiez pris pour naturels François, & les autres pour naturels Italiens. En cedit lieu, non loin du chasteau, dans vne grãde & spacieuse sale, qui regardoit sur vn iardin le plus beau, le plus gentiment comparty, & le plus delicieux à voir qu'autre qui soit en Touraine: Là, dis-je, comme chacun passoit son temps, qui à chanter en Musique, qui à dancier, qui à tirer des armes, qui à discourir l'vn avec l'autre, y arriua (sur la plus ardente chaleur de l'esté) fortuitement vn Gentil-homme, bien connu presque de toute l'assistance; en compaignie duquel e-

estoit aussi vn assez renommé & fameux sauteur, nommé Baptiste Bernard, qui ensemblement venoient de leur promener de ce beau & plaissant iardin; & s'estans arrestez pour falluër vne telle assemblée; remplie de tant de Gentils-hommes & Cheualiers: Le Seigneur Cosme Roger, natif de Florence, docteur, & fort bien versé en toute sorte de science, d'un excellent esprit, issu de noble sang; s'enquit dudit Baptiste où estoit lors son tres-cher & fauory *Palæstrita*, ou pour mieux dire, le Prince des plus rares exercices de siecle. Le Sieur Baptiste (attendu que les assistans ne sçauoient de qui il vouloit parler) respondit, luy disant, qu'il l'auoit laissé en sa chambre, dressant l'Architecture de quelques admirables saults qu'il auoit nouuellement inuentez: chacun desira sçauoir qu'il estoit, & prièrent ledit Baptiste de le nommer. C'est, Messieurs (dit Baptiste) vn mien grand amy appelé Archange Tuccaro, lequel plusieurs Gētils hōmes qui sont icy presens ont autresfois veu sauter deuant sa Maïesté, à quoy elle prenoit vn singulier plaisir. Alors Rogier adressant sa parole au Seigneur Charles Tetti (gentil-homme Napolitain venu en France avecque la Roynie) dit; Encores que vous ayez cy deuāt hanté plus de tēps en la Cour de l'Empereur vostre premier maistre, & le sçē, que ie n'ay fait; si auzerois ie biē assēurer qu'il n'a point discouru avec nous desreigles qu'on doit obseruer, par le moyē desquelles il s'est exercé à reduire en art & methode, la vraye demōstration, & certaine connoissance de l'exercice du saut tourné en l'air, ce qui est digne de louāge & admiratiō: veu que ny des Autheurs Grecs, ny des Latins, cest art de sauter n'a point receuē la dignité & honneur, duquel le sieur Archange la orné & embelly: Comme vous pourriez dire, d'infinites sortes de tours, de voltes, de virades, & inuersions toutes differentes les vnes des autres: dressant avecques certaine connoissance le iugement de celuy qui desire paruenir à l'exercice de bien sauter. Alors le sieur Ferrand gentil-homme Italien tres-docteur & tres-aduisé, & qui estoit venu avec le sieur Baptiste, prenant la parole dit, Or' que ie ne sois ignorāt de la langue latine, si entendrois-je volontiers (ō sieur Cosme) le sens que vous donnez à ce mot *Palæstrita*, duquel vous auez tantost honoré nostre intime amy le sieur Tucca-

ro: car d'vntel personnage que vous, nous ne pouuons attendre qu'vne rare eloquence, entremeslee de tres-belles & hautes conceptions. A ce propos toute l'assistance se haussant, pria les sieurs Ferrand & Baptiste d'entrer à la salle, y prendre place, afin que plus aysément ils peussent entr'eux discourir du subiect mis en auant. Le sieur Tetti s'auançant le premier les fit asseoir, & puis parlant doucement au sieur Roger, luy dit; Je suis fort aisé que soyez tous deux (entendant de luy & du sieur Ferrand) arriuez en si noble compagnie, mesmes sur la dispute de ces vocables Grecs & Latins, la propriété desquels nous esperons entendre de vous deux, tant ie vous reconnois courtois & gentils. Toutesfois quant à ce que vous auez amplement discouru du saut auecques le sieur Archange (saut qu'on peut à bon droit luy attribuer, puis qu'il en a restitué & remis sus l'exercice comme m'auuez assuré) i'en suis fort aysé, tant pour la vraye & singuliere amitié que i'ay en vous connue; que pour le deuoir qu'on doit à la dignité & l'honneur d'un si noble exercice, lequel il a mōstré en plusieurs endroits fort à propos & au contentement d'un chacun, l'ayant veu sauter maintesfois en presence de l'Empereur, & de plusieurs autres Princes, auec un grand & merueilleux applaudissement: & vous diray que si de luy mesmes il n'eut reueillé son esprit, au benefice & consideration de la profession qu'il fait, ce noble art de sauter eut esté tousiours abastardi & ne se fut iamais releué: veu mesme qu'il auoit pris place auec les bastelleurs & ioueurs de farces, qui l'ont tellement rendu vil & contemptible, en se seruant d'iceluy parmy les marchez, cabarets & hostelleries, que i'ay grande compassion de voir comment ils versent sotement & indignemēt de la gentillesse de ce noble exercice. A ce propos s'entremettant le sieur Baptiste, le vous requiers pardon (dit-il) si auant que le sieur Cosme responde, ie m'aduançe à vous faire la responce, que sans doute le sieur Archange vous feroit s'il estoit icy. L'honneur, dit Baptiste, & le respect que ie doy au sieur Archange me fait vous rendre graces de la louange que vous luy attribuez en si bonne compagnie: le vous assureray bien qu'apres auoir discouru auecque luy de la maniere & methode de sauter, & de la diuersité

des fauts, il ma faict si bien voir la faute de ceux qui ne sçauent rendre autre raison de leurs fauts, sinon qu'en nous monstrant la mauuaise pratique & incertain vsage à quoy ils exercent leur corps, que maintenant pour tout certain ie recognois auoir moy-mesme esté le plus pauvre & mauuais saltarin du monde. (I'vsferay de ce mot avecques le congé & licence de ceste noble troupe, encor' qu'il soit peu vsté en langue François, car estant au vocable peregrin & estranger, il semble pourtant estre fort propre pour signifier en vn mot, celui qui a la parfaite cognoissance de bien sauter.) Et diray sans me vanter, que ceux qui n'ont si parfaite cognoissance de cest art que peut auoir nostre Tuccaro, m'ont fait cest hōneur d'auoir prisé mes faultz & ma disposition, non pas pour les auoir seulement trouuez beaux, mais mesmes les plus admirables qui se vissent. Non pas pourtant que ie vueille conclure, que ie sois entré iamais avec le Sr. Tuccaro en si haults termes de Philosophie, sur la perfection du mouuement violent, comme a fait le Sr. Cosme cy present ( n'estant mon intention d'y vouloir penetrer plus auant) mais c'est pour vous dire, que ie me contente d'en auoir tiré vne assez bonne instruction, voire selon mon intention, & par discours communs, confessant ingenuement auoir apprins des choses que iamais ie n'auois sceuës ny entenduës. N'importe, respondit le sieur Cosme, pourueu que la verité soit cognüe, c'est assez que ceux qui la peuuent conoistre la sçachent, voire en quelque sorte & maniere que ce soit. Ne voiez vous pas qu'Aristote en plusieurs lieux de ses liures moraux en discourt vulgairement? Ne vous souciez donc pas tant des termes de la Philosophie, mais contentez-vous seulement de la propriété du vray sens de la chose qui peut approcher de vostre capacité, telle qu'elle soit. Or me reste-il à respondre au sieur Charles, qui veut (comme l'estime) me faire expressement entrer en dispute avec le docte sieur Ferrad, faisant semblant que les gaillardes paroles que nous auons eües l'un l'autre nous ayent picquez & aigris: & veut faire recognoistre à la compagnie ma petite suffisance sur l'interpretation & vraye signification du mot Grec *παλαιστρίτης* suiuant l'honneste & gracieuse requeste que nous en a faite le sieur Ferrand: que si ie

disimule ignorer la susdicte signification, j'ay peur de quelque alteration parmy nous, ce que ie ne voudrois qui aduint pour chose quelconque, parce que ie craindrois que si fort & robuste aduersaire, tel qu'est le sieur Ferrand, ne s'y opposast. Alors voicy approcher le sieur Ferrand qui disoit en se souriant, que ce n'estoient pas seulement les Musiciens qui se faisoient prier pour chanter, mais les Philosophes mesmes, les Mathematiciens, les Theologiens, & les Historiens, qui s'entr'enuient la franche liberté qu'ils ont de promptement respondre aux propos desquels non seulement vn chacun les interroge, mais mesmes à ceux d'entr'eux qui sont desirieux d'apprendre. Au contraire, le sieur Cosme, ie ne veux pas faire ainsi, ains vous monstreray & à toute la compagnie ce qui me semble de ces mots Grecs, mis en auant, encore que ie me doute fort, que ie ne satisferay pas entierement à vostre opinion, laquelle ie prendrois volontiers plaisir ouyr de vous. Après qu'il eut dit ces mots au sieur Cosme, il commença à discourir & parler comme s'ensuit. *Palestrita* donc, dit le sieur Ferrand, si la memoire ne me trompe, est vn mot que les Latins ont tiré de la langue Grecque. Et pour vous le faire mieux entendre, ie vous exposeray premierement que signifie le mot Grec *παλαίστρα* qui est ce que l'on dit en Latin, *Luctatio, concertatio*: & en propos vulgaire, c'est le propre acte de la luitte, ou l'esbat de l'exercice du corps de ceux qui luitent: & ne l'ont les Latins (depuis qu'ils l'eurent receu des Grecs, & mis en vſage) non seulement pris pour signifier la mesme luitte (suiuant qu'il est prins au texte Grec) mais pour tout autre lieu destiné à cest exercice. La Palestre suiuant l'auctorité de Ciceron & de Quintilian, est, la bien-seance des honnestes mouuemens, gestes, façons, formes, postures, & actes, non seulement du visage, de la voix, des mains, & des pieds, mais aussi de tout le corps ensemble: dont est venue à vray dire, ceste coustume d'appeller *Palestritas*, ceux qui en l'instruction de ceste bien-seance du mouuement du corps, sont excellemment biē experts & exercitez. D'auantage ſçay-ie biē qu'en langage Grec *παλαίστρις* est, ce que l'eloquence Romaine a obserué signifier le mesme luitteur, ou celui qui s'exerce en l'exercice de la luitte. Dont il me

semble (sauf vostre meilleur aduis sieur Cosme) que ce mot de Palæstrita ne s'accorde nullement en signification à la vraye Gymnastique, qui est la profession que fait le sieur Archange: & quand d'ailleurs on pourroit le luy attribuer, il le faudroit appeller *παιστικὸς* plustost que *παιστρίτης*, & ce afin de ne s'esloigner de la propriété latine. D'autant qu'Afranius & Quintilian appellent *Palestricos*, les hommes qui sont desjà maistres passez, & qui monstrent & enseignent cest exercice de la luitte, ensemble les gestes, formes & mouuemens conuenables à toutes personnes qui ont la volonté & le courage de se faire paroistre & renommer nobles, gentils & parfaits luitteurs, comme ie m'assure qu'en ceste partie il faudroit mettre le sieur Tuccaro, lequel ne manqueroit de monstrier la suffisance de cest excellent exercice à infinis nobles & gentils esprits. Et par les *Palestritas* ils ont voulu signifier les disciples qui apprennent des Maistres susdicts les exercices de la luitte. Et partant la difference de ceux-cy, avecque ceux là, est aussi grande, que celle qui est entre le maistre & l'apprentif. Et comme le sieur Ferrand vouloit passer outre & continuer son discours, le Sr. Roger l'interrôpant dit, Je ne refusay iamais de discourir avec quelques personnes que ce fut, principalement les ayans veus estre doctes, & accompagnez de modestie: car il est tres-assuré qu'on ne peut tirer d'eux qu'une vtile & louable instruction de la verité de la chose de laquelle le subiect est mis en auant pour disputer: ou si on ne peut du tout, au moins est-ce une confirmation de la cognoissance que l'on peut auoir de la chose disputee. Or i'ay tousiours desiré d'apprendre & de me faire sçauant, de peur de viure en ignorance, ayant par ce desir beaucoup profité en la cognoissance de la verité, laquelle ie n'ay pas tousiours cognüe: m'estant tousiours persuadé, que ce seroit double ignorance, si l'homme pensoit sçauoir ce qu'il ne sçait pas: ains au contraire son deuoir seroit de dire qu'il sçait bien ne le sçauoir; puis qu'ainsi est que la cognoissance que nous auons de ne sçauoir, est presque un vray moyen, ou assuré commencement d'apprendre à sçauoir, suiuant le dire de ce grand Philosophe qui disoit beaucoup sçauoir, en ne sçachant rien. Et si par cas fortuit ie me suis trouué avec des gens

## LE I. DIALOGVE

ignorans & sans aucunes lettres; si n'ay-ie pourtant laissé de discourir avec eux: estant bien aduertý qu'il se trouue force hommes qui se vantent beaucoup, ou tout sçauoir, voire plus que tout le reste des hōmes ensemble, & cependant eux-mesmes ce sont les plus ignorans & les plus bestes du monde; en quoy ils se font recognoistre manques de iugement & d'esprit; & qu'au besoyn la raison & l'entēdement leur deffaillent, gens à la verité que ie blasme & mesprise entierement. Or sieur Ferrand pour retourner à mon propos, i'ay ouý attentiuement vostre discours sur les mots par vous interpretez, à l'intelligence desquels ie ne puis m'accorder: D'autant que s'il vous souuient, ie disois par cy deuāt, parlant du St. Archāge, que ie ne lui attribuois pas absolument le surnom de *Palestritas*, car incontinent ie le qualiffiay du nom de *Gymnasiarcha*. Mais d'autant qu'il vous semble que ce surnom de *Palestrita* soit du tout improprement attribué (comme vous auez demonstré) à la Gymnastique (profession de nostre sieur Archange) il est bien raisonnable qu'en exposant ma conception, ie vous rende satisfait & content, en vous prouuant en qu'elle fame & maniere on le luy peut proprement attribuer, voire sans repliche. La suite duquel discours ie ne pourrois aisement continuer, & puis cōclure, si premierement ie ne declarois ce mot de *Gymnasiarcha*, & d'oū il est tiré, afin que chacun puisse estre resolu & satisfait de nos discours. Ie crains seulement que pendant le temps que nous consumerons à nostre dispute, l'assistance, n'en estant bien cōtente, ne s'en ennuye: Car, ie ne pense pas que vous & moy puissions venir en si peu d'heure à l'entiere fin de toutes les considerations que ie me represente sur ceste dispute; estant mon deuoir en discourant de proposer, & à vous de repliquer au contraire s'il vous semble: car nous attendons qu'au iourd'huy vous nous montrerez avec vostre vehemente eloquence vne diuerse & profonde doctrine, à l'imitations des Academiciens anciens qui oyoient discourir leur grand maistre Platon, comme nous sommes, à sçauoir sous le berceau d'une belle treille, & à l'ombrage de quelques grands & spacieux arbres, chargez de diuerfes fortes de bons fruićts, comme ceux-cy sont. I'eusse bien desiré pourtant sieur Ferrand,



rand, que puis que vostre arriuee, & celle du sieur Baptiste nous a fait entendre tels discours de la profession de nostre vray *Gymnasta* ( & non pas *Gymnasiarcha* comme i'ay esperance vous le biẽ prouuer) que luy mesmes eut esté icy present, m'asseurant qu'il nous satisferoit entierement & du nom & du til-tre qu'il luy conuient proprement; suiuant le iugement de la cognoissance que chacun a de soy-mesmes. Et encor' que cela n'apportast tant de plaisir à l'assistance que la mesme pratique & vsage de si diuers & differens sauts, comme vous pourriez dire l'incomparable saut des Cercles, duquel sera parlé cy dessous; si est-ce que nous en sortirions assez honestement cõtens & satisfaits. A ce propos fort gracieusement & gentiment repliqua le sieur Ferrand, en se retournât vers la compagnie. Prenez garde, Messieurs, ie vous prie, comme subtilement cest accord courtisan le sieur Roger a promptement trouué la maniere de nous faire perdre la souuenance du sens & de l'exposition de sa conception, voire de ses braues considerations qu'il nous pouuoit deduire sur le preallegué nom de *Gymnasiarcha*, & mesme sur celuy de *Gymnasta*, (nom duquel il a mieux pensé qualifier nostre sieur Archange) au cõtiraire ie ne suis pas d'aduuis qu'il eschappe ainsi, ains ie m'apperçois que ceste recherche qu'il nous a promise sera merueilleusement vtile & delectable pour le grand contentement qui s'en ensuiura, comme estant vne recherche rare & exquisite, prouenant de la cognoissance de la venerable antiquité Grecque & Latine. Parquoy il ne seroit pas honneste de vous aduertir dauantage sur ladite exposition, ne me restant plus que de suiure l'ordre qu'il a tenu en la diuision qu'il a obseruee, sans plus aller chercher la longueur des excuses qui seroient par trop ennuyeuses, cõme seroient aussi toutes autres nouuelles allegatiõs qu'on y pourroit adiouster. Je vous supplie doncques de croire, Messieurs, que le discours que ie desire vous deduire sur le subiect de ceste matiere mise en ieu, outre le grand plaisir que vous y prendrez, sera remply de plusieurs & diuerses histoires, la cognoissance desquelles seruira infiniment, comme aussi l'exacte obseruation des loix, & gouuernemens que ie vous représenteray des plus anciennes Republiques. Parquoy il m'a tousiours semblé bon que

## LE I. DIALOGVE

nostre feal Gr. Roger ne s'en allaſt ſi legerement qu'il en fait le ſemblant, puis que volontiers ie me ſuis offert à le ſecond de tout mon pouuoir, en tant que mon petit ſçauoir ſe pourra eſtendre, & m'aſſeure qu'en ce faiſant nous aurons matiere de nous ſouuenir du paſſe-temps que prenoient anciennement les Academiciens en leurs diſputes. Sur ce propos le ſieur Baptiſte ſe leua & dit, que de ſa part il vouloit auſſi faire preuue à tous ces Gentils-hommes du deſir qu'il auoit de les ſeruir, & accroiſtre par ſa diligence les plaiſirs & paſſe-temps qu'ils en attendoyent, s'offrant luy-meſme d'aller trouuer le parfait nourriſſon de la Gymnaſtique du ſieur Archange, nommé Pino; lequel ſans grande ceremonie il ameneroit, pour le faire en preſence d'eux tous ſauter, & leur faire voir toutes les diuerſes ſortes de ſauts merueilleux qui ſe font en l'air ( que nous appellons ordinairement en termes de ſaltarin, ſaut Cobitiſtique, nom, que nous retenons encor des plus anciens & fameux Gymnaſtes qui ſe ſoient veus, ) ſauts, diſ-je, auſſi admirables que les fait le ſieur Tuccaro ſon maïſtre, & ce afin que ce iour ſoit dignement employé à tous les plaiſirs & paſſetemps que nous pourrons: meſmes éſ diſcours de bien & iuſtement ſauter avec les parfaits & dignes maïſtres de l'art, tels que nous en auons icy. Eſtant bien raïſonnable que tels diſcours ſe paſſent de ceſte façon, puis qu'ils ont eſté cauſe de nous faire entrer en ſi haultes & grandes diſputes de la tres-noble & excellente Gymnaſtique. Sur le propos du ſieur Baptiſte toute la compagnie reſpondit: Nous vous ſerons infiniment obligez, ſi vous nous faites voir ce que liberalement vous nous offrez, & promettez, pourueu que voſtre retour ne ſoit trop long. Et comme le ſieur Baptiſte prenoit congé de la compagnie, le ſieur Charles Teti retournant vers Roger, luy dit, vous penſeriez bien eſchappé ſieur Roger par l'entremiſe des paroles de Baptiſte; lequel ſemble auoir reſpondu par ſes diſcours à vos ſubterfuges; le vous prie ne nous vouloir reſuſer, & enuier ſi belle rencontre de tant de beaux & graues propos; mais pluſtoſt qu'il vous plaiſe nous declarer amplement la ſignification du mot de *Gymnaſiarcha*, enſemble ſa vraye etymologie (choſe que nous deſirons fort entendre de vous) parce qu'il

se deriue (cōme indubitabement il fait) du verbe Grec γυμνάζω, il ne se peut faire autrement qu'on ne discoure aussi des exercices Gymnastiques, & des maîtres d'iceux, que vous auez cydeuant appelez *Gymnastes*. Choses à la verité notables, & curieuses à sçauoir, & par conséquent attentiuement entendüs. Surquoy le tres-adiuisé sieur Ferrand adiousta quelques mots, disant, ô l'heureuse iournee, & que i'ay si longuement desiree; en laquelle i'espere qu'en fin la noble assistance verra, & cognoistra ce que tant de fois i'ay asseuré estre vray de la diuersité de tant de faults, & exercices incroyables qui se feront avec toutes les obseruations, & iustesses qui sont necessaires, & requises à si nobles exercices; afin qu'à l'aduenir on puisse sçauoir par la theorique l'excellence de si admirables, & miraculeux faults. Car si cela n'estoit, il seroit impossible de pouuoir acquerir l'vsage à entierement parfaire la vraye iustesse, & la grace qu'il faut auoir à quelque sorte de saut, quelque difficile, & diuers qu'il soit; ensemble la forte & habile disposition que doit auoir vn maistre sauteur. Cela dis ie, ne se pourroit acquerir, Qui demonstreroit seulement la pratique, & le seul traual du corps, comme ont fait quasi par cy-deuant tous ceux qui se sont meslez de sauter, & comme sots qu'ils sont, ont obstinément reprouué l'art de sauter d'Archange. Non pourtant qu'ils soient fondez sur quelque bonne raison, mais pour la seule enuie qu'ils luy portent, lequel a tousiours mis peine de faire les admirables faults, non pas seulement de son corps, mais premierement de son esprit, les reduisant en art, avecque iuste & asseuree reigle, mesure, & methode. Et pour satisfaire à ce que ie vous ay dit cy dessus, vous verrez incontinent venir le sieur Baptiste avec ledit Pino, qui vous feront voir par leurs faults, & ouyr par leurs discours combien mon opinion est vraie, & receuë de tous bōs saltarins. Et toute fois en les attēdāt, vous sieur Cosme. pour leur commencer la narration du suiet, duquel toute ceste noble compagnie vous a prié: Car ie cognoy bien à vostre visage qu'estes resolu à ce faire, sans vous faire reprier d'auantage. Et de peur que Roger ne se voulut entremettre, le sieur Cosme s'auança promptement, & dit: Et puis que de vostre grace il vous plaist m'ouyr, ie vous prie me

## LE I. DIALOGVE

faire tant d'honneur, que de me vouloir seconder en ce mien discours, m'assurant qu'on ne sçauoit iamais perdre le temps avecques vous, le vous diray seulement qu'il me desplaist d'estre icy arriué inopinémēt, sans m'estre au preallable apresté de ce que ie dois dire, de peur q̄ ie ne demeure muët, cōme on dit.

Doncques ie deduiray premierement l'entiere signification du mot de *Gymnasiarcha*, puis ie vous monstreray que la qualité de *Palæstrita* n'est nullement mal seante (comme vous pensez) à la profession de nostre Archange : pourueu qu'il vous plaise m'accorder, & me promettre que n'aurez en vostre ame aucune autre opinion que d'un bon Philosophe, laquelle ie vous supplieray me faire paroistre sans aucun mal talent, ny dispute au contraire: attendu que ie sçay fort bien que n'ignorez nullement combien il est deshonneste se mōstrer peu modeste en l'inquisition, ou recherche de la verité, voire plus que ne le requiert la graue dignité de la Philosophie. Car encores que le Philosophe n'ignore la verité de quelque chose, si est-ce qu'il ne presume iamais la bien sçauoir, comme infinis font, lesquels avecq̄ vne obstination, & pertinacité grande, voulās monstrier sçauoir quelque chose, font paroistre estre les plus ignorans du mōde. Partant ie vous assure que maintenāt plus que iamais ie me dispose à vous faire cognoistre qu'il n'est besoin d'vser de ceremonie, ny de prieres, ny de louāge, à la charge que m'imposez tāt à celle de mō esprit, qu'à celle du corps. Resiouissons-nous, Messieurs, dit le sieur Charles, puis que tels Athletes sont venus aux prises: mettons arriere ie vous prie toutes ces fottes & vaines ceremonies, voire sans plus interrompre leur discours, afin que cela ne soit cause de les faire arrester, & demeurer tout court, sans que nous ayons le plaisir d'entendre ce que nous desirons il y a long temps sçauoir d'eux. l'arriuy sur ces entrefaictes, ou chacun de la compagnie me fit grand accueil, & avec grande resiouissance & exclamation, le seigneur Roger s'escria, en me disant; Vrayement, sieur Archange, vous estes arriué tout à propos, car vostre absence rendoit imparfaicte ceste compagnie, laquelle vous voyez remplie de tant de nobles personnages, qui attendent à ouyr discourir de vostre vertu, & du nouuel art, duquel vous seul fai-

des maintenant profession, & dont est procedé auioird'huy le subiect de nous trouuer assemblez icy pour en discourir. Lesquels discours seront à iamais (ainsi que nous a assuré le sieur Ferrand) dignes de memoire, & de grand plaisir quant & quant. Et lors leur faisant la reuerence, comme mon deuoir m'y conuioit, ils me prièrent de prendre place, & comme ie fus assis, ie commençay à leur dire. Si tost, Messieurs, que le sieur Baptiste m'a assuré que vous estiez assemblez, & que m'attendiez icy, où quelques iours auparauant vous auiez de coutume vous trouuer, pour avec plaisir, & contentement tromper les heures, & les longs iours du chaud de l'Esté, ie me suis incontinent acheminé pour me presenter, & m'offrir entiere-ment à vous, pour vous prier me daigner receuoir en si honorable compagnie que la vostre, & y vouloir accepter aussi le sieur Pin, qui vient incontinent apres moy, auquel j'ay commandé qu'il ne fist faute se trouuer avec le sieur Baptiste, ainsi qu'il luy promit la derniere fois qu'ils s'entreurent. A ce propos, mon très-cher Ferrand se tournant vers le sieur Cosme, luy dict, Le vous prie, faictes en sorte que nous oyons, & voyōs ce qu'un chacun de nous à si grand' enuie d'oïr de vous. Le sieur Tetti interrompant aucunement ce dernier propos, pria toute la compagnie de permettre qu'eux deux seuls, & l'un apres l'autre s'entre-respondissent, sans estre interrompus, afin que plus promptement ils dōnassent fin avecq vne entiere resolution aux discours des exercices qu'ils auoyent mis en auācy-dessus. A quoy chacun s'accorda fort volontiers, & s'appresterent tous à diligemment oïr, & retenir le discours que le sieur Roger auoit desia encommencé, si bien que de nouveau fut recommencee la dispute par le sieur Cosme ainsi comme il s'en suit.

COSME. Il est bien necessaire, Messieurs, sans vser d'autres discours, que ie reprene mon premier propos, & cōmenceray par l'interpretation du mot Grec *γυμνασία* qui signifie exercice, duquel est deriué le mot de *Gymnasium*, pour denoter le lieu où l'on faict quelque sorte que ce soit d'exercice: Encores que nos predecesseurs ayent vsurpé ce dict nom pour signifier le lieu que nous appellons *Eschole*; lieu, où les Maîtres Re-

## LE I. DIALOGVE

gens enseignent ce qui appartient à l'estude, & exercicé de l'esprit seulement, & non du corps. Mais pour ne nous esloigner des autheurs Grecs, desquels nous auons retenu ce mot, ie mettray en auant le tesmoignage du diuin Platon, que nous receurons sans autre, pour la definition des susdicts mots. Lequel au septiesme liure de ses loix definit ainsi la *Gymnastique*. La Gymnastique generalement est celle, qui en soy contient tous les exercices de la guerre, & qui seruent necessairement à icelle, à laquelle est aussi entierement comprise l'exercice de la luitte, & du fault. Il se voit par là qu'il n'a faict nulle mention de l'exercice des lettres, partant ce seroit grande temerité de penser qu'un tel, & si graue personnage comme Platon, eut ignoré la chose qui estoit si commune en son temps, comme estoit, par sur tout, ce noble & excellent exercice de luitter, & de saulter. Et faut icy noter qu'encores qu'il semble que ce mot de *Gymnasium* signifie toute sorte de lieu destiné à l'exercice du corps, comme nous auons rapporté des Grecs; si est-ce qu'ayans esgard à la diuersité des exercices qu'on enseignoit en cefdites escholes, ils auoient aussi des lieux differens, & separez, selon la diuersité de ceux qui se vouloyent exercer à certains, & differens exercices; c'est à dire, que chaque exercice auoit son lieu, & sa place destinee. Qui est cause qu'il ne nous faut esmeruiller des magnifiques, grandes, & miraculeuses architectures, & fabriques, que nous lisons auoir esté basties en toute la Grece, & parmy l'Empire de Rome, comme grande quantité de theatres, amphitheatres, & arenes; Puis que telles places estoient requises & necessaires, pour y representer separément diuers exercices; à l'un pour saulter, à l'autre pour y luitter, à cestuy-cy pour courir la bague, à cestuy-là pour s'escrimer, bref pour s'exercer à quelque autre sorte d'exercice que ce fust. Exercices à la verité, (comme vous sçauiez très bien) inuentez pour plusieurs, & grandes raisons, que nous pouuons tirer, soit de la Philosophie morale, soit de l'institution des anciennes republiques bien ordonnees, qui les ont mis en pratique & vsage, les introduisant en leurs citez avec gloire & honneur; pour ne laisser viure en oyfueté, & fetardise leur ieunesse. De sorte que si quelqu'un se disoit aller au lieu de la Palæstre, on n'entendoit

qu'il allast à quelque particulier edifice destiné pour la luité, mais bien à l'eschole, (qu'ils appelloient *Gymnasia*) où on en-  
seignoit (comme i'ay dict cy-dessus,) toutes sortes de differens  
exercices: & le mesme peut-on dire des autres exercices.

FERRAND. Je le crois ainsi, & le tiens pour tres-certain,  
encores que quelques-vns en parlent autrement. Voire voyōs  
nous aujourdhuy qu'es escoles (que vous avez cy-deuant mō-  
stré estre appellees par les Latins, à leur mode, *Gymnasia*, & en  
France, Colleges,) Il y a de grandes sales departies chacune  
pour l'estude, & la profession de plusieurs sciences, & arts dif-  
ferents les vns des autres, qui s'y lisent, & enseignent par les  
Professeurs à ce gagez. Et quand quelque escholier vient de la  
classe de Rherorique, de Logique, Physique, & des autres, il ne  
s'entend pas qu'il vienne d'autre lieu que de l'une de sesdictes  
classes, qui sont dans ledict college, où on enseigne les susdites  
sciences. Je ne veux pourtant inferer que tous les colleges  
soyent aussi grands les vns que les autres pour pouvoir rece-  
voir si grand nombre d'escholiers, voire de sales qui seroyent  
requis particulièrement à toutes les sciences & susdicts arts  
liberaux. Aussi ne faut il pas croire qu'en tous les anciens colle-  
ges de la Grece y eut autant de lieu, & d'espace, comme il y  
auoit à celuy que descrit Vitruue, ni qui fussent si bien entou-  
rez, si grands, & si spacieux, avec force grande quantité de co-  
lomes, qu'aucuns edifices qui se voyoyent fort fameux & re-  
nommez, à cause des diuers exercices qu'on y faisoit. Il suffit  
(comme a esté dict cy-dessus) que la propriété des choses, mē-  
mement des mots, se cognoisse, & s'entende selon la particu-  
liere signification qu'ils ont, sans estre par trop curieux de la  
trop grande licence d'aucuns, qui pour se monstrier sçauants,  
ou autrement, abusent trop licentieusement de la signification  
des mots Grecs & Latins, voire de quelque autre langue que  
ce soit.

Cos. Ie me resiouys fort, sieur Ferrand, que vous ayez si  
bien confirmé mon dire. Si ne faut il pourtant croire que les  
hommes puissent tellement changer la signification d'aucun  
mot pour leur en seruir autrement que n'est sa premiere deri-  
uation & propriété, sans en abuser, (comme vous sçavez fort

## LE I. DIALOGVE

bien) & mesme que ie pourrois prouuer avecq infinis autheurs Grecs dignes de foy, s'il en estoit de besoin. Mais pour ne me departir de mon premier propos; ie dis, que comme du nom Grec γυμνασία, qui signifie *exercice*, est deriué le mot de γυμνασιον, aussi que de γυμνασιον, sont deriuez les vocables de γυμναστής, de γυμνασιάρχης, & de γυμναστική, combien que quelques autheurs en restraignant ledit mot de γυμναστική, veulent qu'il soit deriué ἀπὸ τοῦ γυμνάζειν, qui en Grec signifie autant que fait en latin l'infinitif, *exercere*, & en langue Françoisse, *s'exercer*. Finablement par ces deriuations ainsi espluchees, il se trouue que le mot de γυμναστής signifie proprement le principal maitre, & precepteur des exercices, c'est à dire, celuy qui a le soin & la charge, generalement de tout le college: & pour ce regard estoit-ce la plus grande, & plus honorable dignité qu'on pouuoit auoir dans ledict college. Mais celle des Gymnasiarques n'estoit telle, parce qu'ils n'estoyent que cōme Presidents particuliers des lieux & classes qui estoyent dans ledict college: lieux & classes, di-ie, qui estoyent, comme i'ay dit cy-dessus, destinees à tel ou tel exercice.

FERR. Au semblable de ce que cy-deuant vous nous auez discouru, (sieur Cosme,) il se voit mesmes en France, qu'en chaque college il y a tousiours celuy qu'on appelle le Principal, dignité sur toute autre qui soit audict college premiere, & plus grande, & comme plus excellente, aussi est-elle mieux gagée, que n'est celle des Regents, qui ne sont principaux, & maitres que de la classe où ils lisent. Dequoy il faut noter, (à mon iugement) que tout ainsi qu'à vn seul college y auoit plusieurs regents: aussi en vos Gymnases vn seul Gymnaste auoit le premier l'honneur, & la charge de son Gymnase, (s'il faut ainsi dire) ayant l'œil sur tout ce qui appartenoit aux exercices du corps. Et au contraire il se trouuoit plusieurs Gymnasiarques, qui seruoient de Presidents és lieux particuliers, où l'on s'assembloit pour lüister, sauter, ou courir avec les Athletes. Et en ceste signification il n'y a pas long temps que ie vous disois que le tiltre de Gymnasiarque estoit fort propre, & bien adapté à la perfection de nostre seigneur Archange. Estant chose tres-asséuree que tout ainsi qu'il se voit en nos Republiques des colleges



colleges destinez pour apprendre les sciences, qu'aussi ne seroit-il hors de propos que l'on remit en vſage & pratique les Gymnaſes, qui fuſſent destinez à la mode des anciens, pour tous & chacuns les exercices du corps: auquel lieu preſidaſt le ſieur Archange, ſuiuant ſa parſaïcte maiſtriſe & entière experience, de ſauter: Et par ce moyen remettre ſus ce gentil mot Grec de Gymnaſiarque, & luy donner place parmy la langue Françoisſe: duquel titre, comme i'ay dict cy-deſſus, à bon droit on qualifieroit ledit Archange. A ce propos Coſme interrompit le ſieur Ferrand, le priant de ne paſſer plus outre.

Co s. Ie me doute, dit-il, à peu pres de ce que voulez inferer, ſieur Ferrand, mais ie m'aſſeure vous ſatisfaire incontinent, & vous declarer ma conception ſur la propre ſignification du mot *Paleſtrita*, car vous ne me ſçauriez nier que les Latins ne l'ayent ſouuent vſurpé pour ſignifier quelque ſorte d'exercice que ce ſoit, ſoit du corps, ſoit auſſi de l'eſprit. Et combien que l'art de ſauter ſoit vne eſpece d'exercice, & deriué de la Palæſtre: & que le nom de *Paleſtrita* ſoit pris eſtroictement pour celui qui ſçait luiſter. Si eſt-ce pourtant qu'en le prenant ſelon ſa generale ſignification, il ſignifie auſſi la profeſſion de celui qui reduict en art, en reigle & methode la vraye & parſaïcte cognoiſſance de ſauter. Mais auant que paſſer outre, deſirant vous faire entendre tous les mots qui ſe deriuent du ſuſdict vocable Grec *γυμνασία*, Ie vous prie vouloir mettre à fin voſtre propos encommencé, pour ne perdre la commodité que nous auons, vous aſſeurant de ne plus vous interrompre.

FERR. Volontiers ie m'accorde à ceſtui voſtre deſir, & vous prie qu'il vous plaiſe ſuiure ſur toute autre choſe, ce que voſtre heureuſe memoire vous fournit, ſur la diuiſion de Platon, que vous auez parci-deuant alleguee ſur la profeſſion de la Gymnaſtique, & diſiez, (ſi bien il m'en ſouuient) que pour dire, allons nous en faire quelque exercice, ou que voulant demonſtrer que ceſtui cy, ou ceſtui-là ſ'en eſtoient allez avec quelques honneſtes hommes s'exercer à quelque honneſte exercice, que ceux-là, diſ-ie, ſ'en eſtoient allez à la Paleſtre, ou bien ſ'eſtoient trouuez à la Paleſtre d'un tel exercice: qu'il ne ſ'entendoit pas ſeulement d'un ſeul exercice en vn

## LE I. DIALOGVE

seul lieu, mais de plusieurs ensēble, en plusieurs & diuers lieux, & qui par art & industrie alloient exercer leur corps, & quelquefois aussi leur esprit.

Cos. Maintenant ie m'assēure que ces messieurs ici auront quelque esclarcissement de nos discours. Ie dy doncques de rechef que l'art de la Gymnastique ne comprend pas seulement l'art de luidter, sauter, courir, jouër au palet, ou se battre à coups de poing, comme anciennement se souloit pratiquer aux places & lieux Gymnastiques, mais mesmes generallyment il comprend tous & chacuns les exercices, qui estoient, selon la diuersité du temps, pratiquez, & exercez en tous les Gymnases, & lieux d'exercice.

FERR. De sorte doncques que vous voulez conclurre que la Gymnastique est le nom d'un art si vniuersel, qu'il comprend tous les exercices du corps, qui sont generallyment instituez & mis en vsage par tous les Gymnases, ne l'attachans pas à un exercice plustost qu'à l'autre.

Cos. C'est la mesme verité, que si ainsi n'estoit, Platon n'auroit pas escrit; comme nous auons rapporté cy dessus, que le nom de la Gymnastique comprint & embrassast en soy tous les exercices militaires: ce qui se cognoist aisément par la diuision qu'il fait de ladite Gymnastique, à sçauoir en la luidte, & au faut, comme estans les deux premiers genres de toutes les autres especes d'exercices à quoy les hommes se peuuent addonner. Ceste inuention fut trouuee tant pour la conseruation de la santé en temps de paix, comme pour accoustumer les corps à la force, promptitude, & disposition en temps de guerre; inuentee dis-ie, & mise en vsage, (comme en ces susdits lieux publics) selon l'occurrence, & varieté des coustumes des provinces d'alors. Ceste consideration seruira pour faire entendre d'un meilleur ordre la diuision de toutes les choses que ie me suis obligé cy dessus à discourir.

FERR. Beaucoup plustost contenterez vous, sieur Cosme, ceste noble compagnie, en vous preparant d'un bel ordre à discourir de si braues & si dignes considerations. Estant l'ordre sans doute la principale conseruation, & seul aide de la memoire, sans lequel les hommes ne peuvent faire leur profit de

ce qu'ils ont leu, ouy, veu, & appris. Mais à propos de la signification de la Gymnastique, que vous auez cy dessus interpretée, il m'est tombé en la memoire de ce que vous disiez n'agueres, parlant des tiltres desquels on pouuoit qualifier nostre Seigneur Archange, en asseurant qu'on le pouuoit appeller Gymnaste plustost que Gymnasiarque. I'estime que ce soit en consideration de la Gymnastique, de laquelle il fait entiere & parfaite profession; à laquelle, à la verité, bien que renouuелlee, il pourroit presider, si les Princes Chrestiens l'introduisoient aux principales villes de leur estat, y faisans à la mode des Anciens, edifier nouveaux colleges, pour reestabli lesdits exercices Gymnastiques: Ordonnans aussi que les exercices de tout temps inuentez, voire les plus recents pour s'exercer à la guerre, fussent avec vn bel ordre publiquement mis en vsage & pratique, qui seroit vn moyen d'aiguillonner leurs suiets de s'addonner à la vertu, & à tous honnestes exercices, pour estre vn iour recompensez de leur valeur & merites.

Cos. Vous auez iustement deuiné mon intention, & si les Republiques qui sont en la Chrestienté remettoient sus cest exercice, que ie puis dire leur estre necessaire pour rendre les corps des ieunes hommes plus forts & robustes, ainsi qu'il se pratiquoit anciennement, ie ne fay nulle doute que nostre Seigneur Archange ne fust des premiers à obtenir par le merite de son experience la preeminence de cest exercice, pour estre ledit Archange vniuersellement bien instruit, & versé à toutes les manieres d'exercices, soit anciennes, soit modernes, & de quels sans en rien dissimuler il a l'entier, & parfait vsage corporel, & spirituel. Mais voicy venir Baptiste, & Pino, qui portent quant & eux tous les instruments propres pour sauter, qui nous releueront vn peu de nos propos, & longs discours.

FERR. Je vous prie, sieur Cosme, auant que Pino saute, vouloir finir ce que vous a requis toute ceste compagnie, comme vous requiert aussi en son particulier le sieur Tetti, aussi biẽ aurons nous assez temps pour les voir sauter, mais non pas tousiours le loisir d'entẽdre la resolutiõ de tãt de doctes discours

pleins d'histoires, & de Philosophie. Partant, sieur Baptiste mō bon amy, & vous aussi sieur Pin, vous soyez tous deux les tres-bien venus. Je me resiouys fort de voir vne si belle & noble couple d'amis comme vous estes, & gens de promesse, n'ayans fait difficulté de nous venir veoir.

BAPTISTE. Le desir de vous faire seruice ne m'a pas seulement fait doubler le pas; mais mesmes l'affection que i'auois d'ouyr & entendre vos elegans discours, m'a fait voler pour venir icy avec le sieur Pin.

PIN. Il est ainsi, sieur Baptiste, encore que i'aille bien viste, mais i'en suis bien aise, & n'eusse iamais pensé trouuer si grande compagnie de tāt de personages vertueux comme il y a icy, en la presence desquels ie me resouds monstrier tout ce que ie sçay faire de bon, & si iamais ie m'esuertuay ce fera à ce coup, m'assurant que l'exercice que ie pretends faire de sauter, les recreera fort, & y deussē-ie, comme dit Sacripant, employer les ongles & les dents.

COS. Or sus laissons les ongles & les dents au seruice des Maccarons, comme on dit en Italie, & vous assoiez, s'il vous plaist, tous deux, puis que toute la compagnie vous en prie. Cependant le plus brieuement qu'il me sera possible ie m'en depestreray de ce que le sieur Ferrand veut que ie face: ne pensez pas pourtant que ie ne vous resueille bien aussi en faisant l'exercice du saut violent. Et ne pensez pas aussi (comme par aduanture vous pourriez auoir opinion) que ie me propose obseruer vntel ordre en mon discours, comme si ie voulois discourir des arts, & sciences, ou de leur action, pratique, ou contemplation; estant, s'il me semble, plus facile d'en discourir avec vn ordre libre, & non contraint, qu'avec l'estroite regle de Philosophie. Je dy doncques qu'ayant le diuin Platon consideré que la plus grande partie, voire que tous les exercices ensemble auoient certaine participation, & communauté avec l'art de sauter, de l'usage duquel necessairement procedoit la disposition, & mesure force du corps, a tres-bien mis au premier rang de la diuision Gymnastique l'art de sauter, & au second celuy de la luitte, laquelle sans doute est la plus ancienne façon de combattre qui se soit trouuee entre les hom-

mes, de laquelle on pourroit dire le mesme que du saut, d'autant que le bon luitteur saisissant son ennemy, & le serrant par les endroicts qu'il sçait estre propres pour le faire tomber, tantost en le poussant, tantost le tirant à soy, & aucunesfois le reculant, suivant l'art & l'experience qu'il a de bien luitter: qui est celuy qui ne voit qu'en telles actions, presque tout le corps, les bras & les mains, ne soyent tousiours employees? & que les temps & mesures ne se rencontrent pour ietter à terre l'ennemy? & non pour autre raison, sinon que cest exercice participe en tout & par tout aux temps, aux mesures, & aux proportions de l'art de bien sauter.

FERR. Maintenant ie m'apperois que ces Messieurs icy cognoistrôt estre vray ce que ie leur ay protestay tâtozt, qu'il ne falloit qu'ils eussent crainte de leur ennui de ces discours icy, & principalement entendant les raisons tirees de vostre heureuse memoire, sieur Cosme; si bien que ie vous prie de leur part qu'il vous plaise nous discourir amplement sur ce subiect: pour ma descharge, ie vous veux aduiser en passant, que si ie ne m'abuse sur le lieu de Platon, (que vous allez si bien exposant) il me semble, di-ie, qu'il vse du mot χορεία, qui signifie autant comme en Latin *Saltatio*, lequel, suivant mon iugement, est plus general, comprenant plusieurs especes, & differences de sauts qui ne seruent, ny à la santé, ny au seruice de la guerre. Partant, sieur Cosme, il vous plaira, en vostre diuision nous declarer ce qu'il vous en semble.

COS. Il faut, sieur Ferrand, qu'auant que ie passe plus outre, ie responde à vostre dernier propos. Il faut sçauoir que les Grecs ont deux mots qui signifient le nom Latin *Saltatio*, l'un est χορεία, & l'autre ὀρχήστρα, les Latins ont de ce premier forgé le mot *Chorea*, qui signifie le bal, qui outre plusieurs beaux sauts, est accôpagné d'infinies chansons, ou chants melodieux, (encore qu'en Grec la premiere signification de χορός, de laquelle on a tiré le mot Latin *Chorus*, signifie proprement la multitude des personnes qui dancent, & chantent doucement entr'eux) & selon le dire de Platon, au second liure de ses loix, χορός vient de χαρὰ, qui ne signifie autre chose que festes, plaisirs & resiouissances. Et à ce propos il ne nous faut oublier

## LE I. DIALOGVE

de remarquer que ce n'est pas de *χορος*, comme aucuns pensent, qu'est deriué le mot de *Choragium*, (qui signifie le lieu, l'appareil, & les ornemens de la Tragedie, & Comedie, comme enseigne Vitruue) mais du verbe Grec *αἰσχρολογία*, que les Latins traduisent, *Subministro, & supposito*.

FERR. Ie ne puis que ie ne vous die, puis que vous estes sur les Etymologies que *χορος* aussi signifie, ce que les Latins appellent *Tripudium*.

COS. Il est vray, & comme vous sçaez fort bien, c'est ce dru & menu battement qu'on fait des pieds, & en dansant avec mesure & cadence, comme vous pourriez dire, les Canariés, & telles autres especes de dances: & est ledict battement signifié par les mots Latins, *Tripudium*, & *Tripudiare*. Mais cecy ne fait rien à l'obiection que m'avez faite, bien sert-il à l'explication cy deuant des mots *χορος*, & *χορεία*, desquels Platon n'a vsé au lieu où il discourt de la Gymnastique; ains au septiesme de la Republique, il vsé du verbe *πηδᾶω*, qui signifie sauter, & de *πηδῆσις* qui signifie le saut: & si aucuns l'ont suivi nostre dire, interpreté *Saltatio*, l'interpretation n'en est que bonne, eu esgard que ledict Platon, au mesme liure, s'est serui du mot *παιδιμα*. Il ne s'ensuit pas pourtant que voulant Platon parler de la Gymnastique, (qui appartient à l'art militaire) il aye voulu parler de l'exercice du saut, ou de la tripudiation, qui ne sont seulement qu'especes de la dance, comme vous pourriez dire la Fissaigne, & autres mouuements qu'ont accoustumé de faire les Mimes, & Pantomimes aux theatres des Tragedies & Comedies: mais il a entendu parler de l'exercice de sauter, qui fortifioit les corps & les membres des hommes, à ce qu'ils fussent plus robustes, plus agiles, & plus gail-lards, pour seruir à vn besoin à la Republique; seule cause finale de l'introduction que lesdictes Republiques firent de tant de fortes d'exercices corporels.

FERR. Ie vous prie sieur Cosme, ne vous monstrez si grād ennemy du bal, ny de la dance, ny moins des plaifanteries des basteleurs: car bien que ces deux derniers exercices ne se puissent honnestement defendre en comparaison des autres arts; si est-ce que le bal & la dance ne doyuent estre blasmez, ny mis

à mespris, combien qu'aucuns estiment ( peut estre avec trop de passion) que ces exercices soient du tout contreuenants à l'honnesteté, & modestie des hommes vertueux. Je desire, sieur Cosme, que ce que dessus soit dit en passant, & sans vous destourber de vostre propos cy dessus commencé sur l'interpretation du verbe Latin *tripudiare*.

Cos. Certes à vous ouyr parler ie iuge que vous estes bon fauteur, & bon balladin, voire leur fort affectionné, tant ie vous voy louer leur exercice; & volontiers ie m'accorderois à vous, quand ce ne seroit que pour agreer & complaire à quelque belle maistresse que vous pouuez auoir, laquelle en vous ayment print plaisir à tels exercices: n'estoit que la verité m'est beaucoup plus chere, & plus amie, que toutes autres choses du monde. Mais ie pense lire à vostre face que vous voulez commencer petit à petit à desployer vostre eloquence, pour me faire vne cruelle guerre, pour n'auoir (se vous semble) voulu assez dignement louer le bal & la dance. Et auant que cela soit, ie vous prie contenter toute la compagnie sur les choses que vous auez cy dessus proposees, & mises en auant.

FERR. Vrayement, sieur Cosme, ie suis bien aise que vous me gaussiez ainsi proprement, parlant sous paroles couuertes de mes amours: mais pour suiuez ie vous prie vostre premier discours, vous asseurant vous faire cognoistre le contraire de ce que vous pensez de moy.

Cos. I'en suis content, & cependant que j'attendray vostre docte discours en faueur de la dance & du bal, ie ne lairray à continuer ce que desirez de moy sur le subiect cy dessus. Je dy doncques qu'encores que les Animaux en sautant, courant, volant, & nageant se remuent en mille & mille manieres de mouuements, & agitations à quoy ils sont poussez naturellement, si ne peuuent-ils sçauoir d'eux-mesmes s'ils se remuent ou non: Car bien qu'ils ayent les sens particuliers conioincts avec le sens commun des hommes, pour discerner, & auoir sentiment de ce qui leur est vtile, & necessaire; voire mesmes qu'ils s'en trouue qui imitent en quelque chose les actions des hommes, soit en parlant soit en se remuant, comme font les singes, & les perroquets, & plusieurs autres Animaux, si n'ont

## LE I. DIALOGVE

ils pour cela l'intelligence, & cognoissance en eux mesmes de sçauoir discerner pourquoy ils parlent, & se mouuent, mesmes estans priuez de la cognoissance de sçauoir s'ils viuent ou non: d'autant que toutes leurs actions ne procedent d'ailleurs que des sens cydeuant alleguez, ou bié de leur naturel qui les pouffe ore à vn effect, ore à vn autre: Parquoy il s'ensuit qu'ils ne sont douéz d'aucun iugement raisonnable, ny cognoissance d'aucune science. Au contraire les hommes ne cognoissent pas seulement simplement ce qu'ils font, ou pensent, ou ce qu'ils vont faisant & pensant: mais d'auantage ils sçauēt regler, & moderer leurs actions, & pensees, (& mieux quasi tousiours que la nature ne les pouffe,) en les accommodans le plus souuent à la proportion du nombre, du temps, & de la mesure; qui sont nō seulement (cōme dit l'Escripture) les fondemēs de la diuine creation, & fabrique de ce monde, mais mesmes de toutes les autres choses que l'homme opere, qui dispose & deduit ses actions à la regle qui se trouue en luy de l'image, & semblance de Dieu. Et ne faut vous estonner si i'ay furnommé cy-deuant Armonie, ce bruit ou tripudiation de pieds, encore que de prime face cela vous ayt parauanture semblé estrange: si est-ce que quand l'homme gouuerne auec reigle, nombre & mesure les temps, & contre-temps de quelque chose, il sçait fort bien accorder quelques sons, & tons que ce soyent, lesquels sans doute il rend plaisans à l'ouye sous espece de quelque conception qu'il a plaine d'Armonie, & de melodie. I'ay dit generalement les tons, & les sons, d'autant que la musique ne peut subsister sans eux, ny eux ne peuuent estre sans la percussion de l'air: la voix est vn son, le bruit de la lire, de la viole, de la fluste, & des orgues est vn son, comme est aussi tout bruit quel qu'il soit, & celuy-mesme que i'ay dit des pieds, & principalement quand il est accompagné de la voix, ou de quelque instrument musical.

**FERR.** Doncques vous voudriez dire que les singes & les chiens, qui ont appris à dancer & baller (comme i'en ay veu plusieurs en Italie, & ailleurs) sentent le mouuement armonieux, & melodieux de leurs sonnettes?

**COS.** Je crains, sieur Ferrand, que ne l'entendiez mieux qu'en



qu'en vous opposant n'en faites semblant. Car ie vousay desjà dit (comme vous sçauiez tres-bien) que les animaux ignorent qu'ils ayent la cognoissance de sçauoir quelque chose: Que si d'aventure il s'en trouue quelques vns qui en dançant, ou sautant, demonstrent comprendre aucunement la proportion armonieuse de la musique; il ne faut pour cela conclure que ils ayent naturellement eu ceste cognoissance & inclination de sçauoir approprier les cadences aux nombres armonieux d'icelle: mais que cela leur procede seulement de l'assiduele instruction que leur donne celuy qui les enseigne, ce qu'il pratique ordinairement en les faisant ieusner, ou bien à force de coups; n'estans encor lesdits animaux irraisonnables, comme i'ay dit, priuez de leur sens commun: & par consequēt ne sont aussi priuez de l'imagination qui leur peut apprendre les choses qui ne sont plus hautes que l'apparence de la cognoissance exterieure de leur sens & entendement, qui leur causent petit à petit ceste-dite cognoissance, & similitude de memoire que ils monstrent auoir de ce qu'ils ont appris par long vsage, & assiduele exercice. Pour ceste raison ne vous ay-ie si tost parlé de la brutalité des animaux, d'autant que la louange, ou le blasme des choses ne doit tāt proceder des effects, cōme de la consideration, & iugement de celuy qui les imite, ce qui ne se peut dire des animaux, mais tres-biē des hōmes, lesquels ne sont pas seulement poussez de leur naturelle inclination, mais par la diuinité de l'intellect ils sont attirez à la cognoissance des choses avec regle, & raison, & mesmes des nombres qui appartiennent à la musique, & en obseruant les temps, les mesures, les proportions & les interualles (pour ne me departir des termes de l'Art) ils forment, & composent la melodie, & armonie de laquelle nous parlons. De là vient que l'agitation, & mouuement du corps, soit en sautant, soit en balant, est appelée tant des Grecs que des Latins, armonieuse; à cause qu'ils participent sans doute de la proportion, mesure, & cadence, que l'homme retient de la musique, à laquelle il approprie entierement tous ses membres.

FERR. Vostre dire, sieur Cosme, me fait souuenir de l'opinion tant renommee de Platon, qui ne craignit de soutenir

## LE I. DIALOGVE

que nostre ame fut creée par armonie, ce que nous pourrions volontiers interpreter avec reigle, & proportion de la musique, & c'est pourquoy l'homme se delecte tant à cest art, à cause dit-il, que chacun est naturellement enclin aux choses, à luy semblables; iouxte la sentence commune des Latins, que, *chacun cherche & ayme son semblable.*

**Cos.** Il me semble à vous ouyr parler, sieur Ferrand, que vous ne foyez gueres amy de la doctrine de Platon, ressemblant à Aristote, qui se delectoit plustost à le reprendre qu'à le louer, lequel pourtant n'a laissé d'estre appellé par toute l'Antiquité Platon le diuin, ce que i'ay tousiours admiré, le tenant pour chose notable, & admirable.

**FERR.** Sçachez sieur Cosme, afin que vous ne vous trompiez pas en faisant iugement de mon estude, & de ceste mienne secte, que ie n'en affectionne point plus l'une que l'autre, ny ne fay iamais tant de cas des hommes, pour sçauants qu'ils foyent, que la verité ne me soit tousiours en plus grande recommandation. Ie ne suis tellement lié à l'opinion d'un, que pour changer en mieux, ie ne quitte volontiers son party, pour suivre celuy qui ne s'estudie pas seulement à bien dire, mais principalement qui enseigne à bien faire; & c'est là, sans trop de recherche, que se trouue la verité. Ie ne puis louer ceux-ci, qui avec vne passion demesuree soustiennent les escrits de plusieurs personnages, lesquels par leurs subtilitez déguisent tellement ceste verité, qu'elle n'est presque plus recognoissable. Il faut donc faire choix des hommes sçauants, & dire avec un Ancien. l'ayme Platon, l'ayme Socrates: mais la verité m'est encore plus chere. Quand ie lis quelques Autheurs, ie m'arreste volontiers à ceux qui ont la raison pour guide, sçachant que qui la suit, ne se peut iamais fouruoyer. Mais toutesfois il faut icy noter, qu'un homme, voire mesme plusieurs n'ont iamais la cognoissance de toutes choses, & qu'encores ceste cognoissance, quelque petite qu'elle soit est accompagnée de beaucoup d'erreur. Si tu veux examiner à la rigueur les hommes, voire les plus parfaits, tu n'y trouueras que trop à redire. A ce propos i'allegueroy volontiers Salomon pour exemple, qui nous seruira de tesmoignage pour confirmer nostre opinion. Par-

quoy ne croyez pas, ie vous prie, sieur Cosme, que ie me passionne plus en lisant vn Autheur que l'autre, ny que ie sois plustost Academicien, ou Peripateticien, que Stoiciẽ, Cirenĩ, que Megarien. Ne pensez-vous pas aussi que ie sois de ceux qui addonnez à leurs sens, & menez d'vne vaine opinion, donnẽt plus d'autorité aux escrits d'vn Autheur qu'à l'autre : Mais en lisant, & meditant, ie fay iugement de ce qui est bon ou mauuais, en vn ou plusieurs Autheurs. Et me souuiens que vous en faisiez ainsi dernièrement estant sur ceste belle consideration que traite si doctement Platon au 7. liure de ses loix, où il parle de toutes sortes de braues, & nobles exercices : mais principalement du saut, & de la luitte, qu'il a si dignement recommandez, comme faisans beaucoup, tant pour la conseruation de la santé, que pour rendre les hommes plus prompts, agiles, & dispos: bref plus propres, & adroits aux affaires & de la Paix, & de la guerre.

Cos. Ie ne sçauois assez louer, ny priser ceste honneste liberté de parler dont vous usez, sieur Ferrand, ny vous rendre graces dignes de vos merites, pour m'auoir si bien encouragé de continuẽr en ces beaux exercices, & en ceste profession d'honneur que ie vay recherchant depuis plusieurs annees. Mais ie ne veux laisser en arriere ceste belle consideration de Platon touchant ce noble exercice que vous m'avez remis en memoire, & que ie diffiniray par la diuision de la Gymnastique. Ie dy donc qu'il n'y a exercice qui face tant de preuue, & de demonstration de la disposition & force du corps, que celui du saut & de la luitte, & non seulement cela, mais qui plus est d'vne grande promptitude, & agilité d'esprit, qui est la theorique, & la pratique d'vn si bel exercice, lequel à la verité, suyuant l'opinion de Platon, merite de tenir le premier lieu entre tous les autres exercices, & ce d'autant qu'il est naturellement necessaire, tant pour la conseruation de la santé, & plus grande disposition du corps, que pour rendre l'esprit plus prompt, & mieux disposé à toutes sortes de belles, & excellentes functiõs. Mais dites moy, ie vous prie, sieur Ferrand, que c'est que vous meditez si attentiuement, entretenant vos pensees si doucement: Ne voulez-vous pas, suiuant la promesse que vous auez

## LE I. DIALOGVE

faite à toute ceste noble compagnie, me seconder en vn si bel cice?

FERR. Je penserois à la verité commettre vne grand' faute, sieur Cosme, si ie n'allois recueillant les paroles de vostre docte & sage discours. Ne vous proposez donc pas, ie vous prie, me voyant pensif, que mon esprit soit tendu ailleurs que en la meditation de ce digne subiet, duquel i'ay pris si grand plaisir à vous oüyr discourir, que mon esprit rauy en contemplation ne pensoit à autre chose, que de se représenter quelques autres exercices qui fussent à comparer à cestuy-cy : Mais apres auoir entretenu mes plus profondes pensées, ie n'en ay trouué aucun, quel qui fust, qui ne soit compris sous l'excellence du saut, & de la luitte; lequel ne sçauroit estre assez recommandé pour sa dignité, & pour l'vtilité qui en reuiet, qui n'est pas petite. Car non seulement il touche le particulier; mais principalement il appartient à la Republique. Neantmoins il me vient en memoire de parler de la course, qui est vn autre exercice non moins necessaire, & profitable pour la disposition du corps, que le saut, & la luitte: Or pour mieux monstrier quelle est la dignité d'iceluy, il faut parler de son antiquité; & certes la course est vn exercice beaucoup plus ancien que ne sont ny le saut, ny la luitte.

COS. Le iugement que vous auez fait de la course, sieur Ferrand, seroit grandement cōsiderable, & fort à propos pour recommander l'excellence d'vn si bel exercice, & le paragonner mesme à celuy du saut, & de la luitte, n'estoit que le courir n'est autre chose, pour en parler à la verité, qu'vn saut qui se fait de pas en pas l'vn apres l'autre alternatiuement continué, tantost sur vn pied, & tantost sur l'autre; & qu'ainsi ne soit, prenez garde à celuy qui se veut mettre en deuoir de courir, ce qu'il ne sçauroit iamais faire s'il n'auance le pas, & ne le fait beaucoup plus grand, & plus long, que ceux qui sont ordinairement suffisans pour cheminer. Dont s'ensuit par necessité qu'on ne peut courir si on ne saute. Partant l'on ne peut nier qu'il ne soit impossible que l'homme s'auance en courant, si de saut en saut il ne va ore sur vn pied, & ore sur l'autre, pour finablement par l'estenduë de ses pas, & en sautant, paruenir à la course. Ce qui

est si euident, & manifeste, qu'il n'est, à mon iugement, besoin de plus grande preuue. Qui est celuy qui n'a veu pratiquer au jeu de la paume, que sçauoir sauter dextrement, & à propos, fait non seulement gagner vne, ou plusieurs chasses, mais mesme la partie, avec plaisir, & contentement de celuy qui par vne telle disposition, & dextérité de son corps, sçait vaincre son ennemy, & remporter avec l'honneur, & le prix, & l'argent? Chacun sçait combien le saut est necessaire à ceux qui se delectent, & font profession de monter à cheual, soit en temps de paix, soit en temps de guerre, mesmes à combattre sur la mer: il est certain qu'une grande promptitude & agilité du corps sert de beaucoup pour sçauoir bien sauter, & s'en ayder au besoin en toutes occurrences. De là vient que les assauts de villes sont ainsi appelez, non seulement pour le saut qui y est necessaire, mais pour signifier qu'ils deuroient estre faicts, s'il estoit possible, en vn saut, comme le nom d'assaut le demonstre. Que diray-je plus? le saut n'est pas seulement necessaire pour la chasse, mais aussi pour l'escrime, & le combat en duel; bref, pour toutes sortes d'autres honnestes & loüiables exercices: Tellement que ceux qui ont la parfaite cognoissance d'un tel art, se peuuent dire à bon droit faire entiere profession de la vertu, & de toutes les nobles actions d'icelle. Or la propriété du saut n'est pas seulement familiere, & commune aux hommes, mais aussi aux animaux, & entre autres, aux singes, & aux chats, lesquels sont douiez d'une merueilleuse promptitude, agilité, & disposition pour bien sauter. Les bestes sauvages, les Lions, les Leopards, les Pantheres, & autres semblables se sçauent si bien seruir du saut, lors qu'ils veulent venir au combat, & en vsent avec telle dextérité, & si à propos, qu'ils surmontent par ce moyen leurs ennemis, les preuenant en telle sorte, qu'ils sont plustost vaincus, qu'ils n'ont pensé à se defendre. Les chevaux ne cedent en rien à tous les autres animaux en ce noble exercice; car ils'en trouue de si prompts & adroits à sauter, qu'ils sauuent la vie de leurs maistres, se rendans par ceste agilité admirables, & espouuentables.

FERR. Certes il y a identité de raison & du saut, & de la course, sieur Cosme, car l'un ne peut estre sans l'autre: & la

## LE I. DIALOGVE

courſe , pour labien definir , n'eſt autre choſe que pluſieurs ſauts enſemble entrecoupez ; & quand meſmes l'on voit les cheuaux faiſans largue, ſe tourner ore d'un coſté, ore de l'autre, & puis tout ſoudain d'une prompte viſteſſe ſe dōner à la courſe, l'on iuge tout auſſi toſt que ceſte promptitude à courir n'eſt autre choſe qu'une continuation de ſauts.

COSME. Mon intention n'a pas eſté ſeulement, ſieur Ferrand, de louer ſimplement les cheuaux par la courſe : mais en diſcourant de leur promptitude, & agilité, ie me ſuis repreſenté les bons ſeruices qu'ils font ordinairement à leurs maiſtres, ſautantſ quelquesfois un foſſé, maintenant une haye, & telles autres choſes qui ſe preſentent, ſçauent fort bien ſ'accōmoder, & ſeruir au temps, & à l'occaſion. Ie ne ſçauerois donc plus dignement louer & la courſe, & la luiſte, qu'en les accompagnant au ſaut, puis qu'il tient, comme j'ay diſt cy-deſſus, le premier lieu entre tous les autres nobles, & vertueux exercices. Mais pour le plaſiſr que ie prens à diſcourir de la vertu, & bonté des cheuaux, ie veux encore un peu d'auantage inſiſter en la louāge d'iceux. Les hiſtoires & anciennes & modernes nous reſmoignent, qu'il n'y a entre tous les animaux fidelité plus grande, & plus recommandable, que celle du cheual, & du chien, leſquels n'abandonnent iamais leurs maiſtres au beſoin, ſoit à la vie, ſoit à la mort. Les exemples en ſont en fort grand nombre. Mais pour ne m'eſgarer trop en ces diſcours, il faut reuenir à noſtre propos touchant la continuation du ſaut, & de la luiſte. Ie dy donc que quand il eſt queſtion de ſe preparer au combat de la luiſte, l'on doit remarquer quelles doyuent eſtre les diſpoſitions, & appareils conuenables à un tel exercice, qui ſont tels, que celui qui approche pour luiſter, y vient les mains ouuertes, les bras eſtendus, & eſleuez en haut, roidiſſant les nerfs, & ſe fortiſiant en telle ſorte, qu'il donne le plus ſquuent l'eſpouuante à ſon ennemy. La façon dont il compoſe ſon corps eſt telle, qu'il ſe courbe, & ſe ploye, ayant l'eſchine un peu retiree en arriere, & ſur tout aſſeure ſi bien ſes pieds, qu'il ſe rend, & plus ferme & plus roide contre tous les efforts de ſon aduerſaire. Il y a plus, c'eſt qu'il ſe munit, & ſe ceint de tous coſtez, à la façon d'un fort chateau qui eſt enuironné de

bons & larges fossez difficiles au passage, pour la grãde distance, largeur & profondeur qui y est, & ainsi s'auance pour affronter son ennemy, ayant quasi de tous costez à l'entour de luy vne muraille, & se met en telle posture, qu'il est tout prest, disposé, & appareillé, de le bien recevoir, pour resister aux assauts qu'il luy pourroit liurer : & tous ces preparatifs ne se font à autre intention que pour venir en fin aux prises : & cela se pratique encores aujourd'hui en plusieurs lieux d'Italie, d'Espagne, & de Bretagne, où ceux qui luiçtent sçauent si bien rechercher leurs prises, qu'à force de bras (qui leur seruent d'armes offensiuës, & defensiues) ils poussent leurs aduersaires ore d'un costé, ore de l'autre, & les entrelassent si dextremement, qu'ils leur donnent du croq en iambe, & les supplantent accortement, leur donnants tant de trauerses, que finalement soit par force, soit par dexterité & finesse, ils les terrassent, & en demeurent victorieux. Il ne faut faire nulle doute que celuy qui est expert en l'art de luiçter, ne soit fort propre à se battre à coups de poing lors que l'occasion se presenteroit : & qui a la cognoissance de cest art, peut avec beaucoup plus de dexterité, & adresse se parer des coups de son ennemy en quelque sorte, & escrime que ce soit, que s'il en estoit ignorant. Je ne veux pourtant oublier à vous dire, qu'encor que le luiçteur, quelque accort & auisé qu'il soit, n'aye pas vne telle disposition, & agilité pour se mettre sur l'offensiue, ou deffensiue, que celuy qui a la parfaicte cognoissance du mouuement du faut fait à propos, si est-ce que celuy qui sçait bien luiçter, a plus de iugement & d'experience pour l'escrime de toutes sortes d'armes, & serre de plus pres son ennemy au combat, que celuy qui auroit mesprisé vn tel exercice. Or le propre de la luiçte est de rendre les membres de l'homme plus forts, & plus robustes que toute autre sorte d'exercice, & mesme au defaut de toutes autres armes, les bras en cest art seruent d'une fin dernière & espreuue du combat, & de la guerre. Ce qui ne se fait pas sans vn grand mystere, & secret de nature, si nous le voulons bien considerer : d'autant que toutes les autres sortes de combats sont inuentez artificiellement par la malice des hommes, entremeslans pierres, bastons, espees, & tels autres instrumens qui

## L E L. D I A L O G V E

sont extérieurs seulement: mais la luitte est naturelle, comme celle qui fut anciennement la première entre les hommes, & depuis a continué iusqu'à maintenant, pour preuve & faire monstre des forces d'autrui par les mesmes raisons que j'ay deduites cy dessus.

FERR. Certes ie ne doute point que le luitteur ne prenne vn singulier plaisir en ces beaux exercices des armes, & de la guerre, se rendant dispos & fort adroit par la pratique d'un si beau mestier.

COS. Et qui est celuy qui reuouqueroit cela en doute, S. Ferrand, veu qu'il n'y a personne qui ne sçache que l'exercice est celuy qui rend les corps plus forts, & robustes, plus propres & habiles à toutes choses, conseruant & la santé, & la vie des hommes? A la luitte on cognoist quelle est la valeur, & la force du luitteur: Tellement qu'il ne se faut esmerueiller, si le diuin Platon entre tous les exercices qu'il appelle guerriers, ou nécessaires à la guerre, il a de son temps compris ceux cy sous le mot general de la Gymnastique, en faisant la diuision cy dessus remarquee du saut, & de la luitte: mais si nous voulons discourir des choses par leurs principes, puis que tous arts, & sciences, & toutes autres choses naturelles, ou artificielles ne peuvent estre sans principes, veu qu'il n'y a rien qui aye iamais esté sans principe, sinon Dieu: Si vous considerez la nature coustume, & origine des exercices tant anciens que modernes, vous trouuerez que l'usage & la pratique de sauter, & de luitter sont d'origine, de nature, & de coustume conformes aux hommes du premier temps, comme vrais, & nécessaires principes de tous les autres exercices. Or ie ne voudrois nullement que vous creussiez S. Ferrand, que discourant de la vertu, valeur, & qualité des exercices par moy cy dessus alleguez, j'aye pensé y comprendre ny la dance, ny le bal, indignes d'une grauité honorable, & de la noble profession des armes. Car il ne faut pas seulement estre sans peché, mais aussi fuir toute apparence de peché. Ce que nous pouuons remarquer en la dance, laquelle, quelque pretexte que l'on ayt, ne peut estre sans vice, & le temps que l'on y employe, se peut dire vrayement perdu.

FERR. Cer-



FERR. Certes, à vous ouyr ainsi parler de la dance, S. Cosme, il n'y a celuy qui ne iugeast que vous n'avez iamais acquis les bonnes graces des Damoyelles pour bien dancier; mais plustost ie penserois que vous n'auriez pas sçeu apprendre cest honneste exercice de baller & de dancier, pour estre ennemy de tout honneste plaisir; & me fais croire qu'il y a entre vous & la dance vne certaine antipathie, puis que ie vous vois si mal affectionné à ce gentil & honneste exercice: Mais d'ailleurs ie me persuaderois volontiers que vous vous en monstrez ennemy pour fonder, (peut estre) ce que i'en diray: car il me semble que vous luy portez quelque hayne, ce que ie ne puis presque croire, comme n'estant chose que vous deussiez hayr, & qui vous peust auoir prouqué à en mesdire? veu que ie vous ay tousiours cognu homme sans passion, mesmes au discours que vous faisiez dernièrement de la liberté qui est requise & necessaire pour estudier; & ceste liberté s'entend, de n'estre preuenü d'aucun empeschement contraire à l'estude. Ie me souuiens que de vostre grace vous me louiez en vos discours. Que si i'auois l'eloquence requise pour bien defendre, ou plustost louer dignement ce bel exercice du bal, & de la dance, ie vous ferois bien tost cognoistre, (si ie ne pensois vous faire desplaisir,) qu'elle est vtile & necessaire pour la conseruation de la santé, & pour donner quelque relasche aux travaux ordinaires de l'homme; & ne pensez pas que si ie voulois prouuer mon dire, que les raisons, exemples, authoritez & experiences me defaillissent: & croyez que si l'entrois en comparaison des autres exercices que vous prizez tant, avec cestuy-cy, vous trouueriez que le vice & l'abus que vous estimez estre au bal & à la dance, seroit beaucoup plus grād aux autres exercices. Que si l'on vient mesmes à considérer ce qui est le plus propre & necessaire pour la conseruation de la santé, ie m'assure que l'on trouuera que l'exercice du bal & de la dance est plus conforme à la nature & complexion des hommes, que tous les autres exercices ensemble, que vous avez si dignement louez & exaltez: Qui est celuy qui ne sçait que le saut, & la course que vous avez cy-dessus prouué estre vne mesme chose, ne soyent mouuements naturellement contraire à l'hom-

## LE I. DIALOGVE

me? qui luy apportent plus de desplaisir, d'incommodité, & de dommage, que de profit, d'utilité, & de plaisir? Et ce d'autant qu'ils sont par trop actifs & violents; estant vne reigle certaine & infallible que la bonne composition, & naturelle gravité du corps humain se conserue mieux par le repos, que par le violent mouuement: outre que, (cōme vous sçaez fort bien) le mouuement du corps de l'homme ne se deuroit pas appeller naturel, qui tousiours s'encline, & tend en bas; ains plustost forcé, & violent. L'experience nous monstre que la preuue en est facile. Ie veis n'agueres comme ie descendois la montagne sainct Godard, qu'un fort agile, adroict, & léger Basque tomba du haut en bas du pont, dict l'enfer, auquel ne seruit de rien ny le saut, ny la course, ny tout autre mouuement que ce soit, encores qu'il fust bien sain, léger & dispos, pour empescher le mouuement naturel de la pesanteur de son corps, qui fut brisé au profond de ce precipice sans aucun remede.

Cos. Vous voulez, S. Ferrand, en vous donnant plaisir cōclure vos belles raisons precedentes par vn desplaisant precipice mortel, qui est sans doute fort considerable, mesmes entre les plus subtils Philosophes. Or toute raillerie ostee, ie dis qu'encores que vous ayez opinion que sur tout autre element qui domine au corps de chaque animal, celuy de la terre y domine le plus, pour n'auoir autre mouuement naturel que du haut en bas, comme estant le mouuement propre, & inseparable des choses graues, & pesantes: Toutesfois considerant le corps des animaux estre l'instrument de leur ame, composé & fabriqué tout expressement par la nature, non pour autre chose que pour seruir, & obeyr à l'excellence spirituelle de l'ame. Tous les mouuements des animaux, comme courir, cheminer, sauter, ou autrement, contre l'inclination de sa pesanteur naturelle, sont iugez & reputez naturels de tous les sages. La raison en est toute euidente, & manifeste; puis qu'on voit que la nature a tousiours donné, & donne encores aux corps des animaux tous les instrumens propres & necessaires pour faire tels, ou autres semblables mouuements, quels qu'ils soyent; d'autant qu'estants les nerfs, les muscles, les tendons, les arteres, les pieds, les mains, & autres tels instruments naturels pour ayder

& seruir au corps, comme le principal instrument de l'ame: tels mouuements procedants de telle parties ne peuuent estre autrement appelez que naturels, & leur action ne peut estre diste que naturelle, eu esgard que les Philosophes appellent l'ame quelquefois ame, & quelquefois nature; c'est à sçauoir, celle qui est l'origine, & la source premiere du mouuement en la chose en laquelle y a vne ame, faisant & causant le mouuement au corps, lequel a d'elle non vne seule & simple maniere de mouuement, mais plusieurs; non seulement differents, ains bien souuent contraires l'un à l'autre, comme suiuant la nature on void tousiours entre les animaux. Partant encore que le saut, & la course semblent (eu esgard à leur violence) contraires à la complexion & disposition elementaire des hommes, neantmoins si sont ils mouuements naturels à l'homme, aussi bien que le bal, & la dance, ou quelque autre mouuement que ce soit faict par art, ou sans art. Mais qu'est-il de besoin de discourir si long temps sur vn si maigre subiet? Je vous dis que la premiere cause, source & origine du bal, & de la dance, qui se faict en sautant & chantant, est nec, & procede de l'yurongnerie. Car les hommes vicieux anciennement s'estants addonnez à la paresse, à l'oyseté, & à la luxure, mangeants, & beuuant extraordinaiement beaucoup de vin, deuenoient yures, dont s'ensuiuoit que leur sang estant eschaufé, leurs esprits naturels, & vitaux s'enflammoient de telle façon, qu'ils estoient quasi furieusement agitez par ceste vineuse fumee qui exhaloit, & leur montoit au cerueau, les excitant à faire tels mouuements, & sauts, qu'on voit encores aujourd'huy pratiquer entre plusieurs yurongnes. Or le mouuement est vne propriété qui vient de la chaleur, lequel sera d'autant plus grand, que la chaleur sera immoderee; & me souuiens auoir leu que l'Ety-mologie Grecque le demonstre, se deriuant de l'ordre, & disposition des vignes, où se faisoient les bals, & les dances, apres s'estre enyurez, pour offrir leurs decimes, & premices au Dieu Bachus. Et de grace ie vous prie, qui est celuy qui sans passion considerant l'agitation des personnes qui dancent avecq' vne telle & si grande diuersité de mouuements, ne s'esmerueille de la folie de tels hommes & femmes qui s'y deléctent, & ne les

fuye comme personnes folles & du tout infenſées? Et afin qu'il ne ſemble que i'en parle pour en vouloir faire vne inuectiue, voyez ce qu'en eſcrit le docteur Viues, diſant qu'aux extremes parties de l'Orient, aux terres qui ont eſté nouuellement decouuertes par les Portugais, il aduint que les hommes de ce pays-là voyants pluſieurs perſonnes baller, & dancier, tournoyants & ſautant, cōme l'on a accouſtumé de faire ailleurs, tous effrayez s'enfuyrent ſoudainement, ſe ſeparans de telles compagnies, qui leur ſembloyent, comme ils diſoyent, eſtre des perſonnes endiablees, & poſſedees de quelque mauuais Démon, qui les auroit ainſi furieuſement eſmenés, & agitees; ne ſe pouuans perſuader qu'il fuſt poſſible que celuy qui ne ſeroit inſenſé, peuſt avec tant de tours, & retours diuers faire tant de mouuements; ſi que s'eſtants retirez, ils eſtimerent auoir eui-té vn tres-grand peril, & danger. Ce que i'allegue expreſ pour vous faire cognoiſtre, qu'encores que le mouuement du bal, & de la dance ſoit auſſi naturel que celuy du ſaut, & de la courſe, ſi eſt-ce toutesfois que ceſte violente agitation de la dance, & du bal n'a point eu ſon origine de la nature, ains de la vie vicieuſe, & mauuiſe couſtume des hommes, leſquels ſans iugement ſe laiſſent transporter à la gourmandiſe, & autres ſens, & appetits pires que les beſtes meſmes. Mais la courſe, le ſaut, & la luitte eurent dès le commencement, avec le meſme principe du mouuement naturel, l'acte de la vertu, & de leur uiſſance, eſtants choſes neceſſaires à l'homme, entant qu'il luy eſt neceſſaire de ſe ſçauoir defendre des iniures qu'on luy fait, & viure ſelon la nature. La luitte eſt pour la deſenſe, le ſaut, & la courſe pour les neceſſitez de la vie, & de la ſanté ordinaire: & cela eſt dict briueſement en conſideration de tout ce qui importe la premiere cauſe, & origine des actions des exercices des hommes, que l'on doit conſiderer avecq' vn meur iugement. Or ſi nous deuons diſcourir, comme il ſeroit bien ſeant, de l'inuention, & de degré en degré de la ſucceſſion de l'vſage, de la qualité des lieux, des temps, & des perſonnes, & de leurs circonſtances: & encores de la conſideration des exercices du bal, & de la dance, & des hommes, & femmes qui y prennent plaifir, & meſmes en font profeſſiō, ſi ie voulois, dy-ie, en faire

vn discours, le iour me faudroit plustost que le subiet, & la maniere, & seroit de besoin que le iour durast six mois, cōme nous lisons qu'il est entre les habitans qui ont pour leur Zenith l'vn & l'autre Pole.

FERR. Pour faire que ie fusse bastant pour pouuoir resister à vn si grand & puissant ennemy du bal & de la dance, comme vous estes, S. Cosme, il m'e faudroit beaucoup de doctrine, & d'eloquence pour la deffense de ces exercices que vous haïssez tant: mais pource qu'il m'est impossible d'alleguer vn si grand nombre de raisons que vous, pour n'auoir ny la memoire si heureuse que vous auez, ny le sçauoir, & l'eloquence telle, ie me contenteray pour ceste heure de proposer ce qui me viendra plus à propos, afin que ie ne semble auoir du tout abandonné & quitté ce party. Je dis donc que les mouuements qui se font avec ardeur, & violence, comme sont & le faut, & la course, ne peuuent estre vtiles, ny salubres tant à l'ame qu'au corps, & telle est l'opinion commune de tous les meilleurs Philosophes, & mesmes de Platō, & d'Aristote, Que nostre ame peut plustost par le repos, que par le mouuement deuenir sage, & prudente: Car lors elle n'a nullement besoin de s'acquerir beaucoup de choses, ayant d'elle-mesme actuellement, & de sa propre puissance l'habitude, & la propriété de toutes sortes de sciences. Or si le mouuement, comme mouuement, est naturel, & par consequent necessaire à toutes choses, estant neantmoins pris comme violent & furieux, il n'est nullement bon, ny salubre, tant pour la conseruation de la santé, que pour la prolongation de la vie des hommes; ce que l'on ne peut pas dire du mouuement, & agitation du corps, au bal & à la dance. C'est pourquoy, sous correction, vous auez tort ce me semble, S. Cosme, d'attribuer le vin, & l'yurongnerie à ces beaux exercices, encores que, (comme vous auez voulu inferer,) on peust bien prouuer, qu'ils ont pris leur source, & origine de l'yurongnerie; neantmoins (ore que la pratique, & l'usage en fussent deffendus) si est-ce toutesfois qu'estans exercices inuentez pour la santé & le plaisir des hommes, il ne faut pas en rechercher la cause, ains considerer quels en sont les effects. Car quelquefois d'vne mauuaise cause il sort bien de bon ef-

## LE I. DIALOGVE

fects: Suiuant aussi la raison qu'en ont tiré les meilleures Republiques avec grãde prudence, tant de la Philosophie morale, que naturelle, & mesme de la medecine, comme vous sçaez fort bien; ioinct que tout le monde ne peut pas sauter, ny courir: que s'il y en a quelques vns qui vsent souuent de ces exercices violents, que vous auez tant prisez, & exaltez, l'on voit qu'ils y finissent bien-tost leur vie, pource que forçant leur nature, ils ne peuuent pas long temps durer. Et cecy me seruira de defense contre toutes les calomnies que l'on pourroit proposer contre l'honneste exercice du bal, & de la dance. Et ne me fera on iamais croire, par quelque raison que ce soit, ny me persuader, qu'un si bel exercice soit un vice.

COS. Maintenant à ce que ie vois S. Ferrand, vous vous estes eschauffé en vos discours, & quelques excuses que vous ayez fait au commencement de vostre propos, vous n'avez pas laissé pourtant de rechercher les plus viues raisons de la Philosophie, pour mieux soustenir & defendre le bal & la dance: mais avec vos raisons mesmes, ie vous veux encore assaillir, & vous battre de vos propres armes. Je vous veux donc prouuer en peu de paroles (en laissant à part, puis qu'ainsi vous plaist la cause & l'origine du bal, & de la dance) que suiuant les raisons de la Philosophie politique, & naturelle, l'exercice du bal & de la dance a tousiours esté estimé, non seulement vicieux; mais aussi comme estant indigne de l'homme vertueux, prohibé, & deffendu du tout en toutes Republiques bien ordonnees, sous tres grandes peines. Et n'est besoin que ie m'estende d'auantage pour prouuer mō dire, ny que i'allegue icy tous les exemples des Republiques qui l'ont condāné, pour estre quasi infinis; ie me contenteray pour ceste heure seulement de vous faire souuenir de la reputation en laquelle a tousiours esté le Senat Romain, le gouvernement duquel ie me fais croire que ne voudriez blasmer, sçachant bien que de tout tēps il a esté le premier du monde. Vous n'ignorez donc pas que les sauteurs, & balladins ont esté plusieurs fois bannis de Rome.

FERRAND. Dites hardiment tout ce qui vous vient en memoire: Car ie ne veux nullement quitter, ny abandonner le party que i'ay entrepris à defendre: & veux bien que vous sça-

chiez que si nous ne nous accordons, ie vous baillera y tant d'affaires, que vous aurez assez de peine de pouuoir d'oresnauant louër & defendre vos fauteurs.

Cos. Principalement ie vous veux représenter le mouuement dont vous nous avez fait mention cy deuant, qui se fait du haut en bas naturellement par le basque, qui sauta plus hautement de vostre pont d'enfer, que ne feirent Rodomont, ny Roland tombants ensemble de ce tant fameux pont fabriqué par le mesme payen par despit. Je ne doute point que par les subtilitez de vos raisons, & arguments, que vostre docte eloquence vous fournit, vous ne me donniez de grandes traufferes; neantmoins pour vous esclaircir tant mieux de mon intention, suiuant vostre conseil, & pour me munir de defense contre vos assauts, ie veux combattre à l'encontre de vous, avec les armes de la raison, & par la force des exemples, des autoritez, & experience, vous prouuer en ceste lice Platonique, que ny la dance, ny le bal ne sont dignes que vous les deffendiez, moins que vous les preniez en vostre protection, & sauuegarde. Sçachez doncques que si les Philosophes, & principalement Aristote, parlants de l'ame, dient qu'elle est appelée sage, & prudente pour ne se mouuoir, mais demeurer tousiours en repos. ils ne l'ont pourtant dite sans action, pour inferer, cōme vous voulez par aduerture faire, que les hommes ne doiuent ne sauter, ne courir, ou autrement se mouuoir; car l'ame ne peut iamais estre sans action nō plus que la vertu, & ne plus ne moins que le Soleil sans chaleur & lumiere: Mais ils ont dit cecy seulement pour reprendre l'opinion de ceux, qui comme Platon, disoient que l'ame auoit la force accidentale du mouuement local, pour estre tousiours arrestee en vn lieu, & ne se mouuoir iamais, encores qu'elle semble se remuer en ses discours, & semblable plustost au mouuement, qu'au repos: mais en fin l'ame, comme substance qu'elle est, n'est point poussee de quelque autre, ains se meut d'elle-mesme seulement.

FERR. Pour cela ne s'ensuiuroit-il pas qu'encore que l'ame ne se meust point d'elle-mesme en mouuant son corps, sinon par accident que le mouuement violent du corps luy dô-

## LE I. DIALOGVE

donnaſt empeschement de deuenir ſage , & prudente : car l'exercice & mouuement violent n'eſt plus ſelon nature, ains repugnant, & du tout contraire à icelle , & au repos , & tranquillité de l'ame.

Cos. Ouy bien ſi ie vous auois accordé qu'en vn meſme temps l'homme doiue ou puiſſe vſer des forces, & actions tant de l'eſprit que du corps, eſtant quaſi impoſſible, que tandis que nous ſommes employez aux choſes mechaniques des affaires corporelles, nous ne ſoyons diſtraits de la contemplation , & des belles conceptions de l'eſprit.

FERR. La derniere raiſon que vous auez alleguee, S. Coſme, fait auſſi bien à propos (ſuiuant voſtre dire) du bal , & de la dance, que du ſaut, & de la courſe.

Cos. Il vous ſemble qu'il ſoit ainſi de primeface, ( S. Ferrand, ) mais i'eſpere bien-toſt non ſeulement vous faire paroître , le contraire, mais auſſi vous le faire aduouër & confeſſer. Or les raiſons que ie vous propoſeray ſont tirées de la concluſion des arguments que i'ay cy deſſus mis en auant. Et ces raiſons ſont pour ſentence diſſinitiuë de la Republique de Rome. Vous ne ſçauriez nier que l'Empereur Tibere n'aye avec vn fort prudent iugement non ſeulement defendu, mais banny du tout l'exercice , & le plaifir du bal & de la dance, diſant qu'il y auoit beaucoup d'autres plaifirs moins vicieux que ceſtuy-cy, aux Republiques, où plus modeſtement l'on pouuoit paſſer le temps aux heures de loisir. Perſonne ne peut nier, que pour l'abus qui ſe commet aux dances, & pour les diſſolutions qui y ſont , elles ne ſoyent vn vray pont pour paſſer en enfer. L'intemperance y eſt ſi grande, que la continence meſme d'une Suſanne en peut eſtre esbranlee, la pudicité de Lucreſſe alteree ; la chaſteté admirable de Porcia violee , & la virginité de Lucie pollue. Les pucelles, les femmes mariees, les veufues, ieunés, & vieilles y trouuent mille occaſions de pecher & penſer à mal faire. Toutes ſortes de voluptez & plaifirs deshonneſtes y affluent, qui les incitent , & prouoquent d'accomplir leurs deſirs impudicqs. Les reuerences, les baiſers laſcifs, les embraſſemens qui ſ'y font en ſautant l'un contre l'autre, & ſ'eſtraignant les mains, les regards affectez & diſſolus, & tels



tels autres gestes, & caresses desbordees font preuue plus que suffisante des façons vicieuses, & deshonestes du bal & de la dance que vous prisez tant. Entre les Romains les dances estoient en tel mespris, que les Dames qui auoyent dancé estoient non seulement reputées peu honnestes, mais n'estoient point estimees femmes de bien; & les hommes mesmes indignes d'exercer aucune charge publique. Et pour confirmation de mon dire, souuenez vous que Ciceron defendât la cause de Murena en la presence du Senat, & du peuple Romain, comme Caton luy eust reproché qu'il auoit dancé en Asie, ayma mieux le nier, que le sôutenir & defendre, quelque grand Orateur qu'il fust; & ne se peût asseurer de pouuoir estre excusé, ny libre de la calomnie, tant ce vice estoit odieux à toute la Republique Romaine; & diât-on que Ciceron ne respondit iamais autre chose à son accusation, sinon qu'on ne verra iamais personne dancer, ou baller deuant desieuner, qu'elle ne soit atteinte de folie, ou insensee.

FERR. A ce que ie voy, S. Cosme, & aux raisons que vous auez si doctement deduites, le bal & la dance sont mal asseurez sous l'esperance de ma defense, veu que principalement le pere de l'eloquence Romaine ne la voulu defendre. Pour suiuez donc hardiment, car vous n'estes pas encores paruenue à la conclusion que vous nous auez proposée.

COS. Aux raisons que nous auons alleguees touchant les Republiques bien ordonnees, nous pouuons adioster ceste cy, que l'exercice corporel des hommes ne doit estre cōmun, ny meslé avec celuy des femmes, y ayant grande difference entre les vns & les autres, subiets naturellement à plusieurs accidens. Car les hommes, qui de leur naturel doyuent estre forts, & robustes, deuiennent par ce meslinge du tout effeminez, foibles, & debiles, & despouillez de force & de vertu, tant de l'esprit que du corps. Voulez vous que ie vous prouue le mesme par les raisons de la medecine: Lisez Hipocras, Galien, & tous les autres Autheurs que vous voudrez, anciens, ou modernes, vous ne trouuerez point qu'ils ayent escrit, ou ordonné, que pour restaurer, & conseruer la santé des hommes le bal & la dance soyent necessaires, ce qui auroit esté vne pure & manife-

## LE I. DIALOGVE

ste folie digne de faire rire vn troisieme Caton, qui sans y penser descendroit du Ciel. Bien ont ils parlé des exercices, fuyuant la generale diuersité, ou particuliere difference de la nature, & complexion des hommes : mais ils n'ont point dict qu'il fallust dancier à jeun, ou baller apres disner. Tous leurs discours ne tendent qu'à la conseruation de la santé des hommes, & d'entretenir leur vie en bonne disposition. Et outre les raisons, & autoritez sussesdites, que respondrez vous à celle de l'Empereur Federic troisieme, lequel souloit dire qu'il eust plustost desiré la siebure quarte, ou continuë, que de sçauoir dancier. Le sage & prudent Alphonse Roy d'Arragon, disoit que es pays où les personnes se delectoyent de baller, & dancier publiquement, l'on ne deuoit craindre tels hommes, ny faire cas & estime de leurs Republiques. Le mesme voyant vne Dame baller auecq vne merueilleuse grace & beauté, dict à ceux qui se trouuerent pres de luy, arrestez vous, car voicy la Sybille qui se prepare à rendre, & produire vn merueilleux oracle ; jugeant par là que la dance n'est autre chose qu'une pure folie : estant chose certaine ( comme nous lisons dans les bons Auteurs Grecs & Latins ) que iamais les fameuses Sybilles n'ont prophetisé, ny donné aucun oracle, sinon apres auoir esté agitées, & rauies par la fureur qui les poussoit à sauter comme incensees. Les Prestres d'Egypte auoyent entre autres vices prohibé & defendu l'usage du bal & de la dance, comme estat trespernicieux. Albert Empereur & pere de Ladislaus Roy d'Hongrie, fuyuant l'autorité d'Æneas Syluius, souloit dire, qu'un Prince ne se deuoit iamais seruir de personnes qui sçeuissent dancier, ou baller ; mais bien de celles qui sçauoyent bien aller à la chasse, sauter, courir, & passer vn fleue à nage soudainement. Et notez que lors que ie parlois des sauteurs, que Tibere fit chasser de Rome, il ne faut pas que vous pensiez qu'autres y feussent compris que les maistres exercez en cest art de baller, & de dancier ; d'autant qu'en latin le mouuement du saut, peut aussi bien signifier la personne qui dance, qui balle, ou tournoye, que celle qui saute virilement, fuyuant l'ancienne profession de cest exercice, qui entre les autres estoit compris en la Gymnastique. Que vous diray- ie plus ? sinon que le bal & la

dance, si nous en voulons iuger par les effects de l'experience, doit estre nōmé l'exercice d'une delectable oyfueté, plus vicieux que l'oyfueté mesme, priuée de toute agitation, & mouuement corporel: & les sages estiment que le bal & la dance n'est autre chose qu'une source de tout mal, & de toute meschante operation. Qu'il soit vray, regardez comme les basseleurs, les bouffons, les parasites, & autre telle ordure du peuple s'en sont seruis, & seruent encores en leurs scenes, bancs, & eschafaux comiques, tragiques, & pastoraux, & en presence de quelque personne que ce soit, tant en public, qu'en priuè, seulement pour satisfaire au desir insatiable qu'ils ont d'amasser de l'argent, ou en quelque sorte que ce soit pour remplir leur ventre & leur panse à l'Epicurienne. Et si en temps de paix ny le bal ny la dance ne sont dignes de louange, ie vous laisse à penser si au temps de guerre les soldats dançant, ou ballant, apprendront à bien combattre, à assaillir & vaincre l'ennemy, à donner l'assaut à une ville: & encore que tous ne soient pas propres à sauter, ou à courir, comme vous dites, il ne faut pas inferer pourtant, que l'exercice de baller ou de dancer soit necessaire. Car chacun n'estant si propre à sauter comme nostre tres-cher Archange, ny à courir comme vn Atalante, ou vn Araldus, il y a plusieurs autres honnestes exercices dignes de la maiesté de l'homme, où il se peut exercer virilement, & vertueusement, comme à luisier, tirer le dard, iouer à la longue & courte paume, aller à la chasse, tirer de l'arbaleste, ou de l'arquebuzé, s'exercer à l'escrime, iouer au pallemal, & tels autres louables, & vertueux exercices dignes de la ciuilité morale. Que si ceux qui sont aptes, & propres à sauter & à courir, vouloiēt s'y exercer souuent, ils deuiendroient plus dispos, plus forts & robustes qu'ils ne sont naturellement, non seulement pour cest exercice du saut & de la luisie, mais aussi pour toutes autres exercices du corps.

FERR. Pour suiuez doncques vos discours, ie vous prie, S. Cosme, iusques à la conclusion, comme nous auez promis de faire, car ie m'appërçois bien que vous n'estes encores parueni iusques au dernier periode de ce que vous vous estes proposé à discourir. Et suiuant vostre coustume de proposer

## LE I. DIALOGVE

vos raisons doctement, ie vous supplie de continuer. Et encores qu'il semble que ie n'aye pas tousiours bien pris vos conceptions, si est-ce que j'espere vous faire paroistre que vous n'aurez pas employé vostre temps en vain, pour le fruiſt que ie receuray en fin de vos beaux & doctes discours.

Cos. Or pour vous discourir ſommairement ce qui me vient en l'ame appartenant à ce propos, ie vous dis, que ſuiuât la qualité des couſtumes des lieux, & de la vie des hommes, on peut inferer le bon ou mauuais gouuernement de leurs Republiques, puis que de chacune Republique chacune perſonne en particulier eſt vn membre entier, lequel à la ſemblance des membres dû corps, plus il ſera ſain, fort, & gaillard, mieux ſ'en pourra-on ſeruir (pour eſtre moins ſubiet au vice, ſoit en paix, ſoit en guerre) au corps vniuerſel de ſa Republique. Et tout ainſi que la medecine va recherchant toutes les choſes propres & neceſſaires pour la conſeruation de la ſanté de tous les membres du corps humain, & à le guerir lors qu'il eſt malade, cōme il aduient ſouuent que le Medecin pour ſauuer le principal du corps, luy coupe, ou bruſle maintenant vn doigt, ore vne main, quelquefois vn pied: Ainſi la vraye iuſtice, conſiderée ſuyuant les raisons de la Philoſophie morale, ſert d'vne tref-neceſſaire, & profitable medecine aux Republiques bien gouuernees, conſervant, & rendant à chacun ce qui luy appartient, chaſtiant & puniſſant les meſchans pour conſeruer les gens de bien. Ordonnant des peines ſelon la qualité des fautes, & delits. Le ſupplice des malſaicteurs eſt ou la corde, ou l'eſpee, ou le feu, & en fait-on ainſi que d'vn membre gaſté, corrompu, & pourry, qui de iour à autre rend la Republique mal ſaine, & eſt occaſion qu'à ſon exemple les autres la vont gaſtant & corrompant. L'impunité des crimes fait que les meſchans continuent à mal faire, tant que ſ'en enſuit finalement la totale ruine & deſtruction de toute la Republique. Et tout ainſi que la medecine va conſiderant, & ordonnant toutes les choſes qui luy ſemblent plus neceſſaires pour ſecourir non ſeulement les femmes à pouoir bien & heureuſement enſanter: mais auſſi pour enſeigner les peres & meres à bien eſleuer leurs enfans, & les nourrir, comme il eſt conuenable, ſelon leurs moÿens, &

qualité, afin que peu à peu ils aillent croissans, moins defectueux, & plus forts par la bonne nourriture qui leur sera donnée, iusques à ce qu'ils soient arriuez en l'aage, auquel avec iugement & discretion ils se puissent d'eux mesmes gouverner, maintenir, & conseruer, contre l'iniure de ceux qui leur voudroient rauer ce qui leur appartient. Ainsi la Philosophie morale de son costé va recherchant avec raisons ciuiles & politiques tous les moyens qu'elle peut, pour faire que les peres & meres puissent non seulement esleuer leurs enfans à la vertu, mais aussi leur laisser des moyens pour paroistre entre les hommes, & seruir à la Republique. Vn sage Senat entre autres choses appartenantes à son gouvernement, doit ordonner, iuger, & faire discretion des exercices qui doyuent estre admis, & receus en la Republique, pour y mettre tel ordre que toutes choses soient regies & gouvernees comme il appartient; Que tous oyseux & vagabons en soyent chasséz, n'estant raisonnable que telles gens soient mis au nombre de ceux qui demeurent en vne Republique bien ordonnee. Mais au iourd'huy à la honte, & deshonneur de nostre siecle, il ne se voit que trop de tels faineants, qui viuent à la suëur & aux despens d'autrui. Nous lisons qu'anciennement ce vice d'oisiueté estoit si peu commun, qu'un iour quelqu'un voulant enuoyer vne lettre de Rome à Athenes, ne peut trouuer vn seul homme de loisir qui la voulust porter, quelque argent qu'il offrist de donner. Suyuant doncques la forme qui nous a esté laissée par nos Ancestres de la profession Gymnastique, prenons garde que nous ne soyons de ceux qui ne sçachans que faire, s'addonnent aux ieux de carte, de dez, & de la paume, non pas pour passer le temps, suyuant la coustume d'une honneste recreation, mais seulement pour gagner l'argent, & le bien d'autrui, perdant en fin & les vns & les autres miserablement leur temps, & esteignants peu à peu par ce moyen la bonté de leurs mœurs, de leur vie, & bonne conuersation. Que diray-ie plus? i'ay veu en quelques villes, où l'on permet choses que ie n'eusse iamais creües, que plusieurs pouuoient tenir en leurs maisons des ieux publics de cartes, & de dez, & toutes autres sortes de ieux de hazard, sans aucune peine, ny reprehension: & puis les magistrats s'es-

## LE I. DIALOGVE

merueillent, & toutes autres sortes de personnes s'estonnent de ce que Dieu par vn iuste iugemēt les visite de la guerre, de la peste, & de la famine, alors ils lamentent & reiettent la faute sur les vices & corruptions du siècle. C'est vne chose tres-certaine, qu'ou les loix ne sont point obseruees & entretenues, la iustice point gardee, que là toutes dissolutions & meschancetez ont la vogue; Il faut que non seulement il y ait loy, & ordonnance publique pour les crimes, & delicts, mais aussi pour les autres choses de la police, comme des exercices qui doyuent estre obseruez en vne Republique bien policee, afin que ieunes & vieux, de quelque estat, qualité, & condition qu'ils soyent, ayants quelque relasche de leurs labours, puissent se recreer, & passer le temps honnestement. Mais d'autant que le mal croist plustost que le bien, le vice que la vertu, & que chacun se vent anjourd'huy gouverner à sa volonté, Il est certain que les villes & Republiques, où cela se pratique ainsi, iront tousiours de mal en pis, iusques à tant que ils soyent paruenus au comble de leur ruyne, & perdition totale. Les Romains au temps de leur meilleur gouvernement auoyent institué, & estably vn Magistrat, qu'ils auoyent destiné seulement pour prendre garde, corriger, reigler, discerner, & iuger des ieux, esbats, plaisirs, & passer temps des citoyens de Rome, & de ceux qui y habitoyent, comme aussi il estoit ordonné aux festes, & banquets, à fin qu'en tout & par tout vn bon ordre fust obserué & gardé, & que chacun se tint aux bornes du deuoir de la modestie ciuile, & politique, ne se destournant des vertus qui sont suyuant la contemplation de la Philosophie morale, tousiours requises & necessaires pour bien viure. Et comme tel Magistrat censeur des bonnes mœurs, & de la vie d'vn chacun, qui en latin estoit nommé, *Tribunus voluptatum*, seruoit avec quelques autres qu'il s'adioignoit, pour la cōseruation de la paix, & d'vn bon ordre entre les concitoyens; Aussi en temps de guerre y en auoit il d'autres, que l'on appelloit *Tribuni militum*, qui estoient deputez, & choisis d'entre les plus sages, & experimentez, pour cognoistre & iuger, si la nature, l'age, & la dispositiō de ceux qui se presentoiēt pour aller à la guerre, estoient aptes & propres, ou non, pour faire qu'ils

s'y trouuaſſent touſiours bien en ordre , ſuyuant la diſcipline militaire, avec toutes les armes, & autre equipage requis & neceſſaire pour le ſeruite de la guerre; & ſur toute autre choſe ils reigloyent les exercices de tous les ſoldats, tant en general que en particulier, ne permettant qu'ils paſſaſſent iamais leur tēps en ieux prohibez & defendus pour gagner l'argent de leurs compagnons; mais s'exerçoient à jeux honneſtes & de plaſir. Que ſi cela eſtoit à preſent obſerué & gardé entre les Chreſtiens, nos ſoldats pour certain ſçauroient mieux, ( à la façon des Anciens ) le meſtier de manier les armes qu'ils ne ſont, joüants aux dez, & aux cartes, blaſphemants le nom de Dieu. Eſtant du tout choſe impoſſible que ceux qui n'ont point eſté nourris aux vertueux & louables exercices, ſçaſſent iamais bien ſeruir, ſoit en paix, ſoit en guerre, à la Republique; ny que ils ayent telle dextérité, & iugement aux affaires, que ceux qui s'y ſont accreüſ, & eſleuez; ny auſſi l'addreſſe requiſe pour vaincre l'ennemy, & ſe defendre lors qu'ils ſeront aſſaillis; d'autant que le fondement principal de la victoire n'eſt ſans doute autre choſe que la force, la valeur, l'experience, & addroicte diſpoſition du ſoldat, accompagné de conſeil & de prudence, de ſçaſſoir, & de iugement pour ſe pouuoir bien conduire, & fidellement exercer la charge qui luy a eſté commiſe: Mais principalement le capitaine doit eſtre doiüé, & enrichy de ces belles vertus, pour ſçaſſoir vaillamment ore attaquer vne place, ore en defendre vne autre, & quelquefois combattre l'ennemy à la campagne: & à la verité ces honneſtes exercices, dont j'ay diſcouru cy-deſſus, y ſeruent de beaucoup. Quant aux choſes qui peuuent conuenir & appartenir au corps, il n'y a doute que plus la Republique ſera ſaine, par la bonne diſpoſition de ſes membres, plus elle ſera eſloignée du vice, mieux ſ'en trouuera elle diſpoſée, & mieux ſerui. C'eſt pourquoy les Anciens ont eſté ſi curieux d'auoir des exercices publics, & y propoſer le prix, afin que les ieunes gens, & autres ſ'eueruaſſent chacun à qui mieux mieux de bien faire, & vaincre leurs compagnons; defendans, ſuyuant les occasions qui ſe preſentoient, les exercices qui ſembloyent vicieux, ou moins neceſſaires, comme le bal & la dance, & autres tels eſbats, & paſſetemps, deſquels

## LE I. DIALOGVE

nous auons discoursu cy-deuant selon leurs merites & dignitez. Et pour ceste seule consideration les Egyptiens ne permettoient iamais que leurs enfans mangeassent, que premier ils n'eussent exercé leur corps à la course, au saut, à la luitte, ou à quelque autre honneste exercice, afin que croissants de ceste maniere, ils deuinsent forts, robustes, adroicts, legiers, sains & dispos pour le seruice & accroissement de leur Republique. Ie vous alleguerois beaucoup d'exemples à ce propos, n'estoit que ie crains estre ennuyeux à toute ceste noble compagnie, & à vous aussi, S. Ferrand; Toutesfois vous m'auiez promis de prendre plaisir à la continuation de ce discours. Avec vostre permission donc, & de ceste vertueuse assistance, ie vous proposeray ce grand Empereur Marc Aurele pour exemple, lequel auoit les exercices de la course, du saut, & de la luitte en singuliere recommandation, & s'y trouuoit bien souuent en personne, louant & carressant ceux qui auoyent bien fait en l'un ou l'autre exercice, les gratifiant tousiours de quelques presents, pour leur donner courage de continuer à bien faire. Que diray-je de Cæsar, lequel, outre beaucoup de belles parties qui estoient en luy, s'est rendu admirable en ces exercices, sautant avec telle disposition, tantost vn fossé, maintenant vne haye, ore montant habilement sur vne muraille à l'encontre de son ennemy, ore courant avec telle vitesse aux lieux où se donnoit l'assaut, qu'il a esté estimé inimitable, loué, aymé, respecté & honoré de toute son armee, voire de tout le monde. Que dirons nous semblablement d'un Maximin auant qu'il fust Empereur, combatant sous Alexandre, qui tiroit de cinq en cinq iours hors du camp son armee tout en armes, pour faire exercer les soldats au saut, à la course, à la luitte & à l'escrime, suyuant l'ancienne coustume de la guerre, y assistant luy mesme le premier; & encore qu'il fust desjà vieil, si est-ce pourtant qu'il monstroient vne telle disposition & dexterité, qu'il estoit en exemple à ses soldats de l'ensuiure? Que dirons nous aussi d'un Cyrus, d'un Alexandre le Grand, d'un Epaminondas, d'un Themistocles, d'un Pyrrhus, d'un Agesilaus, & d'une infinité d'autres grands Seigneurs & Capitaines? Certes ils ont tous tant fait de cas de ces exercices, que pour se rendre plus forts & plus adroicts,



adroits, ils les ont souuent mis en pratique. Que dirons nous encore de ce Prince non moins fameux que vaillant, bien que d'ailleurs il ayt esté le plus superbe Tyran de la terre, lequel en ses armes s'attribuoit le titre d'estre l'espouuante du monde, & le fleau de Dieu? Il a fait neantmoins cognoistre qu'il aimoit & prisoit fort ces beaux exercices, & principalement le saut & la course, prenant vn singulier plaisir d'y employer quelques heures du iour, mesmement quand il se vouloit preparer à la guerre, pour se rendre plus prompt, plus fort & vigoureux lors qu'il faudroit venir aux mains. Ce qu'il mit encore plus en pratique apres qu'il eut vaincu la ville d'Aquilee, d'où s'en retournant, fit rencontre d'une grande compagnie d'hommes lestes qui luy venoyent au deuant pour luy faire la reuerence, sautelants & voltigeants avec les espees en main, faisants entre eux mille vire-voustes, avec vne infinité de beaux combats, qui monstroyent, (bien que ce fussent personnes de fort basse condition,) qu'ils estoient bien appris, & auoyent fort pratiqué toutes sortes de beaux & honnestes exercices. Atila admirant & leur force & leur dexterité, les fit en sa presence tous bien armer, & puis luy mesme descendant de cheual, se tournant vers eux leur dict, Puis que vous vous estes monstrez si agiles & dispos, sautez sur ces cheuaux comme ie fais, estât armé, sans aucun ayde; voyons aussi si quelqu'un de vous me pourra vaincre à la course, lors ie vous promets vous faire à tous vn fort beau present. S'estants doncques mis en deuoir de courir, & ayants fort bien fait, les loia & gratifia des presents qu'il leur auoit promis, & non content de cela, les retint à son seruice, esperant d'en faire de fort bons soldats, & des meilleurs qui eussent iamais combatu sous ses enseignes. Et à ce propos, n'est vray semblable ce que Brodeus dict en ses Epigrammes, que la fameuse Medec rendit les corps des hommes forts & robustes par le moyen de ses charmes & incantations, mais bien par le moyen des exercices, comme quelques vns racontent; & les plus grands capitaines se sont tousiours delectez & pris fort grand plaisir d'employer le temps à telles choses, comme estants propres pour les rendre & plus sains, plus agiles & dispos pour l'exécution de toutes sortes de belles & vertueuses

## LE I. DIALOGVE

entreprises. Et mesmes les plus anciens conducteurs des peuples barbares s'y sont ainsi gouvernez, & en ont vsé cōme d'un regime de santé, pour estre plus forts & adroits à quelque chose que ce soit : Au cōtraire ils ont tousiours mesprisé le bal & la dance, comme indignes d'un cœur braue & genereux. Et faudroit principalement que tous les Gentils-hommes de nostre temps y prissent plaisir, & en füssent studieux, & non de cest exercice effeminé du bal & de la dance, qui rent l'ame & le corps vils, abiects, & pusillanimes.

FERR. Encores que tous ces Gentils-hommes & moy ayons pris vn singulier plaisir à vous ouyr discourir, S. Cosme, si est-ce toutesfois que nous ne sommes entierement satisfaits & contents, pour ce qu'il nous semble que vous n'avez assez illustré & orné d'exemples, & de tesmoignages vos discours, pour vne parfaite preuue des exercices que vous avez si dignement recommandez, au blasme, à la honte & confusion du bal & de la dance. Ie m'assure que iamais personne ne se fust ennuyé, tant vos propos sont agreables, s'il vous eust pleu de continuer ce que vous auiez si bien & heureusement commencé: mais ie ne veux maintenant vous en importuner d'auantage. Or auant que ie commence à deduire mes raisons touchant la defense que i'ay entreprise du bal & de la dance, ie desire sçauoir de vous, afin que ie ne m'en oublie, qui est celuy que vous avez cy-dessus nommé Araldus, au discours que vous avez fait de la course, lequel selon mon iugement vous avez accouplé à Atalante. Il ne me souuient pas auoir iamais leu, ny entendu vn tel nom.

COS. L'histoire, ou fable d'Atalante, est si notoire, qu'il n'est jà besoin d'en faire plus long discours. Or encores que par la pause que i'ay faite doucement en me taisant vous ayez eu occasion de penser que i'eusse du tout finy mon propos; si est-ce pourtant que ce que i'en ay fait n'a esté que pour me remettre en memoire tous les poincts que ie m'estois proposé à discourir: mais puis que vous m'en dispensez, ie m'y accorde pour ceste heure, attendant en bonne deuotion de jouyr de vos beaux discours touchant vos exercices du bal & de la dance: Toutesfois si veux-je satisfaire à vostre demande, &

vous faire entendre qui fut Araldus. Araldus doncques, suyuant ce qu'en escriit vn Autheur digne de foy, fut homme de fort petite stature, & neantmoins si dispos, legier & agile, que ayant deux bastons sous ses deux esselles, il s'y appuyoit en telle sorte, que prenant l'un & l'autre par le milieu de chacune main, courant de saut en saut, & s'eslançant continuellement, s'embloit qu'il volast, auançant alternatiuement ses deux bastons & ses deux pieds, à la façon d'un animal à quatre pieds; & en ceste sorte, bien qu'il semble incroyable, surpassoit la course d'un cheual, quelque prompt & agile qu'il fust; & cōtinuoit en cest exercice iusques à ce qu'il fust paruenue au but prefix, & ordonné, sans iamais faillir de deuaner le cheual, bien qu'il fust de la race de Bucephale, coursier d'Alexandre.

FERR. Ie ne puis pas bien comprendre comment cela se peut faire, Toutesfois pour ne nous attacher trop à ces curiositez, passons outre. La signification du mot latin *Saltator*, & en langue vulgaire sauteur, dont vous auez discouru cy-dessus avec beaucoup d'affection, m'estant cognuë, ie n'auray pas beaucoup de peine suyuant ce mot de vous monstrier que i'ay eu occasion d'entreprendre la defense du bal & de la dance; & de ceux aussi qui y prennent plaisir. Il faut donc remarquer, que de ce verbe latin *Salto*, *Salta*, qui proprement pris signifie baler, fut formé ce nō *Saltator*, qui signifie baladin; & non pas du verbe *Salio*, *Salis*, lequel emporte la vraye signification de sauter proprement, comme fait fort bien nostre S. Archange; & bien que plusieurs s'en seruent souuent sans prendre garde de si pres à ceste differente propriété; si ne me souuient-il point auoir leu qu'aucun aye vsé du mot *Saltatio*, pour denoter le bal ou la dance. Et partant parlant de la signification du saut, suyuant le mot latin, il me semblé que ie dois faire la diuision qui s'ensuit, en quatre especes distinctes & separees l'une de l'autre. La premiere & principale sera celle de l'Art & exercice de nostre Archange, par le moyen de laquelle on ne peut apprendre ny remarquer autre chose qu'une disposition, & force acquise par ces exercices, pour rendre le corps plus agile & dispos, & en temps de paix, & en temps de guerre.

## LE I. DIALOGVE

**Cos.** Mon intention a esté de parler de ceste premiere espece, (& non des autres que vous direz cy apres,) qui est de l'art & exercices, & en voudrois desjà entendre parler, ensemble des sauts que les sieurs Pin & Baptiste nous ont promis faire voir, afin que toute ceste noble compagnie ayt occasion de se contenter, & ne se repentir du temps qu'elle aura employé à attēdre la veuē de ces exercices. Le S. Archange d'autre costé viendra avec vne telle disposition & dextérité, que chacun l'aura en admiration, estant rauy de l'agilité & promptitude de laquelle il vsera en ces beaux sauts, avec vne perfection telle que l'on pourroit desirer en vn personnage de tel merite.

**FERRAND.** Ne doutez point que vous n'entendiez bien tost, & tous ces Gentils-hommes aussi ceste partie, & tout ce que l'on en pourroit desirer, d'autant que le sieur Pin ne peut pas beaucoup tarder à venir, s'en estant allé pour se vestir d'habits propres, & ayez pour sauter.

**Cos.** Il est vray; mais ie crains que le iour s'abbaisant, ne nous defaille.

**FERR.** Gaignons doncques le temps. Ie ne puis souffrir, S. Cosme, que vos raisons foyent si bien receuēs, & les miennes mesprisées touchant la louange du bal & de la dance que vous auez tant blasmee & denigree, & quasi enuoyee au plus profond d'enfer. A la verité ie ne pourrois pas permettre que vous eussiez tant de prise sur moy que de me rendre muēt en vn champ si ample que le mien, & en si fertile moisson. Ie dy doncques que le bal & la dance meritent pour le moins autant de loüange, selon leur qualité, que les autres exercices que vous auez tant exaltez, & dont vous auez cy-dessus discouru, comme i'espere en brief vous faire voir, distinguant les susdites significations de leurs noms & verbes.

**Cos.** Ie vous prie, S. Ferrand, ne vous tourmentez point à deffendre ceste dance, y perdant & vostre temps & vostre peine, ce qu'en fin ne vous seruira de rien. Ie ne sçay à quel propos, voulant cōtre dire les raisons Politiques des Republiques bien gouuernees, vous vous opposez mēsmes à l'autorité & preceptes de vostre Religion, non à autre fin que pour fauoriser

vn si mauuais party. Ne sçauéz vous pas que saint Ambroise, & saint Augustin contre Petilian prouuent que le bal & la dance estoient choses infames & dissoluës, & ( au temps que l'Eglise estoit bien gouuernee) prohibez & defendus? Le mesme ne dit-il pas en l'exposition du Psalme trête troisieme, que c'est vn peché beaucoup moindre d'ouurir & labourer la terre les iours de feste, que d'ancer ou baler? Il me souuient aussi que saint Iean Chrysostome en parle avec vne grande vehemence en ses Homelies; mesmes saint Basile en vne sienne predication qu'il fait contre les yuongnes, contre les chansons impudiques, contre les balets, & toute autre espee de dance, les blasme fort, & s'escrie à l'encontre de ceux qui y perdent leur temps. Et si cela ne vous suffit pour vous monstrier qu'avec grande raison i'ay en hayne vn tel exercice, sçachez qu'il ne se trouue mesme vn seul Concile, où les dances n'ayent esté bannies du milieu des Republiques bien ordonnees. Tous les plus grâds personnages sont demourez d'accord qu'elles deuoyent estre defenduës, comme indignes d'estre receuës de gens vertueux. Il y a plus, que les loix imperiales les ont du tout prohibees. Lisez les Ordōnances des Rois de France, vous trouuerez que plusieurs Rois par le conseil de leurs Senateurs ont, entre plusieurs jeux viciex, condamné le passetemps du bal & de la dance. Que diray-je plus? Dieu mesmes par la bouche de son Prophete Esaië reprend & condamne l'vsage & coustume de jouer de la harpe, du tambour, de la cornemuse, & de la fluste aux nopces & banquets, & toute autre espee de son, de chant, & de dance, au lieu où les personnes se sont assemblees pour faire feste.

FERR. Mais s'il vous plaist de m'entendre, S. Cosme, ie vous feray peu à peu cognoistre que l'art & exercice de la dance pour toutes vos raisons ne laissera de subsister avec honneur & louange, & mesmes avec reputation de ceux qui en font plus de cas que vous. Toutesfois si vous voulez que pour vous faire plaisir i'en en die plus mot, ie vous contenteray volontiers en cela, pourueu que le bal & la dance demeurent enuers ces Gentils-hommes en tel titre, honneur, & reputation qu'un si bel exercice merite, n'y en ayant point de plus

## LE I. DIALOGVE

digne, ny de plus recommandable en toute la Gymnastique.

**Cos.** Pourſuiuez hardiment voſtre diſcours, S. Ferrand, puis que vous penſez ſi heureuſement venir à bout de vos intentions. Car ie n'ay iamais deſiré, & ne voudroy pas que pour mon reſpect on quittast en quelque ſorte que ce fuſt la deſence de ce qui concerne le public. Ie poſtpoſeray touſiours mon particulier, ſi vous penſez obtenir la victoire de ceſte braue cōtention.

**FERR.** Ie diray que ſi vous conſiderez ſimplement la dance telle qu'elle eſt en ſoy, elle eſt indifferente, ne bonne, ne mauuaife d'elle-meſme, & par conſequent ne merite, ne blaſme, ne louiange; & veux que cela ſoit le principal fondement de mes arguments & conſluſions que i'en feray enſuiure, avec vne preuue euidente & neceſſaire de ce que vous ne croyez pas (ou peut eſtre ſaignez de ne croire pas) pour voir ſi ie ſçauray bien deſendre vne telle cauſe. Or pour venir auant toute autre choſe à la difference de l'vniuerſe ſignification de ce verbe Latin, *Salto, ſaltas*, & du nom qui en prouient, *Saltatio*, duquel ſeul, & non du verbe *ſalio* il faut noter que ſont les trois ſuiuantes eſpeces du ſaut, dont ie vous ay deſia declaré la premiere. Quant à la ſeconde, il me ſemble qu'elle ne ſe peut veritablement rapporter au ſaut, veu que le bal ny la dance, ne ſe peuuent proprement appeller ſauts, encores qu'ils ne ſoyent ſans quelque participation des ſauts, ſoyent grands, petits, ou moyens; pour cela on ne doit inferer que le balladin ſoit vn ſimple fauteur, puis que non ſeulement il differe d'avec luy de façon de faire, mais auſſi d'inuention.

**COSME.** A ce que ie puis coniecturer, & iuger par vos paroles, vous voulez monſtrer qu'encores que le mot Latin *Saltatio*, ſignifie l'acte du ſaut, & action de ſauter; neantmoins que ce tant beau & diuers ſautellement ſoit pluſtoſt vn vray, & pur ſaut, & des Latins pris & entendu ſoubs la ſignification del' Art du bal & de la dance: Car ainſi vous eſpluchez les mots en Grammairien, tant vous eſtes ententif à la deſence de voſtre bon party: mais que ſenſuit-il pour cela, & qu'en voulez vous inferer?

FER. Si vous & moy n'auons appris la signification des choses de la Grammaire, nous n'auons la cognoissance de la Logicque, ny de la Poësie, ny de la Rhetorique, & encore moins de toutes les autres parties de la Philosophie. Car encore qu'on trouue la plus grande partie des sciences escrites, & imprimees en langue vulgaire, si est-ce toutesfois que les eserits des Anciens Autheurs Grecs & Latins ne peuent pas estre bien interpretez, si les mots ne nous sont familiers par l'explication de la Grammaire, & par la pratique & v'sance que nous auons des bons & plus corrects Autheurs. Et telle est l'importance des choses qui semblent estre Grammaticiennes à ceux qui en ont la cognoissance. Ce que Cæsar n'a point mesprisé, ayant escrit vn liure des Analogies; & Marc Varron vn de la Grammaire. Nigidius, & mille autres doctes personages y ont mis la main. Et de nostre temps Erasme, Budée, Turnebe, & entre les autres ce grand Iule Cæsar Scaliger, lequel n'est en moindre reputation auourd'huy entre les plus doctes, qu'estoient anciennement Platon, & Aristote entre les Philosophes.

Cos. Je ne puis faire que ie ne me resiouysse grandement de vous auoir ouy si honorablement parler du tres-docte Scaliger, & selon son merite. Certes ie croy que si l'on auoit toutes ses œuures, elles seroyent plus que suffisantes, pour donner la vraye & naifue interpretation de ce grand Aristote, & nous auons l'entiere & parfaite cognoissance de la Philosophie, sans auoir plus besoin de tant de diuerses interpretations. Et par ceste conclusion ie vous prie de croire que ie ne mesprisé point l'interpretation de la Grammaire Grecque & Latine, pour auoir la vraye signification, & propriété des paroles.

FERR. Il mesouuiet auoir ouy dire au docte Carpentier que si tous les liures composez par Scaliger estoient imprimez, qu'il ne se soucieroit pas quand toutes les œuures d'Aristote seroient perduës, d'autant qu'il s'asseuroit que sans elles, moyennant celles-cy, l'on pourroit auoir l'entiere, & parfaite cognoissance de la Philosophie. Et faut noter que pour auoir vne science plus folide, Scaliger ne mit point son esprit à l'estude des lettres qu'estant ia assez aagé, & apres auoir esté long temps à la guerre, & ne luy manqua en fin autre chose qu'une

## LE I. DIALOGVE

fauorable fortune d'un Alexandre le Grand. Mais retournant  
 à nostre propos, ie dis que l'art de la dance & du bal, suiuant les  
 termes & preceptes de la modestie & honnesteté ciuile que  
 l'on recherche entre les vertueuses & louables recreations  
 passant le temps ioyeusement, est la premiere des trois susdi-  
 tes especes comprises sous la generalité du nom *Saltatio*, ou  
 du saut. La qualité & vsage de ceste espece est celle que i'entends  
 louer, & defendre contre toutes les calomnies de ceux, qui com-  
 me vous en sont si grands ennemis, d'autant qu'on ne trouuera  
 iamais que l'exercice, & pratique de ceste-cy que ie mets pour  
 vne espece, suiuant la generale signification de *Salto, saltas*, pris  
 mesme pour signifier le viril exercice de sauter sans chançons me-  
 lodieuses, ou musicales, & pour mesme signification que denote  
 simplement ce verbe Latin *Salio*, aye iamais esté blasmee; Ce  
 qui ne se trouuera iamais, & ne sçauoit-on prouuer qu'elle  
 aye esté defendue ny par l'Escripture sainte, ny bannie d'aucu-  
 ne Republique bien gouuernee, si ce n'est lors qu'il y en a eu  
 qui se sont plongez en vne profonde mer de dissolutions,  
 transgressans par leurs gestes lascifs & deshonestes les bornes  
 & limites de l'honesteté & modestie ciuile; laquelle, comme  
 vn ardent Soleil, doit faire luire ses rayons dessus toutes nos a-  
 ctions, & principalement par celles qui sont espiées de l'œil  
 d'un feuer & critique censeur; & m'assure que si vous auez  
 iamais veu le comportement d'un maistre baladin, que vous  
 n'aurez rien remarqué en son escole qui ne semble directemēt  
 viser au but de la vertu, & vraye modestie, blasmant mesmes, &  
 reprenant avec beaucoup de seuerité celuy qui par ignorance,  
 ou bien d'une mauuaise inclination branle incessamment la  
 teste avec fort mauuaise grace, & se change en plusieurs  
 formes, comme vn Prothee, tantost tournant les yeux en la te-  
 ste, vagabonds deçà & delà, tantost ployant trop le corps, sans  
 aucune mesure de pas, ou s'eslance trop, panchant & inclinant  
 plus d'un costé que d'autre, & autres tels gestes inciuils, & des-  
 honestes. La troisieme espece se doit entendre de la significa-  
 tion generale de ce verbe, *salto, saltas*, soit du bal, soit de la dan-  
 ce, qui est accompagnée des mouuements & gestes du visage,  
 & autres membres du corps, & qui imite la parole, & le main-  
 tien



tien non pas seulement des hommes, & des femmes, mais aussi des animaux irraisonnables, ce que les Latins ont remarqué avec beaucoup plus de propriété, & efficace par ce verbe *tripudio, tripudias*, que vous mesmes auez allegué parlant de Platon; & c'est ceste espece du bal & de dance que toutes les Republiques, dites vous, ont blasmée, & condamnée, & quelquesfois bannie & reputée vile, infame, & indigne des hōmes vertueux. Il y a vne autre espece de dance que vous ne devez pas reprouuer & condamner qui s'appelle la volte, pource qu'elle est accompagnée de mille gentilleses & passetemps. Je ne dy pas qu'il n'y ait quelques-vns qui par faute d'auoir la vraye connoissance de cest art, font mille singeries, ressemblans plustost aux basteleurs & bouffons qu'à des balladins; & ce defaut procede d'ignorance: il ne faut pas inferer pourtant que s'il y a quelqu'un qui en abuse, que l'art en soit à blâmer: il s'en ensuiuroit de mesme de tous les arts, & sciences, si cela auoit lieu. Que si vous auez quelquefois veu vn parfait balladin, comme il sçait bien composer ses actions, & obseruer les reigles & mesures, avec si bōne grace que ie m'assure q̄ vous chāgeriez vostre haine en vne parfaite amitié. Je vous diray qu'il y a des dances qui ont esté tellemēt corrompuës par gēs vicieux, & ignorans qu'elles ressemblent plustost à des farces, qu'à des ballets artistemēt inuētez. Les gestes & mouuemēts, avec des agitatiōs impetueuses, en font desagréables, contrefaisans tantost vn acte & tantost vn autre, avec mille autres singeries qu'il n'est point besoin de représenter icy. Et de ceste dance nasquit la race des bouffons, des basteleurs, tant aux tragedies que comedies, & les Archimommons, qui estoient les Princes & Capitaines de tous les basteleurs, & autres telles personnes de ce mestier.

Cos. Il me semble que vous allez confondant pour louer le bal & la dance ceste profession avec les personnes, qui sont nécessaires pour la Poësie des comedies, tragedies, & autres telles representations; & ne sçay pas si vous auez pris garde que les mommons, farceurs, & basteleurs n'ont que faire ny du bal, ny de la dāce, pour bien représenter leurs personages, ny aussi les autres que vous auez allegué.

## LE I. DIALOGVE

FERR. Il vous semble donc que ie les confonde, S. Comme, mais plustost ie les expose pour ne tomber en equivoque, & ne sçay pourquoy vous auez ceste opinion. Partant ie vous prie d'en iuger autrement; D'autant qu'ayant mis en auant quatre especes de fauter: La premiere qui sert seulement à la disposition de la force & valeur des hommes, la seconde & la tierce d'autant que les Latins les appelloient communément d'un mesme nom *saltatores*, & les François *sauteurs*, j'ay voulu par mon discours exposer ceste grande difference & diuersité qui se trouue en la susdite seconde & tierce espece du faut, suiuant la distinction que vous auez entenduë. La quatriesme estoit l'agilité, dextérité & bonne grace qui s'obseruoit en ces exercices. Que si les mommons & farceurs peuuent sans la dance & le bal jouer leurs personages, si ne le peuuent ils entierement faire, sans se seruir des actes, gestes, mouuements & agitations necessaires, pour representer la partie de leur personnage; & quand ainsi seroit, il ne s'ensuiuroit pour cela que le bal ou la dance ne fust necessaire au chœur comique, ou tragicque des anciens theatres, comme mesmes on void entre les modernes, aux actions, & mouuements desquels ie ne veux pas que l'on pense quel'honneste exercice du bal, & de la dance participe nullement, que ie veux tousiours maintenir & defendre enuers & contre tous. Bien vous confessé-ie, (cōme j'ay dit cy dessus,) qu'il y en a plusieurs, voire des Gentils-hommes & Dämoyselles, qui n'obseruent pas tousiours les mesmes gestes & mouuements que ceux qui sont maistres de l'art, & quelquesfois font de tels pas de clerc, avec si peu de mesure, & de proportion, que l'on ne peut dire qu'ils ne soyent dignes de blasme, & reprehension, eu esgard, qu'entant qu'en eux est, ils rendent l'ornement, & gentillesse du bal & de la dance infame, qui ne peut apporter que scandale au prochain.

COS. O combien j'ay agreable que vous estes venu aux termes de ne pouuoir plus nier que l'exercice du bal & de la dance ne soit digne de blasme & reprehension, puis qu'il est impossible, suiuant les raisons que vous auez alleguees, que par tel moyen les hommes, & les femmes ne tombent en quelque peché, erreur, ou scandale, comme vous auez fort bien remar-

qué, & ne sçay à quel propos, ny comment vous vous estes laissé persuader que le bal ne soit vertueux, ny vicieux; veu qu'il en prent du bal & de la dance comme des charbons ardents que quelqu'un auroit manié & mis dans son sein, voire dans son cœur, ne pouuant autrement faire qu'il n'en soit taché, noircy, & charbonné, mais plustost brûlé; ainsi que les hommes & femmes qui dancent s'eschauffent peu à peu iusques à tant qu'ils viennent à s'embrazer.

FERR. Il est certain que vous estes ennemy capital du bal, & de la dance: mais ie m'estonne encore plus de vous par- adventure, que vous ne sçauriez iamais faire de moy, ayant bié osé dire que la dance, & le bal sont occasion de tous les vices, estant chose asseurée que vous n'ignorez point la difference qui est entre l'essence & le pouuoir: l'essence, dis-ie, d'autât que le bal & la dance ne sont pas occasion du vice, mais ils en peu- uent estre l'occasion selon le suiet vicieux qui se peut presenter. Comme le vin qui n'est pas la vraye occasion de l'yurongne- rie, mais bien vn vray moyen, & subiet de deuenir yurongne si nous en abusons, la cause de mal faire naissant de nous-mes- mes, nous laissant surmonter par nos sens & appetits charnels plustost irraisonnables qu'autrement. Que si le vin estoit la cau- se de nous enyurer, vn chacun de ceux qui en boient seroit y- urongne, & encore qu'il ne le soit pas proprement, si est-ce que il le peut estre, en esgard à la vie dissoluë, vicieuse & corrom- puë de celuy qui boit. Tous pour ceste raison ne sont pas yures ny dominez par le vin: & si ie vous ay simplement dit que le bal, ny la dance ne sont pas dignes de louange, ny de blas- me; ie vous laisse à penser si ie prens ceste raison pour tout ce qui appartient au bal & à la dance, si ie la dois prou- uer, & vous la faire pour telle accepter; & afin que ie vien- ne à conclure ce propos, ie dis que si l'art, ou exercice du bal, & de la dance estoit suyuant vostre opinion vicieux & cause de tant de vices que vous dites, le Royal Prophete Dauid n'auroit pas sauté, dancé, balé, chanté, ny ioüi des instruments en pre- sence du peuple d'Israël, pour honorer l'Arche de Dieu deuât laquelle il estoit, & moins auroit esté l'exercice du bal & de la dance receu, ny mis entre les mysteres & honneurs des Reli-

## LE I. DIALOGVE

gions: Aussi ne peut-on douter que les Rois anciens de la Toscane n'ayent comme toutes les autres prouinces, fait observer la maniere de baler & de dancer en l'honneur de leurs Dieux, & de la doctrine & sainte Escriture des Hebreux; puis que comme escrit Valere lesdits Rois de Toscane assurent qu'il n'estoit pas licite qu'il y eust en l'hōme aucune partie qui ne participast de la religion, & de l'honneur qu'on rend à Dieu, & que le chant estoit celuy qui appartient à l'esprit; le faut, la dance, & le bal au mouuement du corps; & que pour ceste raison l'un & l'autre estoit necessaire au seruice diuin. Je ne croy point que pour autre raison ce grand Prophete Royal Dauid, duquel Dieu mesme parlant, se dit auoir trouué vn hōme selon son cœur; aye, comme j'ay dit, dancé, & dit à ceux qui le regardoient, ie dance, & assurement ie sauteray, & chanteray en l'honneur de la diuine Maiesté, & sa tres-sainte Arche d'Alliance, & mes yeux luy rendront tousiours humilité. Parquoy vous ne deuez vous esmerueiller de ce que j'ay dit, que le bal, & la dance simplement considerez ne sont ny vicieux, ny vertueux, ny par consequent dignes de louange, ny de blafme, ce qui peut aduenir vñ dignement de l'un ou de l'autre: mais non pas que de leur simple nature ils en soyent dignes: Comme par exemple la passion des hommes en general prise & consideree simplement comme passion, suyuant la nature, on ne peut dire qu'elle soit naturellement bonne ou mauuaise; d'autant qu'elle peut estre quelquefois bonne, & quelquefois mauuaise, & par consequent vicieuse, ou vertueuse, selon la qualité, conception, & intention, qu'a produit ladicte passion: & n'est besoin que vous compariez les charbons ardens à l'exercice de la dance, puis qu'ils sont contraires en signification, & nature; d'autant que le feu comme feu, & les charbons comme charbons ne peuuent estre maniez qu'ils ne brulent ou noircissent, puis qu'ils n'ont en eux autre plus naturelle & euidente vertu ny qualité. Et vous sçauiez bien S. Cosme que les choses qui laissent quelque marque de leur attouchement, comme fait le charbon, sont conformes à la diuerse proprieté des choses necessaires, & non volontaires, comme celles qui naissent librement d'une franche volonté des hom-

mes, qui peuuent tantost bien, tantost mal, & comme mieux leur semble operer, pouuant l'un ou l'autre estre, ou aduenir, ce qu'on ne void point és simples actions de la nature, puis que le feu ne peut iamais estre que chaud & brusler, nyle charbon que noir, & noircir celuy qui le voudra manier; & principalement si l'on s'en mettoit, comme vous auez dit, au sein, ou au cœur: & pour n'estendre plus auant ce propos, ie vous dis que la dance & le bal que les Latins appellent *saltatio*, (laissant à part la dance & le bal, avec les gestes, les mouuements & bruits que plusieurs font en beaucoup de parties du monde de sonnettes, de clochettes & autres tels instruments) sera à tout iamais vn exercice non seulement vtile, & honorable, mais aussi tant pour les guerres, comme pour la bonne conseruation de la santé, comme pour l'honneur de la religion, & pour l'honneste soulas & vertueux passetemps des hommes, necessaire: & cela suis-je assure de le vous pouoir prouuer par raisons, autoritez & experiences; & en fin vous faire voir & cognoistre, & à toute ceste noble compagnie, que vostre si grand exercice de la course & du saut, suyuant ce que l'appellez viril, est plustost nuisible & dommageable qu'autrement: & que mesme la Gymnastique & plusieurs exercices d'icelle ont esté dignement mis en oubly, bannis & condamnez par plusieurs sçauans & saincts docteurs.

Cos. Il semble quasi que vous alterant vous soyiez pour vous mettre en colere.

FERR. Vous voulez gossier en vous esbattant à la mode des courtisans, vous sçauiez bien cōment ie me suis rendu imitateur de Socrates, pour ne monstrier aucune perturbation en mon discours.

Cos. Pardonnez moy doncques ie vous prie, pource que l'apparence de vostre discours est sans doute telle, que chacun iugeroit aysement que vous feussiez entré en colere en vostre dispute: mais ie croy ce que j'ay tousiours remarqué en vous, que soyiez naturellement ainsi fait, engendré & composé; de sorte que vous ne pouuez quasi vous retirer de plustost parler haut que bas; toutesfois soit comme il vous plaira, ie vous respons que le feu comme feu ne peut estre non chaud,

## LE I. DIALOGVE

c'est à dire, froid, pource que naturellement il est tousiours chaud, & n'est possible qu'il soit l'un & l'autre alternatiuement, comme sont les choses que les hommes font volontairement, qui ont esté jà par vous declarees, si ne s'enfuit-il pas pour cela que la dance, & le bal puisse estre digne de louiange, ou de blasme, n'estant cest exercice plus doié de cestuy-cy, que de cestuy-là, ou plus accompagné de vice, que de vertu. Et ne s'enfuit aussi que les hommes & femmes ne facent mal d'vser de ce qui peut estre cause, occasion, ou subiect, suyuant vostre opinion, de les faire tomber en quelque vice, erreur, ou peché, comme on void ordinairement, & principalement avec perte de tēps, & de la pudicité & chasteté des Dames, & des despenses extraordinaires qui se font avec prodigalité és mascarades & festins pour telles occasions.

FERR. Vous voulez en somme dire qu'on ne deuroit pas consentir l'vsage de cest exercice du bal & de la dance, à cause de l'abus qu'on y commet. Je vous respons, qu'encor que cest exercice du bal & de la dance soit mal pratiqué, si est-ce qu'il ne merite pas pourtant aucun blasme: car la faute n'en est pas à la dance, mais à ceux qui en abusent. Et qui ne sçait que s'il falloit obseruer ce que vous dictes, que le fer, le feu, l'eau & le Soleil mesme meriteroyent blasme, d'autant que par l'abus des hommes ils nuisent & font mille maux? Il en est de mesme de l'or & de l'argent; il est bon, ou mauuais selon la qualité de ceux qui le possèdent: Et ainsi en est-il de toutes autres choses, lesquelles d'elles mesmes sont indifferentes, ne bōnes, ne mauuaises de leur nature; mais l'effect en est ou bon, ou mauuais selon l'humeur & complexion de ceux qui en vsent, ou en abusent. Qui est celuy qui ne sçache que l'homme peut faire mal son profit des meilleures & plus saintes choses du monde? & toutesfois elles n'en sont pas plustost à blasmer, & ne doyuent pourtant estre estimees vicieuses; & partant ne les faut ny defendre, ny condamner, comme vous voulez qu'on face du bal & de la dance, pour estre leur capital ennemy. Icy nous seruira d'exemple celuy que raconte Dion en la vie de Caius Caligula, lequel pour monstrier que sans consideration aucune les fauteurs & baladins furent bannis de Rome par vne passion des

Conseillers de Tibere son predecesseur: Car le mot *Sauteur*, en latin, comme i'ayjà plusieurs fois remarqué, veut signifier tant celuy qui saute, comme faict à present nostre amy Archange, que celuy qui balle & dance avec grace & modestie, dont i'ay parlé en la seconde espee de sauter; mesme celuy qui avec gestes & autres mouuements les imite, faisant des contresauts pour faire demonstration de sa disposition à ceux qui le regardēt, qui sont ceux de la troisieme espee. C'est pourquoy ledit Caligula à vn apres-soupee fit assembler avec grande instance, & diligence tous les principaux personnages du Senat, leur faisant dire à tous qu'il vouloit consulter avecq'eux de quelque chose d'importance. Arriuez qu'ils furent, ne leur feit voir autre chose que des fauteurs de bals & de dances qu'il auoit rappelez d'exil faict par le commandement de l'Empereur Tibere son predecesseur. A la fin de ce festin, estant proche l'aube du iour, l'Empereur renuoya tous les Senateurs en leurs maisons, disant que pour lors il ne vouloit autre chose d'eux, & que partant ils s'en allaissent reposer.

Cos. Maintenant ie m'appерçois que vous vous donnez du plaisir, puis que vous alleguez pour autorité l'acte d'un des plus meschans Empereurs qui iamais furent au mōde, remply de tout vice, comme si vous n'eussiez sçeu trouuer suyuant l'exemple de ce tyran mōstrueux aucuns exercices plus dignes des hōmes que le bal & la dance, eu esgard que le bal & la dance ne sont qu'une prompte occasion de nous enflammer à cōcupiscēce par le moyen de leurs doux attraits & allechements dont nos sens sont corrompus, du mouuement & ardeur desquels procede l'ardant desir des choses voluptueuses, qui se viennent assembler avec vne plus grande vehemence, mesmes lors qu'il semble estre estaint, & duquel les hommes & les femmes viennent à s'eschauffer peu à peu pour se laisser en fin surmonter & renuerser des assaux amoureux, iusques à vn entier embrasement causé des attraits & allechements du bal & de la dance, laquelle encore que suyuant vostre opinion estant simplement prise, elle ne soit ny bonne, ny mauuaise; neantmoins pour euitier la cause du peché, on peut trouuer plusieurs autres exercices, comme plusieurs fois i'ay dict, sans comparaison

## LE I. DIALOGVE

beaucoup plus profitables aux hommes vertueux, comme sont ceux de la paume, de la luiſte, de l'eſcrime, de la chaffe, de voltiger, & autres tels qui ne ſont compoſez, ny fondez de parties, ny circonſtances participantes à la luxure, à la volupté, & autres tels pechez manifeſtes.

FERR. Vous eſtes en fin arreſté & reſolu en voſtre obſtination, pour me faire, ſi vous pouviez, renier la patience, en me faiſant tant de repliques, lesquelles, encore qu'elles ſoyent aſſez debatues par mes raiſons precedentes, voire ſatisfaites & vaincues; ſi eſt-ce toutesfois que j'adiouſteray, que tout ainſi que l'exercice du bal & de la dance a ſouuentefois fait pluſieur euidens miracles; auſſi aujourdhuy non ſans merueille diſputant contre vn tel aduerſaire que vous, orné & enrichy de toutes ſciences, ie monſtrерay en ce qui appartient à la deſenſe & louange honorable du bal & de la dance, que i'en ſçay mieux iuger que vous ne faites, ou pour le moins que vous ſaignez ne ſçauoir: ſoit comme il vous plaira: ie vous reſponds qu'il n'eſtoit beſoin de dire que les autres exercices ne receuoient aucune compoſition, ny fondement des parties, ou circonſtances de la volupté, voulant tirer en conſequence que le bal & la dance y ſoyent fondez, puis que ie vous ay deſjà par mon diſcours fait entendre que toute dance & bal, qui participe du mouuement, geſte, ou acte mal ſeant, ſoit en imitant, ou contrefaiſant quelque choſe, ou pour representer aux yeux de l'homme ou de la femme quelque vicieux deſir, ou deſhoneſte conception, doit eſtre compris à la dance & au bal, ſuyuant la diſtinction que i'en ay faite de la troiſieſme eſpece, qui ſeroit quaſi ou pluſtoſt du tout impoſſible de les pouuoir ſçauoir, ny cognoiſtre, ou d'en auoir quelque certain contentement les nombrant l'vne apres l'autre, eſtant ſuyuant la diuerſité des pays, & la licence eſſrenee des mœurs & couſtumes deſordonnees des hommes quaſi infinny le nombre des balets & des dances, lesquelles avec mille geſtes & mouuements appropriez ont eſté inuentees pour gagner l'argent de ceux qui prennent plaisir à voir tels danceurs, balladins ou ſauteurs, cōme les Latins les nomment; d'autant que ceux qui en ſont profeſſion ſont pluſtoſt viles perſonnes, qu'autrement, comme  
bouffons,



bouffons, parazites & autres gens de telle estoife, qui flatans & se foudians peu de la vertu, ou de la honte, font rire les compagnies, lesquelles pour passer le temps prennent leur plaisir à telles bouffonneries, desquelles n'est nullemēt composé l'hōneſte exercice du bal & de la dance, que j'ay compris par la ſeconde eſpece: mais ſi en partie ils y eſtoient meſlez, on ne les pourroit plus à bon droit appeller ny bal, ny dance, ains pluſtoſt bouffonneries, comme pluſieurs font bien ſouuent, & plus qu'il ne feroit à deſirer, alors s'enſuyuroit ce qui n'eſt de l'intention ny conception de ceux qui ont par ſucceſſion de temps reduict à vne excellente beauté & perfection ceſt art du bal & de la dance. Que ſi vous ne voulez du tout nier la verité, vous ne pourrez, ny autre auſſi, iamais aſſeurer qu'ayez veu aux compagnies de gens d'honneur ſe pratiquer aucunes de ces bouffonneries, ſoit au bal, ou à la dance: Et quant à ce que vous diſtes que ceſt exercice excite l'appetit amoureux, ie vous reſponds que les balets & la dance accompagnent des attraits & allechements d'amour, de ſaſtes deshonneſtes & de beaucoup de geſtes voluptueux, cōme ſont la plus grande partie de ceux qui ſont compris en la troiſieſme eſpece, peuuent ſans doute eſtre occaſion des vices que vous alleguez; mais non pas la dance honneſte qui ſe pratique entre les gens d'honneur avec tout reſpect, pour le plaisir & contentement des hommes & des femmes qui ſ'y trouuent tant de haute que baſſe condition; y ayant touſiours eu depuis que le monde eſt monde des hommes & des femmes qui recherchent telles compagnies, non pour autre occaſion que pour contenter leur eſprit ſeulement, deuifans ſecretement de leurs amoureuſes penſees; & bien qu'il y en ayt qui en abuſent, il ne faut pas inferer pourtant que le bal & la dance en ſoit à blaſmer & condamner, ainſi que j'ay diſcours cy-deſſus. Il ne faut pas, dy-je, ſoubs ce pretexte blaſmer generalement, comme vous faiſtes, ſans aucune diſtinction toutes ſortes de bal & de dance, lequel exercice eſtant pris comme il faut & bien pratiqué, il a ſans doute en ſoy la vertu de conſeruer la ſanté, de recreer l'eſprit, de rendre le corps agilé & diſpos, de compoſer la grace, & auſſi de maintenir les forces des perſonnes en leur plus gaillard de vigueur. Que

## LE I. DIALOGVE

si parauenture il se trouue quelqu'un qui craigne de tomber au peché de luxure en balant & dançant, on luy peut dire qu'il ne consente que sa femme & ses filles s'y trouuent ou y assistent: mais plustost qu'ils aillent chanter les Pseaumes penitentiels.

**Cos.** Sans doute ils feroient beaucoup mieux que vous, qui prenez ainsi plaisir à passer vostre temps en paroles oiseuses, & peu profitables.

**FERR.** Je le vous accorde: mais pour cela ne s'ensuit-il pas que tous ceux qui dancent & balent pechent, ou bien que on ne puisse dancer ny baler sans tomber en quelque peché, voire mortel, puis que des veniels il ne faut douter que nous n'y tombions, comme c'est l'opinion de la plus grand part des Theologiens, que iamais on ne bale, ny on ne dance que nous ne commettions quelque peché en nostre pensee, ou en nostre parole, au moins veniel. Mais pource qu'on en pourroit autant dire de toutes les autres choses du monde, il ne faut pas donc conclurre incontinent que pour cela le bal & la dance soyent choses indignes de l'honneste compagnie des hommes & des femmes, ny mesmes qu'ils soyent occasiō necessaire des vices, & scandales que vous auez alleguez, comme ie vous ay desia proué par mes precedentes raisons. Et quant à ce qu'il me semble vous auoir ouy dire qu'on peut trouuer beaucoup d'autres exercices pour la conseruation de la santé, ou pour le seruice de la guerre; Je vous responds qu'encore que ie vous accordasse qu'il s'en pourroit trouuer de meilleurs, pour cela ne s'ensuiuroit-il pas que le bal & la dance, suyuant la qualité de la premiere espece, ne soit vn bon & honneste exercice: & ne pourrez nier qu'au contraire on ne trouue plusieurs exercices, jeux, & autres passetemps, & esbats, qui sont non seulement la cause de plusieurs maux, mais suyuant leur nature, qualité & intention, sont, comme vous dites, fondez & composez de toutes sortes de vices, lesquels il n'estjà besoing de vous représenter, d'autant qu'ils ne sont que par trop connus; il est routesfois impossible, ou du moins fort difficile que les Republiques y puissent mettre tel ordre qu'il seroit bien à desirer, corrigeant, & remediand aux abus qui s'y

commettent, & aux inconueniens qui en peuuent aduenir. Et d'auantage, vous sçauiez bien que l'exercice des hommes ne peut pas estre ordinairement guidé d'une seule intention, ny tousiours conduit d'une mesme fin. Car il est certain que tous ne s'appliquent pas tousiours à une mesme chose, ains les vns à une, les autres à une autre, selon leur inclination. Et apres l'exercice ordinaire du traual, faut qu'il y ayt quelque recreation pour donner quelque relasche & à l'esprit & au corps. Or comme tous ne prennent pas plaisir à un mesme exercice, aussi ne se delectent-ils pas en mesmes esbats, & passetemps. Les vns aimeront la luiſte, les autres l'escrime, d'autres s'exerceront à sauter, & à courir, quelques vns prendront plaisir à la chasse, les autres à la paume, & d'autres à la dance. Ce qui ne doit estre trouué estrange veu la diuersité des appetits des hommes, & de leurs inclinations. Vous ne deuez donc trouuer estrange si quelques-vns, voire plusieurs prennent plaisir au bal & à la dance, veu que c'est leur naturel de se plaire plus à cest exercice qu'à tout autre: & me semble qu'il n'y a point de mal quand on en vse honnestement, & sans s'esloigner des termes de l'honneur, & de la vertu, tant d'un sexe que d'autre. Vous pouuez auoir souuenance de ce qu'escriit Aristote en plusieurs endroits de son institution politique, où il dit, que puis qu'il est necessaire de donner quelque relasche aux trauals ordinaires, il faut trouuer les plus honnestes moyens que faire se pourra pour donner quelque recreation aux hommes: en fin il conclut que la musique & le saut, c'est à dire le bal & la dance, sont les plus propres, & non pas vos sauts virils que vous auez tant exaltez, que vous les auez dit estre les vrais moyens de pouuoir sans blasme ny reproche passer le temps en toutes compagnies avec plaisir & honneur, & recreer & l'esprit & le corps en tout contentement: mais dites moy, ie vous prie, qui seroit celuy qui voulust, encore qu'il le peust, tousiours se delecter & prendre plaisir seulement au ieu de la paume, à luiſter, courir, sauter, ou voltiger, sans iamais se soucier de passer le temps, mesmes aux iours de festes, avec sa femme, sa soeur, sa cousine, & autres telles proches parentes & amies? N'est il pas certain, & asseuré que ce seroit une cruauté plus que barbare d'ainsi s'estranger de

## LE I. DIALOGVE

ses amis, & interdire aux femmes tout plaisir & esbats avec leurs maris & leurs compagnes? Vous me direz parauenture que c'est des allechements pour faire mal : mais ie vous ay desia dit cy dessus que l'on en peut bien vser, & qu'il n'y a que l'abus qui rend la chose mauuaise, qui autrement est bonne de foy-mesme. Et d'ailleurs il n'y a apparece que la faute de quelques particuliers doye estre vne cause raisonnable de rompre la societé des honnestes compagnies tant d'un sexe que d'autre. Que si quelqu'un dit qu'il vaudroit mieux chanter des Psalmes, ie respondray qu'à la verité le seruice diuin doit preceder toutes nos actions; mais toutesfois on ne peut pas tousiours estre en oraison. Et puis Dieu ne defend pas de nous resrouyr quelquefois, pourueu qu'il n'y soit point offensé. I'adiousteray qu'il seroit à desirer qu'il n'y eust point de plus grandes fautes au monde que celles qui se commettent au bal & à la dance. Comme si ceux qui veulent venir à bout de leurs appetits amoureux ne se seruoient pas bien d'autres moyens que ceux que leur ministre & le bal & la dance. Mais ie ne sçay pas pourquoy vous m'avez voulu faire estendre plus auant en ces discours, veu que la verité vous est assez cognüe. A cela vous me faites paroistre que vous y prenez plaisir; & puis que ie recognoy que cela vous est agreable, ie continuëray, & vous raconteray en peu de paroles ce qui me semble estre à propos sur ceste matiere. Ie dy doncques que comme pour seruir à la Republique l'on choisit volontiers ceux que l'on iuge estre plus propres & capables pour exercer quelque charge publique; ainsi quand il est question des exercices du corps, l'on fait election de ceux qui peuuent rendre les hommes plus sains. & mieux disposez, pour estre puis apres plus propres aux belles fonctions de l'ame. Or n'y en a-il point que l'on doye preferer icy au bal & à la dance; d'autant qu'il n'y a exercice plus doux, & plus moderé que celui-là, soit pour la paix, soit pour la guerre; & cela est certain & manifeste, suyuant l'opinion commune, ou plustost experience des Philosophes qui nous le fait voir & toucher du doigt: c'est que l'on ne peut pas en vn mesme temps trauailler & l'esprit & le corps en vne mesme actiõ: mais il faut qu'il y ayt quelque distinction, & considerer quelle

est la force, la nature, & la vertu de tous deux, pour mieux cognoistre ce qui est propre & à l'un & à l'autre, autrement cela seroit cause qu'ils ne pourroyent en fin rien faire de bien. Quand l'ame exerce quelqu'une de ses fonctions, il faut que le corps s'arreste pour ne luy donner empeschement; & quand le corps trauaille beaucoup, l'ame empeschée de cest ennuyeux mouuement, & agitation corporelle, ne peut librement vacquer suyuant son excellence aux choses qui sont separees de l'exercice materiel, & qui luy touchent & appartiennent. Parquoy ne pouuans les hommes se seruir, ny s'ayder de l'ame, & du corps, pour les choses communes & vniuerselles de la paix, & de la guerre, Il me reste maintenant à declarer comme l'ame estant la plus noble partie de l'homme, soit qu'elle s'employe au seruice de la religion, ou au gouvernement politiq, & ciuil de la Republique, ou pour la conduicte & gouvernement des armées, ou bien viuant selon les temps, & les saisons, vertueusement non de son reuenu, (comme font ceux qui ont des rentes annuelles) mais de son trauail & industrie, par le moyen de quelque office, & art qu'il exerce en la ville où il habite. Je ne veux mettre en ce rang les trompeurs, & les voleurs, qui par toutes sortes de meschancetez viuent aux despens d'autrui, iusques à ce qu'en fin ils rendent avec vsure ce qu'ils ont iniustement rauy, finissant miserablement leur vie, les vns aux galeres, & les autres au gibet, fin digne de leurs merites. Partant de toutes ces considerations les prudents Grecs & Romains, & autres telles Republiques bien gouuornees en tirerent peu à peu ceste prudente discretion de faire choix & eslection de ceux qu'ils cognoistroient estre plus propres, & idoines pour le gouvernement & administration de la chose publique, & pour la conseruation de la societé humaine, & discerner les hommes de merite d'avec les mal habiles & ignorants, pour establir vn bon ordre & police, en conseruant les gens de bien, & punissant les meschans. Or les Magistrats prudents & aduisez considerants qu'il seroit bien mal-aisé qu'une si grande multitude de peuple entré tant de charges, offices & dignitez, peust estre contenuë en son deuoir, sans luy oster quelque relasche de son exercice ordinaire, tant de l'esprit que du corps,

## LE I. DIALOGVE

pour à quoy pouruoir, luy ont permis premierement l'exercice de la musique, tant des instruments que de la voix, introduite en commun, & confirmee par la coustume de baler & dancier pour le plaisir & recreation de toutes personnes aux iours des festes seulement; & cela se trouue entre les Gentils, & les Hebreux qui estoient esleus de Dieu. Or cest exercice de baler & de dancier n'estoit defendu de ce temps, là ny par la bouche de Dieu ny deses Prophetes; mais bien l'abus que commettoient les femmes dancier & balant, pource qu'elles paroissoient fardées, ayans le regard lascif & impudicq, pensans par ce moyen complaire aux yeux, & à la volupté des hommes.

**COS.** Je vous attendois là. Vous voyez doncques que si les dances & balets n'eussent esté, les filles d'Israël ne fussent tombées en peché, ny par consequent encouru l'ire & le iugement de Dieu.

**FERR.** Vostre obiection n'est pas si forte que vous pensez, S. Cosme, outre que de mon discours precedent vous ne pourriez tirer vne consequence necessaire. Pensez vous que ce soit seulement au bal & à la dance que les femmes se fardent pour paroistre belles? Croyez vous que toutes les femmes Hebraïques qui dancèrent iamais, pecherent & commirent scandale sans exception aucune? L'exercice de la dance, à proprement parler, n'est pas à reprendre & condamner; mais la mauuaise intention, qui faict que la chose qui autrement est bonne de foy, soit rendue vitieuse & corrompue; & par consequent grandement à blâmer. Et pource que nous auons amplement discoursu cy-dessus de ceste corruption qui vient non de la dance, ains de la malice des hommes, ie n'y insisteray d'auantage. I'adiousteray que Iudith ayant tranché la teste à Holofernes dança avec tout le peuple en signe de resiouissance de la victoire qu'ils auoyent obtenue, & en firent feste publique. Ce que quelques vns pourroyent trouuer mauuais; mais en effect c'estoit vne chose sainte & fort agreable à Dieu: ce qui ne seroit pas, si la dance estoit tant à reprendre que vous dictes, & en ceste consideration vous m'aduouierez que selon les occasions la dance a esté quelquefois en estime: C'est pourquoy retour-

nant à mon propos, ie dy que les Républiques que ie vous ay allegues voyans que la multitude du peuple estoit fort ac-  
creuë, trouuerent l'inuention des spectacles publics, & autres  
jeux pour contenter & recreer les esprits du peuple, comme  
nous rapporterons des jeux qui ont esté si renommez ancien-  
nement, & seront cy apres par nostre discours, auant que le S.  
Pin vienne pour commencer ou paracheuer les sauts en pré-  
sence de nostre tres-cher Archangé. Et ne faut estimer que tels  
spectacles ayent esté sans grandes raisons, (comme on dict) in-  
uentez & mis en vsage, considerants que tous ne pouuoient  
pas estre Theologiens, ny Orateurs, ny tous Medecins, Philo-  
sophes, ou Gouverneurs de Prouinces : & que d'ailleurs tous  
n'estoyent propres à la luité & au saut, ny à la course, ny mes-  
mes à aucun autre exercice en particulier ; d'autant que toutes  
les personnes ne sont pas d'un mesme humeur, nature & com-  
plexion ; & bien qu'ils fussent tels, si n'estoit-il pourtant possi-  
ble qu'ils s'exercassent tousiours à mesmes exercices, qui estoient  
plustost pour fatiguer le corps, que recreer l'esprit : & toutes-  
fois le repos leur estant necessaire recherchoient vn exercice  
& esbatement exempt de tout trauail corporel. Ils resolurent  
doncques avec meure consideration & iugement d'accepter,  
& mettre en vsage la Musique avec loüange & honneur ; & le  
saut qui comprend en partie, comme i'ay dict, l'exercice du  
bal & de la dance ; suyuant en ceste consideration l'honneste  
plaisir, & la joye commune d'un chacun, veu qu'il ne se trouua  
quasi personne qui ne s'y delectast, les vns en vne sorte, les au-  
tres en vne autre, suyuant la diuerse inclination des humeurs,  
qui artificiellement en composoyent à leur volonté & fanta-  
sie. Que direz vous de Socrates réputé sage par l'Oracle d'A-  
pollon, & qui se pourroit pour vn vray Martyr canoniser, si  
auant sa mort il eust esté seulement circoncis, lequel estant ja  
vieil demonstra qu'il estoit necessaire de sçauoir baler & dan-  
cer ? & luy mesme pratiqua ce qu'il vouloit que les autres en-  
suyussent, mettant cest art entre ses plus graues disciplines, &  
exalta cest exercice avec tres-grandes loüanges, croyant qu'il  
fut avec la generation du monde nay diuinement, & venu en  
euidence avec toute ancienneté de l'amour mesme. Je ne veux

## LE I. DIALOGVE

pas icy oublier la graue opinion de plusieurs anciens Grecs , & autres qui ont philosophé sur l'inuention du bal & de la dance & des sauts entrecoupez qu'on y faict. Ils afferment mesmes qu'ils ont esté trouuez à l'imitation du mouuement & tour des cieux & des progrez diuers, droits & obliques, des retrogradations & diuersitez des conionctions & aspects des planettes. Toutes lesquelles choses si on vouloit considerer parfaictement, on pourroit parauanture cognoistre qu'elles sont iustement imitees & representees au bal ; d'autant que la diuersité des mouuements faicts à l'opposite l'un de l'autre par ceux qui dancent , n'est qu'une generale imitation du diuers mouuement des cieux, & le retour qu'on faict en arriere au bal & à la dance n'est autre chose que vouloir imiter honnestement la retrogradation des planettes. Il y a plus, que les passages qui sont representez tenants un de leurs pieds arrestez & remuans l'autre: c'est comme une similitude des estoilles errantes , quand elles sont, suyuant les Astrologues, en leur degré. Et les voltes dont on use en ballant, ne sont autre chose que les espies qu'on tient estre es cieux, les conionctions alternatiues qu'on faict apres une separation proportionnee du bal & de la dance : & puis ces belles & diuerses retraictes, droictes & obliques, qu'on exerce avec tant de grace , sont les mesmes conionctions & oppositions triangulaires & quadrangulaires, voire sexangulaires qui interuiennent quasi tous les iours entre les planettes en leurs spheres celestes. Vous ne me nierez pas que ie ne me puisse seruir des histoires & authoritez, comme vous avez faict des antheurs que vous avez accommodé à vostre passion pour rendre d'autant plus contemprible le bal & la dance que vous l'auiez en haine , neantmoins ie ne lairray de continuer en ma defence quelque empeschement que vous y mettiez , m'asseurant qu'en fin l'equité de ma cause me rendra absous de toutes les calomnies que vous pourriez proposer à l'encontre de moy.

Cos. Il faut à la parfin que ie condescende à vostre opinion, S. Ferrand, & que racquiesse à vos raisons pour vous faire plaisir. Ie dy doncques suyuant ce que vous avez proposé cy dessus, que le bal & la dance , selon leur nature ne sont ny vicieux,



vicieux, ny dommageables ; & suis contrainct de vous auoüer cela, preuoyant que si i'ninsistois d'auantage à vous contredire, que le torrent de vostre eloquence ne vint à me faire faire naufrage en pleine mer. Partât dites maintenant ce qu'il vous plaira, vous assurant que ie vous orray avec toute douceur & attention.

FERR. Vous m'en voulez bien faire croire, S. Cosme, disant que pour me faire plaisir, & pour ceder à mon eloquence, vous auez deliberé de ne plus poursuiure avec tant d'instance que vous faisiez. Le voy que vous voulez entrer en quelque accord, & de moy i'en suis tres-content. Le suis donc d'aduis que nous admettions & l'un & l'autre exercice pour le plaisir & delectation, non seulement de ceste noble compagnie, mais aussi de tous autres qui s'y voudront exercer. Vous auez bien preu, S. Cosme, que i'auois des raisons pour vous battre, si fortes, qu'il n'y auoit apparence quelconque que vous ne fussiez vaincu ; & ces raisons estoient des preuues certaines tirees de l'autorité, tant du vieil que du nouveau testament, avec vn grand nombre d'Autheurs Grecs & Latins, que ie voulois opposer à ceste grande loüange des sauts que vous appelez virils pour remporter & l'honneur & le prix d'auoir vaincu & surmonté vn si puissant aduersaire.

COSME. Ie ne permettray pourtant, S. Ferrand, que vous triomphiez de nostre honneur, & principalement de celui du S. Archange, lequel comme vous sçauz fort bien, a acquis vne telle reputation, que ce me feroit yne grande honte si ie ne conseruois la bonne opinion qu'une infinité de honnestes hommes ont, qu'il est doué de toutes les graces, & perfections requises aux plus beaux exercices du monde.

FERR. Vos paroles me font croire que vous estes merueilleusement resolu, S. Cosme, & que vous ne craignez ny l'Afrique, ny l'Espagne : Si est-ce pourtant que ie m'apperçoy que vous auez au commencement pris plaisir à me contredire pour voir si i'auroy des raisons pour opposer à vostre eloquence ; & maintenant ie voy que ce n'estoit pas à bon escient, ains seulement pour entrer en conference de ces beaux exercices,

## LE I. DIALOGVE

que ie ne suis d'aduis que nous laissions au iugement de ceste noble assistance, pour en resoudre & determiner cōme il luy plaira, sçachant qu'il n'y a celuy de la compagnie qui n'en iuge comme sçauant, pour rendre & l'honneur & le prix à qui il appartient.

**Cos.** Ie seray fort ayse que de si bons iuges decident nos differends, & m'assure que pesant les raisons & de l'un & de l'autre, ils nous auront bien-tost mis d'accord, en deferant au S. Archange cest honneur qu'il sera tenu pour le plus grand maistre de toute la Gymnastique, & ie m'assure tant de vous, & de l'affectiō que vous luy portez, que vous ne luy ferez point contraire. Mais tandis que nous disputons, ie m'apperçoy du Soleil qui va jà declināt, Que si les sieurs Pin & Baptiste ne viennent bien-tost, nous perdrons l'occasion qui se presente de cōtenter ceste noble compagnie que ie voy infiniment desiruse de iourr encore du plaisir que leur a quelquefois donné le S. Archange. Vous sçauiez que la Cour est sur le point de partir, mesmes que sa Maiesté a desir de donner iusques au chasteau de Vauieur, appartenant à monseigneur le Comte de Sancerre, situé au milieu d'une grande forest, où se trouuent force bestes rouffes, & là aller à la chasse, à laquelle il y prend vn singulier plaisir.

**FERR.** Il me desplairoit fort si nous perdions vne si belle occasion, S. Cosme, pour le desir que j'ay de contenter ceste noble assistance. Mais ie ne croy pas que le Roy nostre maistre doyne si tost partir. Car ie luy entendis hier dire à table qu'il estoit deliberé de sejourner encore quatre ou cinq iours, tant il trouue beau & commode ce lieu pour le plaisir qu'il y reçoit de la chasse.

**Cos.** Vous me faites resjouyr de me dire si bonnes nouvelles, d'autant que ce sejour nous pourra donner le loisir & de mettre fin à nos discours, & de jouir de ce bon-heur de voir ces beaux exercices par la venue des sieurs Pin, & Baptiste.

**FERRAND.** N'en doutez point; car ie le sçay d'une Dame de ceste cour qui gouuerne du tout le cœur de nostre Roy. Parquoy pour ne perdre point temps, ie vous diray en peu de paroles, que sans me departir des belles raisons politiques ti-

rees de la Philosophie morale, ny des considerations qui sont  
 suiuant nostre Religion Catholique, ie me suis seruy de leurs  
 arguments, & demonstrations cathégoriques pour vous re-  
 spondre, & satisfaire, & vous faire voir que i'auois vn iuste sub-  
 iect de defendre & le bal & la dance, puis que vous vous y op-  
 posez si formellement : maintenant ie desire que vous sça-  
 chiez en quelle reputation ont esté de tout temps enuers les  
 Anciens, les sauts violents que vous appelez virils, voire com-  
 bien le bal & la dance ont esté prisez de ce grand Thebain  
 Cleofante; & du depuis son honneur accreut tellement, que  
 Apollon dans Pindare fut furnomé le sur-sauteur: on peut en-  
 cores aisément iuger de son excellence de ce qu'un Corinthië  
 a dit que Iupiter mesmes s'exerçoit souuent à sauter & baller  
 en terre avec les hommes. D'auantage on met au nombre des  
 illustres & braues sauteurs anciens vn Bulbo, comme Cratine,  
 Callian & Zenon Candiot racontent. Qui plus est cest exerci-  
 ce a esté de tout temps chery & des Dieux & des hommes, &  
 mesmes par ce grand monarque de toute l'Asie Artaxerxes, &  
 par Theodore, suiuant le tesmoignage d'Alexandre escriuant à  
 Philoxene qui fut aussi vn excellent sauteur. Berose escrit q' l'e-  
 xercice de sauter a esté en vsage auant le deluge; d'autât que les  
 Geans mesmes sautoient dès ce temps là en la ville d'Enos, ap-  
 pellee par les modernes Caïn, pource que Caïn l'edifia pro-  
 che de la montagne du Liban. Considerez comme l'exercice  
 de sauter & baller est bien ancien, Nous lisons que Bacchus sur-  
 mōta au saut & à la dance les Toscans, & le peuple belliqueux  
 de Lidie, & vint cet exercice en si grand credit & estime, qu'en  
 fin il fut reduit entre les mysteres, cōme ie vous ay dit cy dessus  
 parlant de la Religion & doctrine des anciens Rois Toscans  
 tant prisez & honorez de tout le monde, ausquels les Romains  
 mesmes enuoyoyent leurs enfans pour y estre nourris, & in-  
 struits. Virgile nous en raconte la verité, & Homere voulant  
 donner vne singuliere loüange à Merion, qui estoit d'ailleurs  
 vn fort vaillant Capitaine, l'appelle sauteur, voulant signifier  
 que moyennant l'exercice de sauter en plusieurs façons, il e-  
 stoit deuenu tant agile de sa personne, qu'il surmontoit tous  
 ceux de son temps aux combats tant en force qu'en dextérité:

## LE I. DIALOGVE

car la disposition qu'il auoit acquise en cest exercice estoit si grande qu'il euitoit & paroit les coups mortels des sagettes qui luy estoient iettees par ses ennemis, & sembloit plustost voler que sauter. Neoptolemus fils d'Achilles fut si excellent sauteur, que s'estant long temps exercé en cest art, il inuenta vne façon de sauter, qu'on appelle auioird'huy la Moresque, auquel son pere prit si grand plaisir, à ce qu'on dit, qu'il l'estima inuincible, tant pour sa valeur, que pour sa dexterité. Et faut croire que l'opinion qu'auoyent conceuë les Barbares de la force & agilité de Prothee, ne venoit d'autre chose que de s'estre fort exercé à sauter, & y auoir fait tel profit qu'il pouuoit imiter diuerses formes, & mouuements, comme la promptitude & vehemence du feu, la cruauté du Liō, l'agilité des Chats, l'impetuosité & dexterité des Leopards; de sorte que le peuple estimoit qu'il y eust en luy quelque diuinité ou enchantement, pour se transformer ainsi en plusieurs & diuerses formes; comme nous voyons encores auioird'huy que plusieurs sauts retiennent les noms de ces transformations allegoriques, comme le saut du Chat, du Singe, & du Liō, les ghissemens des poissons, & tels autres embellis & enrichis par les Anciens d'une infinité de gentilles fables, qu'ils ont attribuees aux miracles selon leur coustume; ce qui nous sert d'exemple assez manifeste, comme aussi ce qui est aduenü à Empuse excellente saltatrice, appelée magicienne, pour ce que par son agilité elle se transformoit en toutes sortes de formes & figures cōme Prothee. Hesiodé au commencement de ses vers voulant louer les Muses, escrit qu'elles sautent & ballent souuent entre-elles de fort bonne grace. Tout ce que les hommes font, ils le font à quelque fin, ou pour y auoir plaisir, ou en recevoir honneur, ou pour en tirer quelque profit & commodité. Et c'est cela qui les attire, & les pousse à entreprendre. Il ne faut point douter que l'art & exercice tant du saut, que du bal & de la dance, selon la qualité & diuersé complexion de ceux qui en ont anciennement fait profession, n'aye esté vn honorable tiltre de noblesse & de vertu, principalement de ceux qui y ont excellé & qui se sont acquis par ce moyen tout l'honneur, le plaisir, & le profit qu'ils pouuoient desirer & esperer d'un si bel exerci-

ce. Il n'est jà besoin de représenter icy combien sont plaisants & agreables les sauts, le bal & la dance, veu que tous ceux qui sçauent que c'est, dient que c'est le mesme plaisir. Ne sçauiez vous pas que du temps de l'Empereur Neron il y eut vn excellent sauteur & braue baladin, lequel entendant que Demetrius n'aimoit pas vn tel exercice, delibera de s'approcher de luy avec resolution de le faire changer d'aduis, par les beaux effects qui accompagnoient ses raisons: Il le pria doncques que pour luy leuer ceste mauuaise opinion qu'il auoit conceuë du saut, du bal & de la dance, il luy permist qu'en sa presence il sautast, ballast, & dançast, ce qu'il feroit avec telle grace & dexterité qu'il s'asseuroit de le contenter. Ce que luy ayant esté accordé par Demetrius, il se presenta avec vne si belle disposition & bonne grace, qu'il se rendit tres-agreable non seulement à Demetrius, mais aussi à toute l'assistance, & fit si bien que chacun l'eut en admiration, & ce d'autant qu'il ne s'estoit point seruy des moyens ordinaires pour delecter & contenter les yeux, mais par vne agilité, & grande dexterité de son art surmonta toutes les difficultez que l'on pouuoit proposer. Parquoy Demetrius ayant pris vn singulier plaisir à voir si bien sauter & dancer, rauy & estonné d'une si grande disposition, artifice & viuacité de cest excellent baladin, dit & protesta qu'il se repentoit de n'auoir plustost employé le temps à vn si beau & si digne exercice: Et là estant present vn Ambassadeur du Royaume de Pont venu à l'Empereur Neron pour chose de tres-grande importance; aduint que cest Ambassadeur estant depesché pour s'en retourner, l'Empereur luy offrant vn don tel qu'il luy plairoit demander, dit, Je ne requiers autre chose de vostre Majesté, que ce balladin, que ie prise & estime plus que toute autre chose du monde, vous suppliant tres-humblement de me vouloir donner. Ce que l'Empereur luy accorda tres-volontiers. I'adiousteray qu'en Antioche les plus excellents & ingenieux personnaiges preferoyent l'estude du saut, du bal, & de la dance à tout autre exercice quel qu'il fust, qui nous fait iuger qu'il estoit entre tous ceux de la Gymnastique tres-recommandable.

Cos. Je vous veux enfin conceder qu'à bon droit vous

## LE I. DIALOGVE

avez soustenu & defendu ces beaux exercices, & lesquels ie recognoy maintenant que vous avez dignement exaltez, comme estants non seulement agreables, mais aussi profitables à la santé & disposition du corps. Mais ie me souuiens que vous auez cy dessus proposé trois fins, où tendent ordinairement les hommes en toutes leurs actions; à sçauoir, l'honneur, le plaisir, & le profit; & neantmoins ie trouue que les hōmes font beaucoup de choses qui ne regardent pas tousiours vne de ces trois fins; & pour exemple, ie vous mettray en ieu l'exercice de la guerre, que nous ne desirons, ny ne recherchons volontiers: toutesfois quand nous sommes contrains d'y aller, soit pour nostre conseruation, ou des nostres, ou bien souuent pour auir, nous disons lors que c'est la necessité qui nous y conduit, & encore ceste necessité seroit à rechercher, si apres vne longue guerre nous pouuions en fin jouir de quelque paix, pour donner trêue à nos miseres: mais nous experimentons tous les iours le contraire à nos despens; Tellement que nous pouuons dire avec vérité, que c'est plustost vne necessité contrainte & forcee qui nous y traine à regret, qu'une bonne volonté qui nous y meine & conduit, sans profit & plaisir.

FERR. Ie ne veux pas pour respondre à ce propos vous dire tout ce que ie pourrois bien: mais plustost ie veux supposer qu'ainsi soit; il me souuiens pourtant que vous auez cy-deuant proposé l'exemple de la guerre, & par iceluy voulu infirmer l'exercice du bal & de la dance, disant qu'il n'auoit non plus que la guerre, l'honneur, le plaisir, ny le profit en recommandation; & insistant sur cest exemple, vous sousteniez qu'il seroit impossible qu'un soldat ballant & dancant peust triompher de son ennemy: mais ie vous veux tout à ceste heure faire aduouër le cōtraire. Il n'y a personne qui ne confesse que l'exercice est celuy qui rend les hommes mieux disposez, plus forts & vigoureux pour l'exécution de leurs charges; Or est-il que l'exercice du bal & de la dance est fort propre à cela; il s'ensuit donc par les raisons precedentes, qu'il est vtile & necessaire & à la paix & à la guerre. Et ne faut pour cela inferer, suyuant l'opinion de Ciceron, que quelqu'un n'ayant autre chose à faire, se mette à dancier des le matin, & y employe toute la iournee:

mais cela se faict aux heures de loisir & de repos , pour estre mieux disposé par apres à l'exercice ordinaire du trauail , & ainsi en vsent les hommes d'esprit & de iugement en temps opportun : D'où l'on peut iuger que Ciceron n'a point blasmé cest exercice , mais bien le peu de discrétion & consideration de ceux qui en abusoient , comme font aujourd'huy vne infinité de folastres, lesquels perdent miserablement & le temps & l'argent de leurs parents, se consumants en des frais inutiles, pour se plonger en toutes sortes de plaisirs & de voluptez. Or d'autât que ceste noble compagnie auroit parauenture agreable de sçauoir comment non seulement le faut , mais aussi le bal & la dance, que vous auez tant recommandez, peuuent seruir à la guerre, & rendre les soldats plus lestes & dispos pour affronter leur ennemy, ie vous veux alleguer quelques exemples qui soyent dignes de foy , pour vous faire d'autant mieux cognoistre que ces exercices ne sont pas seulement propres en temps de paix, mais aussi vtiles & necessaires à la guerre. Polygene, homme de grande authorité, raconte en son second liure des exercices, que l'experience reïteree auoit enseigné aux vaillâts capitaines de la race des Erâclites, que la victoire estoit tousiours de leur costé lors que suyuant la proportion mesuree du bal & de la dance , les soldats à la cadence du son se preparoyent avec vn tel ordre à donner la bataille; & ceste belle disposition donnoit tellement l'espouuante aux ennemis , qu'ils s'en retournoient victorieux ; si bien que l'Oracle d'Apollon fit ceste mesme responce parlant de Prode & de Temene, à l'encontre des Euristides qui tenoyent Sparte assiegee. Les Laconiens & Spartiates, suyuant l'autorité de Plutarque , ne cōmençoient iamais la bataille, sinon qu'en ballant & dançant, imitants la consonance & mesure des flustes. Il adioust que les Lacedemoniens reputez selon l'opinion de Lycurgue, fort sages & aduisez, se seruoyent d'vne dance qu'ils appelloyent *Thicoria saltatio*, laquelle estoit composee de vieillards, lesquels en dançant chantoient & disoyent, En nostre jeunesse nous auons esté vaillants & valeureux , & les jeunes respondoyent, nous le serons à l'aduenir avec vn courage inuincible : & dès maintenant il nous en faut faire preque , afin que nos ennemis

## LE I. DIALOGVE

cognoissent que nostre jeune valeur ne cede en rien à l'experience de nos villards.

COS. Je ne veux plus trauailler, ma memoire en la recherche de tels exemples que l'on trouuë es histoires : Mais dictes moy ie vous prie, S. Ferrand, pourquoy en la seconde espee de la diuision Gymnastique, ( vous seruant de l'antiquité ) auez vous faict le saut, le bal & la dance, dont on vse en l'Europe, sans mine, actes, ny gestes, mesme entre les Chrestiens? veu que du temps des Grecs & des Romains, on ne tenoit point que telles dāces eussent esté en vsage; & encores qu'il s'en trouue aujourd'huy de differentes façons, toutesfois si sont elles routes accompagnées de quelques gestes, mines & contenance, autrement elles seroyent sans grace & sans plaisir. Or ces gestes s'exprimoyent & demonstroyent, à fin de représenter la chose avec vne certaine mesure & cadence, reiglee, pour en estre plus agreable, à la façon presque des Matassins, ou des Curetes Coribantes, Prestres sacrez à la Deesse Cibeles. Mais d'autant que vous auez dict cy-dessus que de ces beaux exercices estoyent fortis des miracles, ie vous supplie le nous declarer par exemples, afin de nous confirmer d'auantage en nostre opinion.

FERR. Encore que l'entreprenne vn grand trauail en voulant continuër vn tel discours, si est-ce que pour vous contenter, ie mettray toute peine de satisfaire à vostre desir, non tant pour monstrier ce que ie sçay dire en telles matieres, que pour vous obeyr. I'allegueray icy l'autorité de Socrates, pour prouuer que le saut, le bal & la dāce sont de fort bons moyens pour preparer & disposer les hommes à l'exercice de la guerre, mesmes qu'on lit en plusieurs Autheurs anciens qu'il y auoit certaines dances qu'on appelloit *Militaires*, d'autant qu'elles disposoyent les hommes à l'exercice de la guerre. Et à ce propos, le saut *Pyrrichien*, & bal *Castorien* nous seruiron d'exemples, où les hommes dançoient & sautoient armez. Ce grand Iules Cæsar Scaliger, non moins docte que vaillant, a plusieurs fois de nostre temps sauté & balé armé, en presence de l'Empereur Maximilian; ce qu'il faisoit avec telle dextérité, disposition & bōne grace, que cest Empereur l'auoit en admiration,



& disoit le voyant encores fort ietine, nostre Casar, eu esgard à son aage, n'acquit ou avec la cuirasse sur le dos, ou bien a esté nourry & esleué dans des habillemens de fer.

Cos. Il est certain que de nostre ville de Verone, d'où est nay nostre Scaliger, sont sortis plusieurs vaillâts & vertueux personnages, tant pour la guerre, que pour les lettres.

FERR. Sans doute il est ainsi : mais reuenant à ce que ie vous dois respondre touchant nos exercices, ie dis que vous deuez tenir pour chose tres-certaine & veritable, que la pratique & l'vsage des pieds a esté premier que celuy des mains; & partant, comme vous auez fort bien remarqué au commencement de vos discours, l'exercice de sauter & celuy de cheminer a tousiours esté pratiqué d'un chacun indifféremment, & pris aussi pour mesme & semblable chose, comme assure Athenee en son quatorziesme liure, disant que le mouuemēt des pieds a esté trouué auant celuy des mains, & à ce propos il vient à parler de la diuersité des sauts. Parquoy ie diray avec Scaliger, qu'encore que le saut & la luitte soyent tres-anciens exercices, si est-ce que le bal & la dance ne le sont pas moins, veu que de tout temps entre les premieres chançons de l'Art pastoral, quel'on trouue auoir esté le premier de tous les autres, ils furent par les anciens Pasteurs, mis en vsage pour le plaisir & recreation de la vie rustique; & par consequent que l'art de faire mille gestes avec les mains, le masque, ou visage descouuert, ne fut trouué sinon fort tard, dont ie veux inferer & prouuer que le bal & la dance, dont nous auons accoustumé d'vsfer sans faire aucuns gestes, se pratiquoit ainsi des anciens long temps auant tout autre exercice; bien que depuis, l'inuention des hommes aye adiousté à la disposition naturelle quelques artifices & embellissemens pour donner d'auantage de plaisir; ce que nous pouuons voir dans vne infinité de bons Auteurs, cōme Homere, Platon, Aristote, Xenophō, Strabo, Plutarque, Galien, Iulius Pollux, Lucian, & Athenee, lesquels & principalement le dernier, racomptent l'art & l'inuention de plusieurs & diuers sauts, & tels que nostre Archange les met au iour d'huy en pratique, avec vne telle force & disposition, que chacun l'a en admiration, ayant par sa dexterité, promptitude

## LE I. DIALOGVE

& viuacité, comme refuscité ces beaux exercices, ne voulant que des threfors si rares & excellents de l'antiquité fussent enseuelis & mis en oubly par vn morne silence. Or ie n'estimerois pas auoir assez dignement recommandé le saut, le bal & la dāce, si ie n'en faisois vne distinction fondee, & accompagnée de la coustume & autorité des Anciens, puis que c'est vne chose euidente que le bal & la dance qu'on fait sans gestes & mines, est vne certaine espece separee des autres; & que cest exercice a esté peu à peu reçu & confirmé par les siecles suyans pour seruir d'honneste recreation & de plaisir à toutes sortes de personnes. Et quant au recit des miracles qu'ont produict ces beaux exercices, que vous desirez que ie vous represente pour contenter ceste noble compagnie, ie ne doute point que l'on ne die & prouue par raisons que ce ne sont que choses naturelles qui se peuuent comprendre, n'y ayant rien d'extraordinaire pour faire iuger que ce soyent des miracles: Je vous veux toutesfois aduertir que ie n'entends pas parler de ces miracles qui sont sur les forces de nature ordinaire, mais seulement qui sont rares, surpassants le commun iugement & entendement des hommes; & bien que la cause en soit naturelle, si est-ce que bien peu la cognoissent pour iuger comme il faut des euene-ments d'icelle. Ne vous semble il point vn miracle ce que ce grand personnage Iean Baptiste Ramnuso raconte d'vne ville en Afrique, qu'on nomme Vmenguinat, laquelle fut destruite & ruinee par les Arabes, & laquelle est fort proche du mont Athlas, où il faut que ceux qui veulent passer par vne jssuë, ou montagnette, qui luy est d'un costé fort proche, y passent dançant, autrement la siebure leur viendrait. Ce qu'on a veu aduenir à plusieurs personnes, ainsi que l'histoire le recite.

**Cos.** Mais pourquoy n'adioustez vous que l'apostille en marge est vne vraye superstition.

**FERR.** Je le vous aurois dit si vous ne vous fussiez tant hasté; Mais si tout ce qui vous semble estre superstition estoit faux (d'autant que nous n'en pouuons souuentefois trouuer la cause) combien y auroit-il de choses fausses? Mais soit comme l'on voudra, que me direz vous de ces maladies qui se peuuent guarir seulement en dançant, ou en balant? C'est chose certai-

ne & nela pouuez nier, que les personnes qui sont mordus de la Tarentole; selon l'impression differente de ce poison & venin, rient incessamment, les autres pleurent, les autres tremblent; aucuns estans insenssez deuiennent furieux & enragez: mais si tost qu'ils commencent à entendre le son de la musique, & ses harmonieux instruments, ils se mettent à dancier & sauter, de sorte qu'ils se trouuent en singueris & deliurez de ce mal qui les presse. Il se lit dans Amatus Lusitanus excellent Philosophe & Medecin, qu'il a veu par experience au pays de la Pouille, subiect au Royaume de Naples, infinies personnes qui auoyent esté mordus & picquees, iusques à deuenir enragees, de certains animaux venimeux, qui naissent comme petits vers en ce pais là, auoir esté guaris par le moyen de la musique qui les excitoit à dancier, & telle dance leur seruir de vraye & assuree medecine. Theophraste aussi fort graue & ancien Autheur assure avec plus long discours la mesme chose; concludant en fin que les personnes picquees ou mordus des Phalāges, & autres tels Animaux venimeux, sont guairies par le remede du son harmonieux de la dance & du bal. L'incomparable Homere dit que le saut fait avec mesure conforme au temps proportionné des cadences de musique, est plustost vn vray don, & grace des Cieux; que de la terre, don digne de l'homme, & non d'autre animal qui est entre tous les animaux viuants, (comme dit Trismegiste) vn Dieu, mais mortel.

Cos. Je ne veux nier que les effects qu'auuez racontez ne soyent dignes d'admiration, mais vous sçauiez que leur cause naturelle procede de la vertu & force de l'exercice que font en dancier les malades, qui fait qu'ils sont plus forts & gailards à resister & chasser plus aisément hors de leur corps le venin de la maladie par le moyen de la sueur & vomissement, & autres tels actes naturels, dont ils viennent à descharger l'humeur melancolicq' & veneneux; Ce qui n'aduiendroit si la nature n'estoit secouruë de cest exercice, qui est l'une des principales parties qu'ayent les plus excellents Medecins en singuliere recommandation, selon l'art & doctrine d'Hippocrates, de Galien & Auicenne; estant la nature excitee à faire cest

## LE I. DIALOGVE

effect que vous nous auez quasi en dançant allegué.

FERR. Je me resiouys puis que parlant en vray Philosophie, vous auez en disputant fait soubrire ces Seigneurs, en disant que ie vous aye allegué ces susdits exemples quasi en dācant; encore que ceste interpretation se puisse prendre en forme d'equiuoque. Il me suffit pourtant vous auoir fait cognoistre que ie puis estre employé à defendre quelque chose de plus grande importance; & si ie ne me trompe, il me semble n'auoir assez satisfait à ce que i'auois proposé; puisque suyuant ma diuision, ie n'ay pas déclaré quelle est la quatriesme espeece de sauter & baller, laquelle pour estre la derniere (& pour nous estre extrauaguez ailleurs) a esté aucunement oubliée.

COS. Mais plustost par vous, que par moy: Car quant à à moy ie vous en aurois fait souuenir; seulement pour voir entierement la forme de vostre defence: & ne pensez que ie me mocque comme vous dites ordinairement; Car tenez pour tout asseuré que qui sçaura bien defendre & gagner vn procez mal fondé, que celuy-là, dy-je, sera beaucoup plus prisé & admiré, que qui le gagnera ayant le droict & l'equité de son costé.

FERR. Je vous remercie de la louange que me donnez sans qu'elle m'appartienne: Mais pour cela ne veux-je laisser, (encore que ie ne sois de vostre opinion) de disposer tellemēt vostre inuentiō, pour en partie satisfaire à l'autorité de quelques grands personages; mesmement de quelques Theologiens; qui ont escrit directement contre ces exercices que vous venez tout maintenant de louāger en vostre discours de la Gymnastique, qui a tel poix, & autorité en vostre endroict, que vous voudriez volontiers qu'on la remit en ces nouveaux siecles parmy tous les Estats & Republiques, en bannissant toutes sortes de bal & de dāces, sans mesmes en excepter vne seule. Que si cela est ainsi, vous aurez affaire à forte partie, comme à Tertullian, à S. Augustin, à S. Hierosme, & autres infinis Theologiens & saints personages, voire à de tres-doctes modernes, qui tous ont escrit contre la plus grande partie de vos exercices Gymnastiques: Et par viue force de raison ils ont

prouué, suyuant nostre foy & religion Chrestienne, qu'ils sont dignes d'estre entierement bannis, pour estre l'occasion de tout mal, & la seule cause de la damnation d'infinité d'ames. D'auantage vous aurez à partie ce grād Medecin Galien, lequel d'vne cholere incroyable, non seulement blasme, mais aussi iniurie plusieurs exercices, & particulièrement les Gymnastiques, & par sus tous celuy des sauteurs, les appellāts lourdaux, poltrōs; endormis, maladifs; tiltres à la verité tous contraires à la disposition & force que vous auez prouué proceder de la Gymnastique. Mais quelle responce ferez vous à Euripide, à Hippocrate & à Platon qui en disent presque autant; que respondrez vous à Plutarque, qui compare les sauteurs, luitteurs & autres maistres des exercices qui se practiquoyent à la Palestre, & à leurs colleges, aux rochers, aux cailloux, aux pilliers, & aux poutres de leurs escholes? Adioustant d'auantage que rien autre n'a introduict en Grece la lascheté, & coüardise de courage d'entre les hommes, & par consequent la seruitude vniuerselle de tous, que le seul curieux exercice de sauter, lequel auoit rendu le cœur & le corps des Grecs si lasches, & si mols, qu'il n'y auoit celuy d'entre-eux qui ne se glorifiast d'estre plustost vn grand sauteur, qu'vn braue & vaillant soldat.

Cos. Maintenant suis-je certain que le iour nous defaudra, sans que nous ayons ouy aucune chose de ce que nous auons sur tout tant desiré, puis qu'il me faut pour defendre le droict & la cause de la profession des sauteurs (comme si mon honneur y estoit engagé) donner l'interpretation de toutes vos autoritez alleguees, & suiuant le vray sens des autheurs qui les ont escrites. Et encor que le S. Baptiste, & le S. Pin arriuaissent tout presentement, si feroit-il impossible, pour le peu de iour qui nous reste, les pouuoir auioird'huy ouir discourir; puis que le garçon a respōdu qu'il le estoit allé chercher tous deux pour les faire icy venir.

FERR. Vous allez tousiours cherchant l'occasion de fuir l'entreprise de laquelle encores q̄ cōme vous dites l'honneur vous appartienne, vous l'abandonneriez toutesfois volōtiers si ie le voulois permettre: Mais, que diroit nostre S. Archange,

## LE I. DIALOGVE

ſien preſence de tant de Seigneurs il ſe voyoit abandonné de vous, ſans aucune bonne deſenſe telle que requiert la vertu, qualité & mérite du tref-ancien art de ſauter? Et puis que vous l'auiez auioird'huy tant loüé, ie ne vois nulle apparence que puiſſiez ſans deſhonneur permettre (ou en vouſtaifant, ou n'y reſpondant point) qu'autre le blaſme & en die du mal. Le ſeruiteur a dit que les ſieurs Baptiſte, & Pin deuoyent venir apres luy : Mais ſur ma foy les voicy venir à grands pas.

Cos. Que vous dit le S. Archange? A-il parauēture pœur que ie ne ſois baſtant pour le bien deſendre contre vos obiections, & ſon art & ſa profeſſion encore?

FERR. Au contraire, il m'a prié de ne vous forcer à diſcourir d'auantage, ſi vous ne l'auiez agreable; veu qu'il ſ'eſt apperceu que n'en auiez pas grand deſir, & que toute la compagnie n'en ſeroit beaucoup contenté, meſmes ſelon mon iugement le S. Tetti; toutesfois voyons ce que nous voudra dire le S. Pin, qui eſt arriué à ſi grand haſte.

PIN. D'autant que ie n'ay peu mettre ſi toſt en ordre toutes les choſes neceſſaires pour les ſauts du S. Archange, qu'il plaift à ſa Maieſté voir ſauter apres ſouper, il vous plaira Meſſieurs pardonner, ſi i'ay tant tardé à venir.

FERR. Sur mon Dieu ie m'en reſiouys, plus que ſi auioird'huy i'auois gaigné mon procès. Et à tout le moins ſi ces Meſſieurs n'ont peu ouyr ny vous, ny le S. Pin, ſur les diſcours que ie ſuis aſſeuré que vous ferez demain; du moins verront-ils ſauter en preſence du Roy le perſonnage duquel ils ſe ſont tant eſmerueillez; ne pouans croire qu'il puiſſe, (ſuyuant l'apparence humaine) paſſer & tourner en l'air tout ſon corps par le milieu de dix cercles, qui ſont diſtans les vns des autres d'un grand pied & demy, & eſleuez en l'air tant que huit perſonnes ſe peuuent hauſſer.

PIN. A propos, ce qui m'a fait tant tarder, ç'ont eſté ſes cercles, cars'en eſtant rompus quelques vns par la faute du ſeruiteur, il nous a fallu les reſaire; ſi bien que les ſieges, les bancs, les tables, le trefpié, le marche pié, le ſac, & bref tous les outils neceſſaires pour ſauter ſont maintenant tous preſts &

mis en ordre comme il les faut.

Cos. Il me semble à vous ouyr parler que i'oy dire par ordre tous les meubles d'une maison; & que le S. Archange menaçant son seruiteur luy aye dict milles iniures. Mais dictes moy ie vous prie, tous ces preparatifs sont-ils necessaires pour sauter?

PINO. Pardonnez moy, Monsieur, ils seruent à plusieurs autres choses, comme la table, pour y manger dessus, les sieges, le trespié & le banc pour s'asseoir:

Cos. Sur mon Dieu sa belle & prompte response fait qu'il a raison.

FERR. Que vous en semble: pour certain il se souuient des equiuoques vsitez en Logique. Mais si vous voulez rire tât soit peu adioustez ceste-cy. Comme le seruiteur d'Archange voulut faire venir en ce iardin les habilles fauteurs, il leur dict que le Roy avec grande compagnie parloit avec Archange son maistre, & que sans doute sa Maiesté le vouloit voir sauter apres souper. Accordez ces fluttes ie vous prie. Comme s'il n'eust pas esté beaucoup meilleur à voir de iour la beauté de tant d'extravagants sauts. Et quant à ce que vous auez demandé au Pin, sa response est excusable. Car quand vous eustes parlé, cela luy fit penser le contraire de ce que vous pensiez, qui estoit de sçauoir si tous ces preparatifs de tables, de bancs, & autres estoient conuenables pour le seruice de tant de sauts, auxquels le S. Archange se vouloit exercer pour donner passe-temps & plaisir à sa dite Maiesté.

Cos. Je ne m'esbahis pas s'il n'a pas entendu mon dire, pour ne sçauoir bien parler François. Mais que diriez vous d'une plaisante response que feit vn autre seruiteur à son maistre, qui estant fors malade au lict, & ayant esté trouuer le Medecin avec l'vrine de son maistre, & luy ayant fait entendre sa mauuaise disposition; le Medecin ayant considéré la couleur, & le temperament del'vrine de sondit maistre, dit au varlet, retourne-tan à ton maistre, & luy dy que demain ie l'iray voir; qu'il faudra qu'il se face purger & seigner, & qu'il ne s'abuse pas, car il est remply de fort mauuaises humeurs; & si bien-tost on n'y remedie, il est en danger de deuenir hydropique, & sem-

## LE I. DIALOGVE

blable à vn ethique & oppilé. Le seruiteur vient, & dit à son maistre, monsieur, le Medecin m'a donné charge de vous dire, que demain il vous viendrait voir, & qu'à la verité vous estes plein de mauvaises humeurs, & en danger de deuenir hypocrite, voire heretique comme Pilate, si bien-tost vous n'y faisiez remedier. Le conte à la verité auroit plus de grace en Italien, d'où il est tiré qu'en autre langue; mais quoy que ce soit, on en peut rire.

FERR. En effect, ces sottises responses, si elles ne sont faites bien à point, au moins sont-elles plaisantes & facecieuses. Mais pour reuenir à nostre propos, ie serois bien aise de vous ouyr discourir sur la responce que vous voulez faire aux authoritez qu'auetz cy dessus alleguees, bien qu'elles soient contre vostre opinion.

COS. Vous voulez doncques selon que ie voy, que nous n'entendions aucune chose du S. Baptiste, & de M. Pin, touchant la perfection des fauts, ce qui seroit faire tort à nostre Archange, qui les a fait venir icy à ceste occasion.

FERR. Parce que l'heure du souper approche, il ne seroit pas possible que ny M. Baptiste, ny M. Pin peussent parler amplement des discours que nous tous desirons ouyr, pour bien entendre l'art & maniere qu'il faudroit obseruer, suyuant leur intention pour deuenir parfait saltarin, voire avec telle agilité & disposition qui se voit en Archange. Partant s'il plaist à la compagnie, ie serois d'aduis que nous missions fin aux discours qu'auons encommencez, desquels il nous en reste fort peu à dire; & que nous remissions à demain la partie; à celle fin de mieux voir & comprendre à nostre aise ce que les gentils saltarins ont eue de nous monstrier non moins par viues raisons, que par les effects mesmes.

PIN. A ce que ie vois M. Baptiste & moy auons esté mal instruits de ce lourdaud de varlet; car contre nostre opinion vous nous auiez fait venir pour discourir de l'art & exercice de bien sauter; chose impossible à faire (comme a dit le S. Ferrand) car estant jà tard, nous n'en pourrions discourir suffisamment, veule long temps qu'il faut consommer à vous faire voir la forme & l'acte de quelques fauts; ce qui ne se peut faire sans que



que quelqu'un de nous les face en effect pour en monstrier la pratique & l'usage, afin de les mieux entendre. Parquoy ie vous prie nous vouloir excuser pour le reste de ce iour, & pardonner à la sottise de vostre varlet, lequel nous a dit tout autrement que ne luy auiez enchargé.

FERR. Et vous S. Cosme qu'en dites vous?

COS. Ie m'en remets à ce que la noble assistance voudra; puis que tous ensemble avec le S. Tetti, s'y sont accordez.

FERR. Vous voyez qu'ils vous prient demain à dîner en ce mesme lieu si beau & plaisant, en esperance d'ouyr vos doctes discours, pour la defence de l'art, & exercice de la Gymnastique.

COS. Et puis qu'il plaist à la compagnie ie vous le promets, pourueu aussi qu'il vous plaise nous declarer auant que nous departir la quatriesme espece de sauter, & baller, & nous monstrier quelle elle est; car suyuant le contentement que i'ay de vos belles conceptions, ie seray mieux disposé à vous rendre content des miennes, & par ce moyen nous donnerons plus briuevement la conclusion que ceste compagnie attend de nous.

FERR. I'espere tost me deliurer de ceste derniere partie, laquelle i'entends consister en l'usage de sauter & baller, qu'on voit aujourd'huy obseruer en plusieurs prouinces, mesmes entre personnages Plebeiens, sans obseruation des temps, proportions & mesures que les hommes ont par le moyen de l'art de Musique inuenté peu à peu, les faisant tomber en accord ensemblement, n'estant mis en doute ce qu'un chacun sçait, & peut naturellement faire plusieurs & diuers sauts sans aucun aide, ny obseruation des reigles, & proportions, ou preceptes de l'art, comme l'on peut dire du bal & de la dance; & ceste est la plus ancienne espece de sauter & baller, & par conséquent la premiere, bien que non sans propos i'en aye discouru apres les autres.

COS. Certes il falloit mettre ceste-cy au premier rang, & non au dernier, veu que c'est la plus ancienne: Mais ie viens

## LE I. DIALOGVE

maintenant à comprendre l'artifice de vostre intention, ayant dit que non sans propos vous l'avez ainsi fait, parauēture pour ce qu'elle peut estre en commun & la premiere & la derniere, puis qu'il est certain qui sautent, dācent & ballent sans aucune iuste mesure, ny obseruation du temps, & sans art, sont en beaucoup plus grand nombre, que ceux qui obseruent exactement les reigles & mesures, les proportions & autres preceptes de l'art, & ainsi se delectēt de baller & de dācer; ce qui est seulement propre aux animaux raisonnables, veu que la disposition de sauter est aussi commune à tous les autres animaux.

FERR. Ce que vous dites est tres-certain; toutesfois ie l'ay fait aussi d'autant qu'il estoit necessaire d'esclaircir premierement toutes vos raisons precedentes, pour n'auoir peu reuoker en doubte la signification & propriētē du nom & verbe de cest exercice du saut. Car puis qu'en Latin il ne signifie vne seule action, mais plusieurs, & icelles differentes l'vne à l'autre, il falloit commencer par sa plus propre signification, laquelle est suyuant ce que vous avez dit, commune au verbe *Salio. salis*: Et puis descendre de main en main, comme i'ay fait par le moyen de vostre aide à la declaration des autres significations.

COSME. Il ne falloit parler de mon ayde, si vous ne voulez d'auanture appeller aide, la contradiction dont i'ay vsé pour m'opposer formellement à toutes vos propositions. Mais pour retourner à nostre propos, il ne faut douter que le bal & la dance (comme dit Scaliger) ne soyent naturellemēt fort anciens, puis qu'ils estoient desia en vsage entre les personnes du premier siecle sans musique ny chansons: Mais qui ne sçait que depuis ce temps là tous les arts ont receu quelque accroissement & embelissement par les hommes, & les choses naturelles ont commencé peu à peu à estre polies & reglees. I'ay dit les choses naturelles, pource que l'art de soy ne peut estre ny monstrier ses effects sinon par le moyen de la nature. Pour exemple, l'art du saut, du bal & de la dance seroit nul, si le mouuement qui est vn effect naturel en nous, ne s'y trouuoit pour e-

xercer ses fonctions, comme vn moyen infallible pour pou-  
uoir courir ou sauter, mesmes que bien souuent nous n'y pou-  
uons pas plus avec art, que sans art : mais l'art a esté adiou-  
sté pour disposer, & reigler le mouuement de nostre corps  
avec quelque grace plus grande que celle que nous ministre  
la nature.

FERR. Puis que nous sommes venus à parler de l'art,  
discourons en ie vous prie amplement, & y apportons tout  
ce que nous auons & d'art & d'industrie; Car il y a long temps  
que ie desire sçauoir que c'est qu'art, science & pratique, suy-  
uant la vraye cognoissance de leur premiere signification, la-  
quelle encore qu'il semble qu'elle soit assez commune, & que  
on s'en serue, & en parle à tout propos; si est-ce toutesfois que  
l'experience m'a appris, qu'il y en a fort peu qui en sçachent v-  
ser comme il appartient & en parolles, & en actions, pour  
tirer vne conclusion certaine & asseuree de toutes choses,  
suyuant les diuerses questions qui sont souuent agitees & mi-  
ses en controuerse d'vne part & d'autre.

COS. Je veux premierement defendre l'art & l'exercice  
du saut avec toute la Gymnastique contre le blasme des autho-  
ritez que vous auez cy deuant alleguees, & puis s'il nous reste  
du temps, nous parlerons de l'art en general, de la science, & de  
la pratique, & en dirons ce que nous en sçauons, pour auoir  
cognoissance de leur propre & vraye signification. Ce que ie  
desire autant que vous pour l'amour de ceste noble compa-  
gnie qui est icy presente, laquelle desire fort de voir sauter, &  
d'en ouyr discourir, afin de se rendre plus sçauante & en la theo-  
rique, & en la pratique du saut. Or pour respondre aux autho-  
ritez des saints Peres, & autres Theologiens anciens & mo-  
dernes que vous auez proposees, ie dy que l'on ne trouuera ia-  
mais dans leurs escrits, que leur intention soit telle, que fini-  
strement vous auez voulu accommoder leur interpretation  
à vostre sens, & tirer les passages de l'Escripture par les cheueux;  
D'autant que s'ils ont blasme l'exces & l'abus qui se commet-  
toit en l'exercice des gladiateurs pour les grandes despences,  
outre les cruantez barbares qui s'y exercoient & practiquoient.

## LE I. DIALOGVE

& autres tels inconueniens qui en procedoyent. Ceste profession neantmoins estoit de ce temps là en reputation, & y en auoit vne infinité qui y prenoyent plaisir. Cela n'a rien de commun avec nostre Gymnastique. Qui est celuy qui ne blasme roit tels spectacles de gladiateurs & tout leur exercice, où avec si grande despence, & qui pis est encores avec vne barbare cruauté l'on voyoit meurtrir, mourir & demeurer estropiez vne infinité de personnes, pour complaire seulement à la veüe du peuple? & toutes fois les Anciens nommerent telle Barbarie, jeux, ou spectacles publics. Mais qui n'escriroit contre tels exercices, qui ne se ruent ny pour conseruer la santé, ny pour s'en ayder en guerre, ny mesmes pour s'en seruir en paix sans reprehension? Car vn chacun sçait que rien ne peut ayder, ny seruir à l'homme, qui ne soit fait avec moderation, tant de la chose que de la personne; Ce que nous voyons n'estre exercé ny pratiqué en ces exercices de gladiateurs. Côme aussi nous pouuons dire, que qui ne voudroit faire autre chose que sauter, baller & dancier, au lieu de conseruer sa santé, la perdrait, & au lieu de se trouuer fort, gaillard & dispos pour le seruice de la guerre, se trouueroit au contraire foible & debile pour l'exécution d'une telle charge. Car, suyuant la sentence d'Horace, il y a certains termes & bornes prefix, dans lesquels se faut contenir pour viure selon droit & la raison, & lesquels si nous venōs à outre-passer, nous nous fouruoyēds du droit chemin de la verité, & du deuoir de la vertu que nous recherchons. Et partant ne se faut esbahir, ny trouuer estrangé si de tout temps les doctes & saincts personnages ont escrit & parlé cōtre les vices & abus qui se commettent en toutes sortes de professions. Mais dictes moy ie vous prie, l'escrime n'est-ce pas vn Art necessaire pour se sçauoir defendre contre les ennemis, & par consequent vn loüable & vertueux exercice? Et toutes fois il seroit plustost vice que vertu, si les hommes qui l'enseignent, ou qui l'apprennent, n'obseruoyent diligemment & exactement les actions qui appartiennent à la vertu. Que si Hippocras, Galien, & autres grands Medecins ont (comme vous auez allegué) si doctement escrit & parlé contre aucuns Maistres

d'exercices qui estoient de leur temps en la Gymnastique, on ne doit, ny ne peut-on de la conclure qu'ils ayent entendu parler contre tous les exercices en general. Et qui est celuy qui ayant diligemment leu les escrits des anciens Autheurs, ne sçache que la vie des Athletes estoit tres-vicieuse, digne de toute punition pour leurs mœurs corrompuës & pernicieuses, (tant s'en faut qu'ils ne fussent dignes de blasme & de reprehension) ayants conuertý la qualité de leur excellent & noble exercice en choses infames, pour seruir à leur ambition & auarice. Depuis que l'on preferé l'vtilité à l'honnesteré, il est impossible que l'on ne soit entaché du vice d'auarice, qui nous faict postposer l'honneur au proffit. Or comme toutes choses se corrompent avec le temps, cest exercice estoit au commencement fort prisé, comme estant hōneste, loüable & vertueux; mais depuis par la malice des hommes a esté tellement alteré, & changé, que l'vsage & la pratique en a esté du tout peruertie, en sorte qu'il en est forty mille desordres & confusions. Et ainsi en peut-on dire de tous les autres exercices. Que si ceste profession Athletique se fut maintenüe en sa premiere dignité, sans en abuser, qui doute que tant le Medecin, que le Philosophe ne l'eussent loüee comme vn fort bon exercice, & comme ils ont faict plusieurs autres, lesquels ils n'ont trouué auoir outre-passé les bornes & limites de la vertu. Tellement que (mon cher Ferrand) les spectacles publics, & les jeux que l'on appelle extrauagants, comme les susdicts gladiateurs, & autres festes qui se faisoient anciennement aux Theatres, Amphitheatres, & Cyrques, avec tant de despence, & de meurtres, introduisants souuent les hommes à combatre avec les bestes sauvages, sont les exercices que ces saincts personnages ont à bon droit blasmez & condamnez. Et s'il vous souuient, le mesme Tertullian que vous avez allegué, parlant de plusieurs abus qui regnoient de son temps, va reprenant la sottise & vanité des Gentils, qui auoyent mis au catalogue des Dieux quelques Athletes, & autres vaillants hommes és exercices Gymnastiques, condamnant vne telle idolatrie, digne d'vne punition exemplaire. Mais ces bons personnages pour cela n'ont entendu blasmer,

## LE I. DIALOGVE

ny condamner les exercices qui seruent à la conseruation de la santé, ou à combattre pour le país en temps de guerre. Plutarque mesmes ne pensa iamais blasmer la Gymnastique, ny aucun des exercices d'icelle; mais bien la nonchalance des Grecs qui manquoient & de sagesse & de iugement en l'vsage de leur profession, lesquels au lieu d'en bien vser, auoyent tant peruertie & corrompu. Ce qui a peut estre donné lieu aux serfs & seruitudes que nous auons encores aujourd'huy en beaucoup de lieux, plus frequentez & vsitez du temps des Grecs. Or Hippocras, ny Galien, comme ie vous ay desjà dict, ny autres Philosophes & Medecins, n'ont point condamné en general les exercices, mais bien l'excez & perte du temps, la despenſe excessiue, & autres abus qui se commettoient en chacune profession. Ce que nous pouons voir ayſement, & comprendre par leurs escrits, comme parauanture nous pourrons demain discourir plus amplement, & plus à propos. Et encores que l'on puisse dire que lors que Galien escriuit tant d'iniurieuses paroles contre les Athletes, ce fut au temps qu'il se trouua mal disposé, pour s'estre gasté les iointures d'une espaule, ayant voulu faire du vaillant luitteur & fauteur avec ceux qui s'exerçoient aux lieux Gymnastics; veu que luy mesme afferme que cela luy aduint en l'an trentiesme de son aage, & ne se faut esmerueiller si estant transporté de cholere il auoit ainsi escrit contre eux; si est-ce pourtant que les vices ne doyuent estre soustenus, & ne faut douter que ceste profession Athletique ne soit grandement descheuë de sa premiere splendeur & dignité; bien qu'anciennement elle fut si noble & illustre, que tous les Senateurs se tenoyent debout pour faire honneur aux Athletes qui entroyent au theatre pour s'exercer & combattre, suyuant l'observation de leurs solemnitez. Qui plus est on trouue ésloix de Vlpian ces paroles escrites, Si à la luitte, ou au pancrace, ou faisant à coups de poing, & pendant le temps que l'on combat l'un avec l'autre, il aduenoit que quelqu'un mourust, la loy Aquilia n'y pent auoir lieu, presupposant que pour l'honneur & la vertu, & non par iniure la mort s'en

soit ensuiuie. Et ne veux permettre que Platon s'en aille (comme on dit) avec les mains lauees : car nous lisons qu'il fut premierement Athlete, que Philosophe.

FERR. Ie ne veux que vous pensiez qu'on ne puisse trouuer aussi bien quelque Loy en faueur de la dance & du bal, que de vos exercices si dignement loüiez & exaltez ; & me resiouïs fort de ce que vous auez allegué à ce propos. Sçachez doncques, S. Cosme, qu'entre les loix on trouue, que si vn tuteur, ou curateur auoit despensé quelque argent pour faire apprendre à dancer à ses pupilles, qu'il luy deuoit estre mis en compte, & remboursement sans aucune controuerse, ou difficulté. Que vous en semble?

COS. A vous ouyr dire, il me semble que si les danceurs & balladins vous cognoissoyent, ils auroyēt agreable que vous fussiez leur Aduocat. Mais ie ne sçay dequoy se soufrit le S. Tetti qui parle avec Archange.

TETTI. Ie priois (suiuant la volonté, & le desir de ces messieurs) le S. Archange de se trouuer icy demain apres disné, comme ils ont promis de s'y trouuer tous sans faute, pour ouyr le discours de M. Baptiste, M. Pin ses disciples sur son art du saut voltigé en l'air qui est entre tous les autres sauts le plus agreable, & auquel on prend le plus de plaisir. Mais quel bruit est-ce que i'entends?

BAPTISTE. Monsieur, c'est le Roy qui vient de la chasse.

FERR. Puis que la venuë du Roy nous a fait tous leuer, baïsant les mains à toute ceste noble compagnie, ie ne feray faute de reconduire le S. Archange, & l'accompagner où bon luy semblera, attendant en bonne deuotion le iour de demain.

COSME. A Dieu doncques sans baise-main; car quant à moy ie ne sçay pas beaucoup obseruer cette ceremonie Espagnolle, de baïser les mains à chacun pas à tout le monde, à chasque heure & à tous propos. Souuenez-vous doncques du prouerbe, qui dit, que c'est vne chose la plus fascheuse & ennuyeuse qui puisse arriuer à l'homme que

## LE I. DIALOGVE

d'attendre.

FERR. Il me souuient plustost de vos doctes discours que d'autre chose.

COSME. A Dieu M.Baptiste & M.Pin, ie me recomman-  
de à vous & à la memoire de ce que vous nous deuez faire ouyr  
& voir demain, Dieu aydant.

*Fin du premier Dialogue.*





# LE SECOND

## DIALOGVE.



Le desir d'apprendre & de sçauoir est cōmun, & particulier entre les hommes; commun, pource que tous generale-ment l'appettent: particulier; car il n'y a nul homme quelque gros & lourd esprit qu'il ayt, qui naturellement ne desire d'auoir la cognoissance des choses qu'il ne sçait pas, & qui concernent & l'esprit & le corps. Car si la faim a esté necessaire pour faire viure le corps, l'accroistre & se conseruer comme les autres animaux; ceste mesme faim luy faict souuenir de se maintenir, & son espece, tout le temps de sa vie, & aussi de rechercher les moyens propres, vtiles, & necessaires pour l'entretenement d'icelle. Ce desir est tellement nay & conioint avec nostre ame, qu'il n'en peut estre aucunement separé. C'est pourquoy nous desirons sçauoir, pour surmōter par le moyen d'iceluy, non seulement toutes les difficultez de ceste vie; mais aussi tant par foy, que par intelligence, comprendre les importants secrets de la vie à venir. Ce desir encore nous faict non seulement esleuer les yeux de nostre corps, de la terre au ciel, pour y contempler, comme dans vn miroiër, les effects merueilleux de la nature; mais avec ceux de l'ame penetrant plus haut, nous faict conceuoir la grandeur infinie, & diuine Maie-  
 sté de ceste premiere cause, de laquelle depend tout le sçauoir,

## LE II. DIALOGVE

& la cognoissance que l'on peut auoir de toutes choses, tant inferieures que superieures. Qui est cause qu'un grand Philoſophe Grec auoit accoustumé de dire, Que l'homme qui n'estoit esmeu de desir de sçauoir, deuoit estre moins estimé qu'une beste brute, & non seulement cela, mais que c'estoit vn monstre en nature, puis qu'il estoit si difforme & si different de la nature raisonnable de tous les autres hommes. Et bien que plusieurs puissent abuser de ce desir, se laissant transporter par leur sens, dont naissent vne infinité de maux; si ne faut il conclure incontinent, que du desir de sçauoir soyent proprement procedez tels maux, mais bien du desir vicieux, qui est inseparable de l'homme tant qu'il vit en ce monde: & ce defaut prouient du desordre & du peu de reigle, & mesure qu'il y a aux actions des hommes. Il faudroit que ce desir fut borné & limité par la raison, & contennaux termes de la vertu qui gist entre ces deux extremes, le trop, & le trop peu. C'est ceste voye du milieu, auquel nous deuons adresser non seulement nos desirs, mais aussi toutes nos operations, paroles & actions. Parquoy il ne se faut nullement estonner, si ceste noble compagnie de Gentils-hommes & Caualliers, desireuse de voir, de sçauoir & d'entendre les discours que nous nous sommes proposez de faire aujourd'huy, s'est trouuee en ce beau & plaisant jardin, pour jouir avec plus de plaisir & contentement de la presence, tant du S. Archange, que des sieurs Tetti, Baptiste, & Pin, qui ont volontiers accepté la charge de proposer à leur tour les raisons qui les ont meu de soustenir & defendre ces beaux exercices cy-dessus tant recommandez. Et d'autant que tous estoient jà assemblez avec silence, le S. Tetti cōmença le propos en ceste sorte.

TETTI. Il me semble, Messieurs, que la compagnie de ces nobles Seigneurs, à ce que j'ay peu entendre, auroit bien agreable, que suyuant la promesse que nous fismes hier, l'on commençast par la declaration de ces mots, *d'Art, Science & Pratique*; d'autant qu'il sont comme la baze, & le fondement principal & necessaire à toutes personnes qui font profession de sçauoir, ou de commander, ou de faire quelque autre chose que ce soit; ce que ie ne doute point qui ne vienne bien à pro-

pos pour continuer le discours des exercices & art de sauter, desquels l'on doit aujourdhuy voir & ouyr les raisons, ensemble l'experience tant par la theorique, que pratique, par le moyen des amis du S. Archange.

Cos. Je croy que le S. Ferrand ne faudra de son costé, non plus que moy du mien, d'obeyr & satisfaire au desir & commandement de vous, Messieurs; toutesfois il me semble qu'il seroit meilleur que nous attendissions l'opportunité qui se presentera entre les discours que les sieurs Baptiste & Pin doyuent faire; puis qu'il seroit impossible de parler de l'Art du saut, accompagné de la pratique que nous désirons voir du S. Archange, sinon qu'à quelque propos de vous autres on s'amusast d'exposer vraiment que c'est qu'Art, Science & Pratique. Parquoy il me semble bon (si ainsi plaist au S. Ferrand) que suyuant ce que nous resolumes hier, nous ne deuõs commencer à faire aucune chose, ou en discourir; mais plustost les susdits amis du S. Archange, suyuant leurs reigles appartenantes ou à l'Art, ou à l'experience du saut.

FERR. Je m'accorde volontiers à ce que le S. Cosme, & les autres Seigneurs commanderont. Parquoy il me semble que vous S. Baptiste, & vous S. Pin pourrez commencer à traiter & discourir des choses, lesquelles, suyuant vos reigles, sont considerables pour former & dresser vn autant fort & disposé sauteur, comme l'on peut voir en la proportion & disposition des sauts que nostre Archange fait avec vn si grand Art, & dextérité, que chacun l'a en admiration: car sans doute la susdicte Pratique naist de la theorique bien entenduë. Et c'est ce que ces Messieurs icy presents en general, desirent principalement de entendre, & chacun en particulier, pour sçauoir l'Art & la Pratique de deuenir bon & parfait sauteur.

Cos. Certes il est necessaire de bien esclaircir ces choses; car autrement il sembleroit à voir quelquefois le corps d'vn sauteur, que ce fust presque vn enchantement, comme se mettre en l'air avec vne telle dextérité & promptitude, qu'il semble que ce ne soit pas vn corps, & puis encore se tourner aucunes fois en figure Spherique, & autres fois se retourner contre le contre-poix & pesanteur naturelle de

## LE II. DIALOGVE

la personne, comme le vous fera voir Monsieur Pin.

BAPT. Vous m'auez enioint & commandé de discourir & traicter vne difficile, fascheuse & penible matiere, (encores qu'elle soit de mon Art,) laquelle me semble d'autant plus difficile, que ie vois tant de Gentils-hommes & Caualliers Auditeurs, lesquels par leur experience pourroyent bien mesmes, s'ils vouloyent, former & dresser avec le S. Roger vne generale Academie de toutes sortes de sciences : C'est ce qui me rend plus estonné d'entreprendre à discourir de telles choses deuant les sçauants. Toutesfois pour ne manquer à mon deuoir ie mettray toute peine de les contenter le mieux qu'il me sera possible, en traictant des choses qui appartiennent à la Maistrise de ceste profession de bien sauter; à fin que l'on puisse entendre le moyen qu'il faut tenir pour dresser & former vn parfait saltarin. Je diray doncques premierement que tout ainsi que les choses du monde ont tousiours certains principes, sur lesquels elles sont fondez, ainsi toute l'experience del'Art de bien sauter est presque du tout fondee sur la Pratique de sçauoir bien faire la volte en auant & en arriere, laquelle quiconque pourra bien faire, avec deux autres choses que ie vous declareray plus amplement, se pourra dire auoir acquis quasi toute la science de l'Art du saut: Ayant entendu de personnes doctes, si i'ay bonne memoire que celuy qui a appris les principes de quelque science, & les sçait bien entendre, a par ce moyen ja sçeu & appris plus que la moitié de toute la science, comme ie le vous pourray bien assseuer par l'experience que j'en ay faicte.

PIN. Bien que la volte soit vn grand commencement pour s'acquerir l'art du saut, si me semble-il pourtant que son fondement soit plustost vne belle & agile disposition naturelle, & vn iugement esueillé, accompagné d'une viuacité de courage, qui avec le temps rendent vn chacun parfait, non seulement en l'art de bien sauter, mais aussi en toute autre professiõ, & exercice que ce soit.

COS. Auparauant que par vostre discours vous passiez plus outre, ie vous prie de nous faire entendre, s'il vous plaist, que c'est que *volte en auant & en arriere*. Car il se pourroit bien

faire que nous tous, & specialement moy, ne vous entendions pas bien, sans la declaration, & explication des paroles de vostre art; puis apres nous verrons qui sera celuy de vous deux qui aura fait vn meilleur exorde de ses raisons, & discours à venir.

BAPT. La volte prise & entenduë simplement comme volte, sans ceste adionction (en auant ou en arriere) entre les fauteurs, s'entend que ce soit lors que quelqu'un sautant en l'air se retourne dessus dessous, ou pour mieux dire retourne son corps entierement en figure spherique en l'air auant qu'il finisse son saut, & retourne à terre, ainsi que le vous pourroit bien faire voir M. Pin par experience.

PIN. Fort volontiers.

BAPT. Messieurs, vous auez veu avec quelle promptitude & agilité il a fait deux sauts en vn instant, retournant entierement son corps dessus dessous, comme ie vous ay dit, estant esleué en l'air, auant qu'il eust, retournant en terre, finy ny l'un, ny l'autre saut. Or ceste maniere de parler *en auant* s'adiouste pour donner à entendre quand ceste volte du corps se fait tournant avec la teste en auant, comme se fait au contraire celle que l'on dit *en arriere*, pour demonstrier que ladite volte se fait lors qu'on retourne le corps, la face, & la teste en arriere.

COS. Le premier saut doncques que M. Pin a fait avec si grande promptitude, est celuy de la volte en auant, & le secõd est de la volte en arriere.

BAPT. Ouy, Monsieur.

COS. Sçachez que l'art & profession de sauter est si ancienne, que le pere d'ancienneté, & des lettres Homere en fait mention. L'on se sert de ceste volte lors que l'on veut faire voir avec merueille vne infinité de sauts quasi incroyables à celuy qui ne les auroit iamais veus.

BAPT. Degrace, Monsieur, ie vous prie faites nous ceste faueur & courtoisie de nous declarer amplement cette antiquité, en laquelle on trouue mesmes que les fauteurs se seruoient de la volte; Car ie n'ay iamais trouué personnage, qui m'en aye peu donner l'expositiõ, ny refoudre de ceste maniere de sauter

## LE II. DIALOGVE

avec la volte en l'air.

Cos. Homere en son Odyssée & autres lieux, entre plusieurs sortes & differences de sauts anciens, qui ont esté recueillis par plusieurs auteurs, Hierosme Mercurial, les a reduits à trois especes, voulant qu'on nommast la premiere *Cubistique*, non sans vn loüable iugement, la seconde *Spheristique*, & la troisieme *Orchestique*. Or Homere raconte qu'il y auoit de son tēps quelques fauteurs, qui sur la fin des banquets de leurs Demy-Dieux fautoyent, se tournants sur leurs testes en la forme d'une rouë.

Bapt. L'on pourroit dire qu'ils le faisoient sur la terre, & non esleuez en l'air : Car il y a grande difference entre la rouë que fait le corps eslançé, & esleué entierement en l'air, & la rouë que tous peuuent ordinairement faire, ayants les mains, ou autre partie du corps appuyez sur la fermeté de la terre, ou d'une table, où ils ont de coustume faire leur saut.

Cos. Cela peut estre, mais il faut noter qu'il dit qu'ils se lançoient de fort loing pour former vn tel tour & retour que vous appelez volte; ce que n'auroit pas dit Homere pour signifier la force de ce verbe *eslancer*, & se ietter de loing pour donner à entendre la longue distance & hauteur du saut, si la volte, ou bien la rouë du corps se fust faicte estant peu ou beaucoup appuyé à terre. Et Iacques Dalechamps diligent & exact chercheur de l'Antiquité, monstre bien auoir entendu ce que ie vous dis, en ces doctes Annotations & recherches qu'il a faites sur les liures d'Athenee : & mesmes le grand Budee en ses Annotations monstre qu'il a suiuy la mesme interpretatiō : outre qu'il n'est vray semblable qu'en presence de tāt de demi-dieux (que ie vous ay dit qu'Homere allegue) aucun se presentast parmy tant de banquets, qui ne fust choses rares & dignes d'admiration. Et est à croire qu'il n'y auoit que les plus habiles qui s'y trouuassent, pour faire paroistre la grande agilité, & adroicte disposition de leurs corps.

Ferr. Je vous assure de verité que ie ne me serois point aduisé de ces belles authoritez d'Homere, encores qu'il me souuienne bien que Budee en ses Annotations, fait mention du *Petaurum*, & des *Petauriste*, les prenant pour ceux que les

Grecs nomment *κυβιστής*, ce que vous auez obmis parlant du dit Dalechams, lequel n'est beaucoup content ny satisfait de ceste interpretation de Budee, disant qu'il auoit exposé ce que il ignoroit par le moyen d'une autre interpretatiō, qui est mesme ignoree des Latins.

Cos. Vrayement il a quelque raison: mais on pourroit respondre que Budee presupposoit que le nom des *Petauriste*, fust desjà cognu & entendu par le moyen de cest œuure curieuse des iours geniaux composé par Alexander ab Alexandro Neapolitain, lequel fut mesme Iurifconsulte; D'autant que au vingtviuesme chapitre de son troisieme liure, parlant de plusieurs jeux & exercices, dont se seruoyent tant les Romains qu'autres nations, il dit qu'on nommoit *Petauriste*, ceux qui d'une fort prompte & viste course passoyent volants sur la fin par le milieu de quelques cercles esleuezen l'air sans rencontrer, ny aucunement toucher la circonference desdits cercles, tant ils scauoyent bien & dextrement obseruer la conformité, & proportion du corps, y entrepassant les membres avec telle agilité & disposition, qu'ils n'y hurtoient en aucune maniere. Ce qui est remarqué aussi par les vieux Interpretes de Iuuenal en sa xiv. Satyre.

FERR. A la verité, vous auez, à mon iugement, mieux que nul autre exposé ceste difficulté, & par mesme moyen defendu l'autorité de Budee digne de toute louange; D'autant qu'il seroit impossible qu'aucun peut passer outre les cercles, s'eslançant du tout par la course au dedans, qu'il ne feist au milieu auant que d'en sortir, la volte parfaite; car autrement il se romproit le col.

PIN. Il n'y a nul doute, Monsieur; car on entre aux cercles la teste deuant, & on vient dehors sur les pieds, ainsi que i'ay appris de mon vnique S. Archange, qui est celuy qui m'a enseigné ce que ie scay dire, faire, ou entendre en cest art de sauter.

FERR. Desorte que la volte est à ce que ie vois autant necessaire pour estre Cubistère, que Petauriste, & n'y a entre eux autre difference, sinon que le Petauriste fait ceste volte du corps dedans les cercles, & les Cubistères la font sans cer-

## LE II. DIALOGVE

cies, selon l'opportunité & occasion qui se presente à leur volonté, & selon leur desir, fautant d'une sorte ou d'autre, comme il leur plaist. Et non sans iugement fort grand a le docte Mercurial interpreté ce mot Grec *κυβιστηγοι*, le nommant en Latin *Cubistici*, si nous voulons former le substantif de la Cubistique qu'il met pour la premiere espece de l'exercice du saut; D'autant qu'ayant iceluy veu & considéré que les Grecs auoient pris ceste similitude du tour que font les dez qui sont iettez lors qu'on iouë au tablier, ou à autre jeu de dez, & que du mesme nom des dez, que les Grecs appellent *κύβει*, ils en formerent le nom des fauteurs qui font le tour & volte Cubistique, il voulut parlant Latin pour mieux les imiter, prendre mesmes le nom des dés, qui ont la forme d'un Cube, & en composer le susdit nom Cubistique: Toutesfois, mon cher S. Cosme, laissant ces choses icy à part, sçachez qu'il nous reste encores un doute qui n'est pas de peu d'importance, sur ceste signification de *Peëtaurum*, ou de *Peëtaurista*, (si vous auez leu certaines corrections qu'a fait Nicolas Mercier sur quelques endroicts du premier liure d'Alexander ab Alexandro, lesquelles sont communément imprimees en Latin, avec un tiltre d'animaduersion), où il dit que Iulius Pollux prend que *πέταυρον* ou *πέρτερον* en Grec est une perche, ou table, où les poules nichent, & se perchent pour dormir: Et que ces cercles cy deuant alleguez estoient certaines rouës, sur lesquelles les hommes fautoient, à la similitude de ce saut que les poules font à demy volant pour s'aller iucher; & que quelquefois y estans deux fautants viz à viz l'un de l'autre, la rouë se retourne en un instant; neantmoins estans iceux retournez dessus dessous ne tomboyent point; ains au contraire y faisoient tantost avec une main, & tantost avec les deux, & quelquefois avec les genoux, plusieurs choses dignes d'admiration; & semble souuent qu'ils doyuent tomber, inclinans la teste ou la moitié du corps vers la terre. Et à ce propos il allegue, quelques vers de Iuuenal, un de Martial, & un autre de Manile, voyez le Mercurial liur. iij. chap. iix. dont en fin apres plusieurs choses il vient à conclurre, qu'il s'estonne fort d'Alexander ab Alexandro, qui a dit ceste forme  
de



de sauter estre entre les exercices familiers des Citoyens Romains.

COSME. Premièrement ie vous nie cela, comme chose non vraye; pource qu'encore que Mercier soit d'ailleurs assez bien instruit, voulant toutesfois paroistre plus grand, s'est plus tost laissé transporter par son desir, que de quelque grand zele de la verite qu'il eust; & qu'ainsi ne soit, si vous auez leu le tiltre de ce chapitre, & tout ce qui y est contenu, vous ne trouuerez point qu'Alexandre aye iamais dit ny affirmé que l'exercice Petauristique fust aucunement en vsage entre les Citoyens Romains: Mais ce qui a abusé Mercier, c'est que ledict Alexandre fait mention de certains jeux dont vsoyent non pas les Citoyens particuliers, mais les plus grands Seigneurs & Princes Romains. Et bien qu'aucuns Citoyens esleus & choisis d'entre la plus gaillarde jeunesse de Rome, se soyent quelquesfois, pour s'exercer, seruis de ces sauts Petauristiques, ie ne vois point que pour cela ils deussent estre, comme il affirme, estimez & reputés outrequidez & remplis d'aucune temerité. D'auantage puis qu'il allegue Polux pour luy faire dire que *πέταυρον* ou *πέτερον*, signifie ceste perche, ou table; pourquoy n'adiouste-il aussi que *Peteuron* ou *Petauron* entre les Grecs denote vne cage ou gelinier, où souuent les poules, chapons, & autres tels animaux entrent à demy volant, courant & sautant pour leur jucher si tost que la nuit approche, comme on voit souuent aux petites maisons rustiques: & c'est icy l'opinion du mesme Pollux.

FERR. Certes vous auez trouué fort à propos pour defendre l'opinion d'Alexandre ceste seconde signification de ces mots Grecs. On peut doncques bien s'asseurer que de la similitude des poulles, qui à demy volant entrent en leurs cages où geliniers par leur petite porte, se deriue le nom de *Petauriste*, d'autant que presque envolant les *Petauristes* entrent par la circonference de leurs cercles.

COS. Sçachez qu'outre ces choses ce Mercier deuoit cōsiderer que *Petaura*, ou bien *Petaurista*, sont certains mots qui n'ont seulement iamais signifié vne mesme chose, mais plusieurs, comme on peut voir, & remarquer es oeures de No-

## LE II. DIALOGVE

nus, Festus, d'Ælius Stilo, & de plusieurs autres anciens & modernes, auxquels il ne se deuoit pas opposer sans nulle autorité, disant que tels cercles estoient certaines rouës, n'y ayant point de rouës és petits cercles, ny és perches appellees en Grec *Petauron*, ou *Peteuron*, pour en pouuir former le mot de *Petauriste*, lequel proprement sederiue de *πέραισθαι* & de *σάνδιον* *τραπεζιον*, qui signifie voler, cōme il faut quasi faire passant par le milieu des cercles, qui sont par ordre esleuez en l'air par ceux qui les soustiennent.

FERR. Je vois en somme que Mercier ne deuoit absolument affermer que ces cercles petauristiques fussent des rouës, sans autre signification; puis que comme vous auez fort bien dit & expliqué, tant le *Petauriste*, comme le *Peteuron*, ne denotent seulement vne chose ou deux, mais aussi plusieurs autres appartenantes à l'exercice qui se fait brauement volant à demy, comme luy mesme l'assure; disant que les *Funambules*, c'est à dire, ceux qui cheminent, & sont merueilles sur la corde, monstrant plustost quelquefois qu'ils y volent qu'autrement, viennent à estre nommez *Petauristes*, pour l'acte ou similitude de voler qu'on remarque en eux. Maintenant ie desirerois que nous reuinssions sur les discours que M. Baptiste & M. Pin auoyent commencé de l'art, science & pratique de sauter: Mais que faites vous, M. Baptiste, car il me semble que parlant avec M. Pin, vous auez ensemble consulté quelque chose, cependant que nous auons trauaillé à accorder les autoritez de ces vaillants hommes.

BAPT. Je vous diray, Monsieur, pendant que vous & le S. Cosme discouriez, le Pin me disoit (ne laissant pour cela à noter, & mediter vos belles & doctes raisons) qu'au Royaume de Naples & de Cicile, ces cages, ou geliniers qu'on voit par les villages pour percher les poulles, lesquels vous auez dit qu'on nommoit en Grec *Petauron*, ou *Peteuron*, que les paisans de ce pais nomment poullailliers, auxquels les poulles entrent à demy volant pour sauter sur les perchettes qui sont là preparees pour leur vcher; & pourroit-on bien dire qu'en la mesme signification de ces cages, ou gelinieres, se pourroit prendre le nom de *Petauriste*, puis qu'il n'est possible qu'aucun puisse faire

le faut des cercles, qu'il n'y entre avec vn faut quasi à demy volant, & passe premierement par la circonference du premier cercle, en la forme du coq, ou de la poulle, qui entrants par l huis de leur poullaillier sautent à vol sur leurs perchettes. D'auantage, cōme le Pin me disoit tantost, il faut noter q̄ bien que la volte se face dedans les cercles sortant d'iceux les pieds deuant, que pour cela ne s'en suit pas que tous les sauteurs l'ayent iamais ainsi faißt, & moins que le faut des cercles se puisse aucunement faire sans quelque volte; pour ce qu'il me souuient en auoir bien veu quelques vns, qui faisoient ce faut des cercles, & y entroyent la teste deuant, & ne faisoient pourtant la volte dedans les cercles, mais bien de l'autre costé au dehors, lors que jà ils en estoient sortis; ce qui entre les plus experts, & fameux sauteurs n'est beaucoup ny estimé, ny admiré, bien que le peuple, & autres, qui n'entendent la force, & vertu des iustes reigles, & preceptes de l'Art, s'en esmerueillent, prisent & exaltent fort celuy qui fait vn tel faut.

PIN. Certes vous auez raison, & ne me souuient point que vous ny moy ayons iamais discouru avec le S. Archange de ceste façon de sauter. Car sans doute il s'en trouue mesme entre ceux de nostre profession bien souuent plus d'imparfaits & ignorants, que de sçauants & experimentez en cest Art. Ce que l'on ne doit trouuer estrange, veu que ce vice est commun à toutes les autres professions. Il y en a plusieurs qui pour paroistre bons sauteurs en presence du peuple, & se faire admirer, font ce faut des cercles, mais si imparfaitement que rien plus, ne faisant la volte dedans les cercles, ny les appropriants comme ils doyuent estre esleuez & separez l'un de l'autre; ce que j'espere aujourd'huy faire voir à la compagnie. Et outre ce que dessus il pourroit aduenir que quelqu'un estat parauenture trop prompt & agile, feroit le faut des cercles sans observer la iuste mesure qui y est requise & necessaire; & sans retourner aussi son corps en l'air dedans ny dehors lesdicts cercles avec vne proportion egale de toutes leurs dimensions. Or on pourroit poser les cercles si bas, & les mettre si pres l'un de l'autre, que quelqu'un pour peu d'experience qu'il eut de l'Art de sauter, s'eslançant dedans avec quelque disposition & agili-

## LE II. DIALOGVE

té, les outre-passeroit sans les toucher, ny faire aucune volte, & sans donner de la teste en terre, se pourroit trouuer sur ses pieds.

BAPT. Cela me semble se pouuoir faire, encore que ie n'en aye veu aucun, que ie sçache, ny ouy dire qui l'aye faict. Et ie croy que quiconque le faict, est poussé de ce desir d'estre veu, estimé, & admiré du peuple, & pour estre dict en fin auoir faict le saut des cercles: mais ceux qui sçauent bien iuger & cognoistre de telles choses, les examinent par la vraye, iuste, & parfaite reigle de tous les sauts, & y apportent toutes les circonstances qui y sont requises & necessaires, sçachants fort bien que la perfection du saut des cercles consiste principalement à y faire la volte avec le tour entier dedans chacun desdits cercles. Et qui fera autrement, fera par tout gaussé, moqué & mesprisé comme ignorant fauteur.

FERRAND. Me souuenant de ce que nous a promis Monsieur Pin, ie desirerois qu'il nous fit voir bien tost l'effect de ses belles promesses, afin que ceste noble compagnie ne soit frustrée d'une si belle attente. Toutesfois, auant que passer plus outre, il me semble auoir remarqué trois choses en ces paroles dernieres. La premiere est que le saut des cercles iuste & parfait est celuy que nous verrons aujourd'huy avec la volte, ou tour du corps entierement tourné dans les cercles, y entrant la teste deuant, & en sortant les pieds deuant. La seconde est que le saut des cercles imparfaict ( & par consequent indigne de telle admiration que la premiere ) est celuy qui se faict avec la volte, ou tour du corps apres qu'il est fort des cercles, lequel, à mon iugement, se faict avec vn grand trauail du corps, s'il ne tient les cercles fort proches l'un de l'autre. La troisieme est que le saut des cercles, ( digne plustost d'un Zany, ou bouffon, que d'un bon & parfait fauteur ) est celuy que quelqu'un bien disposé & adroit pourroit faire, s'il vient à passer d'un bout à l'autre par le milieu des cercles sans aucune volte, tour, ny retour du corps.

BAPT. Monsieur vous auez sommairement compris ce que i'auois dict: mais il faut prendre garde, que de la maniere que nostre Archange accommode les cercles de son admira-

ble faut, il seroit impossible de pouuoir en aucune sorte passer outre tous les cercles, sans se retourner au dedans en forme d'une vne vraye rouë, pour en pouuoir sortir les pieds de uant, sans se rompre le col, comme sans doute il aduiendroit, si on faillloit d'observer avec vne conformité & proportion de la rouë, & du corps, ladicte volte. Toutesfois pour en pouuoir représenter vn vray & parfaict modelle, il faudroit reuenir aux fondements, ou principes de l'Art de sauter. Ce qui n'est maintenant necessaire de faire, veu que l'õ en a discouru cy dessus assez amplement. Comme aussi il n'est point de besoin de discourir des choses qui sont naturelles, & peut estre communes & cognuës d'un chacun, & encore moins de la diuersité des exercices du faut; cela ayant esté cy deuãt fort agité tant d'une part que d'autre. Mais ie desirerois seulement parler de la perfection de cest Art de sauter, sans laquelle on ne peut rien rechercher de beau, ny d'excellent en cest exercice. Et c'est celle que nos Ancestres ont tant admiree, & nous les admirons encores auiourd'huy; voire avec beaucoup de raison, comme celle qui est la plus rare & la plus parfaite partie de bien sauter; qui a, comme ie vous ay dict cy-dessus, la volte pour fondement assuré.

FERR. C'est vne chose certaine qu'il y a grande difference entre l'ordre & la methode que l'on doit tenir pour enseigner vn Art, & le chois & eslection que l'on doit faire des personnes capables d'une telle science pour la mettre en pratique. Et qu'ainsi ne soit, ne voyons nous pas qu'Aristote donne pour principe de la Philosophie vn bel entendement & meur iugement, avec vn esprit subtil, lequel est du tout necessaire pour la pouuoir comprendre: mais pourtant ne laisse-il pas de prouuer aussi que la forme, la matiere & la priuation d'icelles, sont les vrais fondements des choses naturelles; veu mesmes que tous les Philosophes font vne grande distinction entre la science & la maniere de l'apprendre. Parquoy il me semble, (pour reuenir à nostre propos) que Messer Baptiste discourant des principes, a mieux faict de dire que la volte soit le vray fondement de l'Art du faut, que d'alleguer & rechercher l'industrie, dextérité & disposition naturelle des hommes. Qui ne scait

## LE II. DIALOGVE

qu'un estropié, ou celuy à qui on auroit coupé vn membre, est inhabile à sauter, courir, ou voltiger?

COS. Si ie me souuiens bien de ce que vous auez dict, il me semble que M. Baptiste confond le principe avec la fin, & l'obiet avec le fondement. Car bien que (comme il afferme) ce soit vne opinion entre les fauteurs que la volte est le fondement du faut; si est-ce que si nous cōsiderons cela de plus pres, nous dirons que c'est plustost la fin que le commencement, & l'obiet plustost que le fondement de tout faut; & c'est ceste volte que nous disons estre faicte en l'air suyuant la propriété de l'Art de sauter, de laquelle toutesfois ie ne suis encor bien resolu, y ayant plus à dire parauenture que l'on ne pense, comme nous en discourerons plus amplement cy-apres: suyuant l'occasion qui s'en presentera.

BAP. Vous parlez fort sagement. Mais encore que vous faciez si grand cas de la volte, la nommant Roine des plus iustes, rares, & parfaits sauts, voire la iugiez estre la fin du faut; si est-ce qu'elle me semble plustost estre son fondement, son origine & son commencement. Il y en a plusieurs qui font bien la volte, qui pour cela ne sautent pas bien. Il y en a d'autres qui la voulans faire, donnent des mains ou du front à terre; Ce qui n'aduiant pas à celuy qui saute bien, & qui a la vraye cognoissance de l'art, lequel ne faut iamais de faire tousiours à temps la volte iuste & mesuree. Et puis que nous recherchons la perfection, l'excellence & accomplissement du faut, il m'a semblé bon la mettre pour fondement d'iceluy, comme vous entendrez par la continuation de mon discours. Il est certain que sans la volte on ne peut faire vn faut gentil & de bonne grace, & qui soit digne d'admiration & de recommandation; veu que de la volte, & de l'acte reuolté, ou retourné, se font & deriuent infinis sauts qu'on peut naturellement nommer merueilleux. Parquoy cela presuppôsé, Pin & moy discourant sur ceste maniere de sauter, il faut que nous recherchions la voye la plus seure & certaine pour faire que les plus grossiers, & les ignorants mesmes ayent la cognoissance d'estre bons & parfaits sauteurs.

PIN. Puis que ceste noble compagnie desire de voir les

effets de nos promesses, il faut nous mettre en deuoir de la contenter, & luy représenter toutes les manieres & façons de sauter, afin que par la theorique d'un si bel Art, elle iuge quelle en peut estre la pratique. Je voudrois en fort peu de paroles pouuoir exprimer & declarer toutes mes conceptions touchant ceste profession de sauter, & monstrier quel doit estre l'aage de ceux qui doyuent apprendre l'Art du faut. Quelques vns ont ceste opinion, que ce doit estre un enfant de l'aage de sept, ou huit ans. Les autres sont d'aduis qu'il soit plus aagé. De moy j'ay tousiours creu, & croy encores que l'aage doit correspondre aux forces necessaires pour l'exercice d'un tel Art. C'est pourquoy il me semble que l'on deueroit plustost choisir un ieune homme de quinze à seize ans, auquel les membres commencent à estre forts, & bien proportionnez, qu'un enfant de sept, huit, ou neuf ans, lequel pour sa debilité, & foiblesse n'a les reins encores assez forts, ny la disposition telle qu'il seroit à desirer pour l'exécution d'une telle charge.

**BART.** Je suis bien de ce mesme aduis: car, comme vous sçauiez, l'Art du faut a ses reigles, mesures, & considerations si estroitement conioinctes ensemble, & tellement dependantes l'une de l'autre, qu'à grand peine peut on parler de l'une, que l'autre ne s'entende quant & quant. Et d'autant que non seulement l'aage & la force du corps y sont necessaires, mais aussi une grande dexterité, disposition & agilité; il faut faire choix & election de ceste gaillarde ieunesse, laquelle est volontiers accompagnée de ces belles parties pour exercer l'Art de bien sauter.

**PIN.** Je m'en remettrai volontiers au iugement du S. Ferrand: car il me semble qu'un ieune enfant est plus propre & capable d'apprendre les sciences que quelqu'un desjà plus aagé; veu que cest aage tendre n'est encore embrouillé de beaucoup de choses qui pourroyent distraire un autre, & l'empescher de comprendre aisément ce qui luy seroit enseigné. Et ce qui fait, à mon aduis, que les ieunes enfans apprennent plus facilement, c'est l'obeissance qu'ils rendent à leurs pédagogues & precepteurs. Et ne faut faire nulle doute que s'ils n'estoyent accoustumez de bonne heure à la vertu, & à appren-

## LE II. DIALOGVE

dre à bien viure, qu'estants deuenus plus grands ils ne secoüassent le ioug de toute obeissance, qui les rendroit moins capables de proffiter en ceste belle cognoissance de la vertu, & des lettres; & lorsil seroit bien malaisé de les reduire au chemin d'honneur, né l'ayant pas appris de ieunesse. Et autant en peut-on dire de toutes les autres professions, & mesmes de l'Art de sauter. Toutesfois il me semble qu'un aage plus meur & plus fort seroit plus propre pour apprendre la perfection de cest Art.

Cos. Au contraire M. Pin, comme ie le vous prouueray defendant l'opinion de M. Baptiste. Je vous prie de croire que la nature a donné vne aptitude propre & proportionnee à la force, & qualité de chacune chose; comme nous voyons que les arbres pendant qu'ils sont encores ieunes & tendres reçoient le ply que l'on leur veut donner; mais depuis qu'ils sont accreus & deuenus grands, ne se peuvent plus manier & plier comme l'on voudroit; & cela aduient pour auoir changé leur premiere disposition. Que si quelqu'un veut interpreter cecy allegoriquement, & le rapporter aux mœurs & façons de viure des hommes, disant qu'il n'y a que de ployer la verge tandis qu'elle est encore tendre. Si est-ce que cecy se doit aussi entendre de l'education & nourriture de la ieunesse, laquelle, si elle n'est accoustumee & façonnée de bonne heure à quelque honneste exercice, depuis qu'elle est deuenue plus grande, elle ne se peut aisément corriger, ny changer. Et qui ne sçait que l'enfant est semblable à la cire, laquelle se peut facilement manier & changer en toutes sortes de formes que bon vous semble? Ceste ieunesse tendre dis-je est plus ployable, c'est à dire, à tous les membres, les muscles, les nerfs & les iointures mieux disposées & plus faciles à pouuoir faire & former avec tout le corps mille diuersitez de mouuements, que celuy qui est desjà deuenu plus grand, & qui par consequent a les parties de son corps desjà plus fortes, roides & endurcies; & par ainsi moins propres & aptes à la varieté des diuerses agitations & mouuements de la personne, qui sont nécessaires à la pratique de ceste profession.

FERR. On pourroit aussiadiouster en confirmation de  
ce



ce que vous dites, fuyuant l'opinion de M. Baptiste, que tant pour l'accroissement & santé de l'enfant de sept ou huit ans, que pour raison de l'art mesme, vn tel aage puerile est plus propre qu'un ieune homme desjà plus grand; premiere-ment pource qu'un de plus grande aage presumant bien entendre, sçauoir, ou faire desjà quelque chose (comme la plus part de cest aage de 15. 16. 18. ou 20. ans, presume beaucoup d'elle-mesme) ne sera iamais si docile & obeissant aux reigles, preceptes & aduertissemens du maistre, comme il eust esté au- parauant en l'aage de 7. ou huit ans, exempt de toute presom-ption. L'autre raison tiree de la Philosophie & Medecine est, qu'estant l'humeur radicale lors espandue par la tendre & ieune chair de l'enfant, commençants, comme dit le grand Fer- nel, desjà les nerfs & muscles avec tous les autres membres à se rendre plus forts & plus fermes à cause de l'abondante nourri- ture que prennent les enfans, il ne faut point douter, que d'au- tant moins qu'ils s'exerceront, d'autant plus coüiards & non- chalants deuiendront-ils. Ce qui ne leur aduient iamais quand ils s'exercent, car leurs veines viennent tellement à se dilater, que de leur corps se iettent plusieurs mauuaises humeurs, & la purgation de cest excrement gras & fuligineux, qu'ont accou- stumé ordinairement d'auoir les enfans: Dont il aduient que d'autant plus que la nature leur donne de nourriture, d'autant plus aussi les fait elle croistre & en force & en disposition du corps, y adioustant l'exercice moderé qui sçait tellement at- tremper la force & la disposition, qu'il en fait vn corps tout parfait. Que si d'auenture il se trouuoit quelque plaisant do-cteur qui voulut dire qu'encore que l'exercice soit necessaire à tous aages, q̃ pour cela on ne le doit pas restraindre à celuy du faut, veu qu'il se trouue beaucoup d'autres exercices & plus beaux, meilleurs, & plus agreables, selon la diuersité des com-plexions des hommes: Je vous prie que ce Critique sçache que nous ne disputons pas icy des vniuerselles considerations des exercices, & qui sont les plus propres & conuenables à toutes personnes, moins encore de la nature & diuerse complexion des hommes, mais seulement allons nous recherchant quel aage seroit le plus propre & apte, pour avec le temps en pou-

## LE II. DIALOGVE

uoir former vn bon & parfait sauteur. C'est vne chose certaine que tous ne se plaisent pas à sauter, mais que pour cela l'exercice du saut soit vicieux, la consequence ne seroit pas bonne. Il y en a qui ne se delectent pas seulement à sauter, en y prenant tout leur plaisir; mais mesmes sont curieux de sçauoir toutes les particularitez & secrets de l'art, pour les mettre en pratique & en pouuoir discourir selon les occasions. Et en cela l'on peut dire que ceste ancienne sentence est vraye, que chacun suit iusques à la mort la qualité de l'inclination naturelle qui est en luy. Or d'autant que la volte du saut est vn acte assez dangereux pour ceux qui par faute d'experience la voudroyent entreprendre, le serois d'aduis que l'enfant s'y exerçast de bonne heure, & mesme dès ses tendres ans, pour peu à peu paruenir à la cognoissance qui nous rend toutes choses, & moins penibles, & moins hazardeuses. Car il ne faut douter que ceux qui sont desjà grands, ou de crainte qu'ils auront de voir faire vn saut si perilleux, ou si poussez d'une audace temeraire, viennent à l'entreprendre, se perdent le plus souuent en l'air, & tombēt en vn dommage irreparable. Ce que ie ne pense pas que l'on aye veu aduenir au premier aage de l'enfant, d'autant qu'il se laisse gouverner & enseigner, sans que de soy-mesme il presume ou ose hazarder quelque chose outre les reigles & preceptes du maistre.

**BAPTISTE.** Il n'y a pas long temps que l'on a veu par experience ce que vous venez maintenant de dire. C'est l'infortuné desastre qui aduint au pauvre Horace, lequel pensant sçauoir faire la volte, la voulut faire, & s'y rompit le col.

**PIN.** Soit ce que vous voudrez, si me semble-il que les petits enfans estans de leur nature fort prompts, & par consequent perilleux pour se hazarder & esprouuer temerairement en toutes choses qui se presentent, ne sont gueres propres à cest exercice, où il faut desjà auoir du iugement pour s'y sçauoir conduire, outre l'enseignemēt du maistre quelque habille qu'il soit. Et d'ailleurs tous ne sont pas nais naturellement propres pour sauter, tellement que ce seroit faire perdre temps à ceux qui sont nais à d'autres exercices.

**BAP.** Je vous responds qu'il ne faut pas penser qu'en-

cores que l'aye dit que l'aage de 7. ou 8. ans soit plus apte & idoine pour apprendre cest art de sauter, que pour cela ie vueille qu'incontinent & de plein faut l'on leur apprenne la volte perilleuse; ce qui seroit impossible de leur apprendre: mais bien ce que les sauteurs appellent voltiger de l'eschine, ce qui est necessaire qu'apprenne la ieunesse, pour paruenir peu à peu à la cognoissance de la volte, se rendant adroite au tour & retour qui y est requis: ce qu'elle ne pourroit faire avec vne telle propriété, bonne grace, & gentillesse asseuree, si elle ne commençoit de bonne heure, & dès ce premier aage d'y estre instruite, veu que les muscles & les nerfs s'endurcissans perdent la facilité de ce pliement qui y est requis & necessaire. Quant à la raison de l'inclination naturelle que vous auez alleguee, ie laisse à ces messieurs à en discourir; Car ils y sçauront mieux respondre que moy. Je diray seulement que lors que les enfans sont contraincts d'apprendre quelque chose par reigle, & art, encore que de soy elle soit delectable, cômè le faut; si est-ce pourtant qu'ils ne s'y accommodent pas tousiours tous, tant pour le plaisir que pour la crainte du foïet: Car le maistre qui les enseigne ne requiert pas seulement d'eux qu'ils sautent simplement; mais plustost qu'ils sautent avec art & entiere obseruation des reigles & mesures qu'il faut tenir. Ce que l'on ne voit pas souuent qu'ils puissent obtenir qu'avec le foïet.

COSME. Vos raisons m'ont fort delecté, & pour vous satisfaire en ce que vous nous auez deferé; ie dy qu'il est certain que tous ne sont pas nais naturellement à toutes choses; ains les vns sont addonnez à vne chose, les autres à vne autre: Tellemēt que les peres & meres commettent vne grande faute quand ils font instruire & enseigner leurs enfans en choses contraires à leur inclination naturelle, soit en cest exercice de sauter, ou en quelqu'autre profession, ce qui n'est pas seulement digne de reprehension, mais aussi de blasme, estant cause de la perte du temps de leurs enfans. On doit presupposer qu'un sauteur ne receura iamais vn enfant en son eschole, qu'il recognoistra dire et emēt incliner à vn autre art. Et encor que tous ne soyēt pas Architectes (comme on en trouue peu) si est-ce que la plus part

## LE II. DIALOGVE

des hommes, bien qu'ils n'ayent pas cette science acquise, ne laissent pourtāt avec vn iugement naturel de se seruir de beaucoup de choses avec reigle, art & mesure, y obseruants toutes les proportions, & dimensions requises, & necessaires. Comme nous voyons en l'Idée de la Republique Platonique, & en la vie & institution de Cyrus, suyuant l'authorité de Xenophon. Nous desirons aujourd'huy entendre de voustout ce qui seroit besoin pour former vn bon & parfaict fauteur, dont vn chacun puisse tirer profit, & prendre plaisir en la practique d'vn si bel exercice. Partant aduisez M. Pin ce que vous auez à respondre.

PIN. Pour vous satisfaire M. Baptiste i'adiouste que si le voltiger d'eschine estoit necessaire, comme vous auez dit cy dessus, vous auriez certes grande raison : mais de moy ie ne pourrois iamais croire, qu'il y fust necessaire, ayant tousiours ouy dire qu'il est plustost occasion de beaucoup d'empeschements, que de quelque profit ou vtilité, suiuant l'opinion de plusieurs fauteurs, qui afferment que le voltiger rend l'eschine foible & debile, chose fort contraire pour les sauts violents.

BAPT. Il n'y a doute que celuy qui voudroit apprendre à voltiger estant desjà grand, quand les os commencent à s'endurcir, qu'il n'y eust beaucoup de peine & de difficulté, & ne se rēdist moins apte & idoine aux autres sauts plus violents: mais i'ay dit que cest exercice de voltiger est plus propre en vn aage pliable, tel que celuy que i'ay descrit cy dessus, que i'estime estre plus cōmode que tout autre pour l'acheminier peu à peu à la cognoissance de la volte, laquelle ne se peut apprendre qu'avec vn iugement desjà meur & resolu, & laquelle s'il a vne fois acquise, elle le fortifiera d'autant plus qu'il s'y exercera souuent, & le rendra de iour à autre plus gaillard & plus disposé pour s'employer puis apres à toutes autres sortes de sauts, estant en fin deuenu tresfort, seulement pour s'estre accoustumé de bonne heure à ladite volte sans aucune crainte.

FERR. Afin que ie n'oublie à vous demander quel malheur, & desastre aduint à Horace, que vous nous auez allegué cy deuant, d'autant que ie le sçauois volontiers, ie vous

supplie nous dire comment la volte fut cause de le faire mourir.

B A P. Sur la premiere prise de la volte lors qu'il se fust esleué en l'air, comme ne l'ayât encores bien apprise, le cœur luy faillit, & se troubla tellement, que ses sens furent tous esperdus & à peine l'auoit-il faite à demy, que ses forces luy defaillant, s'affoiblit de telle sorte, qu'il tomba, non pas sur le sablon, cōme dit l'Arioste, mais bien sur la terre dure, & là fit sa derniere secouffe, avec vn dueil inestimable de tous les assistans; d'autant qu'à la verité c'estoit vn fort gentil & vertueux jeune homme. Mais pour ne perdre point temps, ie desirerois que nous vinsions à discourir de toutes les autres considerations requises & necessaires à l'art du bon & excellent fauteur; & par mesme moyen ie vous voudrois prier de nous expliquer ce mot *d'humour radical* que vous auez allegué cy deuant: Car il semble que ce soit vn point difficile de la Philosophie, encores que cela semble estre hors de nostre propos.

F E R R. Cela semble bien estre vne entreprise digne du sieur Rogier.

C O S. Ie vous supplie de grace ne vous en faites point reprier; vous ne deuez icy rechercher aucune excuse par ceremonie, ou autrement, puis que c'est chose qui vous touche, ayant employé beaucoup de temps en la Medecine pour vostre contentement.

F E R R. Ouy certes ie m'y suis delecté, & ne m'en repens point, y ayant peut estre, trouué chose que beaucoup ne pensent pas, & qui est d'importance. Mais puis que vous dites que cela m'appartient, & que vostre desir m'y inuite, ie vous veux faire ouyr seulement ce qu'en dit Fernel (duquel nous auons parlé cy dessus) non pas qu'il en soit le premier Autheur, ou maistre; Mais d'autant qu'il s'est rendu en cecy, comme en plusieurs autres choses, fort facile. Ie dy doncques que les Medecins en general & autres Philosophes, qui ont vne vraye cognoissance de la composition de tous les animaux, & principalement de l'homme, cognoissans la nature de nostre temperament, & voyant qu'il y auoit plustost vne diuine qu'humaine harmonie des elements, vnis & incorporez ensemble

## LE II. DIALOGVE

fuyuant leur propre & mutuelle qualité; ont esté transportez en cette consideration que l'esprit vital avec la chaleur deuoiét estre communs à toutes choses qui ont vie, & par consequent estre vne partie plustost diuine qu'autrement; c'est à dire, au moins non du tout elementaire; D'autant que la raison nous enseigne que cest esprit vital & ceste chaleur ne sont seulemēt le puiot & fondement de la vie de tous les animaux, mais aussi des plantes mesmes; veu que ladiēte chaleur se trouue non seulement en plusieurs choses, mais aussi vient (en apparence contraire à la qualité de nostre chaleur elementaire) à cognoistre que sa nature est celeste & separee de ceste masse terrestre des elements. Puis qu'en toutes choses, tant froides que chaudes, qui viuēt, comme le poisson, & le Lion entre les animaux, bien qu'il ne semble qu'au poisson soit la chaleur celeste, mais plustost le froid qui est son contraire; neantmoins ayant vie comme le Lion, il faut necessairement qu'il y ayt de la chaleur puis qu'il a vie: (Car où il n'y a point de chaleur, là la vie ne peut subsister.) Et ne peut-on parler autrement du Lion que du poisson touchant la vie, encores que la proportion en soit fort differente. Le mesme pourroit-on dire des Mandragores, de la Ciguē, & autres plantes tresfroides, si nous les comparons avec le Poiure, la Canelle, & autres telles plantes fort chaudes: Car sans la chaleur nulle chose ne peut naistre, ny croistre, de laquelle les effects sont en toutes choses la vraye cause de vie à tout ce qui est viuant au monde. Et encore qu'il s'en trouue plusieurs de tres-froide temperature, si est-ce pourtant qu'ils ne peuuent estre sans chaleur, puis qu'ils ont vie, & ainsi de toutes les autres choses. Delà ces bons Medecins & Philosophes contemplant quel est le vray lieu, & maintien de ceste chaleur avec les choses qui reçouyent vie d'elle, pour participer en tout & par tout d'icelle; & voyants que ce ne pouuoit estre vn humeur commun, puis qu'avec vne telle promptitude il passe incessamment par la plus petite partie interieure ou exterieure de toutes choses viuantes, vindrent à considerer que ceste chaleur ne pouuant demeurer en elle-mesme sans quelque subiect qui luy fut approprié, participant de l'une & l'autre nature, pour se pouoir continuellement maintenir en son estre;

qu'il estoit donc necessaire luy sous-mettre quelque matiere d'une substance fort legiere, tres-delicate & bien subtile, visue, prompte, & nullement lourde, ou grossiere, & laquelle peut en vn mesme temps s'accommodant à la celeste diuinité de la susdicte chaleur, s'arrester, se sous-mettant à elle, comme si elle estoit son siege, ou bien son appuy naturel, n'estant possible qu'il se peut trouuer vne substance plus aëree, suyuant les raisons des plus grands Philosophes, & laquelle peut à la forme & imitation de l'air ignee brusler & flamboyer clairement sans aucune violence, afin que l'un ne se peust iamais separer de l'autre. Et qu'aux Anatomies qu'on faict ordinairement on trouue au cœur & au cerueau quelques arteres, & petits vaisseaux du tout vuides; & pour ne faire la nature rien en vain, ils ne pouuoient pas estre si grands sans quelque mystere particulier; les susdicts Philosophes conclurent en fin que tels lieux estoient destinez pour l'esprit, lequel pour estre d'une substance fort delice s'enfuit sans que le sens s'en apperceioie. Parquoy pour fomentier ces parties spirituelles nous receuons l'air par le moyen de la respiration libre dont nous iouissons, laquelle ne sert pas seulement à nous rafraeschir; (car on pourroit bien auoir cela d'ailleurs,) mais aussi nous suggere & administre l'aliment & nourriture spirituelle; ayant outre cela pris la similitude de la nourriture de la flamme, laquelle ne se nourrit seulement de l'air, mais d'un humeur gras de toutes choses; concluans que la seule chaleur en la substance subtile ne se pouuoit nommer separément esprit, ains que ce qui se deriuoit de l'union & compagnie de l'un & de l'autre, estoit cōme la flamme en nostre corps, dont l'aliment est la viande & nourriture, afin que l'humeur radical s'y trouue en fin, qui n'est en nous autre chose que ceste partie grasse qui soustient & nourrit cest esprit, n'estant pas pour cela ce gras que l'on voit à veüe d'œil; mais vn autre humeur aërien fort different d'ice-luy, lequel infus en la substance des semblables parties, ne se peut aucunement voir; & c'est le fondement & premiere substance de la chaleur naturelle, qui fut non pour autre raison nommee humeur naturel, & de plusieurs, premier engendré, & de aucuns, radical; mais plus proprement, ce me semble, par au-

## LE II. DIALOGVE

cuns nommé salutaire & vital; d'autant que c'est le premier, où l'esprit plein de chaleurs s'accommode & repose, de sorte que nul autre n'y peut estre ny demeurer longuement sans l'aide de cest humeur; d'autant que l'opinion d'un chacun est, & la raison naturelle le demonstre, que tel humeur fort avec la semence, & se maintient gaillard selon son premier origine. Nous auons dict qu'il estoit espars par tout le corps, se voyant le corps naturel deuenir peu à peu avec l'aage plus sec & plus dur, estant au commencement de nostre natiuité toute la chair moite & remplie de toute humidité, & du tout semblable à l'humeur mesme dont elle a pris son origine. Et mesmes on voit en ces commencements les nerfs, liaisons, & les os estre fort tendres, de sorte qu'ils se plient comme l'on veut, & avec le temps se vont tellement desechant, que sur la derniere vieillesse les os ne sont pas seulement priuez d'humeur, mais mesme la chair deuient nerueuse & dure. Cela est doncques sans doute que la chair des enfans est tendre & humide, & celle des vieillards au contraire dure & seche, priuee presque de toute humeur, & plus on deuient vieil, tant plus deuient-on sec: Ce qui est fort bien prouué & monstré par les Philosophes & Medecins, nous asseurans par plusieurs raisons que ceste humeur radical, qui se cōsomme iournellement, est espars & diffus par toutes les parties du corps. Et ne faut pas que vous pensiez que j'aye voulu discourir de ces choses icy pour resoudre tout ce que l'on en pourroit dire; mais seulement pour satisfaire en partie à l'honneste requeste de M. Baptiste.

PIN. Messieurs, puis que M. Baptiste a voulu ouyr le discours de l'humeur radical, ie vous dy maintenant (retournant à nostre propos) qu'encore que j'aye maintenu que l'eschine n'estoit autrement necessaire pour l'exercice de nos sants, si accorday-ie que l'eschine moindre y est necessaire, & beaucoup meilleure pour vn bon & parfaict fauteur que la plus grande.

BAPT. Ie vous respondray si tost que j'auray seulement dict cecy, c'est à sçauoir, qu'il n'est pas seulement necessaire que le petit enfant de 7. ou 8. ans soit bien formé de corps, mais aussi beau de visage; d'autât que sans doute la beauté naturelle accroist



croist le plaisir & contentement de ceux qui regardent quelque belle & gentille dispositiō, suyuant ceste sentence, Que la vertu qui part d'un beau corps en est plus agreable.

Cos. Encores que ceste beauté & bonne grace ne soit necessaire pour deuenir excellent fauteur, si est-ce pourtant que elle n'est point à mespriser. Car toute personne belle, gentille, & agile, porte tousiours avec soy quelques signes de recōmandation empraints & engrauez en sa face, tant vn chacun prend plaisir à voir ce qui est beau. Outre que sous vn beau visage, (suyuant la sentence des meilleurs Philosophes) l'ame biennee reside bien souuent, & y fait sa demeure: cōme disoit Platon, Gallien, & Hipocrate.

BAPT. Cela est bon, Monsieur, mais ie dis que pour acquerir ceste excellence de l'Art qui est requise, il ne faudroit qu'on y commençast plus aagé que de 7. à 8. ans, comme i'ay dict cy-dessus, auquel aage on se trouue souple, & plus propre pour apprendre l'Art, que si on estoit plus grand.

FERR. Vous vous formez vn enfant en l'idée, lequel bien qu'il se trouuast tel que vous le figurez, ie craindrois que croissant avec le temps il ne prist vn autre party, ne pouuant tousiours vacquer à sauter, ou bien il faudroit que ce fust vn Xenocrates.

Cos. Les plus beaux hommes ne s'amusent volontiers à faire des sauts, mais plustost à donner des assauts au Dieu d'Amour, qui sont ces sauts tournez & retournez où le plus souuent ils employent & leur esprit, & leur corps. Mais ie vous prie M. Baptiste de poursuyure, & laissons ces discours d'Amour pour vne autres fois.

BAPT. Maintenant s'en suit la consideration de l'eschine. Pour respondre doncques au S. Pin, ie dis que quand nous aurons vn tel enfant, nous considererons lors s'il aura trop, ou trop peu d'eschine; Et d'autant que nostre intention est de le rendre parfait, & fort en chacun saut, s'il nous est possible, luy donnant le mouuement selon la legereté, ou pesanteur de son corps, Il faut prendre garde qu'il ayt l'eschine mediocre, & non trop large, d'autant qu'elle ne seroit propre ny apte à ces sauts qu'entre les autres nous nommons, sauts forts; tout ainsi

## LE II.<sup>e</sup> DIALOGUE

que ceux qui l'ont trop petite ne sont propres aux eslancements, c'est à dire, au saut du singe: car on y adioust le saut en arriere de la façon que vous autres Messieurs pourrez voir incessamment. Je croy qu'il y en a plusieurs de nostre Art qui ont cognu vn surnommé Malfatto, lequel faisoit de l'eschine choses admirables: Car, outre ce que tous les autres font, il s'abbaïsoit enterte en arriere tenant les pieds sur vne table assez haute, qui luy venoit de terre iusques aux espauls, & puis se redressoit sans se pener beaucoup, ne remuant peu ny prou ses pieds de la table; & encores que plusieurs ayent essayé de faire ledict saut de l'eschine, si est-ce que pour n'auoir l'eschine faite comme luy, iamais n'ont peu arriuer iusques-là de se pouuoir redresser d'une telle hauteur. D'auantage sçachez M. Pin que les sauts du singe ne peuuent auoir aucune grace, ny estre en aucune maniere bien faicts, sinon de ceux qui ont vne bonne & raisonnable eschine. Car sans ceste forme d'onde que faict le repliement du corps sur l'eschine, le dos ne se pourroit conformer à le faire avec l'eschine, s'il n'estoit suyuant ce que j'ay dit, souple, pliable & facile à se pouuoir tordre, manier & plier en auant; & specialement plus en arriere. Parquoy en fin il me semble pouuoir conclure que tous ces petits enfans dociles à apprendre pourront avec le temps beaucoup profiter en la cognoissance de ces sauts, lesquels outre qu'ils ont leurs corps bien proportionnez, & forts, ont l'eschine mediocre, qui est fort propre pour l'exercice de ces sauts. Et en ceste esperance le Maistre s'assure qu'ayant de si bons disciples, & si bien composez, il ne perdra ny son temps, ny sa peine, ains en receura tout honneur & contentement.

FERR. Je vous assure qu'il me semble que ie suis à Palerme, lors que les Capitaines des galeres avec leurs Ministres vont cherchant les galiots nommez, de bonne volonté, pour eslire seulement ceux qui ont l'eschine plus forte pour mieux pouuoir supporter le traual des galieres, pour escrire sur le fin azur du Royaume de Neptune; d'autant que vous nous auez tant de fois nommé ceste eschine, que ie ne sçay si les enfans qui apprendront à sauter n'en deuiendront point inuisibles. Mais ie voudrois bien, s'il vous plaisoit, que vous me fissiez

plus clairement entendre que c'est proprement auoir, ou n'auoir point d'eschine, afin que la diuision que nous en ferons avec ces Seigneurs en soit d'autant mieux cognüe.

BAPT. Toutes les professions ont certains termes particuliers, que plusieurs nomment termes de l'art, & sont seulement entendus de leurs professeurs. Quand doncques nous disons auoir bonne eschine propre à l'exercice du saut, cela s'entend lors qu'elle n'est point trop dure, ny trop forte à se ployer: Puis n'auoir point d'eschine s'entend entre nous autres sauteurs l'auoir entiere; de sorte que pour ne la pouuoir ployer à faire les sauts du singe, on manque à leuer le saut en arriere avec ceste hauteur, & promptitude qui y est requise & necessaire, suyuant la forme & disposition que doit auoir vn bon & parfait sauteur; toutesfois il suffira pourueu que ce soit suyuant l'ordre qui est estably pour enseigner tout ce qui est requis & necessaire pour cest exercice. Or ie dis que l'Art se conformera avec la nature & complexion de l'enfant, d'autant plus qu'il fera bien composé & proportionné de ses membres, & qu'il aura le Maistre accort & bien entendu aux raisons de l'Art du saut. Car ie n'ay iamais creu qu'aucun meritaist le titre, ou dignité d'enseigner, s'il n'a appris premierement ce qu'un autre doit apprendre de luy. Comme nul ne peut bien commander qu'il n'ayt premierement obey. Estant tout certain que celuy qui n'a sceu apprendre avec Art les reigles & raisons de sa profession; lors qu'il en veut discourir, confond tousiours les termes de l'Art: mais i'estime que vous autres Messieurs en formerez vn beaucoup mieux que ie ne scaurois faire, ny dire. Neantmoins j'allegueray qu'il y a en nostre profession plusieurs differences de sauteurs, desquels les vns n'eurent iamais cognoissance de l'Art, encores qu'ils sautent bien, sans auoir appris reigles ny preceptes, ny autres considerations necessaires à l'Art, qui peut rendre cest admirable exercice du saut plus facile & plus assuré. Il y en a d'autres qui n'ont ny grace, ny façon, de sorte qu'il est impossible qu'ils puissent enseigner à vn autre ce qu'ils n'ont iamais appris. Il y en a d'autres encore, lesquels bien qu'ils n'ayent iamais veu faire seulement vn saut parfait, sont neantmoins en reputation d'estre bons sauteurs,

## LE II. DIALOGVE

(de ceux principalement qui ne s'y cognoissent pas , ) lesquels pensent que celuy qui a sauté sans donner du cul en terre , soit excellent sauteur: Mais c'est commel'on dit des aueugles , qui veulent iuger des couleurs. Il se trouue vne infinité de bons sauteurs, lesquels, pour n'auoir iamais enseigné aucun en leur vie, ne se souuiennent pas seulement des principes de l'art , & sont le plus souuent impatient; & de là aduient aussi que l'on ne se doit promettre assurément aucune perfection de leur instruction. Estant chose certaine, cōme i'ay dit, que celuy qui n'a pas appris quelque science, ou quelque art , ne le peut aussi enseigner. Car comment instruiroit quelqu'un vn autre en la perfection de quelque art, duquel il ne sçauroit luy mesme les principes? Il faut doncques que celuy qui veut sçauoir bien enseigner l'art de bien sauter à autrui , que luy-mesme soit premierement deuenu bon & parfait sauteur, & qu'il ayt fréquenté les plus excellents personnages de ceste profession, comme l'on peut voir & remarquer en nostre Archange , lequel par la theorique & pratique de bien sauter s'est acquis par l'experience vne telle reputation que chacun qui le cognoist l'a en admiration; & lequel aussi a non seulement acquis la perfection de tous les sauts , mais a cognu & familierement conuersé avec les seigneurs Alonse Espagnol, avec Ianino Sicilien , avec Hierosme de Furli , avec le Moret de Bolongne , qui sont tous excellens sauteurs, avec lesquels il s'est trouué plusieurs fois en presence des Rois, Princes & grands Seigneurs; estant ceste-là la vraye voye & le vray chemin d'apprendre au vray toutes les choses appartenantes tant à l'art & science du saut , pource qu'encores qu'un parfait sauteur deuienne par accident ou autrement, inhabile à sauter, si est-ce que la science qu'il a en l'entendement est suffisante pour faire deuenir à son exemple vn autre qui ne manque point ny de volonté , ny de disposition , fort bon & excellent sauteur, voire quelquefois maistre de l'art du saut. Parquoy il faut tousiours soigneusement observer ce qui appartient au vray fondement de cest art , & ne s'en departir point. Car quiconque a esté vne fois mal instruit aux principes de quelque art, il est fort difficile qu'il se puisse iamais corriger, ny retirer de ceste mauuaise instruction premiere; e-

stant certain qu'il n'y a moins de peine d'oublier ce que l'on a mal appris, que de bien apprendre de nouveau les reigles, & preceptes de la profession que l'on veut embrasser. Et tout cela n'est encores suffisant, si celuy qui se veut proposer d'enseigner, ne fait estat de s'armer d'une grande patience, & ne se dispose de faire en fin comme vn bon & diligent Escuyer, lequel apres auoir par le moyen de l'experience cognu la nature de tous ses cheuaux, s'y gouuerne avec telle prudence, qu'il vse ore de patience, & ore de correction, & le tout avec dexterité de son art, ainsi que le temps & l'occasion le requierent. Nostre sage & expert fauteur en fait de mesme. Car s'estant choisi vn enfant à sa fantasie, vse de beaucoup de discretion, de iugement, de patience, & de diligence, pour bien cognoistre le naturel de son disciple, s'il est trop hardy, trop craintif, ou bien d'un trop grossier esprit, afin qu'il se sçache accommoder à ce qu'il cognoist estre vtile & commode pour le proffit & aduancement d'iceluy. S'il est trop hardy de le retenir discrettement, de peur qu'il ne s'emancipe par trop, si trop craintif, l'encourager vertueusement avec vne telle douceur, que cela luy accroisse & le cœur, & le courage : Bref vse de tous les autres moyens qu'il cognoist estre vtils & necessaires pour le contenir en son deuoir.

FERR. Vous me faites souuenir S. Baptiste, de ce que j'ay autresfois leu au second liure de Fulgose, lequel dit qu'un certain fort excellent Musicien nommé Timothee, quand il se dispoisoit à receuoir quelqu'un pour son disciple, il luy demandoit premieremēt s'il auoit iamais appris la Musique, s'il luy respondoit qu'ouy, il luy disoit incontinent qu'il luy payeroit le double de ce qu'il luy eust demandé s'il n'y eust iamais rien appris; d'autant qu'il me faut prendre double peine. La premiere & plus fascheuse, dit-il, sera de te faire oublier ce que tu pensois sçauoir. La seconde par apres sera de t'enseigner les choses vraies selon la perfection de l'art; & cela se doit entendre quand ledit Musicien trouuoit aucun qui eust esté mal instruit, & eust receu de mauuais enseignements & principes d'un autre maître. Dont ie tiens que vous auez fort bien dict parlant des considerations concernant celuy qui feroit profession de mon-

## LE II. DIALOGUE

strer à sauter, disant que bien souuent les disciples s'appërçoient aussi bien que les maistres de faillir dès la premiere institution des principes, estans tousiours iceux en toutes choses le fondement du tout.

PIN. Certes M. Baptiste a fort succinctement, & avec plus de briueuté que ie n'eusse estimé dict & déclaré quasi tous les plus difficiles points que l'on pourroit proposer entre les principes de nostre disposition & exercice de sauter. Car il me souuient en auoir cognu plusieurs à l'eschole de beaucoup de Maistres, & souuent remarqué moyennant l'experience que i'en ay eüe, que la foiblesse du corps est changée de son naturel, comme se change la volonté du mesme disciple, y interuenant la patience, & tolerance du Maistre : Et au contraire l'obstination, la colere & la trop grande hardiesse, ou bien l'impatience, & le lent, morne & paresseux exercice, sont occasion de faire deuenir vn ieune homme, qui seroit d'ailleurs fort legier, disposé & bon sauteur, de beaucoup moindre excellence que l'on n'auroit pas peu esperer : mais d'autant qu'il me semble que tous ces Seigneurs, mesmes le Seigneur Charles entre tous les autres, desire des-jà voir en acte tous ces sauts qu'il leur a racontés, & pour le contenter & satisfaire, ie voudrois qu'en peu de paroles nous puissions conclure nos discours touchant l'ordre qui doit estre obserué & gardé pour enseigner à nostre enfant toute la perfection de l'Art du saut Cubistique.

BAPT. La premiere & plus grande diligence, & le plus considerable aduis dont doyue vser nostre M. sauteur en l'instruction de son disciple, est de trouuer le moyen de l'accoustumer peu à peu dextriement à perdre la crainte naturelle que l'on peut auoir en toutes les choses difficiles à entreprendre, estant le plus souuent occasion de faire abandonner vne entreprise de grande consequence, comme seroit celle de faire faire la volte au petit enfant de telle façon que vous pourrez conceuoir & entendre; d'autant que le Maistre pour l'accoustumer peu à peu à pouuoir aysement ployer l'eschine, commencera dès l'entree à le soustenir sur la cuisse en ceste maniere.

*Comme on ploye l'enfant sur la cuisse.*



## LE II. DIALOGVE

Il luy faut balancer l'eschine sur la cuisse estant son corps du tout renuersé, lequel moyennant ceste lente agitation de iour à autre vient à estre plus ployable & maniable. Et partant avec le temps on luy ira tantost poussant d'un costé le sein en bas, & de l'autre costé les cuisses comme on le voit par la figure. Il est bien vray que si l'enfant sentoit douleur, il seroit plus à propos de différer à vne autre fois l'acte de ceste instruction; pource que si on s'y obstinoit par trop faute de iugement & de patience, il seroit à craindre qu'il n'en mes-aduint, estant cest inconuenient fort à noter. Mais quand on aura tant continué que l'enfant puisse avec facilité ployer l'eschine, alors il faudra que le Maistre vse de mesme que cy-dessus des deux mains, faisant peu à peu ioindre en plusieurs façons les mains aux pieds en ceste maniere.

*Comme*





*Comme on faiët ioindre les mains aux pieds.*



## LE II. DIALOGVE

En cest endroit il faut que celuy qui enseigne prenne bien souuent garde que la foiblesse, ou bien quelque lassitude, & quelquefois la pesanteur, ou l'un & l'autre ensemble, sont souuent occasion de faire que pour le moindre trauail & douleur qu'il sentist, il ployast les genoux: Parquoy il sera bon y remedier y interposant le Maistre ses deux genoux, afin que l'eschine prenne la coustume de se ployer le plus droit & le mieux qu'elle pourra; & puis le faut asseurer de s'abbaïsser de luy mesme, afin qu'il ne craigne de donner de la teste en terre; & afin qu'il aye plus de courage, il se mettra pres d'une muraille deux ou trois pieds loin d'icelle; puis le faisant tomber en arriere, appuyant ses mains eslargies; peu à peu il s'aidera avec l'une, puis avec l'autre en ceste façon à mettre les mains en terre; & luy ayant donné assurance de se plier ainsi, il faut qu'il se releue luy mesme de la muraille, prenant garde à deux choses sur tout. La premiere est, qu'en quelque sorte & maniere qu'on le face abbaïsser de luy mesme, qu'on se tienne pres de luy, & que on aye l'œil, que s'il perdoit courage, on fust prompt à luy donner secours, & qu'on se garde de le faire commencer à s'exercer en ceste seconde leçon, qu'on ne luy aye premierement bien rehaussé & ployé l'eschine sur la cuisse; d'autant que ceste premiere leçon le dispose à acquerir plus grande facilité & vigueur à se ployer. La seconde est qu'on l'aduertisse à toute heure de tenir les genoux fermes & droicts lors qu'il se ploye de soy mesme; d'autant qu'on euite par tel moyen le danger & peril de donner peu, ou beaucoup de la teste en terre se laissant aller; & si s'estant abbaïssé, il ne se pouuoit redresser avec les deux mains, qu'il se tire suyuant le besoin du grand ou mediocre secours par ses chausses; il faudra qu'il tienne semblable reigle & mesure de soy redresser les genoux droicts & fermes; & lors qu'il se fera accoustumé à abbaïsser iustement se monstrant jà asseuré d'un tel estude, il faudra l'aduertir que pour faire la volte en arriere, il doit retirer les muscles des espaulles, ensemble avec les hautes parties du sein, haussant en mesme temps les cuisses gentiment; pour faire la volte en telle sorte: Et pour qu'il la face plus aysement, il sera bon luy ayder, & tenir la main gauche au sein, & la droicte à l'eschine; & lors qu'il

apprendra la volte, alors il luy faudra ayder avec la main dextre, iusques à tant qu'il se soit retourné, diminuant toutes-fois tousiours l'ayde selon qu'il verra bon estre, comme i'ay dit ailleurs, afin que peu à peu il paruienne à pouuoir de soy mesme faire ladiçte volte toute entiere; & voilà comment se fait la volte en arriere: Mais quant à la volte en auant, on luy monstrera à mettre le pied gauche deuant, lors qu'il aura appris à demy à soy redresser de soy mesme au premier ply de l'eschine de la seconde leçon; de sorte qu'il ne restera qu'à luy monstrer à faire la volte en auant: on luy monstrera dis-je de ceste sorte, à mettre le pied gauche deuant, & au mesme temps qu'il abaisera les mains avec les bras bien fermes, qu'il esleue aussi la jambe droicte avec les genoux bien droicts & fermes, l'esleuant en haut, & la jambe senestre en auant, que la dextre soit pour s'abaiser en terre pour faire la volte avec promptitude, il faut qu'elle soit d'un mesme temps esleuëe de terre en haut avec la cuisse dextre, accompagnée aussi de la senestre auant qu'elle arriue à la ligne perpendiculaire, afin qu'en semblément ils abaissent la volte de terre, l'aduertissant qu'auant que les mains s'abaissent pour soy reposer en terre, il faut que tousiours la teste vienne en haut le plus qu'il est possible, & que la partie inferieure continuë le mouuement vers la terre, & les jambes ayant passé la ligne perpendiculaire, à l'instant il ploye un peu les genoux en ceste sorte, iusques à les faire toucher l'un l'autre, & faut tenir les bras en terre forts & fermes, & ployer fort l'eschine, & où il luy faudroit ayder, (ce qu'on remet au iugement du Maistre) à l'instant que les jambes sont esleuees en haut, & commencent à s'abaiser vers la terre, il luy mettra la main senestre avec quelque ayde du bras, & la dextre sur les cuisses, puis il s'abaissera peu à peu par mesure pour luy faire ployer l'eschine fort bien; mais au temps que les pieds s'abaissent pour se mettre à terre, il luy faut dire que ployant les bras avec les mains il prenne un eslançement de deuers la terre, afin qu'avec iceluy il releue son corps en l'air avec plus de facilité, & en cest acte esleuant ses mains de terre ploye un peu ses genoux; & ceste-là est la volte qui se nomme entre sauteurs, voltiger de l'eschine, laquelle sert d'un fort suffisant principe, & commence.

## LE II. DIALOGVE

ment pour l'enfant, afin de luy accroistre les forces & le cœur à la volte qu'on fait en auant aux sauts voltigez. C'est pourquoy il me semble que nostre disciple se doit maintenir, tant sur ce voltiger d'eschine, qu'on le puisse recognoistre assés, mesmement de la teste, à faire la volte avec assurance & sans crainte tant en auant qu'en arriere, & qu'il monstre & donne signe d'auoir force de pouuoir sans ployer l'eschine tourner son corps, c'est à dire, le rendre ferme pour la faire aux sauts voltigez. Et icy ie feray fin à ce discours pour ne sembler vous vouloir ennuyer, & pour estre plus brief à vous raconter le moyen de plusieurs & diuerses eschines: Mais d'autant que ces sauts voltigez viennent pour la plus part de ladicte volte qui se fait en auant & en arriere, qui est chose facile, & cognüe à tout Maistre pour dresser vn enfant à voltiger sans autre exposition plus grande, pour autant qu'encores que l'enfant ne sceust faire autre chose que la volte en auant & en arriere, & qu'il ne s'exercast à autre chose, elle est assez suffisante pour l'induire avec le temps aux sauts voltigez en l'air.

**COS.** Mais dictes moy ie vous prie combien il pourroit employer de temps à s'exercer à tel voltigement.

**B. A. P. T.** Nous auons desjà dict que le voltiger d'eschine ne sert d'autre chose que pour assés l'enfant à s'accoustumer de bonne heure la teste à faire telle sorte de volte, pource que quant au reste il n'y sert de rien, rendant plustost les membres & les muscles pesants à faire la volte qu'autrement, dont s'ensuit, sans que i'vse d'autre repliche, (comme chacun sçait) qu'il n'y a pas grande distinction de temps sur tel acte: mais il faut que le maistre aye iugement pour cognoistre si la force de l'enfant se trouue propre pour commencer l'exercice de ces sauts qu'on appelle voltigez en l'air, mais plus proprement sauts cubistiques; prenant tousiours garde que si tost qu'ils s'entremet de faire les autres sauts, que pour cela il ne cesse de continuer ce remuement & voltigement d'eschine, iusques à tant qu'il aye appris trois ou quatre sauts, comme le saut à deux mains, le glissement du milieu, avec le glissement quand on est estendu de soy-mesme en terre, le saut du singe, & le saut à pieds non pairs, & aussi yne rouë, avec vn, ou plusieurs sauts de singe, ou

rouë avec vn saut en arriere.

PIN. Je ne puis coniecturer pourquoy vous voulez reuoquer en doute que les sauts d'eschine ne soyent nuisibles à sauter en toute chose, excepté pour l'accoustumance de la teste à la volte, lequel exercice ie veux continuer seulement iusqu'à tant que ie sçache faire les autres sauts ; D'autant qu'il me semble qu'estant l'eschine forte, elle soit le fondement tant des sauts abbaisséz, que des forts & violents, tant qu'il est necessaire les esleuer le plustost que l'on peut, mais aussi s'il estoit possible, ne les arrester iamais, veu que nous auons dit cy-deuant, que cela estoit necessaire seulement pour s'accoustumer à faire les principes, dont ie ne ferois seulement d'opinion que l'on desistast à faire tel voltigement d'eschine, mais de le faire plustost cinq ou six fois arrester, sans faire autres sauts, pour autâr que comme nous auons dit, l'eschine sert de beaucoup aux sauts abbaisséz. Celà estant, encor que puis apres le disciple fust cinq ou six mois sans s'exercer, il n'en oublieroit tant, qu'il ne luy en demeurast tousiours quelque souuenance, s'accoustumât l'enfant plus à faire la volte de disposition que de l'eschine, & bien que vous me pourriez respondre que demeurant sans voltiger il pourroit auoir la teste pesante & debile, le cœur timide & craintif, & les muscles estonnez, ie dy qu'il n'est vray semblable qu'il l'oublie en si peu de temps, de sorte qu'il ne retint quelque chose des sauts voltigez ou autres qu'il auroit fait tant de fois auparauant, puis qu'on voit ordinairement que les fauteurs, encor qu'ils soyēt des ansentiers sans sauter, neantmoins moyennant que leurs forces durent, ne perdent point le cœur à faire la volte, & bien que ie vous accordasse que ceste discontinuation de cinq ou six mois pourroit beaucoup preiudicier à l'enfant en ce commencement, pour cela ne seroit-il necessaire de croire qu'il deust continuer à voltiger de l'eschine, apres qu'il se sera mis à faire d'autres sauts ; pource qu'encor qu'il peust estre quinze iours ou vn mois sans apprendre d'autres sauts, veu que la volte s'y interpose & entremet en chacun saut, iamais depuis le cœur n'en part, ny n'en a peur.

BAPT. La perte du temps est si chere que si vn petit enfant demeueroit cinq ou six mois sans continuer ce qu'il auroit

## LE II. DIALOGVE

commencé, ceste premiere ardeur, & bonne volonté qu'il auoit en ces commencements pourroit estre peu à peu refroidie; & cela luy preiudicieroit beaucoup, & luy pourroit tant nuire qu'en fin ce luy feroit plus de peine de se pouuoir remettre apres vn si lōg temps à faire les sauts, que si de nouveau il commençoit n'y sçachant rien; mais vostre seconde opinion avec la raison que vous auez alleguee n'a aucun lieu: Car il n'est point besoing de l'oster si tost, ou destourner de faire les sauts de l'eschine; Car vn mois ou plus qu'il s'y tiendra, ne le rendra pas plus foible ny tendre, outre que durant ce temps il se resioit en prenant plaisir d'apprendre quelque chose, & de profiter en la cognoissance tant des sauts que de la volte que l'on luy enseigne, desirant tousiours avec plus d'affection d'en sçauoir d'auantage. Ce qui ne succederoit si bien, s'il s'en destournoit si tost que vous dites; Mais plustost se desesperant, il se persuaderoit de voir encore de nouveau employer autant de tēps & de peine qu'il auoit fait auparauant: Tellement que ie suis d'aduis, tant pour son profit, que pour luy maintenir & conseruer la teste bonne, il faut qu'il s'y entretienne, comme i'ay dit, iusques à ce qu'il sçacha iustement faire trois ou quatre sauts; & ce sera lors qu'on luy pourra librement dire que le voltiger d'eschine est nuisible pour paruenir à la cognoissance d'vn rare & parfait saut; laquelle proposition il ne trouuera point estrange, pour auoirjà cōmencé à goustier l'excellence, & beauté du vray saut. Ce qui aduiēt à toutes les choses qui appartiēent à quelque art ou science qui se puisse enseigner aux hōmes. Pour exemple, nous voyons qu'vn maistre ioieur d'instruments pour cōseruer l'vsage, & la promptitude de la main de l'enfant, comme aussi pour luy en donner delectation & plaisir, va chacun iour reïterant les plus faciles accords qui se trouuent, iusques à tant qu'il se soit introduit en chose de plus grande importance.

Cōs. le voudrois suiuant le commun aduis de toute ceste noble compagnie, que vous fissiez le plus de diligence que vous pourriez à poursuiure l'ordre que l'on doit obseruer pour la parfaicte instruction de l'art de sauter, que vous alleguez; car nous voudrions desjà voir par experiēce les plus beaux & plus

admirables sauts.

BAP. Il me souvient auoir jà dit que toute la perfection de nostre saut consiste à faire la volte iuste reuenant à terre.

COS. Auant que passiez plus outre, dites nous si vous entendez lors que vous parlez de la volte, que le corps doyue tousiours retourner à terre, remettant ses pieds au lieu d'où il auoit commencé à eslancer le saut, ou non; car il me semble que cela est fort considerable.

BAPT. Vous auez bonne raison: Car il ne faut nullemēt douter qu'entre tous les sauts voltigez ou en auant, ou en arriere, celuy-là est le plus parfait de tous les autres, qui faisant en se tournāt en l'air vn vray cercle, retourne à mettre les pieds au mesme lieu, d'où il auoit commencé à partir à l'eslancemēt du saut; & cela non pour autre chose que pour le rendre plus parfait & mieux accomply, estant impossible qu'on trouue personne qui puisse passer outre le signe de ce saut parfait, qui entre les professeurs & maistres de l'art, se nomme saut en arriere retourné, pour l'acte de retourner ses pieds au lieu d'où il a toutte proportion iuste au lieu d'où le sauteur les tenoit eslançant son saut.

COSME. Certes ie m'aduise de vostre conception qui est fort belle: Car à chasque fois que vous aurez fait vostre saut bien proportionné avec sa iuste volte, retournant au mesme lieu d'où s'est le corps eslancé, il n'y a doute, qu'encores que d'autres puissent faire le mesme, si ne s'ensuit-il qu'ils le puissent surmonter, comme il peut aduenir en tous les autres sauts, qui peuuent estre aduancez plus d'une part que d'autre, veu qu'il est certain qu'à chaque fois que quelqu'un surmonte son compagnon seulement d'un doigt en sautant, que le saut du premier se doit appeller moindre, puis qu'il s'en est trouué vn qui l'a fait plus grand, ne se pouuant en tels sauts trouuer vn terme prefix que l'autre ne puisse passer; ce qui est vne plus grande imperfection entre-eux, puis qu'ils ont pour leur fin de pouoir estre plus longs; ce qui ne se peut pas trouuer au saut retourné, estant tousiours iceluy, comme tres-parfait, semblable à soy-mesme entierement de tous costez, sans determination de longueur, ou largeur, estant assuré de ne pouoir jamais e-

## LE II. DIALOGVE

estre en aucune maniere surmonté. Ce qui à bon droit ne procede d'autre que de la bonté diuine & excellence de la forme circulaire, laquelle on peut dire auoir proprement son principe distinct, & separé de la fin cōmune des autres, n'y ayant au cercle aucune partie qu'on puisse nommer ny principe, ny fin d'iceluy. Car quelque point qui s'oste du cercle sans aucune difference, est tant le commencement que la fin de ce cercle. Parquoy examinant tous les mouuements qu'on peut faire aux autres cercles, il n'y en a aucun qui ne se puisse vanter estre plus conforme au mouuement celeste, & partant plus digne que cestuy nostre faut retourné, duquel l'origine & fondement ne semble point dependre aucunement du mouuement humain. Qui plus est Aristote, nous assure que le seul mouuement circulaire se peut nommer regulier; & tous autres mouuements sans aucune exception irreguliers; d'autant aussi qu'ils se peuvent, sans aucune exception, hors mis le circulaire, auancer, reculer, se contrarier & diuersement opposer les vns aux autres, n'ayant aucune reigle determinee, longue ny large de leurs distances, comme il est necessaire que le circulaire l'aye, voire au beau milieu de toute la ligne perpendiculaire, sur laquelle est le mouuement formé en se tournant à l'entour du centre, qui se trouue continuellement au lieu qui esgalement est distant de tous les costez de la circonference.

FERR. Poursuiuez doncques M. Baptiste, puis que le S. Cosme a tant bien consulté avec sa Philosophie circulaire la perfection & egale proportion de ce faut retourné.

BAPT. Je diray ce qu'il m'en semble, suyuant la pratique & cognoissance que i'en ay, me sousmettant tousiours à la correction de ceux qui peuvent mieux que moy sçauoir le moyen d'enseigner ce qui concerne ceste consideration circulaire. Il me semble donc que le faut retourné iustement fait avec la volte n'est autre chose qu'un cercle parfait en l'air, dont la circonference commence, & finit au mesme lieu, d'où le fauteur est party de terre lors qu'il s'est eslançé pour faire ledit faut: Il faut doncques que le centre de la circonference formée de la iuste proportion du faut se trouue en la moitié de l'espace occupé par le corps du mesme fauteur retourné à point nommé.



mé. Or i'en ay cognu quelques vns qui se sont trompez, se persuadants que le centre fust où les pieds retournent sur la fin du saut iustement tourné: Car si cela estoit, il seroit nécessaire que la moitié du cercle fust sous terre descrit, ce que l'on voit estre impossible. Et encores ce que i'ay entendu de plusieurs, que lors qu'il est besoin que le sauteur s'esleue de terre pour faire la volte de son corps, nous deuons prendre pour centre du saut tourné la iuste moitié du corps dudit sauteur, suyuant le lieu auquel il se trouuera apres auoir commencé se tourner en l'air; & qui le considere de ceste sorte, chaque saut tourné descrit tousiours avec la teste vn cercle tres-parfaict en l'air, duquel la superficie va par ligne droicte au centre, & droict au lieu où le sauteur auoit ses pieds lors qu'il a commencé à sauter, & s'esleuer en l'air. Il est bien vray qu'aux sauts longs la volte commence du lieu d'où on s'eslance, & finit au lieu où la teste vient à se tourner; & encores qu'il y ait peu de difference, si est-ce neantmoins qu'il est assez euident que l'extremité de la teste regardant le ciel au commencement & à la fin de chaque saut, il est nécessaire que la teste retourne à former vn cercle parfait duquel la difference n'est autre que cest alongement ou extension qui se fait en quelques sauts, comme en les faisant parauenture voir en acte, ils seront beaucoup mieux cognus & entendus. Maintenant il faut dire, que tout ainsi qu'aux Mathematiques pour enseigner à descire vn cercle sur vne droicte ligne, il le faut diuiser en deux portions égales, & puis faire le demy cercle d'vn costé; & ainsi ayant pour resolution que le cercle face vn cercle tres-parfaict en l'air, nous procederons de la mesme maniere & façon qu'eux, nous souuenans toutesfois que le nostre est beaucoup plus difficile que le leur; d'autant que plus est gros le compas avec lequel nous le faisons, est plus difficile à manier que n'est pas l'ordinaire: Mais d'autant que ie ne suis point Mathematicien, bien qu'il semble à m'ouyr discourir que i'y entende quelque chose, ie veux prier M. Ferrant de prendre en cecy ma protection, & observer en chaque saut la figure que l'on descrit.

FERR. Vous deuiez plustost employer le secours du S. Rogier que le mien, comme si i'estois quelque resolu & excel-

## LE II. DIALOGVE

lent Mathematicien.

**Cos.** Je vous prie que nous ne nous remettions point sur les bien sçeances & ceremonies : mais cherchez seulement de satisfaire à ce que l'on requiert de vous gracieusement , & le plus brièvement que faire se pourra. Car j'aurois fort agréable de voir avec tous ces Messieurs l'acte de ces beaux sauts, fanstant en disputer ; & me semble que toutes ces raisons tant des cercles, que des centres, & autres telles speculations , bien qu'elles semblent belles, ne sont toutesfois en effect si iustes & certaines que les demonstrations és Mathematiques.

**FERR.** Il est vray que toutes les autres choses ne sont point si certaines ; mais encôres faut-il que nous nous en seruions pour la necessité telles quelles sont , & y apportions du iugement pour en sçauoir vser avec discretion , de peur que nous ne prenions vne chose pour l'autre. Qui est celuy qui ne sçait qu'il est impossible de former iamais en sautant , soit retournant , ou non , vn cercle parfait ? bien qu'audict saut retourné on voye & considère vne telle circuïtion qui approche fort à ceste parfaite rondeur du cercle duquel nous parlons : & n'est vray semblable ce que vous vouloit persuader le S. Baptiste, que la teste se forme en tous les sauts retournés à la similitude & semblance d'un petit cercle parfait , pource qu'on ne le peut iustement figurer & comparer aux sauts iustement & également retournés ; & ne doit-on prendre garde au tour de la teste, mais bien à celuy que les pieds vont formant , lors que le corps se retourné en l'air, se tournants ou nō, pour se remettre en son mesme lieu, d'où le sauteur s'estoit commencé à lancer pour faire le saut ; estant certain qu'en ces sauts tournez , & non retournés, nō seulement la teste ne fait aucun cercle, mais au contraire elle va formant vn croissement de lignes, par lequel on cognoist que la teste deuāt s'auancer avec tout le corps pour se trouuer redressé au mesme lieu où ils vont plâter leurs pieds, il est necessaire qu'il s'en ensuyue vn tel croissement de lignes que j'ay dict ; ce qui n'aduiant pas au saut retourné, d'autant que les pieds retournent au mesme lieu, d'où ils estoient partis ; & duquel saut il ne se peut former aucune figure bien & iustement reiglee, ny que le nom de rondeur parfaite meri-

te, comme par les demonstrations cy-deuant mises il se pourra aysement voir, lesquelles vous montrent facilement la diuersité des mouuements requis à ceste sorte & espece de saut, comme estant ou plus ou moins droitement decliné à son premier eslançement, c'est à dire, plus haut ou plus bas, qui est son premier temps.

BAPT. Je n'ay pas entendu qu'on doye proceder enuers vn ieune homme par ceste voye Mathematique, bien que j'aye prié le S. Ferrand de monstrier les mesures iustes du saut; mais seulement ie desirois sçauoir d'où procede la cause du saut parfait & imparfait, & leur difference; & d'où vient que tous ne sont pas fauteurs, bien qu'ils fassent les mesmes sauts. Et faut que nous empruntions des Mathematiques la plus part des noms que nous auons en nostre Art, & desquels nous vsons en chacun saut, mesme en celuy qui seroit fait par le plus lourd fauteur qui se trouue, comme cercles, demy cercles, lignes, o-uales, &c. Mais la difference d'estre plus long, ou plus court, plus propre, ou moins propre, procede de l'observation de se gouverner de l'un à l'autre contre les mesures Mathematiques, avec plus ou moins de proportion qui est requis au saut: mais passant à la demonstration de nostre Art, auant que de venir à la narration du saut, il est necessaire de sçauoir la proportion, & mesure, qu'on doit generally tenir en chacun des trois fondemens d'iceluy, qui sont le leuer, le tourner & l'acheuer, & autres mouuements du corps, qui sont la cause de ce saut tourné. Or il y a quelques sauts qui s'esleuent par le moyen de la course, & autres sans course; & y en a tant des vns que des autres aucuns conditionnez, & autres non terminez. Nous nommerons doncques terminez ceux generally; ausquels il faut en sautant passer sur vn homme, ou dans les cercles, ou sur vn siege, ou banc, ou autres semblables. Les autres sont ceux que nous nommons libres, qui se font sans introduction de borne, ou terme, ou le corps doye par necessité acheuer son saut. Le fondement premier de ces deux sortes de saut n'est qu'un mesme, se deuant & en l'un & en l'autre lancer le corps avec violence; & partant nous nommerons d'oresnauant ce premier fondement eslançement du corps, lequel n'estant fait

## LE II. DIALOGVE

à temps, ou pour glissement, ou pour chāgement de pied proche du terme où on se doit lancer, ou pour auoir les membres disioincts suyuant leur necessité, s'ensuyuent desordres tres-dāgereux pour le fauteur. Il est doncques de besoin aux fauts de course, auant que l'on commence la course, qu'on se resolue du moyen & de la force requise & necessaire pour accomplir, & faire le faut, & qu'on diuise la distance d'où on commence la course iusques là où on doit commencer le faut; & afin qu'il ne s'ensuyue changement du pied cōtraire à son vouloir, nous nous seruons d'une sorte de course, dont nous parlerons tantost, & aussi du moyen que l'on doit tenir à faire le faut diuers, & variable dès le commencement iusques à la fin, la difference qui est en ce premier fondement entre les fauts libres & terminez; és libres on doit monter tant que la force & le iugement le permettent; & aux limitez, ou terminez, il faut aller si haut que la teste vienne iustement, ou au moins fort proche du terme; car si elle n'y arriuoit, ils feroient la volte & le tour le plus souuent, outre que le faut n'esteroit iuste & mesuré; & y auroit danger de tomber, & se faire mal: & au contraire il seroit qu'il y auroit desordre, pour vne trop grande violence non reiglee, s'il passoit ledict terme, par lequel il peut faire la volte iuste. Quant au second fondement, c'est le mesme en l'un & en l'autre faut, libre & limité: car estant arriué au lieu propre à faire la volte, il est besoin sans interposition de temps se racourcir fort, retirant les cuisses pres du corps, avec l'ayde des bras & de la teste, qui font que le corps se tient en fort peu d'espace, alors que l'on veut faire la volte, ou le tour; à laquelle si les forces manquoient par interposition de temps, il en aduendroit de fort grands dangers. Le dernier fondement se rapporte à la fin de chacun faut, qui consiste, à sçauoir bien accommoder les deux mouuements du corps, à sçauoir le superieur, qui est depuis la teste iusques à la ceinture, & l'inférieur, qui est depuis la ceinture en bas, où il est en proportion égale; & de cela ne peut-on donner reigle generale: car suyuant la diuersité des fauts, il faut s'allonger, ou accourcir conformement à la plus grande hauteur, ou petitesse du faut, plustost, ou plus tard, pour euitier de tomber, ou trébucher, ou donner du cul en ter-

re selon la diuersité de la volte en tous les sauts eslancez qui s'esleuent avec la course, & ausquels le corps s'esleue en haut, & avec plus de violence, qu'il ne faict s'esleuant sans course. Que le saut se face avec la volte en auant, ou en arriere, ou de ferme, & qu'on se iette de haut, il est necessaire de s'estendre, ce qui n'est autre chose que refrener la volte en eslançant en vn mesme temps le mouuement superieur du corps en haut, le redressant droit, allongeant les jambes & les cuisses en bas vers terre; Que le sauteur aie le iugement de s'en seruir proprement selon la hauteur, afin que voulant euitier vn inconuenient, il ne tombast en vn autre pour estre trop diligent & trop prompt; comme il aduiendroit s'il se trouuoit auoir le corps trop esleué de terre à faire vne volte en auant, s'il s'estendoit trop tost & qu'il vint à tomber, d'autant que les jambes ne trouuant terre, pour s'estre estendu trop violemment, il viendrait à trebucher & à donner de la face en terre: mais il faut qu'il aille compassant, suyuant la hauteur du lieu, lors qu'il se vouldra estendre, & pour parler plus clairement & le mieux donner à entendre, ie diray qu'és sauts, où le corps s'esleue de terre fort haut, on ne se doit pas si tost estendre: car, comme j'ay dict, les pieds ne trouuant terre on viendrait à trebucher; ny s'accourcir aussi trop violemment, & pour se l'estendre il faut le faire au commencement fort lentement, & peu à peu, tant pour retenir le corps, de peur qu'il ne tourne, qu'aussi pour prendre temps que le corps tombe, tant que sentant estre suffisamment abaissé, on s'estende lors tout d'un coup. Et és sauts qui s'esleuent avec course, esquels le corps s'esleue avec violence non trop haut de terre, si tost que la volte, ou tour est acheué, on se doit estendre: mais qu'on prenne garde toutesfois que selon l'elevation du corps plus ou moins, qu'on aye le iugement de scauoir trouuer terre par ligne perpendiculaire en l'acte de se vouldre estendre; car si on attendoit trop tard, on pourroit donner du cul en terre: & és sauts esleuez de terre ferme il faut au contraire qu'avec les cuisses & les jambes accourcies, on vienne à s'esleuer, & les ayant ployees on retourne à terre à pieds pairs, & non pairs; & s'estant mis en auant pour celuy qui se faict en arriere, & au saut retourné, & aux autres qui ne se peuuent pas

## L E II. D I A L O G V E

beaucoup esleuer de terre, le temps de faire la volte, ou le tour, les empescheroit; & és sauts tournez en auant y a danger de donner des fesses en terre, & és sauts tournez en arriere y a danger de donner de la face en terre: mais aucunes fois plus, aucunes fois moins en quelques vns, suyuant la plus grande, ou moindre esleuation du saut; ce qui peut aduenir au plus ou moins disposé fauteur. Le maistre doit auoir vn fort grand iugement en cecy à enseigner les deux premiers fondemens. Ils seront doncques semblables aux sauts fermes, & le dernier qui consiste à s'estendre est different, ainsi que nous auons dict, à reuenir droit, ou ployé, comme nous dirons en son lieu, en l'instruction de chacun saut. Or puis que nous auons suffisamment discouru de la maniere, mesure, & proportion que l'on doit tenir & obseruer en chacun desdits trois fondemens, nous viendrons maintenant à traicter des autres mouuements, qui sont occasion de tout le souleuement du corps pour faire nostre saut cubistique. A l'eslancement que fait la partie inferieure de terre est suyuant la diuersité du saut aydee tantost de l'accourcissement des genoux, & quelques fois de l'auancement de la jambe droite en la leuant: La superieure est semblablement aydee continuellement en s'esleuant du mouuement de la teste & de celuy des bras; il est bien vray que ces quatre susdicts mouuements, de la teste, des bras, de l'accourcissement des genoux, & de l'extension de la jambe, sont entr'eux differents selon l'occurrence des sauts; car la teste a quatre mouuements, à sçauoir, s'auancer en auant au premier eslancement du saut en auant, & de celuy qui se fait en arriere, suyuant que l'on donne la volte au corps en auant, & en arriere circulairement; le troisieme c'est celuy qui se fait par les flancs, à costé, de hanche, ou autrement: le quatrieme est celuy que l'on fait en se retournant en arriere, ce dernier estant vers le costé fenestre ou dextre, suyuant la commodité propre du ieune homme, est entre les sauteurs nommé saut retourné, & cestuy-cy mesme est peu different du commencement de la rouë, n'estant le retourner autre chose que bien faire la rouë en l'air, comme vous entendrez. Mais ceste forme de se mettre en auant & en arriere toutes les fois que continuë le mesme mou-

uement de la rouë, iusques à ce que la volte ou tour finisse, est tousiours cause de deux effectz; à sçauoir, qu'il aide premiere-  
ment à esleuer le corps au premier fondement, & puis au se-  
cond à le tourner: L'autre qui se met du costé gauche, retour-  
nant le saut, & par flanc ou costé, & par le saut de hanche ne  
fait qu'un effect. Les bras ont six mouuements. Le premier, se  
mettre estendu en auant, comme monstre la premiere figure  
au saut des cercles. Le second est, tenir les poings esleuez & e-  
stendus regardant le Ciel; & c'est ce qui cause faire la 'volte' és  
sauts retournez qui se font en arriere. Le troisieme est en auant  
en forme courbee, comme vous verrez en son lieu. Le qua-  
triesme, en arriere estants raccourcis, comme ie vous monstre-  
ray cy apres. Le cinquiesme est de ceux qui sont ployez ayants  
le costé fenestre en rouë par flanc, ou pour mieux dire par han-  
che, le mouuement duquel n'est necessaire à nos sauts, excepté  
à celuy qui se fait par hanche; & ce qu'on se met en auant les  
bras estendus sert à esleuer le corps au premier fondement, &  
auec fort grande promptitude, mesmes en ces sauts en auant  
qui s'esleuent de course, il faut que le corps soit eslacé par droi-  
cte ligne, en la forme qu'il s'eslance au premier fondement à  
passer les cercles, ou en quelqu'autre tournant le saut sans fin,  
ou terme, comme à passer sur vn homme, ou autre chose. Et  
d'autant qu'on trouue quelques professeurs de cest art qui s'es-  
leuent és sauts en auant auec fort grande violence, & ont de  
coustume mettre les bras au premier fondement nō estendus,  
comme i'ay dit cy dessus, mais courbez, ie tiens qu'il ne guide,  
ny ne souleue son corps auec telle vigueur & prōptitude que  
l'autre pourroit faire, veu que mettre les bras courbez repugne  
au corps, comme contraire mouuement de se pouuoir auan-  
cer auec ceste facile & prompte agilité qu'il pourroit faire les  
mettant estendus; ce que nous enseigne la nature mesme.  
Que s'il aduient que quelqu'un vueille sauter vne espace, ou sur  
vne table, pour peu expert qu'il soit, il ne iettera iamais ses bras  
pour tirer son corps en longueur, ou pour le souleuer de terre  
en haut, en mettant ses bras courbez; mais bien le fera-il les e-  
stendant, comme ie vous ay ja dit de ceux qui s'esleuent de cour-  
se és sauts qui se font en auant auec promptitude là où il est ne-

## LE II. DIALOGVE

cessaire s'estendre. La forme de mettre les bras estendus au premier & second fondement pour faire la volte, les tirer en arriere, & les raccourcir, a plus de propriete pour temperer la volte, de peur qu'on ne vienne à trebucher en auant, ou tomber sur la face: mais bien diray-je que ces sauts qui se font en auant, ou qui se leuent de terre ferme, ou avec petite course, & pour plus faciliter le corps à s'esleuer de terre en haut d'un temps conuenable, pour luy faire donner ou faire la volte, & mettre ses bras courbez pour le saut non trop haut esleué, sont de plus grande aide & secours, qu'ils ne sont les estendant pour faire tourner le corps avec plus de promptitude; me reseruant toutesfois le saut de ferme à pieds impairs, disioints tourné & retourné, lequel se doit esleuer au premier fondement avec les bras estendus, estant plus propre que l'autre courbé, ainsi que l'experience nous le monstre, & accourcir les genoux és sauts qui se font en arriere, cause des effects; l'un, ou qu'il aide au premier fondement à leuer le corps de terre, & au second tenant ses genoux accourcis, le corps tousiours se tourne avec plus de facilité, & promptitude, d'autant qu'elles sont en luy vnies & conioinctes, & ne sont qu'un effect au saut retourné en arriere, comme en celuy qui se fait en auant soit au premier, ou au second fondement; la iambe pour esleuer le saut en haut, soit à pieds disioincts, de ferme, ou de course, sont effects, à sçauoir, le premier au premier fondement aide le corps à s'esleuer de terre, il fait seulement cela en arriere, s'estant de course eslançé en auant. Et sçachez que la difference qui est entre le saut iustement fait, & avec toute assurance & bonne grace, & celuy qui est mal propre, peu resolu, & de mauuaise grace, procede du plus & moins docte fauteur, qui est, suyuant l'occurrence de sçauoir regir & conduire son corps és trois fondements avec la proportion iuste & la mesure, que l'on y doit obseruer. Mais d'autant qu'aucuns sauts se font libres, & autres limitez, comme nous auons dit cy dessus, ie ne veux toutesfois laisser d'en donner briefuement un general aduis, & enseignement; afin que nostre fauteur en ces sauts diuers soit iudicieux pour faire que le saut soit iuste & bien fait. Il y a doncques quelques sauts qui s'esleuent avec la course, & autres sans course; ceux qui s'esleuent



s'esleuent avec la course, les professeurs de cest art luy donnent le nom de eslancez; les autres qui se font sans l'aide de ceste course, sont nommez sauts de terre, & sont plus forts que les autres, veu que la vistesse qui naist de la course, cause plus de facilité à s'ouïdre le corps de terre, & le faire esleuer en haut avec plus de vigueur, qu'on ne fait à l'esleuer sans elle; veu que c'est chose naturelle, que beaucoup plus aiseement on sautera vne espace de longueur, ou qu'on passera vne table, ou autre chose de hauteur avec l'aide de la course, que l'on ne leuera le corps de ferme: Et afin que l'aduertissement soit mieux en general, & avec plus de facilité entendu de nos sauteurs, nous prendrons pour les sauts qui s'esleuent de ferme deux termes; l'un sera, que le sauteur esleue vn saut de terre en auant, ou en arriere, & le mesme sur vn treteau qui seroit de hauteur de trois pieds: Le saut qui s'esleue de terre ferme requiert au premier & second fondement vne plus grande vistesse & promptitude qu'il n'est requis à celuy qu'on fait sur vn treteau; car le saut qu'on fait sur vn treteau requiert vn plus lent mouuement: & la difference qui naist du plus grand, & moindre mouuement est cause de la hauteur que porte le treteau, la hauteur duquel rend le corps à l'esleuer & tourner, remply d'une plus grande vigueur, facilité, & promptitude esdits deux fondements, qu'il ne fait en ce qu'il s'esleue de terre; Pource que quand ie dois faire vn saut esleué de ferme (prenons premierement de terre, & puis nous prendrons le mesme de cy-dessus d'un treteau) pour faire que le saut que i'esleue de terre forte effect avec parfaicte proportion, il me conuient, esleuant le corps au premier fondement, vser de grande force & promptitude, afin qu'en le tournant, ceste force & violence dont i'ay vsé à leuer le corps, cause au second fondement que ie me tourne auant que le corps commence à descendre vers son centre au troisieme fondement: mais au contraire esleuant ce mesme saut dessus le treteau, il viendrait à donner trop grande volte quand il voudroit vser de ceste force & violence dont ie me suis serui en celuy de terre, & lors il viendrait à donner de l'eschine & de la teste en terre au saut en arriere, & de la face en celuy d'en auant. Et afin que nostre ieune homme se rende as-

## LE II. DIALOGVE

feuré & vse de ces sauts avec vne entiere & parfaicte pratique, auant que de venir à la particularité de chacun saut, ie dis en general, qu'il aduise de ne se mettre iamais à faire vn saut, s'il n'a auparauant iugé en son entendement que ses forces corporelles correspondent pour faire le saut qu'il s'est proposé de faire, estans les forces du corps iournalieres à vn chacun: qui est cause que tel pourra aujourd'huy bien faire vn saut avec toute asseurance, se trouuant les forces suffisantes, qui demain ou vne autre fois ne sera pas si bien disposé, ses forces estans beaucoup plus foibles. Et ceux qui n'obseruent pas cette reigle & preceptes, se mettent en voye d'estre bien-souuent renuersez avec la teste, ou avec l'eschine en terre. Que nostre jeune homme aussi prenne garde à chacun saut, auquel on donne la volte en l'air, mesmes es sauts, esquels on se souleue de terre ferme, d'auoir fait la volte iuste, auant que le corps commence à descendre vers son centre pour se remettre à terre, comme i'ay déclaré cy dessus; veu que si le corps descend auât que la volte soit finie & acheuee, & outre que le saut ne se feroit iuste, ny avec grace, on seroit en danger de cheoir & se faire mal. Et afin que le corps aye force & vigueur de se tourner en ces sauts qui s'esleuent de terre ferme, & d'eslancer le corps au premier fondement, il faut vsfer de fort grande force, & violence: Et s'il aduenoit d'auenture par debilité de force, ou autre accident, que le corps s'abbaisast vers la terre, auant qu'il eust finy la volte, pour euitr vn grand danger, qu'il tienne tousiours le corps accourcy le plus qu'il pourra, veu que le dict accourcissement donne le temps au corps d'acheuer de se tourner. On doit aussi aduiser en chacun des trois fondements, que les membres, ou mouuements du corps, (s'il les faut ainsi nommer) viennent à s'vnir à ceste temperature qui est propre & conuenable à l'Art; veu que l'vnion & bonne temperature de membres faict reüssir le saut iuste, & de bonne grace: & au contraire l'imparfaict, mal propre & perilleux, cause de se mal faire. Et faut noter que pour faire le saut iuste, & s'esleuer en hant, se tourner & finir le saut, les membres s'accordent & respondent à l'ayde de ce saut en s'vnissant, comme plusieurs lignes tirees circulairement correspondent au centre: mais il

faut entre autres choses que nostre sauteur rende son esprit & entendement expert en cestuy nostre faut, afin qu'avec la prudence & adresse d'iceluy il puisse tousiours bien guider & conduire son corps és trois fondemens susdits depuis le commencement iusques à la fin, avec assurance & bonne proportion de membres qui y est requise & nécessaire. Par cest Art de la pratique à l'acte, son faut se fera tousiours avec plus d'assurance. Or l'esprit & l'entendement que i'ay dict y estre requis s'acquiert par l'examen qu'on doit faire du mouuement propre, & du temps qui est conuenable à chaque faut, mesurant de luy-mesme ses forces selon que le faut est plus ou moins fort; & que son corps est pesant ou disposé plus vne fois que l'autre; & en telle sorte la theorique rend la pratique parfaite, l'esprit & l'entendement par ce moyen examine & reduit en acte. Le dernier aduis que ie veux donner à nostre ieune homme est en cest endroit vniuersel, me reseruant à discourir de l'aduis & precepte particulier en son lieu. Et peut-on vser de cest aduis en deux manieres; à sçauoir, de bien prendre le temps, & y employer la vifesse, & promptitude qui y est nécessaire; & la pratique de cest aduis est des plus difficiles & dangereuses à exécuter, & spécialement és sauts limitez. La course, comme nous auons desjà dict, est vn grand secours, mais perilleux, si on ne s'en sert bien à propos; & là vn iugement certain, ferme & assuré est fort nécessaire à celuy qui saute, qui est, de retenir tousiours vn pied soit le droit, soit le gauche, (comme c'est la coutume des sauteurs) & lors il finira la course au lieu où il aura mesuré les pas en son espace: tellement qu'il faut qu'il prenne garde qu'arriuant au but où il veut prendre le temps pour esleuer le faut, que son pied accoustumé y arriue, de sorte que la continuation du faut l'y conduise, & non pas l'incommodité d'un pas: car si vne fois par faute de bien prendre le temps il venoit à perdre la vifesse & promptitude requise, il auroit beaucoup de peine à restaurer & reprendre ses esprits, & vnir vaillamment la force de ses muscles pour parfaire son faut; & en tel cas au milieu d'iceluy le peu expert & discret sauteur, qui ne se peut retenir, se trouue en grand danger, sans qu'il y ait grande apparence de le pouuoir finir; & c'est cest erreur remar-

## LE II. DIALOGVE

quable que nous auons dict estre en l'eslancement. Or pour auoir assurance de ne tomber en l'erreur de plusieurs fauteurs, on vse d'une sorte de course, en laquelle le pied gauche va tousiours le premier deuant, & le droit le va suyuant continuellement, & le chasse presque de la sorte qu'on a de coustume courir la poste; Ce qui semble, (à mon iugement) plus assuré que la course ordinaire, mais elle n'est pas si prompte pour leuer le saut, toutesfois ie l'approuuerois plus és sauts limitez: car estant arriué au but, dont on doit prendre le temps, la course ordinaire le pourroit auoir conduit d'un pied incommode pres du lieu, & par ainsi le contraindre à perdre le temps de l'autre, dont il pourroit aduenir tres-grand inconuenient, peril, & danger: mais pour vser de la course prompte & assurée, où y a grand espace, ie serois d'aduis premierement qu'on courust ordinairement, comme est la coustume des fauteurs; puis estant proche du lieu, sept, ou huit pas, la restraindre à tous sauts, tenant vn pied deuant, & le chassant avec l'autre, le faisant, comme nous auons dict cy-dessus; & où l'espace est petit vser seulement de ceste moindre course avec vn pied deuant; toutesfois ie le remets au iugement du sauteur, d'autant qu'on en peut trouuer tels qui ont vne si grande cognoissance & pratique du saut, que la mesure de la course ordinaire ne leur saut iamais, ny ne vient à faute. Mais ie veux que nostre sauteur s'estudie en ceste chose avec le pied deuant, le changeant au milieu du cours, afin qu'il s'en puisse seruir plus commodément, & assurément en l'acte du saut, afin que cela soit moins perilleux & dangereux à nostre ieune homme. Il y a vne autre consideration en la course, c'est que plusieurs fauteurs se font croire qu'en sautant en vn grand espace, & en prenant vne fort grande course, le saut leur doye estre plus facile & plus prompt, encores que l'experience leur fasse voir le contraire, ne s'apperceuant pas que d'une trop grande course aduiennent deux inconuenients, l'un est, qu'auant que le sauteur arriue au but prefix l'haleine luy saut, laquelle retenant, les forces sont plus gaillardes; l'autre est, que la longueur de la course empesche bien souuent à prendre la iuste proportion du temps du saut, de laquelle proportion de temps, & de la retention de l'halei-

ne, on fait iustement le faut. le veux doncques que nostre ieune homme sçache prendre la course, & la borner, veu que de la distance ordonnee & limitee vient la promptitude du faut, de sorte qu'en retenant bien l'haleine, & obseruant la iuste proportion du temps, il le fait en sa perfection; se prenant bien garde qu'il ne soit point trop long pour les inconueniens qui en arriuent, ny aussi si court que le faut n'aye sa iuste promptitude. Or d'autant qu'il me semble auoir suffisamment declaré comment se doit gouverner nostre fauteur, ie viens maintenant à la narration du temps qu'il faut prendre és fauts où interuiuent la course, & à sa fin, lequel temps est cause que les esprits & mouuements du corps s'vnissent, & que le faut avec telle vnion s'esleue, car ce seroit chose impossible de faire le faut voltigé en l'air sans prendre ce temps apres la course: mais d'autant que nostre nombre de fauts s'esleuent de terre apres le premier fondement en diuerses sortes, il est necessaire qu'un tel temps soit pris en quatre manieres differentes, dont la difference des noms est; l'un se nomme le temps des pieds disjoincts, ou separez: l'autre le temps à pieds joincts: le troisieme le temps eslançé: & le dernier le temps eslançé avec l'esbranlement: Mais d'autant qu'il me sembleroit chose superflue & ennuyeuse de redire & repeter la maniere de ces temps en chacun faut, ie declareray le moyen de se seruir de chacun d'iceux, afin que le seul nom fuisse de le faire entendre en son lieu. Le temps à pieds disjoincts se fait avec deux battements, & l'ordre que l'on y doit tenir est cestuy-cy; le pied dextre doit faire la fin de la course au lieu qu'on a marqué pour prendre le tēps, qui sera cōme à la lettre A. mise en apostille à la marge, & sans s'arrester nullement au temps que ledict pied dextre est pour finir la course, le fenestre avec la jambe bien estendue passera en auant se tenant en l'air suspendu, dont le dextre au mesme temps que le fenestre passé en auant s'esleuera de la lettre A. & avec un petit faut, ou s'il est permis le dire, avec un cloche-pied, se transportera un pied plus auant, comme à la lettre B. & le premier battement du temps fait tout cecy, & le dextre finissant le petit faut, le fenestre avec la iambe bien estendue s'abaissera en terre, se mettant sur la

C

B

A

## LE II. DIALOGVE


lettre C. qui est la distance d'un pas mediocre, qui se trouue à la fin du tēps du second battemēt que fera le pied fenestre s'arrestāt à la lettre C. & le corps s'esleuera en ce mesme tēps en l'air au premier fondement pour faire le saut de la volte en auant, & faut bien prendre garde que si tost que le pied fenestre finit le second battement à la lettre C. le dextre ayant en arriere la iambe bien estenduē en l'air avec promptitude, & agilité commence le saut: Mais si c'est pour faire la volte en arriere le pied dextre s'arreste au mesme temps que le fenestre à la lettre C. ayant la iambe bien roide, & pour commencer le saut se iette deuant en l'air, De sorte que d'oresnauant quand nous exposerons la façon & maniere de laquelle on doit vser pour eslan- cer le saut apres la fin du temps limité, nous prendrons pour commencement le moment auquel le pied dextre s'esleue en l'air ayant la iambe bien estenduē en auant ou en arriere, ainsi que nous auons dit, & cela se peut mieux practiquer à pieds ioincts qu'autrement, de façon toutefois que le pied fenestre fasse la fin de la course au temps & lieu limité en la lettre A. le dextre ayant la iambe bien estenduē avec pareille agilité & promptitude que le fenestre passera deuant en l'air, & si tost qu'il sera passé, le fenestre s'esleuera de terre, & s'ira ioindre promptement avec l'autre, & ainsi vnis & conioincts s'arrestent à la lettre B. pour faire la fin du temps, s'esleuant le saut au mesme instant que les pieds auront finy leur battement, & au mesme temps qu'ils s'esleuent de terre se fait semblablement vn battemēt, & le pied dextre fait la fin de la course à la lettre A. Et en ce mesme temps que le pied dextre finit sa course, le fenestre estant esleué en l'air passera deuant ayant la iambe bien estenduē, & finalement s'ira poser au lieu limité d'où doit prendre le saut son commencement, & se terminer en la lettre B. où finit le battemēt: Mais au mesme temps que ledit pied fenestre se va poser à ladite lettre B. qui est vn pas mediocre du lieu où le pied dextre a finy la course estant encores en l'air, le dextre s'esleuera de terre se ioignant avec le fenestre, ayant la iambe bien estenduē, & roidissant les bras passera plus auant deuant l'autre, & en ceste façon se doit tousiours commencer le saut avec quelque battement de pieds, & le temps limité

exactement obserué à la lettre A. puis soudain le pied dextre passera vn pas deuant se posant à la lettre B. où finit le premier battement, cela fait, le fenestre se posera soudainement apres le dextre au lieu d'où on doit esleuer le saut, & avec la iambe bien estenduës eslancera à la lettre A. comme nous auons dict cy dessus, & faut que l'eslancement soit fort retenu; & pour commencer le saut il faudra tenir le mesme ordre qu'on a tenu au precedent, nō pas toutefois avec telle hauteur, agilité, & promptitude, mais bien avec plus d'assurance, & de force, & aussi avec moins de peril de l'eslancement. Et cela suffit pour le fondement des temps. Reste à dire quel pied finit la course selon le lieu & le temps: Mais pour continuer le propos du saut, il faut noter que le premier saut qu'on doit monstrier à nostre fauteur est le saut qu'on fait avec les deux mains, auquel il faudra garder & obseruer cest ordre.

*Le saut qu'on fait avec les deux mains.*

Pour faire ce saut on prendra vn petit espace, où il y ait distance du lieu limité où se doit commencer le saut, puis l'on courra tout à l'aise estant de soy-mesme ce saut fort aisé & facile à faire; & si tost qu'on sera arriué à la fin de la course au lieu où on doit mettre les mains, sans aucune dilation on prendra le temps à pieds disioincts & eslargis, & faut prendre soigneusement garde qu'à l'abaissement que le pied fenestre fait en terre, au mesme temps on abbaisse les bras bien roides avec les mains ouuertes & estenduës, & les faut iustement mettre en terre vn pied pres du pied fenestre en ceste forme.

## LE II. DIALOGVE






A l'instant mesme que le pied fenestre aura donné la bature en terre, & finy le temps, le dextre avec la iambe forte & roide se retirera promptement en arriere circulairement; puis le pied fenestre se leuant de terre (ayant que la iambe droicte soit arriuee à la ligne perpendiculaire) gaignera le temps pour se joindre avec la dextre; & en cette action il faut tousiours que l'une des iambes soit la premiere esleuee au commencement du saut; & avant qu'elle arriue à la ligne perpendiculaire: l'autre qui demeure la derniere se doit joindre avec la premiere esleuee; & lors en ce saut sera esleuee la partie inferieure du corps en haut en ceste forme.



## LE II. DIALOGUE



Ce qui est la moitié du saut, auquel saut les jambes ne se doyent arrester, mais continuer leur mouuement avec promptitude pour faire le tour ou volte; & saut prendre garde que soudain que les genoux auront passé la ligne perpendiculaire, les mains pendront en terre, & avec l'aide de la teste esleueront la partie superieure avec promptitude pour la faire monter en haut, afin qu'au mesme temps en s'abbaissant en terre, il tombe droit sur les pieds.

Et afin que nous ne repetions vne mesme chose plusieurs fois, il est bon de sçauoir qu'és sauts qui se font en auant en touchant des mains en terre, le tour ou la volte se fait au second fondement, & pour faire remōter la partie superieure en haut, la teste se doit tousiours pousser en auant avec telle promptitude & agilité que faire se pourra, ce que les sauteurs appellēt l'Onde: mais il faut noter qu'en quelques vns elle est plus forte & en d'autres moins, selon le saut qui se fait avec la couche plus ou moins viste; & ceste sorte de course se pratique és sauts retournez en arriere; & aussi doit-on prendre en arriere ladite Onde és sauts tournez en arriere, & retournez en auant. Et apres que nostre sauteur sera bien exercé à faire le saut susdict, nous sommes d'aduis qu'il mette en pratique deux petites dexteritez, dont l'une s'appelle entre les sauteurs *glicement de demy col*, & l'autre, *glicement couché*, lesquelles outre qu'elles sont de belle apparence, sont grandement vtils & necessaires pour la perfection du saut. Or le glicement du demy col va ainsi.

*L'Onde & glicement du demy col.*


Premierement il se faut tenir droit tenant les pieds égaux separez l'un de l'autre trois ou quatre doigts, & les mains aux cuisses en ceste sorte.

## LE II. DIALOGVE



Après la partie supérieure on abaissera le tour, on volte en terre, & en l'abaissant on haussera ses pieds de terre & ses genoux se ployeront ayant les cuisses larges & estendues, afin que

ladite partie se puisse abbaïsser auec plus grande commodité  
deuers la terre, & que tout le corps soit soustenu de la pointé  
des pieds en ceste forme.



Et apres auoir tant abbaïssé ladicte partie, que la teste com-  
mence à touchér en terre de la partie de deuant, continuant le  
mouuement elle se mettra en rond, & si tost qu'elle aura tant  
tourné qu'on sente qu'elle touche terre du costé de derriere de  
la memoire iusques au cōmencement des espaules, ayant per-

LE II. DIALOGUE

du terre, lors avec promptitude de la partie inferieure elle s'esleuera en haut circulairement avec telle proportion qu'elle se remettra en terre; & en tel eslancement les cuisses & les jambes se viendront vnir, & se tiendront bien estenduës, & au mesme temps que la partie inferieure prend l'eslancement, la teste prendra sa force au terroir, & avec l'onde & glicement susdict elleuera promptement de terre la partie superieure, & la fera remonter en haut, afin que tout le corps soit esleué en ceste forme.



*L'Onde, ou glicement qu'on faict estant couché en terre.*

La forme del'onde couchee est ceste cy : Premièrement, il faut estre estendu en terre, ayant l'eschine sur la terre, & tenir le bras fenestre estendu avec la main ouuerte & pendante sur la cuisse fenestre, & la dextre à la cuisse dextre derriere la partie inferieure, tenant les jambes vn peu larges, s'esleuera en haut au dessus de la teste, de sorte que tout le reste du corps ne sera soustenu que du col; & quelque peu des espaulles en ceste forme.




Pour puis apres faire reuenir le corps droit sur ses pieds, on tiendra la meſme forme qu'on a tenuë au precedent, & en fin il viendra droit comme à la precedente figure.

PIN. Il me ſemble que qui laiſſe trop abbaiffer en ceſte onde leſeſpaules auant que l'on prenne l'acte de l'eſlancement pour ſe remettre ſur ſes pieds, qu'à grād' peine peut-on reuenir droit ſur iceux commodément.

BAPT. Il eſt bien vray, & aduient fort ſouuent à ceux qui abbaiffent trop l'eſchine vers terre, faiſant quelquefois tomber la partie ſuperieure en arriere comme chacun ſçait. Or noſtre ſauteur ayant bien appris la vertu & la force deſdiſtes deux ondes, ie deſire que peu à peu il aille s'exerçant à vne forme d'agilité, promptitude & viſteſſe, tenant les deux mains pendantes en terre, ce que l'on appelle Pouſſer, & aduient que quelquefois avec iceluy on leue le ſaut en arriere, & quelquesfois le ſaut de ſinge avec plus de facilité que de le leuer ſans luy de fermer terre. Et afin que vous ſçachiez encore mieux que c'eſt que l'appelle pouſſement, ie le vous veux monſtrer par le moyen de l'experience.

*Du pouſſement ou eſlancement.*

Premierement il faut eſtre avec les mains en terre, & avec les pieds en haut en ceſte ſorte.







**Puis on doit venir droit en ceste forme.**

X



Rais on doit venir de terre

Le doute si vousauez pris garde qu'au mesme temps que les pieds ont commencé à s'abbaïser en bas, à l'instant mesme les mains doyuent estre esleuees de terre, & y doit interuenir vn

certain pouſſement, ou eſlancement, afin que la partie ſupérieure s'eſleue avec plus de promptitude en haut, & à chacune fois que la partie inférieure s'abbaiſſe, au meſme temps la partie ſupérieure vient à s'eſleuer plus haut; que qui feroit autrement, comme pluſieurs ont de couſtume faire, auant que les mains ſe leuent de terre, d'abbaiſſer les jambes & courber les genoux, dont s'enſuiuroit vn eſlancement hors de temps, pour auoir perdu vne grãde partie de la promptitude accouſtumee pour eſleuer le ſaut: quant au parfait eſlancement il va comme ie vous ay montré; car à l'abbaiſſement des jambes avec les cuiſſes bien eſtenduës vers la terre, les mains en ce meſme tẽps doyuent prendre vn eſlancement en terre, & avec vne grande promptitude ſe doyuent eſleuer, & tirer la partie ſupérieure en haut avec l'aide de la teſte.

**PIN.** Ceſte promptitude eſt fort notable & vtile, comme a fort bien remarqué le ſieur Baptiſte, & meſme fort neceſſaire pour faire vn iuſte pouſſement: Car autrement il ſemble qu'on aye peine à arreſter la perſonne ainſi eſmeuë de reuenir ſur les pieds, comme ayant deſià vn certain eſlancement pour vn autre ſaut, ce que l'on peut voir à l'œil & toucher à la main, qui voudra conſiderer ſon agilité, & viſteſſe: car à chaque fois que l'on oſtera ſes mains de terre, & que l'on pliera les cuiſſes en vn inſtant pour reuenir droit ſus pieds, il eſt neceſſaire d'uſer d'une grande promptitude pour ceſte partie ſupérieure, autrement l'on donneroit de la face en terre: mais ſi les pieds viennent à ſe mouuoir les premiers, & que les genoux paſſent aucunement la ligne perpendiculaire, il eſt impoſſible de pouuoir faire reuenir droit le corps, ny avec telle agilité, & promptitude que de couſtume; & ainſi ceſt eſbranlement eſt hors de temps, & de nul profit aux ſauts.

**BAPT.** Vous auez raiſon, & en iugez ſainement: Car toute la promptitude qui eſt en ceſt eſbranlement naiſt & procede pour la plus part de l'agilité & viſteſſe que les pieds ont pour abbaiſſer tout le corps eſleué, & qui ſe voudroit redreſſer; dont il aduient que d'une ſi belle proportiõ & meſure au meſme temps que le corps s'abbaiſſe, l'autre s'eſleuant cauſe la viſteſſe du iuſte pouſſement comme dit eſt. Car chaque fois que

## LE II. DIALOGVE

l'une ou l'autre partie du corps manque quelque peu de tēps audit esbranlement , ne correspondant à la iuste mesure , le pouffement ne peut estre iuste, & à proportion du mouuement de tout le corps; de sorte que quand les mains s'esleuent de terre, & que l'extremité de la ligne perpendiculaire remonte en haut circulairement au temps que la teste arriue à l'autre extremité de ladite ligne , l'autre partie inferieure doit mettre les pieds en terre pouffée d'un certain mouuement circulaire, lequel plus il abbaisse ladite partie, plus il se releue en haut; & d'autant que la partie superieure du corps est beaucoup plus pesante que l'inferieure, d'autant la teste prendra elle plustost terre, pour estre plus propre & mieux correspondante au mouuement de tout le corps. Mais le sauteur doit prendre garde à vne autre chose, c'est que lors que les pieds viennent à terre, il est besoin d'une certaine proportion & mesure telle qu'ils ne viennent à se poser ny trop pres ny trop loing du lieu d'où il a esleué ses mains; mais il faut qu'il y aye vne grande distance: que si il les posoit en terre trop esloignez d'iceluy, la partie superieure n'auroit dextérité, agilité, ny force pour s'aider à leuer le saut; comme aussi s'il les posoit trop pres dudit mouuement, à l'esleuement que fait la partie superieure du corps, à cause de la viftesse qu'il a en soy pour reuenir en arriere, il viendroît à tomber à l'enuers; ce qui est tres-dangereux à l'esleuement du saut.

PIN. Ceste viftesse & promptitude ne me semble si vtile & necessaire que celle de la course.

BART. Pardonnez moy, aux sauts où elle entre elle produit vn fort bel effect, & sert de beaucoup: Mais dites moy, ie vous prie, qui fait qu'elle ne vous semble tant vtile & necessaire?

PIN. D'autant qu'entre plusieurs notables personages il a esté resolu que ceste-cy ne peut si bien que l'autre deliurer la personne de la prise des soldats hardis & courageux nommez en bon Venitien *zaffi*, & en bon & fin Toscan *Birri*, c'est à dire Sergents. Il me souuient à ce propos d'un Norcin qui avec vne gentille astuce trouua l'inuention de s'euader, & eschapper des mains d'un Sergent. Sçachez qu'encores que ce

Norcin fust bien disposé & bon coureur, le malheur toutefois luy en voulut tant que n'ayant assez bien couru ceste fois, il fut attrappé par le Sergent, auquel pour ses excuses il dit, Si i'eusse eu mes sabots tu ne m'eusses peu attrapper; & le Sergent respondant en se sousriant; Tu me voudrois volôtiers faire croire que tu peusses mieux courir avec des sabots: Dequoy se gaussant le Sergent, delibera de les luy enuoyer querir pour se donner du plaisir, s'assurant que ses sabots ne l'empescheroient point qu'il ne fust par luy atteint & attrappé. Finalement ayât le Norcin fait apporter ses sabots, & faignant de les chauffer pour se disposer à courir à l'encôtre du Sergent, luy en donna si grand coup par le visage, qu'il le rendit plus prôpt & plus prest à crier, qu'à courir apres luy. Voilà comment le Norcin se desfit accortement de son Sergent.

BAPT. Certes voylà vn traict digne d'un Sergent.

PIN. L'acte que vous faictes leuant les mains, & ayant les pieds abbaissés comme ie voy, m'a fait souuenir de ce gentil traict du Norcin.

BAPT. Il y a encores vne autre sorte de pousser fort differente de ceste-cy, qui se nomme des sauteurs, à la difference de cestuy-cy, *pousser en auant*, qui n'est autre chose que pousser son corps plus auant, & le tirer hors du lieu où on eslance vn saut en arriere. Or pource que i'espere qu'il viendra plus à propos en son lieu de discourir de ceste seconde espee de pousser, ie n'y insisteray d'auantage. Il y a encores vne autre maniere, ou espee de pousser, non toutesfois si necessaire au sauteur que la precedente, veu qu'elle luy sert plustôst de plaisir & passe-temps, que de grande ayde & secours à bien sauter. Et ceste sorte de pousser se faict, & consiste en la force des bras, & en la façon & maniere que nous auons dict cy-dessus, hors-mis qu'à esleuer de terre la partie superieure le sauteur se tire en auant, à fin que les pieds à venir en terre se tirent également, pour se mettre au lieu d'où se sont leuees les mains, ou qu'ils passent plus outre. Ayant doncques conduit mon sauteur à se seruir du poussément, ie veux qu'il apprenne le saut du singe, qui n'est autre chose qu'un poussément redoublé, qui va en ceste forme.

## LE II. DIALOGVE

### *Le saut du Singe.*

Premierement, il faut estre droit auec les pieds ioincts, separez trois ou quatre doigts l'un de l'autre, & auant qu'essancer le saut, la partie superieure se ployera aucunement en auant, & les bras se tireront en arriere auec les mains serrees en ceste forte.



Et à fin qu'à l'aduenir il ne nous aduienne de repeter plusieurs fois vne mesme chose, les sauts soit du singe, ou saut en arriere s'esleuent de terre ferme, & auant que de leuer le saut, on vient à ployer la partie superieure. en auant, & tirer les bras en arriere: Car le corps s'esleue en auant avec plus de force & vigueur, qu'il ne feroit pas si on obmettoit à le faire en ceste forte, leuant apres le saut les bras avec les mains ouuertes, hautes, droites, avec tout le corps droit en ceste forme,




## LE II. DIALOGUE






Continuant le mouuement en arriere avec l'aide de la teste le corps se tirera en arriere, & s'y tiendra arresté le plus qu'il sera possible, se donnant garde qu'au temps que les mains prennent l'acte pour s'eslancer en terre, les pieds s'esleueront en arriere avec les genoux estendus, & les mains ouuertes & pendantes, se reposant tout le corps, doit estre & demeurer en force de bras en la maniere que vous voyez à la page suyuant.



## LE II. DIALOGUE



Et cestuy est la moitié du saut & le commencement du pouffement dont nous auons parlé cy dessus; & sans perdre le temps on continuera l'autre moitié, & puis faut reuenir droit.

FERR. Vous voyez maintenant comme ce saut de singe est vn autre demy cercle semblable au saut des deux mains.

COS. l'estime que ce soit vne mesme chose.

FERR. Il n'y a autre difference que d'estre deuant ou derriere; Car le mesme centre, & la mesme description y est obseruee, qu'au saut des deux mains, ainsi qu'vn chacū peut auoir veu & remarqué.

BAPT. Sans doute il est vray, & ainsi l'ay-je souuent pratiqué; & entre nous autres sauteurs ce saut est tenu pour difficile à faire iustement & proprement, (bien que de soy il soit assez facile) car il y faut obseruer vne certaine proportion si iuste, que si vne fois on y venoit à manquer ou peu ou trop, il feroit à craindre qu'on ne perdist la force & naïueté du saut, & son commencement mesmes est vne maniere de pouffement different du principal.

PIN. L'eschine aucunement languette donne vn tres-grand aide à ces sauts, & me souuient auoir icy veu le S. Baptiste, qui outre la bonne grace qu'il auoit à sauter, y obseruoit vne proportion si exacte & mesurée, que faisant tenir vne jarretiere à deux tant haut qu'ils la pouuoient esleuer de terre au bout d'vne salle, où il faisoit tant de sauts de singe, qu'il ne falloit iamais à prendre le temps iuste pour passer la jarretiere, avec le saut en arriere; ce qui apportoit vn fort grand plaisir & contentement aux spectateurs: & ce saut ressembloit plustost au tour d'vn moulin à vent quand il tourne, qu'à vn corps humain qui sautast.

BAPT. D'autant que ie sçay que vous aurez agreable de sçauoir la iuste proportiō que se tiens pour faire vne infinité de sauts de singe, vous deuez entendre que partant d'oū ontient la jarretiere pour sauter, & me tirant à l'autre bout de la salle par droitte lignē au lieu où ie veux commencer le premier saut, ie vay contant en moy-mesme, (sans que les assistans s'en apperçoient) combien il y a de pas, mettant tousiours deux pas

pour vn saut de singe; de sorte que la mesure est telle que ie ne faux point à me trouuer pres de la jarretiere pour le passer avec le saut en arriere: Et certes estant curieux des beaux sauts, & principalement de ceux du singe, i'en ay cognu plusieurs qui y ont excellé; mais entre les autres il me semble que vous M. Pin en auez tant de cognoissance, que vous emportez le prix de tous. Parquoy ie vous supplie fauoriser tant ceste honneste compagnie que de luy en faire voir trois ou quatre.

PIN. Fort volontiers.

FERR. Considerez ie vous prie la beauté de ce saut, & comme la vistesse prise de la continuation de ce tour donne grande force & vigueur au dernier, qui est, comme vous auez veu, aérien, & esleué beaucoup plus que les autres.

BAPT. Le dernier se nomme saut en arriere, ainsi nommé pour la difference qui se trouue entre luy & ceux du singe: Mais il y a icy vne consideration qui n'est pas de petite importance, ains est fort necessaire pour la perfection de ce saut. Car ceux qui veulent faire plusieurs sauts de singe, pour donner au dernier, (c'est à dire, à ce saut en arriere que vous auez veu,) vne fort grande hauteur, se doyuent bien garder de faire tant de sauts de singe qu'ils en perdent haleine: Car apres vn certain nombre, tout ainsi qu'entre les premiers l'agilité va croissant, aussi au contraire faudroit-elle aux derniers; & partant les sauteurs qui croient que le nōbre des sauts leur accroist la promptitude au saut en arriere, apres auoir passé vn certain nombre correspondant aux forces de celui qui saute, se trompent & s'abusent grandement.

COS. Cela est assez aisé à cognoistre: car la defaillance d'haleine affoiblit fort la force des muscles & des nerfs, principalement quand le corps vient à s'eslācer sur la fin pour le saut en arriere.

BAPT. D'autant qu'il me semble que ce seroit chose superflue de vouloir monstrier l'ordre des sauts qui se doyuent enseigner l'un apres l'autre à nostre sauteur, ie vous declareray en peu de paroles la forme que l'on y doit tenir; puis ie diray l'ordre qu'il sera besoin d'observer pour s'auancer de l'un à l'autre: Car outre la doctrine, sçauoir & instruction qui y doit estre, il

nous faut particulièrement auoir esgard à l'inclinatiō de la nature du ieune homme, lequel nous voulons former à la perfection du saut. Toute la diuision doncques des sauts est reduite en deux points, à sçauoir, de ferme & de course eslancee, chacun desquels a plusieurs especes sous soy, comme au treteau, au siege, au banc, à la table, à la muraille, au sac & autres : Mais d'autant que les premiers sont faciles, nous parlerons premierement des sauts eslancez qui se font avec la course, & autres viffesses, puis des fermes, & suyurons cette forme, & methode à chacune espece de saut.

PIN. Aussi est-il beaucoup meilleur ainsi, d'autant que tout homme qui y aura pris de pres garde, cognoistra par leur facilité, lequel doit estre le premier, & lequel le second.

BAPT. Es sauts eslancez est compris le saut en arriere, apres le saut de singe, qui acquiert son agilité par le poussément redoublé, comme ie vous ay dict cy dessus, qui est necessaire au saut de singe, & à leuer le saut en arriere fort haut de terre, ainsi que vous verrez faire à M. Pin.

PIN. Il y en a quelques-vns, dont ie ne veux declarer le nom, qui ne sçachans bien faire vn saut de singe iustement, se trouuent tousiours malheureux à releuer le saut en arriere, plus que s'ils le faisoient de ferme.

BAPT. Ie cognois ceux de qui vous voulez parler, & combien ils sont peu dispos, & mal-habiles en leurs affaires, avec fort mauuaise grace; mais sur tout quand ils font ce saut de singe, ils retournent tout pantelās & lasches; Et neantmoins ils ont fort bōne opinion d'eux mesmes, & pensent biē faire vn saut en arriere; bref ils s'estiment les premiers hommes du monde pour bien sauter. Or l'en laisse iuger ceux qui les cognoissent encore mieux que moy. Ie dy doncques qu'il est aisé à cognoistre la raison pour laquelle on void que le saut de singe n'est secouru à son eslancement du saut en l'air, d'autant que le corps doit reuenir droit sur la fin du saut du singe, pour se pouuoir soudain esleuer avec force, & puis se tourner en arriere, & luy faisant mal la forme de l'art, tire les iambes en bas, auant que les mains s'esleuent, & ainsi elles se trouuent ployees au milieu du chemin, qui cause d'esleuer presque toute sa force au saut du singe

## LE II. DIALOGVE

pour leuer le saut en arriere ; & d'autant que, comme dient les Philosophes, au cōmencement que l'on veut apprendre quelque chose, l'on n'est pas incontinent maistre parfait, ainsi celuy qui leue les pieds de terre du commencement pour faire ledit saut de singe, & tire ses genoux vers le ventre, pert lors la iuste & mesuree proportion du corps, qui luy cause plustost foiblesse & debilité, que force pour esleuer le saut en arriere ; quand cela arriue, on a coustume de luy donner quelqu'ayde pour le soulager & supporter quād il est estēdu, dont prouient la force & violence pour leuer le saut en arriere.

PIN. Telles gens sont nais pour faire rire les autres , & principalement ceux qui entendent l'art: Car c'est plus grande honte à ceux qui font profession de sauter, ne sçauoir faire le saut de singe & autres petits commencemēs de sauts, qu'à d'autres qui ne se vantent pas d'auoir ceste cognoissance. Mais pour venir à la conclusiō de sçauoir comme on doit faire le saut de singe avec le saut en arriere, ie vous veux monstrier l'ordre qu'il y faut tenir.

### *Saut de singe avec le saut en arriere.*

BAPT. Nostre sauteur premierement se tiendra droit, puis s'esleuera le saut de singe, & estāt arriué à la moitié du saut, fera en ceste sorte.



Et sans interalle il continuëra le mouvement avec vne disposition propre à cest exercice, prenant garde qu'au temps que les pieds se doyent mettre en terre à la fin du saut du singe, estans encores les mains en l'air, avec fort grande agilité

## LE II. DIALOGVE. 76

s'estant leué de terre, elles s'esleueront en haut, tirant la partie droiſte ſuperieure, & s'estant quelque peu renuerſee en arriere au meſme temps que les pieds ſe mettent en terre, ils reuiendront à eux leuer, ayant les genoux racourcis vers le ſein, afin que tout le corps au premier eſlancement ſe monſtre ainſi,



Or s'estant le corps ſuffiſamment eſleué, ſans perdre temps on fera le tour, c'eſt à dire, que les bras en ceſte propre maniere ſe mettront en tour avec l'aide de la teſte, & les genoux ſe tiendront tât accourcis que la volte ſoit acheuee, où on mettra peine en après à s'eſtendre pluſtoſt ou pluſtard, ſuyuant que le corps  
aura



DV S<sup>r</sup>. ARCANGELO TVCCARO. 87  
aura esté effleué de terre plus haut ou plus bas ; & sur la fin s'en  
viendra droit en ceste forme.



## LE II. DIALOGVE

FERR. M. Baptiste, j'auois oublié à vous demander vne doute sur le faict du tour & volte; Car il me semble que vous auez dit cy dessus, que lors qu'on s'efforce trop, on se met en danger de trebucher, cōme à faire vn tour & demy; c'est pourquoy ie desirerois sçauoir s'il est possible, comme plusieurs ont voulu dire, qu'un sauteur puisse faire deux tours en arriere estât sur vn lieu haut auant que tomber en terre.

BAP. Il y a eu plusieurs personnes curieuses qui l'ont expérimenté de dessus vn pont, voulants redoubler ce tour de volte, & ont cognu que cela ne se pouuoit faire, d'autant que le corps de l'air n'est aucunement ferme pour pouuoir par le moyen du mouuement des membres (apres que le tour est vne fois fait) secourir la pesanteur du corps à la refaire de rechef, & ceux qui ont voulu essayer à la faire, & ont retiré les jambes, & abbaisé la teste, se sont allez frapper par les espaulles, & donné du derriere de la teste en l'eau, y estans attiréz par la plus pesante partie.

COSME. Je n'en doute point, encores que j'aye entendu de quelques vns qu'il se pouuoit faire; car bien que la violence d'un mouuement peult faire descrire plusieurs cercles en vn corps remué, si est-ce qu'un homme de soy-mesme ne pourra jamais auoir tant de force, comme il seroit bien requis à ceste violence, de se pouuoir tourner en l'air pour faire vne double volte en sautant.

FERR. Combien qu'un baston, vn poignard, vne espee, ou autre chose semblable face plus d'un tour estant d'une main simple jettée en l'air, & que suyuant la raison Geometrique aucuns veulēt cōclure que la proportion de la violence estât donnée à la pesâteur du corps humain, il pourroit faire ce mesme effect; Neantmoins la difficulté de cecy procede de la foiblesse de la violence, & non de la forme du corps, lequel puis qu'il fait vn tour en l'air, il en pourroit faire trois ou quatre, s'il trouuoit violence proportionnée à sa pesanteur, cōme la violence d'une main au mouuement circulaire d'un poignard. Mais retournons à nostre propos du saut.

BAP. Le saut en arriere prend vne grande force pour s'elancer fort haut d'un autre certain mouuement qu'on appelle

larouë, laquelle va en ceste forme.

*Laroue avec le saut en arriere.*

On fera la course avec vne grande viftesse, & promptitude, à la fin de laquelle on prēdra le temps à pieds dis-joints; mais lors que le pied fenestre s'abbaisse en terre pour finir le temps, au mesme instant les mains ouuertes s'abbaisseront aussi avec les bras fort bien estendus en rond du costé fenestre, tenant la teste haute; & soudain que le fenestre aura fait son battement en terre, le dextre avec la iamberoide se tirera avec promptitude & viftesse en ceste forme.

Z ij



## LE II. DIALOGVE

Et si tost que les mains se seront posees en terre de la mesme forte & maniere qu'elles se monstrent en l'air, ladicte iambe droicte continuant le mouuemēt en haut, iusqu'à tant que tout le corps aye prins force des bras, & se soit retourné à l'opposite d'ou s'est prins le temps.



Le tours'arrestant en cest estat,& continuant le mouuemēt de pousser, estans les mains poussées des pieds , pour l'effect qu'ils font en terre,pour leuer le corps en haut au premier fondement, on tiendra la forme & mesme precepte qu'on a tenu au saut cy-dessus en ceste forme.



Or estant le corps esleué suffisamment pour faire le tour on obserue en cestuy le mesme precepte que l'on a obserué au saut precedent, & si tost que le tour sera fini, on s'estendra beaucoup plus à l'aise qu'au precedent, en esgard que pour cause de la rouë le corps vient à s'essancer & esleuer beaucoup

LE II. DIALOGVE  
plus haut, qu'auec le seul saut de singe, & sur la fia il viendra  
droict, comme de coustume, en ceste sorte.



L'effect que le corps produit entre la fin du temps, & l'esleuement du saut, est appellé la rouë. Parquoy quand nous parlerons d'icelle d'oresnauant, il faudra entendre de la faire tousiours en la mesme façon.

PIN. Je crois bien, sieur Cosme, que vous auez prins garde comme le saut en arriere a plus de force, & de viffesse que la rouë, ny que le saut du singe esleué de pied ferme, dont il procede, & la raison en est toute manifeste.

COSME. Je le pensois bien ainsi, & me sembloit que ce saut fait par trauers requeroit plus grande violence pour faire retourner le corps à droicte ligne, d'où il auoit leué les mains, laquelle violence eslance le corps avec plus de force & de viffesse; & par consequent se retournant en arriere, il a plus de promptitude & agilité pour faire le saut en arriere.

BAPT. La consideration en est belle; car ceux qui se comportent lentement en faisant la rouë, dōnent moins de promptitude au saut en arriere, que s'ils le faisoient de ferme: Mais on trouue des sauteurs, qui apres auoir fait ceste rouë tirent les bras en arriere, estimants par là receuoir plus de promptitude & de viffesse, & les lourdaux ne s'apperçoient pas que ce retirement de bras qu'ils font en arriere, fait perdre toute l'agilité qu'on auoit prise de la course, & la force qu'apporte le pouffement de la rouë, encores que l'experience nous demonstre que le saut est plus bas qu'en ceux-là esquels soudain apres la rouë, on hausse les bras, pour tirer par le moyen de ceste agilité le corps en l'air.

PIN. Certes j'en ay veu aucuns en faire ainsi, ce qui est vne grande inconsideration; car ils ne peuuent tirer les bras en arriere, qu'ils ne s'arrestent incontinent tout court, ce qui preiudicie tant à la viffesse, qui luy diminue du tout l'auantage qu'il luy donne: & bien que retirer les bras en arriere aide au saut que l'on leue de pied ferme, & que par consequent on vueille inferer que cest arrest doye accroistre la viffesse, tant s'en faut, ains fait perdre le temps de s'eslancer, & s'esleuer en haut avec promptitude: Tout cela neantmoins ne les peut excuser, ains l'experience monstre euidentement leur erreur, comme nous auons dit cy-dessus. Nostre sauteur doncques doit biē

## LE II. DIALOGVE

prendre garde que faisant le saut en arriere avec la rouë, ou le saut de singe, en esleuant ses mains de terre, sur la fin du pousse-  
ment il tire en mesme temps ses bras estendus en haut : & au  
contraire au saut en arriere esleué de pied ferme par l'aide du  
poussément esleuant ses mains de terre apres auoir fini le pous-  
sément, estant encores le corps en l'air, il les faut retirer en ar-  
riere; & cela d'autant qu'apres que les pieds auront touché la  
terre, & soudain retournans iceux à s'esleuer pour faire le  
saut, en ce mesme temps les bras employent toute leur  
force pour esleuer de terre tout le reste du corps.

BAPT. Lors qu'apres la rouë on fait le saut de singe,  
alors le saut en arriere est plus eslançé en ceste forme.

*La roue avec le saut de singe, & le saut en arriere.*

La course se fera avec la vîtesse telle qu'elle s'est faicte au  
precedent, sur la fin de laquelle on prendra le temps à pieds  
impairs non ioincts, puis on continuera la rouë du mesme or-  
dre tenu cy dessus.

Et au





Et au temps que les pieds s'abbaissent à terre sur la fin de la rouie pour chasser les mains, elles se leuants de terre pour faire le faut de singe le corps se leuera droit en la maniere quis'enfuit,

Aa



Et continuant le mouuement en arriere pour faire le saut de finge, on gardera le mesme precepte que l'on a gardé au saut de finge esleué de pied ferme avec le saut en arriere, & sur la fin dudit saut s'abbaissant les pieds pour se mettre en terre, les mains s'esleuans avec vne prompte disposition ayās les poings

clos en haut, & par l'aide de la teste s'estans eslancez les pieds en mesme temps de la terre en l'air, & accourcissant ses genoux vers le sein, le corps au premier eslancement s'esleuera en ceste forte.



Mais que la partie superieure soit aucunement tiree en arriere des bras & de la teste, & estant à la fin de l'eslancement arriuez au point qu'ils ne se puissent plus esleuer en haut, il fait le tour, & à la fin d'iceluy il s'estend comme au precedent ; & en fin viendra droit ainsi.

## LE II. DIALOGVE



FERR. Certes il semble que la viftesse foit icy beaucoup plus grande, & le faut plein de plus grand air: Mais ie voudroy bien ſçauoir ſi deux fauts de ſinge donneroyent encores plus de force qu'un pour eſſeuer le faut en arriere plus haut.

BART. Il n'y a doute que le tour continuel ne fust accroistre la promptitude, mais aussi la pourroit-il bien faire perdre, suruenant quelque defaut, comme nous auons dit cy-dessus. Outre ce, la rouë avec le saut retourné en arriere donnent vn fort grand plaisir & contentement aux spectateurs, lequel saut peu de gens font de bonne grace, & comme il faut, veu qu'il requiert quelques rares & singulieres dexteritez, desquelles peu de personnes sont doüees. Or ce saut se fait en la forme que M. Pin vous fera voir.

*Le saut en arriere fait de course à pieds disioincts  
estant poussé en auant.*

La course sera fort prompte, & le pied dextre la finira, vn pied pres d'où on a proposé de commencer le saut, & soudain on prendra le temps eslançé, mais au mesme temps que le pied senestre s'abbaisse pour se poser en terre, pour donner fin audit temps, estant encores la jambe droicte en l'air roide, avec grande promptitude s'eslancera en auant, & ayât les mains fermées, les bras en mesme instant avec l'aide de la teste tireront la partie superieure en auant en ceste forme,

## LE II. DIALOGVE



Ayant esgard de tirer la partie superieure plus auant que les bras, & que la teste du lieu où le temps a pris fin avec le pied fenestre, en la mesme forme que vous verrez en la demonstratiō qui vous sera faicte du saut en arriere de pied ferme poussé en auant, & le ieune homme sentant que la jambe droicte ne se peut plus pousser en auant, en ceste mesme forme il prendra le mouuemēt circulaire pour faire le tour, & au mesme tēps se leuāt le fenestre de terre, s'ira ioindre à l'autre avec prōptitude, & puis en mesme tēps s'accourcirōt, & encores en mesme instant les bras se ioignants avec la teste feront le tour, & estant le tōur fini selon l'esleuement du saut plus grand ou moindre, au premier eslançement on reuiendra plus ou moins courbé.


*La roue avec le saut revolté en arriere.*

La course sera prompte & en fin se prendra le temps à pieds impairs, apres on continuera la rouë, & l'esleuement du corps en l'air au premier fondement, en ceste sorte.



## LE II. DIALOGVE

Mais sentant que le corps est suffisamment esleué les bras estans aucunement ployez avec la teste se poseront au costé fenestre tenant les genoux accourcis , afin que retournant le corps il soit ainsi au second fondement.



Or ayant les pieds fini le cercle en ouale, & l'eschine estant retournée à l'opposite du lieu d'où on s'est esleué en l'air, soudain on mettra peine des'estêdre avec promptitude, de crainte de trebucher en avant , & pour venir droict & avec bonne grace sur la fin en ceste forme.

FERR.





FERR. La vue de ce saut, est veritablement fort agreable:& qui a fait croire à plusieurs, comme vous m'avez dit autrefois, qu'elle se faisoit deux fois en l'air, pource que son tour est si subtil qu'il trompe & esblouyt les yeux de ceux qui le re-

gardent, pensans voir ce que de faict ils ne voyent pas; & cela se doit entendre de ceux qui n'ont aucune cõgnõissance de ce faut, qui ne se fait à la verité qu'avec vn demy tour en trauers, & non avec deux, comme quelques vns se persuadent.

BAPT. Il est vray & en ay veu de si obstinez, qu'encore qu'on leur monstraist par effect qu'il n'y auoit qu'une espee de roue en l'air, ou les espaules faisoient de mesme que font les mains à la roue en terre, comme nous auons dit cy dessus, si ne le vouloyent-ils pourtant croire, s'arrestans obstinément en leur opinion.

FERR. Le me faisois croire que ce faut estoit vn demy cercle conduit avec les genoux; & disoit qu'il se faisoit en la mesme forme que les pieds le font en la roue, & ne me suis trompé en mon opinion, pour ce que la grace de ce faut se voit en la iuste mesure qui s'observe & de pieds & de mains en la pratique d'iceluy.

PIN. Je vay en faire vn retourné le plus iuste que ie pourray, pour voir si l'on y trouuera la reigle & mesure que vous dites.

FERR. Il est fort iuste & bien faict suyuant ce qu'on en a dict, & qui le fera autrement, non seulement il ne sera pas de bonne grace, mais sera en danger de tomber d'un costé ou d'autre.

BAPT. Vous auez ouy l'ordre que l'on doit tenir avec la vistesse és sauts eslanchez en arriere, il nous reste maintenant pour suyure nostre ordre à descrire les sauts avec la volte en auant avec la course, entre lesquels est le faut en auant à pieds impairs qui est cestuy-cy.

*Le faut de course en auant, & de course à  
pieds desioincts.*

En ce faut il se faut seruir d'une course mediocre, & en fin d'icelle prendre le temps à pieds desioincts, dont soudain que le fenestre aura finy le temps, le dextre avec la jambe roidie avec promptitude & agilité se tirant en arriere, attirera la partie inferieure estendue en haut, & au mesme temps les bras se tireront

en arriere, & soudain s'estans estendus avec les mains, se mettrōt apres en auant, & avec l'aide de la teste attireront l'autre partie superieure en haut, & quelque peu en auant, afin que tout le corps se trouue au premier fondement en l'air en ceste forme.



Or estant le corps monté à suffisance, la teste se mettra en rond pour faire le tour, & les bras au mesme temps se retirerōt accourcis en arriere, avec vn mouuement circulaire, & les genoux se retireront vers le sein, & estant le tour de la volte finy, on s'estendra avec agilité pour reuenir droit en terre.

P I N. Ce saut que ie viens de faire n'est autre chose qu'un commencement de la volte en auant, d'autant que le mouuement de la iambe droite rend le saut assez facile, comme nous voyons au saut à deux mains, & s'en sert-on plus pour accoustumer vn ieune homme à faire l'exercice de la volte en auant, que pour ce que ce saut soit autrement beau & agreable.

C O S. La facilité de la volte qui cause le mouuement de la jambe droite, comme i'ay accoustumé de la faire, est fort facile, comme l'on peut aisément voir par la prastique d'icelle: Car ce n'est autre chose, comme chacun scait, qu'un saut à deux mains sans les asseoir en terre.

B A P T. Vous dites fort bien, mais encore faut-il remarquer qu'en cecy on vse d'un raccourcissement de genoux, & de bras, & le corps se mouuant pour faire le saut retourné, fait vn

effect different, encores qu'il approche de la monstre de la figure & forme circulaire.

PIN. Je ne voudroy pas du tout approuuer ces Mathematiques, & croy que si Euclide & Vitruue eussent deu enseigner à faire les cercles avec semblables compas, ils auroient ietté leurs liures au feu, & maudit les poincts & les lignes, les angles & centres, mesmes les circonferences avec tous les astro-labes de l'Algebre.

BART. Mocquez vous en tant que vous voudrez, si est-ce que la proportion est telle, & les reigles & mesures y sont exactement obseruees. Or est-il que la volte ne se peut faire iustement qu'avec proportion & estroite obseruation de toutes ses mesures, comme vous pourrez cognoistre en la difference du tour long & court, qui n'est autre chose que rompre le temps que la proportion du corps porté en l'air. Mais pour ne confondre nostre discours, & nous esgarer par vne trop longue digression, ie diray que la perfection de ce saut consiste à le leuer en temps à pieds ioincts.

*Le saut de course en auant à pieds ioincts.*

La course sera faicte agilement, & sur la fin on prendra le temps à pieds ioints : mais sur la fin que les pieds s'abbaissent pour se mettre à la fin du temps au lieu d'où on a deliberé commencer le saut, estants iceux encores en l'air, les bras ployez se tireront en arriere pour prendre force à esleuer le saut, lequel s'entendra tousiours de ceux qui s'esleuent en auant, faisant tel acte auant que les pieds finissent le temps à pieds ioints. Ce qui donne grand'vigueur au corps pour s'esleuer au premier es-lancement ; puis sans s'arrester ils se tireront en auant tous estendus avec les mains clauses promptement, & au mesme temps que les pieds ayants donné la cadence du temps sans aucun interualle se doyuent releuer de terre en accourcissant les genoux ; & en ce temps la teste donnera ayde pour esleuer le corps en l'air, qui sera en ceste forme.



Estant doncques le corps arriué au but désiré, à l'instant la  
 teste se remuëra en rond, & les bras estants ployez se retireront

## LE II. DIALOGVE

en arriere; tenant tousiours les genoux accourcis, iusques à tant que la teste aye avec le reste du corps finy le iuste tour; puis on mettra peine à s'estendre pour venir droit en terre de bonne grace.

Cos. Voylà vn beau faut, & de belle monstre: mais il n'est point différent du premier en autre chose qu'en pieds joints.

FERR. Vous auez raison, & ne faut icy beaucoup de Philosophie pour prouuer nostre dire.

COSME. le ne sçaurois alleguer tant de raisons: Peu de paroles suffisent pour prouuer la verité à qui la veut receuoir.

FERR. On pourroit disputer, & proposer des arguments plus subtils & plus preignants pour la confirmation de nostre faut: mais qu'est-il besoin de tant de paroles, veu que celà est tout clair & manifeste? Sçachons seulement lequel est le plus difficile, le faut essancé en arriere, ou bien le faut essancé en auant avec la course, veu qu'au faut en arriere avec la rouë, ou le faut de singe, ou l'vn & l'autre ensemble rendent vne grande promptitude; mais non si grande comme la course; neantmoins on y trouue encores vn auantage, qui est que retirer les genoux sert à prendre le tour, & sert à finir, comme plus pesante, la ligne perpendiculaire de ceste volte tirant au centre dressé pour la teste avec peu d'ayde; ce qui n'est au faut en auant: car si tost que la volte est faicte, bien qu'elle soit plus facile beaucoup que le faut en arriere; d'autant que pousser la teste dessous sert à retourner le corps, qui n'a le contre-pois des genoux qui l'attire au centre comme dict est: mais la difficulté n'est pas petite de retirer hors la teste, & essancer ceste partie en auant d'un corps lourd & pesant à la ligne droicte pour se redresser.

Cos. Certes vous auez raison, & l'onde du demy col le demonstre; d'autr qu'encores que l'on face la volte aisement, il faut pourtant donner vne grande vitesse & aux jambes, & au col pour se redresser. Mais M. Baptiste, & M. Pin qu'en dites vous?

BAPT. Ces considerations certes sont belles & agréables, & ne pense pas qu'il y aye eu iusques à present aucun sauteur

qui aye fait vne plus parfaite anatomie des parties du saut que ceste-cy: mais encore que vous croyez le saut en auant estre le plus facile; il y a pourtant plusieurs demonstrations qui arguent & montrent le contraire, & la premiere est celle qui est cy-dessus alleguee, sçauoir est que la fin de tous les sauts en arriere est plus aisee que le commencement, & que le commencement des sauts en auant est fort ayse; & faut icy aduiser qu'il y a plus de force à son cōmencement qu'à la fin, laquelle est cause d'offusquer l'entendement de ceux qui ne sont pas fort asseurez à faire la volte, pour la crainte qu'ils ont du danger où ils peuvent tomber; de sorte que le saut qui aura la fin plus difficile que le commencement, sera aussi sans comparaison plus difficile pour deux raisons; la premiere, pour ce qu'il est plus ayse d'estre instruit à faire le commencement d'un saut que la fin, à cause de sa promptitude: car les premiers mouuements se montrent, & se font sans sauter: mais il faut auoir l'œil bien ouuert pour comprendre les derniers; pour ce que, cōme ie vous ay dict, il est requis au commencement du saut en auant de pousser sa teste dessous, & hausser ses bras avec grande force & violence, y demonstrent l'effect sans sauter: mais on n'a peu monstrier comme il faut reuenir sans donner de l'eschine en terre, sinō qu'en sautant; de sorte qu'il faut que le sauteur aye de foy-mesme vn prudent iugement pour sçauoir faire le saut selon les preceptes qu'il aura appris de son maistre pour ne se laisser tomber; la seconde pour la crainte que ie vous ay dicte; de sorte qu'on peut conclure par ces raisons, que si le saut en auant est, comme a dict le S. Cosme, est plus difficile à la fin qu'au commencement, il est par consequent en tout plus difficile quel'autre.

PIN. Nous ne tenons pas que les sauts en auant soyent aucunement plus difficiles sur la fin que les sauts en arriere, (bien que M. Baptiste vous aye allegué l'experience de l'onde du demy col;) d'autant que la vistesse que luy donne la course sert à mettre le corps tout en auant, & à retourner par force en pieds.

Cos. Il faut noter que bien que ce saut en auant soit plus difficile à la fin que le saut en arriere, & encore que les raisons

## LE II. DIALOGVE

du S. Ferrand deussent suffire pour le confirmer, si est-ce que ie desire que maintenant nous en facions la preuue. Vous m'accorderez que la meilleure partie de la volte tant au faut en arriere comme au faut en auant est, quand la teste est perpendiculaire en bas, & les pieds en haut en ceste forme.

BAPT. Il est ainsi.

Cos. Je vous prie M. Pin faites nous ceste faueur de nous tenir les iambes esleuees, & la teste en bas comme vous faisiez.

PIN. Me voilà prest, ie le veux bien.

Cos.





Co s. Dites moy ie vous prie pour nous redresser maintenant comme vous auez fait au saut en arriere, quel ordre il nous faut tenir pour acquerir quelque perfection en cest exercice: Mais il me semble que pour nous bien enseigner il ne faudroit pas ainsi laisser aualler les iambes comme vous faites avec vn

Cc

## LE II. DIALOGVE

raccourcissement de genoux, ains plustost hausser la teste, afin que le corps se redresse de soy-mesme.

PIN. Je l'entens ainsi & en cela ie veux suiure vostre aduis.

COS. Mais si vous nous voulez redresser ainsi qu'au saut precedent, comment ferez-vous? il faudra donc que ce soit de ceste façon.



PIN. Pour plus commodément faire ce saut, il faut les mains estendues, & les bras roides, leuer la teste, pour donner agilité aux jambes, afin que les forces soyent plus propres à vn tel exercice.

Cos. De sorte qu'à vostre dire si vous laissez aller le corps sans le secourir, vous donneriez de l'eschine en terre.

PIN. Certes il est ainsi.

Cos. Redressez vous doncques maintenant comme au saut precedent.

PIN. Me voilà tout prest.

Cos. Par le moyen de ceste experience on peut dire que la chaleur directe du saut en arriere soit presque naturelle, & que toute la difficulté d'iceluy consiste au premier mouuement pour attirer la teste à la ligne perpendiculaire, & les iambes en haut, & que par consequent ce saut est plus aisé à faire que le saut en auant qui a besoin de plus grande viffesse sur la fin qu'au commencement: Toutesfois d'autant qu'il est requis plus d'artifice au saut élançé en arriere pour trouuer l'agilité necessaire seulement au commencement, & que la simple course faite auparauant luy donne vne grande viffesse. Nous dirons neantmoins que faisans comparaison de la difficulté de l'vn avec celle de l'autre, le saut fait en auant estant simplement pris comme saut, est estimé beaucoup plus difficile que celuy en arriere.

BAPT. Je croy certes qu'il soit ainsi; toutesfois ie veux prendre de plus pres garde lors que nous traiterons de l'vn & de l'autre pour les faire fermes sans viffesse, sçachant qu'aller la teste en arriere donne plus d'espouuante à tous les sauteurs, que d'aller la teste en auant, ce qui diminue beaucoup la facilité de ce saut, auquel il n'y a pas grande viffesse, sinon celle que l'on prend de l'élançement d'une courageuse resolution.

FERR. Certes la raison de M. Baptiste me semble fort conforme au iugement naturel, & me fay croire que l'on y pourroit cōsiderer plusieurs autres choses, desquelles on pourra par aduventure parler és sauts fermes.


BAPT. Ce saut en auant se fait estât retourné à pieds im-

## LE II. DIALOGVE

pairs, & à pieds pairs ou ioincts, comme le simple faut en auant: mais il y a vne difference à le tourner que vous entendrez cy apres. Or celuy à pieds impairs va ainfi.

### *Le faut en auant de course à pieds impairs retourné.*

On se sert de la course avec la temperature, à la fin de laquelle on prendra le temps à pieds impairs, considerant qu'il faut tenir la mesme forme qu'on a tenuë au faut à pieds impairs tourné en auant circulairement lors qu'on prend le premier essancement au premier fondement.



Et estant arriué sur la fin du second fondement, avec soudaine promptitude, on mettra peine à se retourner, c'est à dire, en vn mesme temps les bras estans ployez avec les mains fermées se ietteront du costé droit, auquel costé il faut aussi mettre la teste, & ayant accourcy les genoux, ils formeront le corps en l'air au second fondement en la maniere que voyez.



Dont s'estant la teste retournée à l'opposite du lieu d'où s'est  
le faut esleué, ie ferois d'aduis que pour euitier quelque incon-  
uenient on reuint sur la fin ainsi courbé.



Cos. Il me semble que ce saut ne soit qu'une rouë faicte sans l'aide des mains.

BAPT. Il est vray, mais il y a une grande difference, d'autant qu'au saut retourné comme vous avez veu, il est nécessaire que le saut aille d'une grande vitesse en avant, comme s'il vouloit faire la volte dessus dessous, au lieu de pousser la teste

sous la moitié d'un costé du corps, & tout le corps seuient par trauers.

PIN. Quant à la difficulté que vous faites plus grande du saut en arriere que du retourné, elle est assez esclaircie; d'autant que celuy qui ne se retourneroit à temps, pourroit donner de l'eschine en terre, & qui le tourneroit trop trebucheroit ce qui n'adiendroit à mon iugement au saut retourné en auant.

BAPT. C'est bien dit, car la course au saut en auant donne fort grand aide; D'autant que le corps pour peu qu'il se meue est conduit au lieu limité: mais le faisant à pieds pairs joints il a beaucoup meilleure grace, lequel se fait ainsi.

*Le saut à pieds pairs de course volté.*

PIN. La course en ce saut icy se fera avec plus grande violence qu'elle n'a esté faite au precedent, à la fin de laquelle on prendra le temps à pieds pairs, dont en vn instant venant à leuer les pieds, ce qui se fera tenant les jambes avec les cuisses bien estenduës, & en ce temps les bras avec les mains fermées se tireront en auant avec promptitude, & avec l'aide de la teste leuant aucunement la partie superieure en haut, & quelque peu en auant du lieu d'où le saut s'est eslançé entiere ment avec le corps esleué en l'air en ceste sorte.

## LE II. DIALOGUE



Et le corps estant esleué suffisamment, on gardera le mesme  
precepte



precepte pour le saut retourné, que l'on a gardé au precedent en ceste forme.



Et ayant retourné la teste à l'opposite du lieu d'où s'est le saut eslançé, lors on commencera à s'estêdre vn peu: mais il faut que ce soit avec promptitude, & faut venir plus droit que l'on n'a fait à pieds impairs.

**B A P T.** Il est ainfi, mais toutesfois il nous faut sçauoir que le dernier saut que l'on fait avec la cource par terre, est vn saut qui de nous autres fauteurs est nommé saut *de hanche*, qui mesme se peut faire de pied ferme. Et faut icy considerer qu'il est fort difficile à faire ce saut iuste, & avec telle mesure qu'il seroit bien requis; & se trouue peu de fauteurs, ou paraenture nuls qui iusques à aujourd'huy l'ayent bien fait. Et afin que vous co-





Et soudain que le pied fenestre aura finy le temps, le dextre avec la jambe bien estendue s'enslancera promptement en haut,  
Dd ij

& au mesme temps le bras droit avec le poing clos, & avec l'aide de la teste, & encores surpassant la teste se mettra en haut, attirant aussi la partie superieure en haut, & estant quelque peu attiré & ployé par flanc, & le bras fenestre estant accourci, & ayât le poing clos, se retirera vers le corps, à sçauoir vers la partie superieure, taschant à la soustenir au premier essanc ment le plus qu'il pourra. Or estant le corps suffisamment monté, le bras fenestre en ce temps attirera la partie du corps superieure en rond, c'est à dire circulairement, la teste fera le semblable avec la jambe droite roidie, & le bras droit ferme, & renforciront le mouuement du costé d'en haut, tenant la jambe fenestre esloignée de la dextre tant qu'il sera possible; & si tost que la teste & les bras auront passé la ligne perpendiculaire, & que le bras fenestre commence à monter en haut, le bras fenestre avec la teste s'efforceront d'esleuer avec la promptitude qu'il sera possible la partie superieure en haut; & lors que le corps abbaïsse la volte en terre, il faut faire que le pied dextre soit quelque peu le premier à se mettre en terre que l'autre; & apres que le fenestre aura donné le second mouuement, en ce mesme temps la partie superieure doit estre retournée droïste avec tout le corps du costé de la hanche, en ceste sorte.



Et lorsqu'on que le pied fenestre aura un peu le temps, le dextre  
avec la jambe pied, efforceront d'esleuer avec la promptitude qu'il sera possible  
D q ii



Si on le veut faire à pied ferme, on tiendra les jambes larges, & à l'eslancement du saut la teste & les bras se retireront de la

partie droiſte par flanc, le ployant, le quel acte on appelle *On-*  
*de*, qui ſert à eſleuer le corps de terre avec plus de vigueur; puis  
à eſleuer le ſaut on tiendra le meſme ordre que l'on a tenu au  
precedent.

**Cos.** Ce ſaut me ſemble fort difficile, & deux raiſons  
m'eſmeuēt à dire qu'il eſt preſque impoſſible de le faire iuſte,  
la premiere eſt que nous n'auons le mouuement du flanc ſi fort  
& ſi iuſte à ſe ployer par droite ligne, comme il ſeroit bien à de-  
ſirer: car ſi vous voulez d'une main toucher terre à coſté du flāc,  
il eſt impoſſible le faire ſans ployer & reculer en arriere, ou  
d'un coſté contraire à la main vers le genoüil en auant; c'eſt  
pourquoy ie dy que ce mouuement n'eſt tel qu'il puiſſe attirer  
tout le corps deſſus deſſous ſans vne tres-grande viſteſſe; l'autre  
eſt que la viſteſſe ſe perd en partie quand apres la courſe il faut  
tourner le corps par flanc pour eſlancer le ſaut, dont ne pouuāt  
venir à bout, il ſe pend avec le pied en auant, & avec la teſte à  
coſté, & on recognoiſt lors à veuë d'œil qu'il n'eſt plus ſaut par  
hanche, ains ſeulement vne rouc eſtropiee, veu qu'en tous les  
ſauts la droiſture du corps ſe retire à ceſte ligne droiſte, par la-  
quelle ou doit donner la volte, bien que ce ſoit ou en auant, ou  
en arriere, ou par hanche.

**B A P T.** Certes vous l'auiez deuiné, d'autant que quaſi tous  
les ſauteurs s'eſlançant ne dreſſent le corps par flanc pour faire  
le ſaut par hanche; mais l'eſlancent & eſleuent avec le pied ſe-  
neſtre en auant en ceſte meſme forme que le ſaut volté en auāt  
à pieds impairs, & eſt d'une fort mauuiſe monſtre à qui n'en a  
l'experience, l'vſage & la pratique: mais encores qui ſeroit ſi  
obſtiné de croire que ce ſaut volté par la hanche fuſt ſi iuſte que  
il n'y euſt que redire? & pour en faire plus grande preuue, que  
l'on tienne deux couuertures ou linceux haut eſleuez, & le ſau-  
teur qui aura par ſaite cognoiſſance de ce ſaut, les ſurpaſſera ſi  
iuſtement, qu'il n'y aura que redire, ſans y toucher nullement  
des pieds: que ſ'il arriuoit autrement, ce ſaut ne ſe pourroit dire  
aſſeuré ny iuſte par hanche.

**F E R R.** Je croy que celui qui inuenta ce ſaut de coſté, ou  
de la hanche, eſtoit fort de loiſir, & curieux de nouueauté, d'au-  
tant qu'il me ſemble que l'eſtude des hommes doit eſtre prin-

cipalement en choses vtils ou delectables, & chacun scait que ce saut icy par hanche n'est ny vtile, ny delectable.

Cos. Mais quelqu'un pourra dire qu'il a la mesme fin que les autres, à scauoir, d'exercer le corps : mais cest exercice estant par trop violent, n'est ny bon, ny profitable, & estant fort difficile à faire, celuy qui le veut entreprendre, ressemble à celuy, lequel pour monstrier que les autres ne pouuoient faire comme luy, s'efforçoit de viure de pierres, de fer, ou d'autre chose semblable : mais quiconque est si outre-cuidé cela ne peut estre qu'en risée & moquerie à vn chacun.

BART. Or nous voilà arriuez à la conclusion de tous les sauts avec course de terre, & ceux-là sont estimez les plus forts entre nous qui se font de pied ferme : maintenant ie vous veux monstrier l'ordre, & la maniere qu'il faut tenir pour serendre ces sauts fort familiers, encore qu'il me souuiene que le S. Cosme croit que la force de ces sauts consiste plus en leur proportion & mesure, qu'en autre chose.

Cos. Si vous auez bonne souuenance de la dispute qui s'est meüe cy-deuant touchant les sauts, vous recognoistrez qu'il n'y a aucune difference entre les raisons qui ont esté allegues, pour ce que faire vn saut en arriere iustement est vn vray indice d'entendre l'art de bien sauter, tellemēt que vous faictes de vostre corps ce qu'il vous plaist, & le menez où bō vous sēble, sans crainte de danger, de force violence, ou vistesse extraordinaire, & le scauez retirer, auancer, ou eslancer à vostre volunté, comme vous feriez vn cheual aydé d'un bon mors, guidé & conduit d'une bonne main : Ce que ie vous représenteray cy apres encore plus clairement.

BART. Le premier des plus forts sauts qui soit entre les pieds de pied ferme est à mon aduis le volté en arriere, bien que plusieurs facent comme aucuns, qui ne font non plus de compte de l'art de bien sauter, que du manquement de force, laquelle toutesfois est plus necessaire en certains autres sauts. Or pour venir au saut volté en arriere de pied ferme, l'ordre que l'on y deura tenir sera cestuy-cy,

## LE II. DIALOGVE


*Saut volté en arriere de pied ferme.*

Auant que leuer le saut, on se tiendra droit en ceste forme.





Et s'esleuants les pieds de terre pour essancer, il faut tirer avec grande promptitude les genoux accourcis vers le sein, & au mesme temps les bras avec les mains fermées, & avec l'aide de la teste attireront le corps en haut par ligne perpendiculaire, & faut que tout le corps soit formé en l'air, comme vous voyez.



Ec

LE II. DIALOGVE



Or estant en ce premier essancement le corps eslé<sup>e</sup> suffisamment, comme seroit à la lettre B. du second cercle que monstre la premiere figure, les bras à la mesme forme avec l'aide de la teste se mettans en arriere, feront vn tour, prenant garde que la teste faisant la volte n'attire la partie superieure en arriere: Mais, que le tour qu'il prend soit fait sur la ligne perpendiculaire, les genoux se tiendront accourcis iusques à ce que la teste ayt finy de faire le tour, & que les pieds ayent leur aspect perpendiculaire au lieu d'où ils se sont leuez, & lors avec promptitude il faudra faire l'extension du corps, & remettre les pieds au lieu d'où ils se sont leuez, puis faut reuenir droit.




## LE II. DIALOGVE


FER. Considerez ie vous prie la beauté & perfection de ce saut, lequel avec les deux extremittez du corps, descript & represente deux cercles fort parfaits.

BAPT. le vous ay desia dit que le poussement est vne espee de vistesse que l'on prend tant pour le saut en arriere, que pour celuy de singe, ce qui accroist la force au sauteur ; C'est pourquoy si on veut faire vn saut en arriere non retourné avec le poussement, & avec plus grande facilité, il le faudra faire en ceste forme.

*Le saut en arriere avec le poussement.*

On tiendra premierement les mains sur la terre, & les pieds en haut en ceste sorte.





## LE II. DIALOGVE.

Puis il faut faire le pouffement ordinaire, ayant esgard que les mains estans esleuees de terre au temps qu'elles sont pouffees des pieds, & estans fermees, se retireront en arriere avec les bras estendus, estans encores les pieds en l'air : mais en posant en terre la teste tiendra la partie superieure quelque peu ployee en auant ainsi.



Tant pour auoir plus de force pour esleuer le fent de terre, que pour ne tomber ou trebucher en arriere esleuant la partie superieure trop droicte: Mais soudain que les pieds auront touché en terre, au mesme temps ils s'esleueront accourcissant les genoux; & en ce mesme temps les bras avec promptitude se mettront en auant estans estendus, continuans avec agilité le mouuement en haut, & avec l'aide de la teste attireront le corps en haut, & la partie superieure estant quelque peu en arriere, mettant les bras au premier fondement avec la mesme forme & maniere que dessus, & avec l'aide de la teste se porteroet en rond, tenans tousiours les genoux accourcis, tant que l'on sente la volte estre finie, dont soudain en apres l'on mettra peine de s'estendre, & de reuenir droit ainsi qu'il est à la page suiuantte.



Ca sans encores est de plus belle & plus excellentement mon-  
 stré, pour le voir, & pour le faire, il faut aller vers  
 le bas.

## LE II. DIALOGVE



Ce faut encores est de plus belle & plus excellente mon-  
stre, si on le fait volté, & pour le faire tel, il faut garder cest  
ordre.

Saut



*Saut en arriere volté avec le pouffement.*

On fera premierement appuyé, & assuré sur la force des bras, comme au precedent; puis on trauuillera à pouffer, prenant garde de mettre les pieds au mesme lieu d'où se sont leuees les mains; & pour le faire avec plus de facilité au temps que les mains s'esleuent de terre, que la teste attire premiere-ment la partie superieure, se retirant en arriere estant quelque peu ployee en auant, afin que les pieds estants en l'air soyent attirez de ladiète partie pour se mettre au lieu d'où se sont leuees les mains, & soudain la teste s'efforcera de redresser ladiète partie superieure quelque peu en haut; mais principalement que les pieds facent le battement au lieu d'où se sont les mains leuees, en tenant les genoux vn peu ployez, pour correspondre au contre-poix de la partie superieure qui doit demeurer ployee moyennement, pendant que les pieds finissent le pouffement, & les pieds ayants donné le battement en terre, tenant les genoux fort bien accourcis vers le sein, au mesme temps les bras se ietteront estendus en auant, continuant le mouuement en haut, pour y attirer le corps avec l'aide de la teste au premier eslanacement; & faut prendre garde qu'en ce premier soulleuement du corps, la partie superieure se doit tenir quelque peu ployee, pour faire le retour des pieds avec plus de facilité, & estant le corps esleué suffisamment, les bras pour s'vnir à la maniere accoustumee, se mettront en rond, tenant les genoux accourcis, & le corps viendra en fin courbé.

F f



Cos. Certes voilà vn fort beau faut , & d'vne belle proportion, & à mon iugement c'est l'vn des plus forts fauts ; d'autant que l'art y a plus de lieu que la nature.

FERR. Il me semble que ce faut , ( puis qu'il est aidé de la viffesse du pouffement ) doit estre mis au nombre des fauts es-lancez.

BAPT. Monsieur vous me pardõnerez, d'autât que ces deux

voyes de s'esleuer, eslancer de course, ou de pied ferme, sont la difference, & le pouffement n'y donne que bien peu d'aide, pour esleuer le corps en l'air. D'auantage en plusieurs sauts de pied ferme nous vsons indifferemment de ceste vistesse de pied ferme, que nous nommons ainsi en nostre art. Or si la fin de la rouë, & des sauts de singe est la mesme & semblable, ce retour du corps de l'un & de l'autre avec la course, & se retirer les mains soudain sur la teste pour venir en terre sur les pieds en fin du pouffement, rend la vistesse parfaicte & eslance le corps avec vne fort grande impetuositè, ce qui n'aduient en ce saut, estant necessaire de retirer les bras en arriere, cōmes'il se mouuoit sans estre pouffé. Et encor qu'il y ayt des fauteurs qui esleuent le saut en la mesme forme & maniere qu'on fait les eslancez, il ne s'en suit pas pourtant qu'ils facent bien; d'autant que la vistesse n'est si grande au pouffement qu'il puisse tirer le corps sans l'union des bras, ou plustost de tout le corps, & partant il est necessaire de retirer les bras en arriere, & vser de la mesme forme & maniere qu'on a tenuë au saut en arriere de pied ferme.

PRIN. On peut mieux prouuer cela par l'experience que par la raison; d'autant que la grande difference qu'il y a de les faire en vne façon ou autre, fait recognoistre la fausseté de mettre sur la teste au pouffement, & de les tirer en arriere au saut eslancé, apres auoir fait la rouë, & la proportion qu'on doit garder en l'autre maniere que ie vous ay dite en l'un & en l'autre. Je diray plus, c'est que le S. Baptiste & moy, qui auons tenu la forme que vous auez oye és sauts eslancez, disons qu'elle est fort differēte d'un simple saut pouffé, & n'auōs trouuë fauteurs, lesquels suyuant d'autres voyes que celles-cy, n'ayent confondu les deux du saut pouffé au saut eslancé, faisants en l'un ce qu'il faut faire en l'autre, c'est à sçauoir, haussant les mains au saut pouffé, & les retirāt apres la rouë ou saut de singe; quant au saut eslancé ils l'ont fait comme le nostre, d'assez bonne grace, duquel au contraire il y a difference comme du iour à la nuict.

BAPT. Il est ainsi; mais il est besoin desormais de laisser cela, & parler d'autre chose. Or combien que ie vous aye dit cy-dessus que ie ne vueille tenir liure de compte de tous les sauts

## LE II. DIALOGVE

en général qu'ont accoustumé d'observer les sauteurs, qui plus, qui moins, selon leur force & valeur; Neantmoins d'autant que au nombre des sauts en arriere il y en a aucuns qui les font d'une maniere & temps différent, les autres d'une autre, j'ay bien voulu pour ne laisser rien en arriere, vous esclaircir de ce que vous pourriez estre encore en doute. Vous devez doncques sçavoir qu'il y a eu quelques sauteurs, qui voulans faire plusieurs sauts en arriere, en ont fait d'une maniere, qu'on nōme *sauts en arriere avec l'eslancement*, qui va ainsi.

### *Saut en arriere fait avec l'eslancement.*

Après que le sauteur se sera tenu droit comme de costume, l'esleuement du saut se fera accourcissant les genoux, & au mesme temps les bras s'estants avec promptitude esclancés, & estendus, avec les mains closes, continueront le mouvement en l'air à l'ordinaire, & avec l'aide de la teste qui attirera la partie superieure quelque peu abbaissee en arriere, esleueront le corps en l'air, estant en ce premier fondement en ceste forme.



Or le corps ne pouuant plus esleuer les bras avec ceste mesme forme d'vnion avec la teste, se mettront à faire la volte, & les genoux se tiendront accourcis tant que ladiète volte soit finie; & soudain on commencera à s'estendre, prenant garde que la partie superieure soit quelque peu abbaissée en auant; car tousiours on aura de-là plus de force pour esleuer vn autre saut en arriere, que d'auoir trop redressé ladiète partie; & les pieds donneront deux bons pieds en arriere d'un lieu d'où ils se sont leuez au commencement du saut, & soudain qu'ils aurônt touché terre, reuiendront à se leuer, & feront vn petit saut en

## LE II. DIALOGVE

arriere; & au mesme temps que se fera le petit saut, les bras aussi avec les poings se porteront en arriere, dont si tost que les pieds auront donné le battement du petit saut, on viendra à esleuer vn autre saut du mesme ordre que l'on a esleué le premier; & autant de sauts en arriere qu'on voudra refaire de ceste espece, tousiours sur la fin d'un saut, auant que d'en esleuer vn autre, on fera derechef auparauant le petit saut.

### *Sauts en arriere arrestez à pieds fermes.*

S'estant le sauteur tenu droit, comme cy-dessus, s'eslançant le saut au commencement, en chacun des trois fondements on gardera la reigle, & le precepte qu'on a obserué au precedent: mais sur la fin d'iceluy, si tost que les bras auront assisté le corps, à la fin du troisieme fondement les pieds prendront tant de pause à se leuer de terre pour faire vn autre saut, que les bras se soyent tirez en arriere avec les mains ferrees; & puis en vn instant se venant à tirer en auant, au mesme temps les pieds s'esleueront de terre, pour faire vn nouveau saut en arriere, auquel on tiendra l'ordre du premier; & si on en faisoit d'auantage, les pieds s'arrestent tousiours, tant sur la terre sur la fin de chaque saut, que les bras ayent temps de se retirer en arriere pour prendre force, & pouoir avec plus de vigeur esleuer le corps de terre au premier fondement.

### *Sauts eslancez en arriere de pied ferme.*

On tiendra pour ce saut à l'eslancement, & à la volte le mesme ordre qu'on a tenu au precedent: mais il faut prendre garde en le finissant au troisieme fondement, de retourner les bras en arriere, comme de coustume, lors que les pieds viennent en terre, estant encores le corps en l'air.

Nostre jeune homme auant qu'eslancer le saut, se tiendra droit, comme j'ay monstré cy-dessus, puis esleuant le saut au premier & second fondement, on obseruera le mesme ordre que l'on a obserué au precedent: mais au troisieme fondement on prendra garde qu'à l'abbaisement que les pieds font en ter-

re, se trouuant encores la volte en l'air, d'attirer les bras en arriere ainsi que de coustume, afin qu'au temps que les pieds se mettent en terre pour retourner à se releuer, au mesme instant les bras se doiuent trouuer preparez pour esleuer le corps au premier souleuement du nouveau saut, gardant l'ordre que l'on a tenu au premier, & continuant plus longuement tousiours au troisieme fondement, pour en faire iusques au nombre de sept ou huit, & auant que les pieds se posent en terre, les bras se doyuent retirer en arriere aucunement ployez, avec les mains closes, aduisant de laisser la partie superieure laquelle peu ployee sur la fin de chaque saut, comme dit est.

P I N. Il faut icy prendre soigneusement garde, & considerer, que l'usage diuers des sauteurs a faict la diuersité de ces sauts: car de vouloir resoudre quels sont les plus forts, c'est à dire, les plus difficiles à faire, il est presque impossible, d'autant que ceux qui se feront exercez aux eslancez, auront plus de peine à en faire trois arrestez que six d'autres, ayant accoustumé la nature à prendre ceste viffesse, & ce temps que l'eslancement apporte de soy-mesme: s'asseurant que bien que la force de faire la volte leur manquaist, ils ne lairroyent pas de faire le saut de finge, & n'y a doute que si le sauteur a le cœur assuré, qu'il fera aussi facilement les eslancez que les fermés, d'autant qu'apres le premier les autres ont viffesse, & les fermes se vont tousiours affoiblissant avec le nombre, y ayant plus de viffesse au dernier qu'au premier; il est vray qu'avec le petit saut ils sont plus aisez que les arrestez & eslancez; d'autant que ce peu d'eslancement que l'on prend sur la fin d'un saut, donne beaucoup plus de temps, & de viffesse au saut. Je trouue aussi qu'il est fort difficile de cōiecturer ou deuiner quelle force est la plus grande, celle des fermes, ou des eslancez; les sauteurs tiennent que les eslancez soyent les plus parfaits, comme ceux qui ont besoin d'un temps plus subtil, & plus mesuré, ce qui n'aduient pas aux fermes, veu qu'il y en a qui les arrestent plus courts, ou moins longs.

B A P T. Il est d'oresnauant temps de discourir de l'autre forme de pouffement qui se nomme entre sauteurs *pouffement en auant*, lequel n'est pas seulement de belle apparence, mais vri-

le, nécessaire, & mesme admirable, comme M. Pin vous fera voir pendant que discourant ie vous racôteray la maniere que l'on tient à faire ce saut poussé en auant, lequel va ainsi.

*Saut en arriere de pied ferme poussé en auant.*

Premierement on se tiendra droit de la ligne perpendiculaire à la lettre C. comme il se void à la figure suyuant: comme on a dit plusieurs fois, & en vn moment auant que de leuer les pieds de terre pour esleuer le saut, la teste attirera la partie supérieure plus ou moins agile du corps, & au mesme temps les bras roides selon la coustume avec les mains closes se tireront en arriere, & au mesme temps que les bras se doyuent ietter en auant pour esleuer le saut vseront de fort grande velocité, en ceste sorte.


Les





## LE II. DIALOGVE

Les pieds s'esleueront de terre tirant avec la plus grande promptitude qu'il leur sera possible, les genoux estans fort bien raccourcis vers le sein, lesquels soudain qu'ils seront proches du sein, les bras de forme estenduë, joincts avec la teste, se mettront en rond pour faire la volte, tenant tousiours les genoux accourcis, afin que le corps aye plus de temps pour se tirer en auant au pouffement, & puis venir sur la fin courbé, en ceste forme.



Cos. Auez vous bien pris garde à ce saut.

FERR. Ouy bien.

Cos. Et vous M. Pin, vous semble-il que cestuy-cy soit plus fort, & plus beau que le retourné.

PIN. Qui en doute.

BAPT. Nous l'estimons plus fort sans comparaison.

Cos. Vous autres sauteurs, vous auez, comme plusieurs autres, en vostre art quelques opinions qui sont plustost fausses qu'autrement: car considerez seulement l'effect au saut, & laissez la cause à part, c'est auoir la matiere sans la forme. Or ce saut, comme ie vous auois promis le monstrier, estant considéré sans course, & avec course, est sans comparaison beaucoup plus difficile que le saut en arriere: Mais il nous faut laisser finir M. Baptiste, cependant qu'on viendra sur le saut en auant.

BAPT. La mesme faute s'observe qu'au saut en arriere, volté, & au saut poussé, qui est telle, quand le sauteur se veut volter, ou pousser le saut, & qu'il manque & en l'un & en l'autre de la proportion du temps requise à esleuer le corps de terre, il vient à faire la volte plus en arriere qu'il n'est requis pour se retourner ou eslancer selon le saut qu'il veut faire; & reuenant à terre, il iette ses jambes deuant, de sorte qu'il est comme contraint à donner des fesses en terre, ce qui est non seulement laid à voir, mais aussi contre l'observatiō des reigles de l'art, veu que en l'un & en l'autre de ces sauts la volte y est requise, & la proportion, à ce que les jambes & le corps viennent à tomber iustement au lieu destiné, ou pour se retourner, ou pour s'eslancer.

Cos. Ces raisons sont à la verité considerables en vn parfait sauteur.

BAPT. Il y a vne autre impropriété qui n'est pas de petite importance, qui procede, ou de ne sçauoir pas prendre la proportion du temps à l'esleuement du saut, ou pour se sentir trop foible à faire la volte, & le plus souuent d'une coustume qu'aura le sauteur de n'auoir pas recherché à donner grace aux sauts. Voilà ce qui priue le sauteur des susdictes raisons, quand il a conduit le corps où il doit faire la volte, & ayant

## LE II. DIALOGVE

pris les cuisses avec les mains, il s'aide à s'esleuer en auant.

PIN. C'est vne chose fort deshonneste entre bons sauteurs de faire telles fautes.

FERR. Je croy que ce que vous avez dit de l'esleuement avec la proportion du temps sert de beaucoup à faire la volte.

PIN. Il est certain; mais cela pourtant ne peut venir & proceder que d'ignorace de ne se sçauoir pas tourner à propos, & au temps qu'il est requis, ou plüstoit, ou plus tard; & cela est digne de mesme blasme entre sauteurs, qu'un soldat qui estant attaqué d'un autre s'enfuyoit pour chercher vne rondache ou autre sorte d'armes offensiuues ou deffensiuues, s'excusant sur ce que son maistre luy auroit ainsi enseigné à combattre.

BAPT. Or vous voyez que nous vous auons fait voir tous les sauts qu'on tourne en arriere circulariement, il me reste maintenant à vous declarer & faire cognoistre le volté qu'on fait de pied ferme, qui est tenu pour l'un des plus forts sauts entre les bons sauteurs, qui se fait ainsi,

*Saut en arriere à pied ferme volté.*

Il se tiendra comme dict est au precedent, à sçauoir tout droit; & s'esleuant le saut apres le premier essancement ce fera avec l'ordre qu'on a fait en arriere de pied ferme ainsi.



Il faut que lors la teste & les bras attirent la partie superieure quelque peu en arriere, dont estant le corps esleué assez haut, soudain on se retournera à la forme & reigle que l'on s'est retourné au saut en arriere esleué avec la rouë.

Mais il faudra faire le retour avec plus de promptitude, à cause que le corps est moins esleué de terre estant retourné, l'eschine sera à l'opposite du lieu d'où on a esleué le saut, lors la teste s'efforcera avec grande promptitude de se leuer en auant, pour sçauoir faire l'onde, comme nous auons dit cy-dessus, afin que la partie superieure reuienne droite tenant les genoux accourcis, & puis venir sur la fin courbé.

## LE II. DIALOGVE

Cos. Ce saut ne me semble different de celuy de la course, que du commencement du temps.

BART. Il est vray; & d'autant que nous sommes venus à la fin des sauts en arriere de pied ferme, il nous est maintenant licite de discourir, si vous voulez dire quelque chose: car nous sommes arriuez aux sauts de pied ferme en auant.

Cos. Je vous ay dit & replequé plusieurs fois que ie tenois pour fort ce saut qui estoit si viste qu'un autre ne l'auroit peu mieux faire, & que cest honneur appartient au saut retourné, ou en auant, ou en arriere à pieds impairs; car un autre ne le pourroit mieux faire; & ceste proportion vient de manier l'art ainsi qu'il faut, & en doit-on faire beaucoup plus d'estime que de ceux à qui la force naturelle donne un grand auantage; car il est plus difficile de paruenir à ceste proportion, que s'il n'y estoit point requis une si grand' force de corps, & croy à ceste occasion que les sauts en arriere ne sont si forts que le volté, & m'assure que vous mesmes ne les tenez pour tels, & à ces sauts concurrent l'eslancé, le retourné & le volté en arriere, entre lesquels vous autres sauteurs donnez le premier lieu au volté de pied ferme, le second à l'eslancé poussé, le troisieme au volté, comme ie vous l'ay plusieurs fois ouy dire, n'est il pas ainsi?

BART. C'est l'opinion de tous les sauteurs.

Cos. D'autant que i'estime que vous ayez memoire de plusieurs autres raisons alleguees à ce propos, specialement quand on demonstroit que l'eslancé poussé deuoit estre estimé imparfait, selon la belle preuue que nous auons faite cy-dessus du tresteau; cela estant assez clair, ie n'ay que faire de le replequer: mais outre les raisons desduites cy-dessus, il faut encores considerer plus particulierement la perfection du saut volté, & que l'eslancé poussé se fait avec un peu plus de peine que les autres, lequel n'ayant encores bien veu pratiquer, ie n'en ay telle cognoissance & experience que ie desirerois bien. C'est doncques une chose necessaire, comme vous dites, de retourner par ligne perpendiculaire au lieu où on a finy de s'eslancer, à la difference du faux eslancement qui n'a aucun bon effect. Or il est besoin qu'au iuste saut on esleue presque tout le corps au

lieu où on veut tomber, & la volte se doit faire directement à ceste ligne, autrement il feroit impossible que le sauteur ne donnast de la face en terre, comme vous mesmes auez assez reconnu quand vous auez parlé d'esleuer le corps pour faire le saut en auant.

PIN. Il est tres-certain, & l'experience du saut en arriere le demonstre assez: car si le corps ne s'esleuoit en auant deuant que faire la volte, on heurteroit des pieds contre la muraille, en danger d'y donner de la teste.

BAPT. Vrayement il est ainsi, & ce saut a la mesme forme que celle du poussé eslançé, & celuy qui fait bien l'un, fait bien l'autre aussi; & ceux qui veulent esproouuer de le faire à la muraille, donnent volontiers de la teste en terre, & des jambes à la muraille, dont peut aduenir vn grand danger & inconuenient à celuy qui le hazarde.

COS. Tout beau ie vous prie, si la volte se fait au lieu où on tombe, ce saut retourné n'est different que d'une petite plieure de corps.

BAPT. Pardonnez moy, car il y est requis plus de force & plus de promptitude.

COS. Je le veux bien; mais ceste forme & promptitude que vous luy attribuez, est plus de la nature, que de l'art, comme ie diray cy-apres: car entre deux sauteurs égaux en science, le plus fort l'eslancera mieux que le plus foible, & n'y a terme si prefix, & déterminé, & que l'on puisse tenir si certain, ny saut si parfait, qu'un autre ne le puisse auancer; bref il n'y a chose si parfaite au monde, à laquelle on ne trouue quelque chose à adiouster.

PIN. Tout cela est vray; & encores que quelques vns tiennent qu'un petit homme fera mieux qu'un grand le saut poussé, eslançé & volté, si ne s'ensuit-il pas pourtant que le saut poussé eslançé ne soit plus fort & plus difficile.

COS. Il me semble qu'en l'art du saut on ne doit point considerer la force naturelle, mais plustost la perfection de l'oeuvre, ainsi qu'en la peinture & sculpture, la beauté des couleurs n'est pas tant considerée par les hommes de iugement, comme la perfection du pourtrait. Mais concluons que le saut

## LE II. DIALOGVE

volte, & le ~~peu~~ <sup>peu</sup> s'eslancé, se font plustost par curiosité, qu'autrement, veu qu'ils ne sont pas gueres beaux, & par consequent agreables.

BAPT. Mais que dites vous du saut volte en arriere, qui est l'un des plus forts & plus difficiles sauts qui soyent, pour lequel bien faire il est necessaire d'auoir vn bon iugement, & vne memoire pour le retourner, & si le iugement se perd tant soit peu, l'on se met en beaucoup plus grand danger & hasard, qu'en toute autre sorte de saut.

COS. Je ne nie pas que ce saut ne soit fort beau, plaisant, & fort subtil; mais à mon iugement il n'est pas à comparer à la perfection de l'autre volte; pource qu'en effet le saut ne se tourne pas en cestuy-cy que par trauers, & bien peu; & bien que le temps en soit fort difficile, si ne semble-il que ce soit vn saut pour en faire compte & comparaison de la volte en auant & en arriere.

BAPT. Au contraire il est tenu entre nous pour l'un des plus beaux, & dispos sauts qui se facent point.

COS. Je ne le nie pas absolument: mais puis que ce n'est pas vne volte, on n'en doit pas autrement disputer avec ceux qui la font parfaictement; car cestuy-cy est vne autre forme de saut different.

BAPT. Je vous veux doncques représenter les autres sauts qui se font sur terre sans l'aide du tresteau & autres instrumens, comme ceux desquels nous auons dit cy dessus.

LE PIN. Et ie le vous monstreray par effect.

BAPT. Le saut de pied ferme en auant se faict à pieds impairs, & à pieds pairs voltez, comme on le faict de course, ny ayant autre difference que le temps, & la facilité de l'un plus que de l'autre. Celuy qui se faict à pieds impairs va ainsi.

### *Le saut de pied ferme à pieds impairs.*

Premierement on se tiendra droit, & auant que d'esleuer le saut, la iambe droicte estendue se tirera en auant, comme ferot les bras avec les mains fermées ainsi.

Mais





## LE II. DIALOGVE

Mais ainsi qu'on veut esleuer le saut au premier fondement, ladiſte iambe droiſte ſe tirera en arriere avec promptitude, s'estant esleuee circulairement en haut de telle ſorte que toute la partie ſuperieure ſe vienne à former en l'air en droiſte ligne, & au meſme temps les bras accourcis ſe ietteront en arriere avec grande violence, & la teſte abbaiffera la partie ſuperieure en auant, à ce que tout le corps ſe trouue en l'air au premier eſlan- cement.

De là eſtant le corps venu au terme de ne pouuoir plus s'e- leuer, les genoux ſans perdre temps s'accourciront, & les bras de la meſme façon continueront le mouuement en rondvolté, & la teſte ſe pouſſant en auant ſe mettra en volte, & finiffant il viendra courbé à l'accouſtumé.

### *Le ſaut de pied ferme à pieds pairs.*

En ce ſaut on ſe tiendra droiſt ayant les pieds ioinſts en ce- ſte ſorte.





## LE II. DIALOGVE

Et auant que leuer le corps de terre, nostre sauteur tiendra le plus qu'il pourra la partie superieure en arriere, & pour auoir plus de commodité, il leuera de terre quelque peu les pointes des pieds, lequel mouuement donne plus d'aide, que si on s'esleuoit sans le faire. Or venant la partie superieure à se retourner on prendra garde que soudain que les pointes des pieds se viendront à mettre en terre, les bras avec les mains serrees s'esleueront courbez en haut en ceste façon,





## LE II. DIALOGUE

Après les pieds s'esleueront soudainement de terre, tirañts les genoux avec promptitude vers le sein, & les bras, ainsi qu'ils se trouueront, se ietterōt au mesme temps en haut, & avec l'aide de la teste ils attireront la partie superieure abaissée en auāt, & soudain qu'on sent que le corps ne se peut plus hausser, les bras avec l'aide de la teste se mettront en rond de la mesme maniere, & ayant finy on reuiendra courbé.

*Le saut en auant de pied ferme à pieds  
impairs volté.*

Premierement on se tiendra droict, & puis de ceste façon.






## LE II. DIALOGUE

A l'eslancement que l'on fera apres le saut au premier fondement on gardera la propre forme qu'on a gardée au saut en auant, volté de pied ferme à pieds impairs, & au second fondement, apres que le corps sera esleué suffisamment, on gardera le precepte de la mesme façon qu'on a fait au saut en auant de course volté à pieds impairs.



Mais on le fera retourner avec plus grande promptitude, & si tost que la teste sera retournée au contraire d'où on a esleué le saut, en fin on reuiendra courbé en ceste sorte.





Ily en a bien peu qui foyent arriuez au but de tourner vn  
saut en auant, comme ie vous ay dit cy-dessus, & neantmoins  
on en a veu infinis qui ont bien fai& le saut en arriere.

Co s. le vous puis assureur que ce saut, & le saut volé à pieds  
impairs en auant sont parfaits entre tous les autres sauts, & ne  
s'est point encores veu personne qui aye fai& ce saut de pieds  
ferme à pieds impairs en auant, avec plus de grace & propor-

## LE II. DIALOGVE

tion, que nostre S. Baptiste, & le S. Archange.

BART. Il est temps de passer plus outre pour discourir des autres sauts; c'est pourquoy ie dy que le tresteau, & le trampelin, & autres instrumens qui en dependent sont les vrayes marques, lignes & parangons, comme vne pierre de touche, pour recognoistre s'ils sont asicurez ou non en leurs sauts. Et encore qu'il y ayt des sauteurs qui font des sauts fort differents de ceux de terre; toutesfois si est-il besoin d'un certain aduis particulier pour en bien iuger. Pour commencer donc à ceux qui se font sur le tresteau, ie dy que quant à la hauteur, elle pourra seruir tât au grand qu'au petit sauteur, qui fera de hauteur enuiron de trois pieds, & de largeur d'un pied quatre doigts, lequel sera tenu par deux personnes estans assis en terre, tenant les jambes entortillees à soy, & le tenant bien fort sur la fin des bords à ce qu'il ne varie, & que le sauteur en esleuant le saut trouue force aux pieds, & assurance aux bras, puis nostre sauteur s'esleuera d'une gentille dexterité sur le tresteau, & s'estant monstré dessus quelque peu, se tiendra tout droict.

### *Le saut à deux mains sur le tresteau.*


Premierement nostre sauteur se mettra sur le tresteau droict à pieds ioincts, puis auant que leuer le saut, il s'arrestera, comme vous voyez.



## LE II. DIALOGVE

Puis esleuant le saut, la jambe droiſte ainsi estenduë, se iettera en arriere doucement, attirant le reste de la partie inferieure en haut circulairement, & au mesme temps les bras vnis avec la teste reculeront tant la partie superieure en arriere de la volte du tresteau, que la teste soit perpendiculaire sur luy, dont les mains d'vne prompte vifesse avec les bras bien estendus & forts, viendront à se poser sur luy, tellement que lors que les mains se mettent sur le tresteau, tout le corps doit estre au dessus d'iceluy en ceste forme.





## LE II. DIALOGVE

Et lors continuant la partie inferieure le mouuement vers terre si tost, que les cuisses auront passé la ligne perpendiculai-  
re, & que le corps commencera à s'abbaïsser à terre, lors les  
mains prendrôt vn eslançement sur le tresteau, & à la faueur de  
la teste leueront la partie superieure si haut, que se mettants les  
pieds en terre, le corps viendra en fin droit & de bonne grace  
en ceste sorte.



FERR. Le commencement de ce saut est vn eslançemēt ou poussēment de mains contraire à l'ordinaire, & a besoing d'vn temps fort subtil à moniugement.

PIN. Il est ainsi ; mais au reste il n'est point different du saut des deux mains que l'on fait par terre.

BAPT. On fait aussi sur le tresteau le saut en auant à pieds impairs, & à pieds pairs, qui ne sont fort differents de ceux qui se font de terre au saut à pieds desioincts, & pour le faire on tiendra cest ordre.

*Le saut en auant à pieds desioincts ou impairs  
au dessus du tresteau.*

Après que nostre sauteur se sera monstré droict à l'accoustumé, premier que faire le saut il se tiendra en la forme & maniere qui s'ensuit : Eslançant le saut il tiendra l'ordre & la voye qu'il a tenuë au saut cy-dessus en auant à pieds desioincts de pied ferme esleué de terre au premier & second fondement : mais en esgard à la hauteur que porte le tresteau, le mouuement sera moindre & plus lent à esläcer & tourner le corps ; & lors que l'on aura finy la volte on commencera à s'estendre pour venir sur la fin droict en terre, comme nous auons dit cy dessus.

Pour celuy à pieds pairs ou ioincts l'on tiendra cest ordre.

*Le saut en auant à pieds ioincts sur le tresteau.*

Premierement nostre sauteur s'arrestera droict sur le tresteau, auant que d'esleuer le saut de dessus, puis s'esleuant en l'air, les pieds tireront les genoux les accourcissant doucement vers le sein, & au mesme temps les bras se lanceront courbez en ceste façon.



LE II. DIALOGUE





Et à la faueur de la teste ils attireront le corps en haut, & la partie superieure estant quelque peu esloignee du tresteau de distance d'un pas, & le corps ne pouuant plus s'esleuer, les bras vnīs de la mesme façon avec la teste, se mettront en rond pour faire la volte; mais ce sera doucement à cause de la hauteur du tresteau, pour n'estre en danger de trespucher, tenant tousiours les genoux accourcis, iusques à ce que la volte soit finie, lors soudain on mettra peine de s'estendre.

Cos. Or ie desire sçauoir de vous autres fauteurs quel iugement vous faites du saut *en auant* & *en arriere*, & lequel vous tenez pour le plus difficile celuy qui se fait sur le tresteau, ou celuy qui ne s'y fait pas.

P. I. N. Il n'y a nulle doute que le saut en auant qu'on fait sur le tresteau ne soit plus difficile que le saut qui se fait en arriere.

Cos. Je m'esmerueille doncques comme il est possible qu'un saut en auant de course soit plus difficile qu'un saut en arriere; mais pour ne repeter vne mesme chose, nous concludrons que l'experience que nous auons de la volte prouue assez, & montre euidentmēt par ses effect̃s qu'elle est plus difficile que celle que l'on fait en arriere.

B. A. P. T. Certes vous auez raison, mais c'est contre l'opiniō de plusieurs fauteurs, qui ne sont à la verité si curieux de rechercher toutes choses: mais venant au saut en arriere que l'on fait sur le tresteau, il me semble qu'il est presque semblable à celuy qu'on fait à terre, & est beaucoup plus facile que celuy qui se fait en auant; toutesfois encore faut-il declarer la forme que l'on y tient, afin que nostre fauteur puisse tousiours plus hardiment s'asseurer, pour puis apres avec le temps venir aux plus difficiles.

### *Le saut en arriere sur le tresteau.*

Après que nostre ieune homme se sera monstré droict, esleuant en apres le saut, on gardera le mesme ordre & chemin que l'on a gardé à celuy de pied ferme eslançé de terre non retourné, ayant esgard toutesfois d'attirer le corps quelque peu plus en arriere au premier eslançement, & les mouuements de l'es-

## LE II. DIALOGUE

lancement, & de la volte, se feront avec plus de promptitude & facilité, & en fin en s'estendant on viendra droit à l'accoustumee cy dessus.

### *Le saut en arriere retourné esleué sur les deux tresteaux.*

Il faut mettre sur le grand tresteau vn autre petit tresteau d'vn pied & demy de hauteur, d'vn pied de largeur, & de deux pieds de longueur, qui sera fort legier, à ce que plus aisément on le puisse leuer, & sera tenu par les pieds de deux personnes qui seront droicts, dont l'vn sera à vn bout, & l'autre à l'autre bout: Et le grand tresteau sur lequel on met le petit, doit estre de largeur vn bon pied quatre doigts, & de hauteur trois bons pieds, que deux hommes assis ayants l'vne & l'autre jambe au trauers du tresteau, tiendront par les pieds, & puis apres nostre jeune homme au dessus du petit tresteau, & auant que d'esleuer le saut se monstrera droit en ceste sorte,


Après que nostre jeune homme se sera moult droit esleué, il se mettra sur le petit tresteau, & se tiendra par les pieds de deux personnes qui seront droicts, dont l'vn sera à vn bout, & l'autre à l'autre bout: Et le grand tresteau sur lequel on met le petit, doit estre de largeur vn bon pied quatre doigts, & de hauteur trois bons pieds, que deux hommes assis ayants l'vne & l'autre jambe au trauers du tresteau, tiendront par les pieds, & puis apres nostre jeune homme au dessus du petit tresteau, & auant que d'esleuer le saut se monstrera droit en ceste sorte,

*Le saut en arriere sur le tresteau.*

Après que nostre jeune homme se sera moult droit esleué, il se mettra sur le tresteau, & se tiendra par les pieds de deux personnes qui seront droicts, dont l'vn sera à vn bout, & l'autre à l'autre bout: Et le grand tresteau sur lequel on met le petit, doit estre de largeur vn bon pied quatre doigts, & de hauteur trois bons pieds, que deux hommes assis ayants l'vne & l'autre jambe au trauers du tresteau, tiendront par les pieds, & puis apres nostre jeune homme au dessus du petit tresteau, & auant que d'esleuer le saut se monstrera droit en ceste sorte,



Puis effeuant le saut, il obseruera la maniere & le precepte que l'on a obserué au saut en arriere retourné leué de pied ferme; toutesfois en ce saut nostre jeune homme ne doit point esleuer le corps trop haut; cela estât la volte se fera avec vn mouuement beaucoup plus agile, & plus prompt, à cause de la hauteur du petit tresteau, veu que si on faisoit la volte avec la violence qu'on a faite à celuy de terre, il causeroit l'essancement en auant, & non le retour, auisant les deux qui tiennent le petit tresteau d'estre bien adroicts, experts & aduisez, & de tenir les yeux aux pieds de nostre sauteur; afin que si tost qu'ils le verrôt essancé de dessus, leuant ensemble le petit tresteau de dessus le grand, ils le portent hors de là, afin qu'estant la volte finie nostre ieune homme puisse reuenir sur le grand en ceste forme,





LE II. DIALOGVE vñ  
Le saut eslançé en arriere sur le tresteau est tel.

*Le saut en arriere eslançé sur le tresteau.*

Premierement on se tiendra droit sur le tresteau, & vn moment auant que d'esleuer le saut, on prendra cest eslançement à la faueur de la teste vn peu plus pour attirer la partie superieure en ceste sorte.





## LE II. DIALOGVE


Et esleuant le saut au premier & second fondement , on tiendra la mesme voye, & forme que l'on a tenuë à celuy qu'on fait à terre, mais avec vn plus lent mouuement, & estant la volte finie, on commencera à s'estendre.

Le saut en auant retourné de dessus le tresteau est tel.

*Le saut en auant volté sur le tresteau.*

Premierement le fauteur se tiendra droict sur le tresteau, puis il se tiendra de ceste autre façon,

Puis








## LE II. DIALOGVE

Puis s'esleuant du tresteau, au premier fondemēt, se retour-  
nant il fera ainsi.




Puis sans interualle il se tournera en ceste maniere.



On obseruera le mesme precepte qu'on a obserué au mesme saut leué à pied ferme impair de terre, mais avec vn plus lent mouuement ; & si tost que la teste sera esleuee au dessus du tresteau, à l'opposite on commencera à s'estendre.

*Le saut en arriere retourné de dessus le tresteau.*

En ce saut apres qu'on se sera tenu droit, on esleuera le corps au premier fondement, tel qu'il a esté esleué au precedēt fait en arriere de dessus le tresteau, & puis le saut retourner en ceste façon.



Et icy faut obseruer la mesme forme, maniere & precepte  
Ll ij

## LE II. DIALOGVE

que l'on a tenu à retourner le saut en arriere de pied ferme: mais il faudra qu'en cestuy-cy le mouuement soit moindre & plus lent, & si tost que l'eschine sera retournée au contraire du tresteau, on mettra peine à s'estendre promptement pour venir droit en terre.

Vous auez ouy (messieurs) iusques à present tous les sauts qui meritent d'estre recitez qui se font de pied ferme, tant par terre que de dessus le tresteau, encôresque l'on puisse faire beaucoup d'autres petites dexteritez & petits sauts, avec des entrechats en changeant de sauts, tenant les mains à terre, ou aux oreilles pour faire vn saut en arriere, ayant les jambes enlaccées, & les bras joincts pour retourner vn saut sur le tresteau, & faire le saut en arriere esclancé en auant, tenant l'eschine à la muraille, & vne infinité de telles curiositez que l'on a de coustume de rechercher, selon la gaillarde nature, & dexterité du sauteur: mais d'autant que nous n'auons entrepris de raconter toutes ces choses par le menu, ne recherchans point tant l'artifice que la nature, nous passerons outre.

Cos. Je m'esmerueille seulement d'une chose, qu'estas les sauts sur le tresteau beaucoup plus faciles que ceux de terre, estant presque la mesme chose, vous en ayez neantmoins fait vne mention particuliere.

BAPT. Il y a deux raisons qui m'ont poussé à cela, la premiere, pource qu'ordinairement en certains sauts comme sont le volté, & l'esclancé, la hauteur du tresteau engendre vne crainte particuliere, & espouuante le sauteur, & le temps ne s'y peut pas tousiours prendre bien à propos, ce qui n'est pas de peu d'importance pour les raisons que vous auez entendues en chacun saut. L'autre, comme vous entendrez quand nous parlerôs de l'ordre de sauter, est que le sauteur s'exerce en plusieurs sauts auant que les faire par terre. On fait aussi plusieurs autres sortes de sauts, comme les sauts, *au siege, au banc, à la table*: mais premierement nous parlerons de ceux qui se font *à la chaire & au banc*, le siege qu'on doit mettre pour faire le saut du chat, sera sans appuy, les selles qui sont routes de bois sont les plus propres qui s'ouurent, & se ferment, dont on se sert en la plus gran-

de partie d'Italie, & ce bâc, ou siege sera large d'un pied, & de longueur vn pas & demy, ou deux au plus, & sera tenu de deux personnes qui seront assis à terre fort & ferme, & sera esloigné trois grands pas du siege, plus ou moins, selon la plus grande ou moindre disposition du fauteur.

*Le saut dit saut du chat qu'on fait au siege & au banc.*

Il faudra faire la course avec beaucoup de violence, & à vn demy pas du siege on prendra le temps à pieds impairs, prenant garde que le pied fenestre fait la fin du temps, les mains estants ouuertes avec les brases tédus se poseront sur le haut bord du siege de maniere que la figure, & forme de ce saut sera paroistre la susdite façon plus au dessous, & au mesme temps que le pied fenestre finit le battement du temps, le droict ayant la jambe roide se retirera en arriere promptement, leuant en haut la partie superieure à demy air, prenant garde que lors que le pied fenestre se leue de terre pour s'aller vnir à l'autre comme dict est, il prendra vn souleuement en terre, & au mesme temps les bras se leuants du siege en promptitude, & ioincts avec la teste soudainement s'ostants du banc meneront tout le corps, ce qui demonstre la seconde figure des cerceles, & estants les mains arriuees à l'opposite du banc, avec les bras roidis, se mettront dessus tenans la teste haute, & soudain qu'ils s'y seront mis, les genoux se retireront quelque peu vers le sein, & ce afin que toute la partie inferieure se tire vers le banc; dont sans perdre temps les jambes s'esleueront en haut, afin que tout le corps demeure en force de bras en ceste façon.

Ll iij



Et continuant le mouuement, si tost que les genoux auront

passé la ligne perpendiculaire, & que l'on sente que presque tout le corps se laisse aller du banc vers terre, les mains soudain avec promptitude prenans vn soulleuement au banc à l'aide de la teste attireront droit en haut la partie superieure, afin que les pieds touchant en terre, tout le corps retourne droit de bonne grace.

*Le saut du Lyon.*

La course sera plus prompte qu'au precedent, & le sauteur estant esloigné vn grand pas du siege, prendra le temps à pieds ioincts, & finira son saut vn grand pied loing du siege, & au tēps que les pieds donnent le battement en terre, les bras s'esleuerōt en haut en ceste sorte.



LE II. DIALOGVE






Et sans toucher le siege se tireront vers le banc, & à vn instant à la faueur de la teste attireront tout le corps estendu vers ledit banc, comme dit est cy-dessus; & les pieds s'accourcissans se doyuent esleuer de terre, au temps que les bras avec la teste esleuent la volte vers le banc, & estans les mains arriuees à l'opposite du banc, elles se reposeront avec les bras bien fermes; & pour acheuer le saut, ils tiendront le precepte & la forme qui s'est tenuë au precedent.

*Le saut en auant pour passer le siege & le banc.*

En ce saut la course sera fort prompte, & sur la fin d'icelle, estant vn pied & demy esloigné du siege, on prendra le temps à pieds joints, le finissant à vn grand pied & demy loing du siege, aduisant qu'au temps que les pieds tombent pour faire le battement en terre, & pour faire la fin du temps, les bras se trouuans encores en l'air avec les mains fermées se retireront en arriere de ceste façon.



Mm

## LE II. DIALOGUE



Et sans perdre temps les pieds venant à s'esleuer pour faire le saut, au mesme temps les bras se mettront estendus en auant avec grandepromptitude, & avec l'aide de la teste attireront tout le corps estendu, comme mōstre la figure qui est au milieu des cercles; & arriué que sera le sauteur à la volte du banc, la teste vn pied pres du banc se mettra en rond pour faire la volte: & au mesme temps les bras accourcis avec le coude, se retireront en arriere en rond, & les genoux se retireront vers le sein. Or estant la volte finie, on mettra peine à s'estendre pour venir droit à terre. Et bien que l'on peust encores parler de quelques autres petits sauts, & forces de bras, qu'on a accoustumé faire avec le siege, parce qu'il conuient expedier autre matiere, i'ay voulu seulement raconter les susdits trois sauts, lesquels sont les plus beaux sauts que l'on puisse dire & faire; & le premier saut que nostre sauteur doit apprendre au trampellin sera le pied en auant à pieds impairs, & la forme & maniere de ce saut doit estre de la façon que vous verrez tantost; la longueur sera de deux pieds & demy, & la hauteur du costé de deuant sera d'un grand pied, puis on luy mettra vn oreiller picqué de grosseur de trois doigts, afin que ceux qui tiendront le trampellin, puissent tenir ledit oreiller avec les mains par les bords de peur qu'il ne glisse, & ne coule en tombant dessus. On y mettra vn ais de deux ou trois pieds au trauers d'iceluy, afin qu'on le tienne fort du costé de deuant, & de l'autre il y faut faire asseoir vn d'un costé, & l'autre de l'autre, & qu'un chacun d'eux le tienne d'une main, & l'oreiller de l'autre; afin que le sauteur donnant des pieds dessus, il ne vienne à glisser en auant, comme i'ay dit cy dessus.

*Le saut en auant de course à pieds impairs  
au trampellin.*

En ce saut la course sera mediocre, & la fin sera demy pas proche du trampellin, & au temps que le pied senestre finit le temps, le pied droict avec la iambe bien roide se tirera en arriere, esleuant le reste de la partie inferieure estenduë en l'air, la

LE II. DIALOGVE

formant au demy air par droicte ligne, & les bras estendus avec les mains fermes se ietteront en auant avec force attirant à la faueur de la teste tout le corps en l'air en ceste sorte.



Et si tost que le corps sera au terme de ne pouoir monter plus haut, lors la teste se mettant en rond fera la volte, se tirant les bras accourcis avec promptitude vers le sein, les tenant en tel estat tant que la volte soit finie, & incontinent apres on mettra peine à s'estendre.

*Le saut en auant de course à pieds impairs  
au trampellin.*

La course sera plus prompte en ce saut qu'elle n'a esté au precedent, & vn pas loing du trampellin se prendra le temps à pieds pairs, qui determinera la maniere & façon comme se doit finir ce saut sur le trampellin, en prenât garde que tous les deux pieds (qui sont encore en l'air) viendront à ôber sur ledit trampellin que les bras raccourcis reuiennent en arriere, cōme cy-dessus a esté monstré. Et si tost que les pieds seront arriuez sur le trampellin, les bras se ietteront estendus avecque force & violence en auant & en l'air, à la forme qui s'ensuit.

M m iij

## LE II. DIALOGUE



En mesme temps les pieds soutenus du trampelin en raccourcissant les genoux, representeront le corps en l'air en ceste forte.



## LE II. DIALOGVE

• Puis esserant le corps suffisamment le sauteur se retournera à la mode de la figure precedente, & quand le tour de la volte sera fini, il s'estendra, retournant droict sur ses pieds.

Ce saut est des plus beaux pour la proportion iuste qu'il a, & la disposition le rend beaucoup plus plaissant; & pour s'en servir on tiendra cest ordre; premierement on fera tenir droict vn homme de stature grande avec les pieds ioincts vn demy pas plus auant que le trampellin, apres nostre jeune homme prendra vne course fort prompte, & à la fin d'icelle il prendra le temps à pieds ioincts, & le finira au trāpellin, esslançant le corps en l'air au premier fondement.

On se seruira du mesme precepte que l'on a tenu au precedent, prenant garde de faire monter le corps droit vers la teste de celuy qui fait & termine le saut; & si tost que la teste de nostre sauteur sera au cercle entre A. & B. il fera la volte sur la teste du terme ou limite, gardant l'ordre qu'on a tenu au precedent, les espaules s'estants vn peu abbaïssées à terre pour mieu faire la volte, lors les bras mettront peine à s'estendre avec l'aide de la teste, mais lentement du commencement, comme la figure cy apres le demonstrera.

Estant







## LE II. DIALOGVE

Estant le corps arriué à vne iuste mesure esloigné de terre, on commencera à s'estendre, & venir droict.

On fait encores ce saut à pieds pairs, & à pieds impairs retourné en auant.

### *Le saut en auant de course à pieds impairs volté au trampellin.*

La course se fera avec promptitude en ce saut, & à demy pas du trampellin, là où on la doit finir on prendra le temps à pieds impairs & le pied fenestre fera la fin du temps sur le trampellin, & au premier essancement du premier fondement, & au second on tiendra l'ordre à esleuer & retourner le corps de la mesme forme & maniere qu'on a tenuë à pieds impairs de course esleué de terre retourné: Mais le mouuement du retour sera fort lent en cestui-cy, & estant le corps retourné on se seruira de l'extension.

### *Le saut en auant de course à pieds pairs retourné au trampellin.*

La course sera plus prompte en cestui-cy qu'elle n'a esté au precedent, & on la finira vn pas loing du trampellin, & esleuant le saut soudain on tiendra l'ordre en cestui-cy au premier fondement, comme on a fait cy dessus à pieds pairs au trampellin, formant au premier essancement tout le corps en l'air en ceste façon.



Mais estant le corps esleué à suffisance, il retournera ainsi.

Na ij.



De la mesme maniere qu'il s'est tourné à pieds pairsestant esleué de terre à la course, & si tost que le corps sera tourné, on commencera à s'estendre & venir sur ses pieds.

*Le saut en arriere de course eslançé en auant au trampellin à pieds impairs.*

La course fera fort prompte, & la fin d'icelle sera à vn pas loing du trampellin, là où en vn instant on prendra le temps eslançé, & le pied senestre le finira au trampellin, dont on tien-

dra au premier & secōd fondement le mesme chemin que l'on a tenu au saut esleué de terre avec course à pieds impairs: Mais d'autant que ce saut s'esleue plus haut à cause du trampellin, l'eslancement que prend la teste, attirant en auant la partie supérieure, sera plus grand, pour rendre l'esleuement vn pas & demy ou deux plus auant que le trampellin, & estant la volte acheuee on se doit estendre.

*Le saut en arriere tourné estant assis sur le trampellin.*

Auant que de s'asseoir pour faire le saut, le cuissin sera tiré du costé de deuant vn demy pied plus auant que le trampellin, abaissant le costé du cuissin qui surpasse le trampellin, & serrant les dernières parties fort & ferme, à ce que reuenant sur la fin du saut il soit assis avec beaucoup plus grande commodité: apres nostre sauteur s'assera sur le seul costé qu'on a tiré en auant, & saut que tout le corps soit soustenu de la pointe des pieds, & que la partie supérieure se tienne quelque peu abaissée en auant en ceste forme.



Puis esleuant le saut on y tiendra la reigle & precepte que on a tenu au saut retourné esleué de pied ferme ; mais en cela la volte doit estre basse & plustost tournée, prenant garde qu'estât la volte finie, s'abbaisant le corps à terre, le ieune homme eslar, gira les jambes avec les cuisses, veu qu'en ceste façon on reuiet plus aisément que si on les tenoit serrees , & vient en fin assis ayant les cuisses ouuertes, comme i'ay dit, en ceste sorte,




*Le saut de course fait en auant à pieds pairs de-  
dans les cercles.*

Il faut que la hauteur du diametre du cercle soit si haute que elle arriue au nez du sauteur, apres on prendra dix personnes, en mettant cinq d'une part, & cinq de l'autre, viz à viz l'un de l'autre, & l'un d'un costé, & l'autre de l'autre tiendront deux grands cercles distans un grand pied l'un de l'autre, & que les-

dits dix hommes tiennent les jambes larges, si que les vns touchent les pieds aux autres, afin que le corps soit assez fort & bien posé pour tenir les cercles avec proportion, & que la hauteur de la circonférence desdits cercles se leue si haut qu'elle arriue au bout du nez de nostre ieune homme; sauf que le premier & second où le saut s'esleue, & les deux derniers où il finit, doyent estre quelque peu plus baïssez que les autres, les deux premiers pour n'y donner des bras en y entrant, & les derniers, de peur de donner des fesses, ou de l'eschine en terre à la sortie: & doit estre le premier cercle esloigné du trampellin, vn demy pas, afin que nostre ieune homme s'eslançant aux cercles n'y touche des bras: apres nostre sauteur prendra vn bon espace, pour auoir moyen de faire vne course fort prompte, & à la fin d'icelle estant esloigné vn pas du trampellin, il prendra le temps à pieds pairs, faisant la fin sur le trampellin; puis en vn instant les pieds se releuant du trampellin en l'air, les bras bien estendus avec les mains bien serrees mences d'une grande promptitude se ietteront dans les cercles, comme monstre la premiere figure, & à la faueur de la teste attireront tout le corps estendu par le milieu des cercles, ainsi que monstre la seconde figure qui est en ces cercles; & soudain que la teste sera arriuee au septiesme cercle on fera le tour, à sçauoir, au mesme temps que la teste se mettra à faire la volte, & les bras aussi se ietteront estans en arriere accourcis à la volte, & les genoux aussi accourcis se tireront vers le sein; & si tost que le corps aura finy de se tourner, estant la partie inferieure sortie du dernier cercle, on s'estendra promptement pour retenir la violence que porte le corps en ce saut; & pour reuenir droit en terre, la figure suiuite nous demontre l'entrée des cercles, & comme le corps se doit retirer du milieu d'iceux, & le temps auquel se doit estendre le sauteur.

Cos.







Cos. Il me souvient outre les choses susdites de la vol-  
te & des cercles, lesquels Alexandre de Naples, nomme *Petau-  
ristique*, suyuant yn vers qui se trouue en Lucilius Poëte fort an-  
cien, lequel voulant signifier quelque chose par le moyen de la  
comparaison du saut *Petauristique*, dit ainsi, *si quis potest*

*Sicuti mechanichi alto exilière Petauro.* Car le mot Latin *exilio, exilis*, signifie proprement l'acte du saut  
qu'on fait de quelque lieu haut, comme de ces cercles, ou autre  
telle chose aussi haute: Car on ne pourroit dire qu'on eust sauté  
dehors que premierement on n'eust entré dedans, & ne faut  
penser que Lucilius n'aye bien entendu cela, ayant esté tou-  
iours tenu & réputé pour homme docte, & de fort bon juge-  
ment, comme a fait Quintilian, Horace, & plusieurs autres an-  
ciens auteurs, & les modernes mesmes, comme nostre Scalli-  
ger.

FERR. Certes vous auez trouué la plus grande raison  
que l'on pourroit iamais trouuer à ce propos, & m'en resiouys  
infinitement avec vous, d'autant plus qu'elle est accompagnée  
de l'autorité de ce tres-ancien Poëte, étant certain que puis  
qu'il faut que le sauteur sorte hors du Petaure, il falloit que le  
Petaure fust vne machine de bois plustost ronde qu'autrement,  
& semblable en tout, ou en partie, à la disposition des cercles,  
lesquels sont accommodez en saut de la forme qu'estoit le Pe-  
taure, suyuant ce que dit le Poëte, que le Petaure estoit mesmes  
haut, qui montre clairement que ceste machine estoit vneroue  
& non autre chose.

Cos. Soit ce qu'il pourra, puis que Lucilius vouloit moy-  
nant la comparaison du saut hors du Petaure signifier vne au-  
tre chose, il falloit quoy que ce soit qu'il y fust entré en sautant,  
pour en pouuoir aussi sortir en sautant, & d'autant que ce saut  
ne se feroit peu faire sinon que presque en volant, comme si vn  
homme auoit des ailes comme vn oiseau, ie tiens pour certain  
que le nom de *Petaure* a esté attribué à vne telle machine, suy-  
uant ce que i'en ay démontré plus amplement au commence-  
ment de ce Dialogue.

FERR. Ie croy que vous vous en soyez aduisé en partie,  
pour en auoir icy représenter l'acte admirable tel que pres-

que volant dans les cercles, on y fait tourner le corps auant que d'en sortir sans les toucher, avec merueilleuse dexterité & agilité, fuyuant en l'air le mouuement d'un mesme saut continué: Mais j'ay opinion qu'on pouuoit trouuer anciennement vne machine qui eust seruy de rouë, & de cercles ensemble, à la semblance de ceux-cy: mais qui sera celuy qui nous pourra mieux esclaireir de la verité, que le temps de tant de siècles passez?

Co.s. Certes, il n'y en a point qui la puisse mieux faire cognoistre que l'antiquité fondée sur la verité, & sur la vraye recherche des choses, voire les plus douteuses & difficiles. Que si nous auions les escrits de tous les auteurs anciens qui ont traité de l'art de sauter, nous ne serions réduits auourd'huy à diminuer la douteuse signification du *Petaure*, ny de la *volte*, ny d'aucune autre chose appartenante aux exercices de l'art du saut: Toutesfois i'oserois affermer que ce saut du cercle en la forme qu'on le void maintenant, est l'un des plus beaux, & admirables sauts que l'on ait peut estre iamais veu.

FERR. Certainement on peut dire que si les anciens ont iamais représenté vn semblable saut, nous nous pouuons asseurer qu'il ne nostre ne luy cede, ny en force, ny en agilité, ny en iuste proportion & volte admirable, & tant digne qu'on ne peut remarquer vn acte en luy, pour lequel il doye ceder à aucun saut de ceux qui se sont iamais veus & pratiquez anciennement.

BAPT. Je ne desirerois pas d'auantage sortir d'un fâcheux procès, que ie voudrois auoir entendu le progrès de ces sauts *Petauristiques*, lesquels sont d'autant plus estimez, qu'ils sont fort antiques & fondez sur vn art fort authentique. Parquoy pourfuyuant le discours de ces sauts que l'on a fait à la table dignes d'estre veus & admirez, ie dis qu'il faut que la table soit de six pieds de long, & trois pieds de large, & faudra qu'un la tienne tousiours d'une main d'un costé, & de l'autre main l'autre costé, comme on verra par exemple, & la faudra tenir à la volée du sauteur fort & ferme, selon qu'on leue le saut vn pied plus haut que l'autre; par ainsi il faut hausser ou abaisser la table avec proportion, & le premier saut que le sauteur y fera, sera vn pas, pour lequel faire on gardera cest ordre.

PIN. Je vous prie M. Baptiste auant que passiez plus outre

d'attēdre que ces messieurs les Philosophes nous dient s'ils ont cogneu rien de beau sur le fait des cercles, & quelle difference & difficulté ils trouuent plus en cestui-cy qu'à celuy qui se fait sans cercles, pource que plusieurs sauteurs auerglez de leur ignorance veulent que ce soit vne mesme chose de faire le fait en auant avec cercles ou sans cercles.


**FERR.** Certes ie n'en scaurois que dire, veu que le fait de dedans les cercles a eu son principe & commencement du passage que le corps fait à la fin de ces cercles, encores que quelques vns dient qu'il y doit auoir de la difficulté en l'un plus que en l'autre, il s'ensuit que celuy qui n'a l'intelligence de cest art, ne peut pas donner les raisons, & resoudre de ce qu'il faut scauoir pour discerner & cognoistre la cause & difficulté qu'il y a entre l'un & l'autre.

**PIN.** Dites M. Baptiste ie vous prie, ce qu'autresfois nous auons discoursu ensemble sur ceste matiere.

**BAPT.** Je n'y feray pas de long discours pour vous faire cognoistre que ceux se trompent qui tiennent ceste opinion, que le fait qu'on fait aux cercles soit avec telle difficulté que celuy que l'on fait sans cercles; & aussi l'on ne peut dire avec verité qu'il aye telle proportion en foy: Car on peut au premier eslanacement ietter le corps à la discretion & volonté du sauteur, à scauoir plus haut & plus bas, ou plus ou moins long par droite ligne, ou moins droite: mais quant au fait qu'on fait dans les cercles, le sauteur est tenu à l'observation de plus grande proportion, laquelle de necessité porte quelque limitation, scauoir est, s'eslançant le sauteur és cercles, iette son corps dans iceux à cōtrepois avec telle mesure que le corps se puisse tourner sans les toucher aucunement: il faut aussi qu'il se porte au plus iuste terme que faire se pourra à l'endroit où il doit faire la volte, & là se pose tout doucement lors de l'impetuosité que le corps prend pour y entrer proportionnément, & aussi en sortir avec assurance & bonne grace; ce qui a beaucoup plus de difficulté en foy, que de le faire librement sans cercles.

*Le saut de course à vn pas de la table.*

Il faut prendre l'espace pour faire vne course temperee ; & le pied dextre fera la fin à la lettre A. qui sera à vn demy pas de la table, & le pied dextre estant encores en l'air ; & s'abaissant pour acheuer la course, les bras avec les mains ferrees à l'ordinaire se tireront en arriere ; puis soudain on prendra le temps eslançé, sçauoir est que le pied fenestre ayant la jambe roide s'ira poser à la lettre B. & comme le fenestre s'eslance, les bras se ietteront deuant, & à la faueur de la teste attireront le reste du corps en haut vers la table ; mais estant la partie superieure abaissée en arriere, comme le pied fenestre s'esleue au B. le pied dextre s'esleuant de terre demeurera en arriere ayant la jambe estendue à l'esleuement que le pied fera sur la table ; l'autre se leuant de terre se tiendra la jambe roide, comme dit est cy dessus ; & lors que le pied fenestre fait la batture à la lettre B. le pied dextre se tirera auant avec la jambe estendue ; se tenant en l'air ; formant tout le corps en ce premier eslançement de la façon & maniere que vous voyez la demonstration cy dessous.



## LE II. DIALOGVE

Mais ne pouuant plus la jambe droicte s'esleuer sans s'arrester, se mettra à la volte en la mesme sorte & maniere : mais s'estant la iambe fenestre esleuee de B. & conioincte avec la dextre, comme elle doit tousiours faire, on s'accourcira doucemēt, & lors les bras à la faueur de la teste ferōt la volte, laquelle estāt finie le fauteur s'estendra.

### *Le saut avec la course à deux pas de la table.*

La course sera vn peu plus prompte qu'elle n'a esté au precedent, & le pied fenestre s'arrestera à la lettre A, & soudain apres sans interualle de temps, le dextre à l'instant mesme s'en ira poser à la lettre B. tenant la jambe bien roide en la mesme sorte & maniere qu'on a fait au precedent, prenant bien garde tousiours qu'à chaque fois qu'un pied s'auance pour monter les bras avec la teste, au mesme temps ils esleueront le corps en l'air, comme dit est au precedent; & s'estant le fenestre posé à la lettre C. le dextre passant en auant en l'air pour finir le saut, on tiendra la mesme reigle & precepte qu'on a tenu au precedent; mais il faut que la volte soit plus lente quelque peu.

### *Le saut de course à deux pieds de la table, & à un pied de la muraille.*


La course sera fort prompte en ce saut, & le pied dextre la finira à la lettre A. & le fenestre incontinent s'ira poser à la lettre B. avec le temps essancé, puis sans perdre temps le dextre passera, & se posera à la lettre C. puis le fenestre à la lettre D. se posera à la muraille d'un pas proportionné qui ne soit pas trop long, ne trop court, & s'estant posé le fenestre, le dextre s'esleuant de la lettre D. de la mesme façon & maniere que les precedents, se tirera deuant l'autre, ayant la jambe bien estenduë en l'air; & comme le dextre va pour passer deuant l'autre, le fenestre se leuera de la muraille, y prenant vn essancemēt pour esleuer le corps en haut au premier essancement, & pour reculer de la table, lors les bras à la faueur de la teste s'esleuerōt en haut pour esleuer aussi le corps au premier fondement, & attireront



la partie superieure quelque peu en arriere abaissee, dont ne pouuant le corps plus s'esleuer, on s'accourcira doucemēt pour faire la volte, & les bras aussi s'y employeront estans accourcis, mais lentement, & estant la volte finie, il ne faut s'estendre soudainement, mais doucement au commencement, dont estant le corps arriué à iuste mesure proche de terre, il faut finir le saut.

*Le saut de course à pieds ioincts à vn pas de la table.*

On prendra vne course mediocre pour faire ce saut, & le pied dextre le finira à la lettre A. puis sans perdre temps le pied fenestre d'un mesme temps eslancés ira poser à la lettre B. de la mesme reigle, maniere, & precepte, dict cy-dessus; & en vn instant on prendra le temps à pieds ioints, & le finira-on à la lettre D. & faut qu'il y tombe pour faire la batture, & estant encores en l'air, les bras viendront à se mettre en arriere, afin que le reste du corps aye plus de force & de vigueur à monter sur la table à pieds ioints, se reiettant les bras en auant; & doit-on prendre garde que lors que les pieds s'abbaissent à eux poser sur la fin dudit temps à pieds ioints à la lettre D. les bras se retourneront derechef à mettre en arriere, & les pieds ayants donné fin à la lettre D. au mesme instant ayant pris vn eslancement sur la table, s'esleueront accourcissant doucement les genoux, & au mesme temps les bras se ietteront en auant en ceste forte.





Et à l'aide de la teste le corps s'esleuera en haut , & estant la partie superieure quelque peu separee de la table , estant le corps monté à suffisance pour faire la volte, les bras à la faueur de la teste feront la volte comme dict est, & les genoux se tiendront tant accourcis que la volte soit finie , puis on s'estendra incontinent.

*Le saut du chat de course sur la table.*

La course sera agile en ce saut , & le pied fenestre fera la fin, estant vn grand pas esloigné de la table , & de peur de perdre l'occasion, on prendra le temps à pieds pairs, & la fin d'iceluy sera à la lettre A. & les pieds soudain se viendront à leuer accourcissant les genoux, & au mesme temps les bras estendus avec les mains ouuertes , & à la faueur de la teste s'esleueront promptement en haut vers la table, tirant le reste du corps en l'air, dont se trouuant les mains à l'opposite de la lettre D. s'y mettront en vn instant , & quelque peu apres les pieds se mettront vn pied loing des mains en ceste forme.



Or ayant les pieds donné la batture en vn instant, les bras & mains ferrees & estenduës à la faueur de la teste attireront le reste du corps estendu en haut, estant la partie superieure quelque peu renuersee en arriere, en ceste façon.




## LE II. DIALOGVE

Et lors soudain en ceste mesme forme d'vnion feront la volte en ceste sorte, prenant lors les pieds vn eslancement sur la table s'esleueront tenant les genoux tousiours retirez pres du sein tant que la volte soit finie, puis on s'estendra.

*Le saut de course en arriere tourné à vn pas de la table.*

On courra legierement & le pied dextre fera la fin de la course à la lettre A. apres le fenestre avec le temps eslancé s'en ira poser à la lettre B. où bon luy semblera avec le temps redoublé, En apres on esleuera le corps au premier fondement de la mesme sorte & maniere que l'on a tenu au saut en arriere à vn pas de la table, dont ne se pouuant le corps plus esleuer, il se retournera, mettant en vn mesme temps les bras ployez avec les mains fermées du costé droit avec la teste en ceste façon.



Et les genoux se tiendront tant accourcis que l'eschine soit à l'opposite de la table, & lors on s'estendra. 

*Le saut de course à deux mains sur la table.*

La course sera en ce saut temperée, & le pied dextre la finira à la lettre A. puis le fenestre de mesme façon s'eslancera à la lettre B. lors le dextre se mettra à la lettre C. & ayant fait la batture à la lettre C. le fenestre s'en ira mettre proche de luy vn b<sup>o</sup> pied du costé fenestre; où s'estant posé le fenestre, le pied dextre avec le genoüil quelque peu plié retournera du costé fenestre la pointe la part où il auoit le talon; & au mesme temps les bras avec les mains fermées vnies avec la teste retourneront aussi du

## LE II. DIALOGVE

costé fenestre la partie superieure avec proportion du pied , & estant le pied dextre retourné , & ayant donné la batture , le fenestre se remuant comme le dextre , retournera semblablement la poincte où il auoit le talon & les bras avec la teste retourneront la face du tout vers terre , & l'eschine à l'opposite de la teste. Or reuenant le fenestre ayant finy la batture sur la table , les bras bien estendus & la teste haute s'abaisseront pour se reposer sur la table en ceste maniere.

Le fenestre se remuant comme le dextre , retournera semblablement la poincte où il auoit le talon & les bras avec la teste retourneront la face du tout vers terre , & l'eschine à l'opposite de la teste. Or reuenant le fenestre ayant finy la batture sur la table , les bras bien estendus & la teste haute s'abaisseront pour se reposer sur la table en ceste maniere.





THESE ARE THE SEVERAL MACHINES AND APPARATUSES  
 WHICH ARE USED IN THE ART OF WARRE  
 AND ARE NOW IN USE IN THE  
 KINGDOM OF FRANCE



## LE II. DIALOGVE

Il faut aduifer qu'au temps que les mains vont à s'abbaif-  
fer pour se poſer en terre de deſſus la table, le genoüil de la  
jambe ſeſtre ſe ployera quelque peu, & au temps que les  
mains ſ'abbaiffent, le pied dextre avec la jambe droiète ſe leue-  
ra en haut promptement avec tout le corps en force de bras,  
tenant la teſte haute, & continuant le mouuement, les ge-  
nouils ayants paſſé la ligne perpendiculaire, les mains pren-  
dront vn eſlancement ſur la table, & ſouſleueront à la faueur  
de la teſte la partie ſuperieure dreſſée en haut au temps que la  
partie inferieure abbaiffe la volte de terre, afin que donnant  
les pieds en terre tout le corps remonte droit.

### *Le ſaut en auant à pieds ioints de courſe à la table.*

La courſe qu'on prendra par terre pour ce ſaut avec le  
temps eſſancé, & le mouuement ſur la table, & le retour du  
corps, & des pieds ſera ſemblable au precedent, prenant gar-  
de qu'eſtant tout le corps retourné vers la terre, ayant le pied  
ſeſtre finy la batture, le dextre avec vne prompte viſteſſe ſe  
iettera en arriere leuant la partie ſuperieure en l'air, comme par  
droiète ligne; & au meſme temps ils ſe mettront eſtendus en  
auant ayant les poings ferrez, & enſemble avec la teſte attire-  
ront la partie ſuperieure en auant loin de la table, pour respon-  
dre à l'autre par droite ligne. Or eſtant le corps eſſeué à ſuffiſan-  
ce on fera la volte, c'eſt à dire, que les genouils ſe tireront  
poyez vers le ſein, & les bras ſe retireront accourcis en volte,  
& la teſte donnera en rond, dont eſtant la volte finie ſelon la  
commodité de l'eſſeuation plus haut, ou plus bas on pourra ve-  
nir eſtendu, ou courbé.


### *Le ſaut de courſe en auant tourné à pieds impairs ſur la table.*

En ce ſaut la courſe ſera ſemblable qu'on fera par terre  
apres le temps eſſancé, à la courſe ſur la table qui ſe faiet par le  
retour

retour du corps, & l'eslancement d'iceluy à la premiere eslevation de la mesme forme qu'on a vſé au precedent : mais si roſt que le corps aura finy ſon cours au premier eslancement on ſe retournera , mettant en vn meſme temps les bras ployez avec la teſte du coſté ſeſtre , & les genouils ſ'accourciront formant le corps en ceſte maniere , comme de couſtume.



Et eſtant la teſte retournée à l'opposite de la table , il ſera meilleur qu'il renienne ſur la ſin courbé.




Entre bons fauteurs si tost qu'on a couru deux pas à la table, on a de coustume faire vne rouë à la muraille, ce qui a vne fort belle apparence; & bien que ceste rouë ne soit au nombre des fauts, si ne veux-je laisser pour cela d'en donner la reigle.

*Le saut à deux pas de la table, & la roue à la muraille.*

La course sera fort prompte, & le pied fenestre fera la fin à la lettre A. puis le dextre s'elancera à la lettre B. & s'estant le fenestre posé, le dextre passera & ira à se poser au bout de la table, faisant à la faueur ordinaire monter le corps, cōme nous auons dict és sauts cy-dessus, & s'estant le fenestre posé, le dextre avec la jambe estenduë se tirera en arriere, & soudain les bras estendus avec les mains ouuertes au mesme temps à la faueur de la teste tireront le corps du costé fenestre loin de la table de deux bōs pieds, & faut faire la volte de la muraille quelque peu en haut, & ne pouuant tirer le corps plus haut à l'aide de la teste en forme de rouë les mains se poseront à la muraille en ceste façon.

Rr ij





De sorte qu'au temps que les bras & la teste tirent le corps, & que les mains vont pour se reposer sur la muraille, le pied fenestre prendra vn essancement sur la table, & s'estant vny à l'autre il se faudra accourir, & au mesme temps les mains se mettront en rouë sur la muraille, comme nous auons dit, s'estant les mains posées, la teste avec promptitude se ietiera en rouë du costé fenestre pour faire retourner le reste du corps: & estant la rouë du corps finie, & les pieds regardants la terre par ligne perpendiculaire, les genouils s'estendront, & tout le corps tombera droit en terre, estant esloigné deux ou trois pieds de la table.

On a encore accoustumé de faire le saut retourné ou volté en derriere contre la muraille à vn ou à deux pas avec la rouë, tout ainsi & de mesme que se fait le saut sur la table à vn ou à deux pas: or mis qu'il faut prendre garde de ne faire pas les pas trop longs, & que le retour soit fait plus promptement, & avec plus grâde viffesse, à cause de la muraille laquelle se trouue fort droicte, & toutesfois & quantes que l'on met les pieds, soit à la muraille ou à ladicte table, que ce soit sur la pointe tenuë droicte & ferme, & le talon aucunement haussé, c'est à dire, ny trop haut ny trop bas, ains avec hauteur & mesure proportionnee, parce que ne les haussant pas assez, à l'esleuement du corps qui se feroit trop droit ils pourroyent glicer, & les haussant aussi par trop, cela pourroit causer moindre force au corps qu'il luy conuient auoir pour se hausser. Partant le retour au volté qui se fait à vn ou à deux pas se fera promptement & fort vifte, selon la grande ou moindre eleuation du saut.

PIN. Voilà tous les sauts qui iamais furent practiquez iusques à maintenant entre les meilleurs fauteurs, cōme vous les auez non seulement veus auioird'huy, mais aussi examinez de l'antiquité, ainsi en pourrez vous à l'aduenir voir d'autres qui feront les mesmes sauts, entre lesquels il n'y a point telle contrariété, qu'ils puissent estre differents en la parfaite proportion de chacun saut, depuis le commencement iusques à la fin, & encore quelques autres obseruations que le fauteur est tenu garder pendant qu'il saute.

Cos. Il n'y a doute qu'il n'y en ayt eu plusieurs si excellens en leurs sauts qu'ils ont esté en admiration à tous ceux qui en ont seulement ouy parler, comme vous & M. Baptiste auez aujourd'huy fait fort excellemment : mais que pour cela tous ceux qui se messent de sauter, meritent le tiltre de tres-bons & parfaits sauteurs, la consequence n'en est pas bonne & valla-ble, encores mesmes qu'ils obseruassent la mesme forme & rei- gle que les bons sauteurs: d'autant qu'il y a bien differencé entre imiter les maistres en leur art, & estre maistre soy-mesme ; entre ensuiure les bons sauteurs, & estre bon & parfait sauteur. Car qui est celuy qui ne sçache qu'il y en a plusieurs qui peuuent bien faire vn saut avec la volte, pour s'y estre estudiez & em- ployé leur temps, qui toutesfois ignoreront les reigles de la ius- te proportion & perfection de l'art du saut.

PIN. C'est pourquoy ie disois quand on commençoit à discourir des principes de l'art de sauter, qu'il estoit necessaire que le sauteur eust vn bon iugement, accompagné d'vn cœur fort vis & courageux, autrement il seroit impossible qu'il peust comprendre les reigles, mesures & proportiōs de chaque saut, puis qu'il est notoire que la seule pratique & experience, sans la cognoissance de l'art, ne le pourroit rendre parfait sauteur, & ne sçay qui le pourroit nier, & aller au contraire.

Cos. Je ne vous le nie pas, comme estant chose necessai- re, s'il vous en souuient bien; mais comme n'estant principe de l'art du saut: Car combien qu'un esprit subtil soit apte & pro- pre à comprendre non seulement l'art du saut, mais aussi toute autre science, la vertu & l'acte de l'entendement est bien verita- blement le commencement de sçauoir entendre & apprendre avec l'aide, ou sans l'aide d'autrui vn art ; comme pour exem- ple celuy de sauter; non que l'entendement soit tousiours le principe vniuersel de tous les sauts, mesme de celuy qu'un par- fait sauteur fera excellemment; que si nous constituons l'en- tendement du sauteur pour l'un des principes du saut; qui plus est, si le parfait entendement du sauteur estoit necessaire ment le vray principe de l'art du saut, tous ceux qui en seroyent doüez, (comme on en void vne infinité qui ont vn fort bon entende- ment) auroient la science des principes du saut, ce qui est aussi



faux, comme il n'est véritable que tous les fauteurs, bien qu'ils soyent ignorants de l'art, dont ils ont la pratique, soyent priez d'un bon iugement & d'un meilleur entendement: Car il n'y a doute qu'entre tous ceux qui sautent il ne s'en trouue plusieurs qui ont l'entendement bon & subtil, qui neantmoins n'entendent non seulement les principes de l'Art, mais mesme se moquent de ceux qui en veulent discourir, assurant que la longue pratique, exercice, & experience sont le seul, vray, & nécessaire principe de la science de cest Art du saut, plustost que tant de resueries que plusieurs fantastiques ont voulu inventer, & imaginer.


**BAPT.** Certes le sieur Cosme a la plus grande raison du monde; car il me souuient en auoir veu vne infinité, lesquels i'ay fréquenté, & reconnu d'ailleurs estre fort bons sauteurs, & doüiez d'un fort bon iugement, & excellent esprit, qui se moquoient de moy quand quelquefois ie leur discourois des reigles de cest Art, disant que ce n'estoyent que resueries que toutes ces speculations, & qu'il n'y estoit requis autre chose qu'un corps prompt & agile, pour estre & deuenir en sautant, sans tant de sophistiquerie, le meilleur sauteur du monde comme nostre Archange le pourroit mieux dire que moy, quand il en voudroit parler comme il sçait bien faire, & beaucoup mieux que nous autres, qui ne sommes que ses disciples, duquel auons appris que cest Art se doit gouverner par reigles, mesures, & preceptes, pour paruenir à l'action iuste, & parfait de nostre Art du saut.

**Cos.** Ceux qui iamais n'eurent que la seule pratique du saut, & n'ont sçeu aucune autre chose, sont le plus souvent les plus arrogants, & remplis de vaine gloire, seulement pour ce qu'ils estiment ne pouuoir sçauoir rien plus que la seule pratique de cest Art, s'amourachants eux mesmes de leur disposition: mais s'ils prenoient bien garde que faire & sçauoir sont deux choses différentes, & que sçauoir bien faire vne chose ou non, depend non seulement de la faire, mais aussi de la sçauoir bien faire, sans doute changeants d'opinion ils viendroyent à confesser qu'ils se trompent du tout, n'estant la chose telle qu'il leur sembloit: mais qui ne sçait que la science est vn particu-

lier don de Dieu faict à nostre intellect, & l'acte n'est qu'un simple œuvre du corps, lequel venant à faire quelque chose, s'il n'est gouverné de l'artificielle conduite de l'intellect, il peut quelquefois aussi tost aduenir que l'acte soit imparfait, comme parfait, ce qui n'aduiet à celuy qui faict avec reigle certaine ce qu'il entreprend; & s'il arriuoit quelquefois que cela vint à faillir, l'on peut dire que c'est ou l'ignorance de l'Art, ou bien quelques autres accidets qui seroyent suruenus qui en seroient cause, & ces accidents ne dependent pas de la science humaine, mais bien de la fortune. Pour exemple on pourroit amener vne infinité de tels accidents; comme la coulpe d'auoir failly, ne se peut, ny ne se doit attribuer au sauteur; mais bien cela luy pourroit estre imputé, quand sans aucun accident il manque de iuste proportion, & perfection au saut, pour ne sçauoir, entendre, ny obseruer les reigles & considerations qui sont necessaires à celuy qui doit sauter, plustost qu'au corps qui pratique le saut. D'auantage bien que l'on accorde qu'aucun eust failly, comme il peut aduenir, pour auoir mal obserué les preceptes de l'Art en sautant, non pour quelque accident extrauagant; pour cela ne s'ensuit-il pas qu'il soit à parangonner & comparer à l'erreur de celuy qui n'y cognoist rien que la seule pratique; car bien que l'un & l'autre aye failly, neantmoins le praticien demeure despouillé de la cognoissance speculative, estant encores sujet à errer par ceste mesme voye, ne luy estât possible de sçauoir iuger incontinent pourquoy, d'où, ny comment est aduenüe vne telle faute. Ce qui n'aduiendra pas à l'autre; car il ne recognoistra seulement auoir failly comme l'autre, mais il sçaurabien tost pourquoy il est tombé en cest erreur. Parquoy ceux qui blasmeront les raisons de l'Art, que quelques vns appellent pedanteries, ( puis que les reigles & preceptes de toutes sciences sont ainsi nommees d'aucuns) ils sont & seront tousiours tant qu'ils auront ceste opinion, appelez des sçauants, & experimentez en l'Art, lourdaux & ignorants. Et certes c'est vne grande ignorance, & indigne d'un homme sur toutes les autres, d'estimer ne pouuoir paruenir à la cognoissance d'un Art que plusieurs autres sçauent, pour en auoir vne plus parfaite intelligence & experience.

FERR. Voylà l'vne des choses qui me faict plus que tout autre estonner grandement de l'outrecuidance des hommes, veu qu'il y en a qui sont si aueuglez & obstinez en leur ame, qu'ils se persuadent, & se font à croire, que ce dont ils n'ont la cognoissance, & dont ils ne peuuent apprendre la verité, est vne chose impossible, & qui n'est point ainsi comme plusieurs l'affirment; & maintiennent cela avec vne telle assurance, & arrogance, que l'on est contraint leur ceder, pour ne pouoir gagner le dessus à cause de leur force & autorité, & entant qu'en eux est, obscurcissent tellement la verité par leur raisons vrayement desraisonnables, & leur babil, que l'on perd mesme la cognoissance de ce qu'on recherchoit; & ce qui est de plus mauuais, bien souuent l'on vient des paroles aux mains, aux haines & inimitiez immortelles, & irreconciliables. Ce qui ne procede que de la folle presumption que l'ignorant a de soy-mesme, estant fort mauuais iuge des actions d'autrui, ne pensant pas qu'il y ayt rien de bien faict, ou de bien dict, que ce qu'il a faict ou dict. Et pour mieux assurer & maintenir son opinion erronee, il se targue & se veut preualoir de l'exemple de quelque ignorant comme luy, qui n'aura le plus souuent, ny cognoissance, ny experience de ce dont il veut disputer; & lequel seulemēt sera, peut estre, doié de quelque peu de science, mais bien remply de beaucoup d'arrogance & vaine presumption de soy-mesme; & neantmoins il voudra assurer que c'est vn personnage le plus accomply du monde, bien qu'il soit le plus imparfait, & mal habille homme qui se trouue. Et le iugement que l'on en peut faire est, en ce qu'il mesprise toutes choses pour bien dictes, ou faictes qu'elles soyent, estimant les siennes seules estre parfaites: Contre lesquels il se faudroit escrire, ô ignorance infinie des hommes? Mais reuenant à nostre propos, il me semble à vous voir ioyeux, que soyez arriuez avec vn grand contentement au dernier but de tous les sauts, qu'è le S. Tetti auoit promis faire voir à toute ceste noble compagnie, par le moyen que nous deuions conduire & rapporter de la Gymnasiarchie de nostre Archange.

TETTI. Je vous prie de ne passer plus outre; & cependant que l'on appareille le souper, & que l'on dresse les tables,



## LE II. DIALOGVE

discourir, pour contenter ces Seigneurs, avec le S. Cosme des choses qui sont à l'exposition, & explication de ces paroles, art, science & pratique, & ne pensez pas vous en pouuoir excuser.

Cos. Je prendray volontiers ceste charge, aussi que nous ne sommes encores paruenus au dernier but de tout ce qui appartient à l'art du faut, bien que les fauts soyent de fait finis, & qu'un chacun d'eux aye esté fait proportionnement, & parfaitement par les vrais maistres & professeurs de l'art.

FERR. Je ne sçay comme diroit un naturel Espagnol: mais pour cela ie ne voulois conclurre suyuant son opinion un *valet & plaudite*: Mais venons à parler de l'art, & quelle est sa vraye signification.

Cos. Pourquoi n'avez vous commencé à en discourir plustost, ou pourquoi vous estes vous reserué à en parler apres les autres, ceste question s'estant desjà meüe, & ayant esté agitée plusieurs fois entre les maistres de l'art.

FERR. Vous me voulez faire à croire que ie prens plaisir à differer ceste dispute: mais au contraire ie ne desire rien plus, & s'il n'eust tenu qu'à moy, ie vous puis asseurer qu'elle fust desjà finie. Pourfuiuons doncques sans plus dilayer, puisque ces Gentils-hommes se proposent mesme, desirans d'en voir la fin, de souper plustard à ceste occasion que de coustume.

Cos. Il n'est pas encore si tard qu'il vous semble, mais pour cela ie ne veux pas que nous perdions temps, de peur que ces Seigneurs, le S. Tetti, & tous les autres ne s'ennuyent d'une trop longue attente.

TETI. Il me semble qu'il n'est pas raisonnable, que pour complaire du tout à la compagnie, vous discouriez si briueuement, & comme seulement en passant, de ces choses, veu qu'elles sont de si grande importance, qu'elles meritent bien d'estre traittes au long; de peur mesme qu'estant trop brief, vous ne vous rendiez obscur, & par consequent n'en donniez pas une si claire interpretation qu'il seroit bien à desirer, pour satisfaire & contenter toute ceste noble assistance.

Cos. I'estendray doncques tres-volontiers mon discours

plus auant, & commenceray mon propos par les choses qui appartiennent aux conceptions de la vraye & naïfue signification vniuerselle de l'art de la science & de la pratique; si tost que M. Pin nous aura déclaré entierement toutes les autres considerations, aduis & resolutions qu'il faut prendre sur ceste matiere, & qui sont necessaires pour la parfaite intelligence, & connoissance de l'art du faut; d'autant que par ce moyen nous entendrons tout ce que peuvent dire & faire sur ce suiet les maistres de l'art, puis nous pourrons le sieur Ferrand & moy avec plus de satisfaction & contentement d'un chacun, discourir de cest art, science & pratique d'iceluy, vsant mesme des mots de la profession du faut, pour nous faire mieux entendre de tous generalement.

PIN. Bien que, ô sieur Cosme, j'aye dit cy-dessus qu'il faut instruire nostre fauteur de quelques autres aduis & resolutions, si ne me suis-je obligé pour cela de passer plus auant pour en discourir, comme si i'y estois tenu d'une necessaire consequence, selonc les termes de la Philosophie. Que le sieur Baptiste doncques ne laisse pas de poursuivre cette matiere, car de moy l'en ay dit ce qu'il m'en sembloit, ie ne laisseray pourtant de me ioindre avec nostre chery Archange, & le sieur Baptiste, lequel lors de ce propos ne fait qu'un peu entamer ceste matiere, qui merite bien d'estre discourüe, & traittee plus amplement.

BAPT. Vous vous excusez, S. Pin, de ce que vous deuiez volontiers entreprendre sans vous faire prier, & ce d'autant que ie vous auois esbauché la matiere pour luy donner sa forme: mais à ce que ie voy, vous voulez demeurer, comme l'on dit, en beau chemin, & puis que vous vous laissez de bien faire, ie ne vous presseray pas d'auantage, ains suis d'aduis que vous vous reposiez. Or pour satisfaire à ces messieurs, & à vous aussi qui m'honorez de ceste charge, ie commenceray par l'ordre qui doit estre estably en la conduite du faut: Car nous ne sommes pas seulement icy appelez pour sauter, mais principalement pour declarer l'ordre que l'on doit tenir pour bien sauter, afin d'instruire mieux vn chacun de tout ce qui appartient à la connoissance & parfaite intelligēce de l'art du faut. Et pource que

## LE II. DIALOGVE

le commencement de nostre intention a esté de monſtrer la forme & conſideration de chaque ſaut, & comment il ſe doit faire, ie reprendray maintenant le fil de nostre diſcours, laiſſant en arriere tout ce qui ne fait point à propos de nostre ſuiet. Ie veux doncques monſtrer premierement pourquoy nous auons pluſtoſt fait vn ſaut qu'vn autre, & pourquoy nous l'auons mis en auant: mais premier que paſſer plus outre, il faut que nous reprenions le ſaut à deux mains, auquel nostre ieune homme, comme nous auons dit, ſe fera exercé. Nous auons diſcouru cy deſſus (ſi i'ay bonne memoire) comment nostre ſauteur deuoit eſtre induſtrieuſement inſtruit à voltiger de l'eſchine, il ſera bon maintenant que nous racontions ce qu'il faut faire ſur ce ſaut pour deuenir bon ſauteur, de peur que par la faute du maiſtre qui ne le ſçauoit pas bien inſtruire, il ne demeurast imparfait, & au milieu de ſa courſe, ou qu'il ne fuſt ſur la fin auſſi peu aſſeuré de l'art du ſaut, comme il eſtoit au commencement; & lors que le ieune homme ſe fera rendu aſſez expert & aſſeuré du ſaut à deux mains, le maiſtre le fera exercer ſeulement au meſme ſaut que l'on fait à vne ſeule main en terre, puis il ſera bon qu'il s'exerce à faire l'onde du demy col, & faire ſemblablement la roue en terre, & à ſe ſçauoir bien pouſſer & eſlancer de terre en haut; Car toutes ces choſes ſont fort aiſées & fort corréſpondantes à l'aage & force de nostre ieune homme: Puis il luy faudra monſtrer le moyen & pratique de faire le ſaut de ſinge, & cōme il le pourra bien faire & iuſtement ſelon l'art, & ainſi il cōtinuera à eu faire vn, deux, trois, l'vn apres l'autre, & de main en main, ſelon la force & complexion de ſa nature: Car la pratique & aſſurance de ce ſaut de ſinge, outre ce qu'il ſert beaucoup à faciliter & diſpoſer le corps d'vn ieune enfant, pour luy fortifier ſes membres, il luy aſſure auſſi fort la teſte pour faire la volte qui eſt tant neceſſaire, & le ſaut en arriere que tous ont auourd'huy veu faire, auquel il ſe doit exercer inceſſamment & continuellement, s'eſprouuant à le faire quelquefois avec la roue, autres fois avec la courſe, & en apres s'exercera à auoir l'art de le ſçauoir eſlancer en auant, afin que par vn continuel exercice il vienne peu à peu à s'aſſurer de faire la volte en l'air ſans appuyer ſes mains en terre en aucune maniere; puis il ſera inſtruit.

par le maistre à sçauoir faire industrieusement le saut en auant à pieds impairs avec la course, afin qu'y estant ja bien instruit, & assuré, on vienne en apres à luy enseigner la pratique du saut en arriere fait dessus le tresteau, & aucune fois à vn pas sur la table: mais il ne faut pas que le maistre sauteur l'abandonne de loin, ains qu'il soit tousiours pres de luy, pour donner l'aide & le secours necessaire aux occurrences qui pourront suruenir: & quand l'on verra que le ieune homme aura acquis avec le iugement courage, force & disposition, il fera bon l'instruire à faire le saut de l'eslancement en arriere avec la rouë, ou bien avec la rouë, & saut de singe, le venant quelque fois à esleuer avec vn ou deux sauts de singe esclancez de pied ferme, & le plus souuent avec le seul poussement; & puis il faudra qu'il s'auance continuellement en l'Art, & vienne à le pratiquer, pour se sçauoir retourner, sautant premierement en ceste maniere, c'est à dire, qu'il retournera le saut en arriere avec la rouë, ou bien avec la rouë & le saut de singe, & venant au saut qu'on fait en auant, il s'assurera à le faire à pieds desioints à la course, & puis à celuy qu'on fait à pieds ioints, lors cognoissant ses forces plus disposées & fermes, il se pourra mettre à l'espreuue du saut en arriere de pied ferme, & ainsi de main en main selon la proportion des forces: mais pour continuer ce saut qu'il tienne le chemin des esclâcez, pour estre ceste façon-là tenuë la plus parfaite de toutes les autres; & estant par la continuation arriué à ce but, il se pourra auancer avec l'exercice à faire le saut en arriere retourné de pied ferme, & voyant le maistre qu'il s'en acquite bien, & avec vne certaine & prudente industrie de l'Art du saut, il luy pourra dire ainsi: Mon cher disciple, iet'ay tousiours guidé & conduit en mon Art selon la capacité de ton esprit & de tes forces, le mieux qu'il m'a esté possible iusques à l'exercice mesme des plus difficiles sauts, selon les reigles que tu en as ouyes, & apprises de l'Art. Or puis que iete vois maintenant assez fort & puissant pour pouuoir avec la pratique executer les enseignements necessaires pour la cognoissance & vraye intelligence de cest Art du saut, ie te laisseray d'oresnauant le libre gouuernement de toy-mesme, pour t'y exercer ainsi que bon te semblera, afin que tu puisses paruenir à la per-



## LE II. DIALOGVE

fection que l'on pourroit exercer d'un tel exercice. Tu ne manques ny de force, ny de iugement, ny mesme d'experience; va t'en maintenant par le monde exerçant & pratiquant les sauts qui te seront plus agreables. Pren tousiours bien garde aux preceptes que ie t'ay appris & enseigné, pour bien sçauoir avec assurance prendre le temps proportionné sur le tresteau, le trebuchet, trampellin, & ailleurs, comme à la table, & ainsi des autres; traduisant que tous les sauts qui se font sur terre, qui se font aussi sur le tresteau quelquefois, il les faut premierement auoir pratiqué avec beaucoup de iugement & d'assurance, comme nous auons dit, selon nostre premiere instruction par terre. Tu ne dois aussi laisser aucun saut en arriere, grand ou petit, fort ou foible, auquel tu ne t'exerces tous les iours, de peur d'oublier aysément, & en peu de temps, ce que tu aurois appris avec beaucoup de peine & de travail, & mesmes avec un long tēps. Tu dois aussi continuer cest exercice; afin que tu puisses acquerir, avec les reigles de l'Art que tu en as appris, la promptitude qui y est requise: mais principalement que tu t'emploies en la continuation de l'exercice des sauts qu'on fait par terre, veu que d'iceux depend la proportion & perfection de tout l'exercice du saut.

P I N. Bien que ie me sois teu iusques icy, & que ie n'aye rien repliqué à tout ce que vous auez proposé, si me semble-il que le mouuement des sauts qui s'esleuent sur le trampellin, & autres instruments, n'est si fort, ny si difficile que ceux qui se font par terre, desquels l'exercice est beaucoup plus fort & violent, comme se faisant presque contre la nature de l'homme; Tellement qu'il me semble, selon que j'ay tousiours ouy dire, que l'on doit apprendre du commencement aux disciples les choses plus aisees de l'Art, l'auançant en apres peu à peu, de main en main, és autres qui se trouuent plus difficiles. Vous au contraire auez contre les ordres de l'eschole commune des sages, commencé par les sauts plus mal-aysez, forts & difficiles qui soyent en toute la Gymnastique.

B A P T. Sçachez qu'il y a vne fort grande difference entre les exercices de tous les sauts, comme j'ay appris des maistres, & ne s'ensuit pas tousiours que ce que vous auez dit soit neces-



fairemēt obserué en tous les sauts; & vous fussie à present ceste raison, qu'ou il y a plus de difficulté, là il faut employer plus de temps, de peine & de trauail, & la pratique aussi en est beaucoup plus difficile; & pource vn sauteur qui sauterait tousiours de haut en bas, ne se trouueroit pas disposé à sauter de terre en haut en s'eslançant, dont j'ay dict à ce propos, qu'il faut vn long exercice aux sauts qui sont les plus difficiles; c'est pourquoy bien que les autres soyent plus prompts, & s'il m'est permis dire, plus dignes en apparence, & de plus grande admiration vulgaire, la pratique d'iceux en est d'autant plus requise pour l'excellence de leur exercice, au sauteur qui se les veut rendre familiers, s'il s'est bien assuré à faire premierement ceux qui s'esleuent de terre, ce qui n'aduient à ceux qui se sont exercez à des sauts contraires; de là vient que plusieurs ieunes hommes n'ont iamais peu paruenir à l'excellence de sçauoir bien promptement sauter, ayants esté nourris, & esleuez en cest Art par des sauteurs, qui n'en auoyent vne seule reigle, ny precepte digne de cognoissance; outre l'auarice, l'impatience, & autres tels vices qui avec l'ignorance les perd, faisants perdre le temps à l'enfant par le moyen des demonstrations confuses de tant de sauts qu'ils luy font apprendre sans autre distinction; & spécialement ceux qui sont les plus aysez & faciles, ne s'auisants pas qu'il seroit beaucoup meilleur de les faire exercer continuellement à faire les plus difficiles, afin que par ce moyen ils prinsfent vne habitude de se fortifier les membres de plus en plus au commencement, bien que ie ne vueille affermer que l'vsage trop continuel & particulier és sauts de terre, ne soit au long aller pour oster la perfection aux sauts faits avec plus de promptitude de vn plus haut lieu, si on ne s'y exerçoit nullement; car outre l'espouuante que le sauteur y prendroit s'y voulant employer, sur la fin il viendrait à manquer de la grace & assurance qui y est requise, dont on pourroit inferer que le disciple deuroit se seruir tant des vns que des autres, se proposant de faire le saut en arriere retourné de pied ferme avec proportion, mesure & reigle certaine.

FERR. Je ne doute point que n'ayez la doctrine correspondante à vos beaux exercices & enseignements que vous dô-

## LE II. DIALOGVE

nez, qui sont nécessaires à ceux qui font profession de sauter avec la proportion du temps, de la mesure, règle & mouuement; & de sçauoir aussi enseigner & traiter de l'art, avec tous les moyens qui se pourroyent rechercher par vn fâcheux Aristarque. Vous auez parlé de plusieurs choses belles & bones: mais vous n'auetz encore fait aucune mention de la maniere d'aider, & accroistre le corps & courage du ieune homme, qui s'exerçât peu à peu à sauter, se doit auancer par l'instruction de son maistre és sauts où il faut que la volte soit faicte & refaicte en l'air continuellement, veu qu'il est impossible que sans l'assurance & appuy de quelque ayde l'enfant s'y puisse de soy-mesme introduire, moins s'y rendre assuré aucunement.

BAPT. Quant à l'ayde dont on a accoustumé d'vser à l'apprendre, sans faire autre mention de ce que nous auonsjà suffisamment montré au tour de l'eschine, ie dy qu'en trois manieres le disciple peut estre aidé par le mesme sauteur qui luy apprend son art. La premiere & plus graue est de lier le ieune homme par la ceinture avec quelque chose forte, & cela se fait ainsi, afin qu'au lien on tienne vne main pour le soustenir, l'aidant avec la volte, tant pour le souleuement de terre, comme pour se retourner à l'aïse par apres; ce qui se doit practiquer en l'vne & l'autre volte par le maistre, c'est à sçauoir, és sauts en auant, tant de pied ferme, comme de course, & aussi de ceux qui se font en arriere de pied ferme. La secõde est moindre que la premiere, car on n'y employe qu'vne main seulement à tenir le lien, pour soustenir le corps. La troisieme & derniere est de le sçauoir aider seulement d'vne main: mais on vse de ces deux premiers aides se lon la necessité esdites deux voltes, assurant le ieune homme és sauts qu'il va commençant à faire peu à peu, afin qu'il en acquiere vne assuree & certaine pratique: mais on se sert de la troisieme en ces sauts que le ieune homme a appris pour s'y estre peu à peu assez bien assuré, comme il est requis en tels exercices à la fin des enseignements d'iceux. Et ne faut que le maistre de l'art abandonne son disciple; ains doit tousiours estre pres de luy pour le secourir en temps & lieu, s'accommodant à la capacité de l'esprit & entendement de son ieune homme, pour le rendre en fin digne & capable de la perfection

ction de tous les sauts, avec vne telle disposition qu'il se rende agreable à tous. Ie ne veux oublier à dire qu'es sauts retournez on peut donner quelque aide au premier esleuement avec vne main, & suis d'opinion que cela sert plustost d'empeschement que d'aide & secours. Or nostre sauteur doit au commencement auoir cognoissance des lieux où il se veut exercer, afin qu'il se puisse garentir de tous les accidents qui luy pourroient suruenir. Que s'il aduient qu'il encoure quelque danger, il craint vne autres fois d'y retomber. Comme il y en a plusieurs, qui pour se estre estonnez & espouuantez d'un tel accident suruenu en vn saut, ils n'y veulent puis apres iamais retourner. Il n'est pas besoing de m'estendre plus auant en discours pour aider le corps de nostre nouveau sauteur, estant chose tres-aisee & facile à faire, moyennant les aduis precedents. Et faut que celuy qui veut enseigner l'art de bien sauter à vn autre, le sçache fort bien; & pour ce faire, ne doit manquer du iugement, & experience qu'un parfait maistre doit auoir: Mais d'autant qu'il aduient souuent qu'aucuns veulent chager de propos en sautant en l'air, ils produisent en ce saut vn autre effect que celuy qu'ils auoyent entrepris & resolu de faire au premier commencement. Nostre sauteur se doit bien donner garde d'entreprendre quelque autre saut, que premierement il n'ait resolu & mis à fin celuy qu'il auoit deliberé de faire en son esprit; de sorte que par le moyen de l'idee qu'il auoit conceuë en son entendement, il puisse bien gouverner le mouuement de son corps, qui est requis à vn tel saut: Car il n'est pas possible, comme nous auons remarqué, que tout saut se face bien, sinõ qu'avec la iuste proportion des reigles & mesures qui sont conuenables & necessaires à vn chacun saut en particulier; & la principale difference qu'il y a entre eux vient de ce que les reigles de l'un ne correspondent pas à celles de l'autre, pour le commencer, continuer, & poursuivre iusques à ce qu'il soit finy; & partant se doit-il bien garder d'oultre-passer les reigles & mesures qui luy ont esté prescrites, il doit aussi mesurer ses forces & se garder de vouloir faire le vaillant, & l'experimenté en l'exercice principalémēt des sauts forts, esquels la nature nous peut plus seruir que l'art; car aucuns sont tombez en grand danger par faute d'auoir bien obserué

## LE II. DIALOGVE

toutes ces reigles, proportions, & mesures; mesmes ceux qui poussez de temerité outrecuidee, ne cognoissans bien leurs forces, ayants entrepris de faire tels sauts sans iugement, ny discretion aucune ont esté payez du loyer digne de leur presomptiō; comme il aduint n'agueres à vn qui sautoit à trois pas à la table, lequel pour n'auoir bien compassé & mesuré le lieu où il deuoit sauter, donna sur la fin des greues contre vne grosse poutre, qui estoit là de trauers. Il y en a d'autres, qui pour n'auoir obserué & mesuré la longueur de l'espace en sautant, apres plusieurs sauts de singes, se sont sur le dernier saut que l'on fait en arriere, heurtez contre la muraille; ce qui leur aduint, cōme beaucoup d'autres inconueniens du peu de iugemēt qu'ils ont, & de leur trop grande arrogance accompagnee d'une aueuglee ignorance qui les fait tomber en des precipices, d'où ils ne se peuuent releuer aisément. Et se doit mesme nostre sauteur garder le plus diligemment qu'il pourra, de glisser, ny heurter peu ou beaucoup à aucune chose haute ou basse; ce qui luy sera aisé d'observer & preuoir si auant que de commencer les sauts qu'il a entrepris & resolu de faire, il a bien pris garde & reconnu les aduenues & empeschemens des lieux, où il a deliberé de sauter, s'asseurant de la disposition & bonté de ses instruments, comme sont le tresteau, la table, le siege, & le banc, les compassant avec vne deuë proportion & distance, que ses forces pourront embrasser, prenant aussi bien garde que la force luy croisse plustost, & augmente, qu'elle diminuë & vienne à defaillir, surmontant par ce moyen le mouuement naturel, de peur qu'il ne vienne à tomber en quelque dangereux accident, comme il aduiendroit par necessité, si la vehemence & force du saut dominoit la disposition du sauteur, ce qui importe beaucoup & sert grandement pour se munir de iugement conuenable en l'exercice de tous les sauts qu'il entreprendra à faire, & se guidera à la forme d'un timon & gouuernail de nauire, pour sçauoir bien conduire son corps & le guinder en l'air, afin que toutes les mesures, reigles & proportions estant diligemment, & fidelement obseruees, il face ses sauts en toute perfection: puis il sera necessaire qu'il face la volte, pour s'y accoustumer de bonne heure: Car comme vn nauire ou galere ne pourroit estre con-

duit par le pilote ou gouverneur, sans la force & bon gouvernement du timon ou gouvernail; ainsi ne seroit-il pas possible qu'un fauteur se peust bien iustement gouverner & conduire en l'air, pour bien retourner en terre, s'il n'vse d'un bon gouvernement & iugement, avec l'usage & experience du saut qu'il voudra entreprendre de faire. Or combien que toutes ces choses soyent vraiment celles qui peuuent beaucoup aider & servir un rare & singulier fauteur, si faut-il qu'en chaque sien saut & action il face paroistre quel est son esprit & iugement, se monstrant tousiours gaillard, disposé, plaisant & agreable en tout ce qu'il fait, tant en general qu'en particulier: non comme aucuns qui sont tellement melancoliques ou pensifs, qu'ils s'espouuantent de la moindre chose qui se presente à leurs yeux, & en ce faisant, tout ce qu'ils entreprennent est sans grace & sans plaisir. Je ne veux aussi pour cela que nostre fauteur tombe en l'autre extremité de plaïsanter & bouffonner, sortant des bornes & limites de la modestie, qui doit reluire en toutes les actions d'un hōneste hōme. Or à l'esleuement du saut il ne faut pas incōtinēt mōstrer quelque nouvelle admiratiō avec les yeux, faïfāt paroistre qu'il y ayt de la force & contrainte: mais encor que ce soiēt des actes difficiles de leurs corps, si faut-il neantmoins qu'ils se fassent avec promptitude, agilité, facilité, beauté & de bonne grace, pour se rendre agreable à toute l'assistance; & ainsi tous les sauts doyuent ensuiure l'un l'autre de bien en mieux, afin aussi qu'ils en soyent d'autant plus plaisants & agreables. Or pour finir ce propos, i'adiousteray seulement que sçauoir baller disposément & de bonne grace, rend d'autant plus recommandable le fauteur, qu'il est doïé des parties propres & requises à un si bel exercice: Car auant qu'il commence à sauter il est de besoin, voire necessaire, qu'il s'exerce premierement, afin qu'il soit plus disposé pour bien faire le saut, ou le bal qu'il entreprendra, & qu'il en sorte avec plus de plaisir & contentement, & avec vne belle disposition & dextérité, il fera paroistre combien il est bon & parfait fauteur, & esleuant son saut en haut avec grace & beauté se rend à toute heure plus agreable, accompagnant la fin de chacun de ses sauts de quelque capriole, y entre-meslant quelque entrichat, & autre gentillesse, comme les fleu-

## LE II. DIALOGVE

rets & autres diuers passages, & passer temps, qui le rendent plus admirable en ses sauts, & digne de plus grande loüange. Et cela veritablement peut rendre nostre fauteur bien venu & recommandable en toutes bonnes compagnies, pour la perfection, rarité & singularité de son art. D'auantage non seulement il apporte plaisir & recreation à ceux qui le regardent, mais aussi il conserue sa santé par vn tel exercice, contentât aussi & ses yeux & son esprit, qui est la fin & le point principal, où tendent au iourd'huy toutes les actions des hommes.

FERR. Il me semble maintenant que soyez arriuez au but qu'à bon droit vous pouviez esperer, suyuant la pratique de vostre art, & me resiouis de voir que le S. Cosme se pourmene en meditant vos discours, pour entrer à l'exposition du reste de vos raisons. Il reste que M. Baptiste, & M. Pin poursuivent leur propos, touchant la disposition de leur art.

PIN. Au discours que n'agueres faisoit M. Baptiste entre les autres aduis & resolutions qu'il a donnees à nostre saut, il veut qu'avec le mouuement & action le fauteur y introduise, & entremette aussi la grace à sauter & baller, ce qui sert de grand ornement & parement pour le saut & le bal; & me semble que si vn sautoit ou balloit dispostement, & avec vne grande dextérité, & neantmoins feist quelqu'autre chose de mauuaise grace, ce seroit ne plus ne moins qu'à vn festin où il y auroit toutes sortes de bonnes & delicates viandes, où toutesfois le vin fust fort mauuais; l'on diroit que comme pour rendre le festin honorable & accompli, il n'y doit auoir que toutes choses bonnes & honnestes; aussi le saut & le bal doyuent estre accompagnez de toutes choses belles & gracieuses; Mais à ce propos de la grace, pour n'auoir iamais ouy dire quelle est la vraye definition d'icelle, ie vous prierois volontiers S. Cosme, ou bien vous Seigneur Ferrant, qu'il vous pleust nous declarer quelle est la vraye definition de la grace, afin que nous en puissions sçauoir quelque chose.

FERR. A ce que i'ay peu coniecturer par les paroles du S. Pin, desquelles peut estre, vous autres Seigneurs ne vous estes pas apperceu en son discours; il a fait comme l'escriueur, qui porte à la teste pour donner aux pieds; ainsi nostre M. Pin pour

ſçauoir que c'eſt que la grace, & que le fauteur, qui n'a bonne grace, eſt comme vn feſtin, où il n'y auroit pas de bon vin; il a voulu avec ceſte comparaifon entendre par ces paroles celui qui a la charge des bouteilles que vous voyez en ce coin, lequel attend par aduenture que finiffions noſtre diſcours pour nous faire ſoupper, qu'il ſe ſouuienne ſeulement de nous donner de bon vin, & puis nous parlerons de la bonne grace: car i'ay pris garde que parlant de bon vin, le Pin a regardé incontinent le ſommelier. Certes luy meſme a eu bonne grace de l'aduertir de cela pour complaire à toute la compagnie, & pour ſe donner du plaifir; car auſſi eſt-ce à luy de rendre noſtre ſouper gracieux: mais quoy que ce ſoit, apres que le S. Coſme aura donné fin à ce que nous attendons ouyr de luy, il prendra auſſi la peine, ſ'il luy plaift de nous ſatisfaire en ce que nous deſirons ſçauoir, ſi M. Pin a diſt cela pluſtoſt pour entendre que c'eſt que grace, que pour auoir ſignifié & donné le mot au ſommelier de faire prouiſion de bon vin.

Cos. Vous me voulez donner la charge de ce que vous ſçaez mieux quē moy: mais c'eſt voſtre couſtume de me donner touſiours la peine de commencer, & faut que ie vous obeiffe pour vous contenter. Or ie dy qu'il y a trois choſes plus importantes & principales, entre toutes celles que M. Baptiſte a fort bien diuiſees, leſquelles i'ay remarquées ſans ſortir du propos de ſauter. La premiere eſt que le fauteur ſans ſe flatter cognoiſſe ſes forces & ſa puiſſance; la ſeconde, qu'il les ſçache obſeruer & ſ'en ſeruir à propos en tout ſaut, iuſques à ce qu'il l'aye finy du tout; & en ce ſaut, comme auſſi en tous les autres, il obſeruera vn mouuement reiglé de ſon corps qui y eſt neceſſaire, ſe gardant bien de changer en l'air la premiere deliberation de ſon ſaut commencé: la troiſieſme eſt de ſçauoir cognoiſtre quelle proportion de temps eſt neceſſaire à chacun ſaut, & ne faut douter que ceſte cognoiſſance du temps eſt celle qui conduit le corps iuſtement par tout le paſſage qu'on fait depuis l'eſleuement du ſaut, qui eſt le point du premier but, iuſques à l'autre point du retour que le corps faiſt à terre, comme il aduient; car eſtant le mouuement continuel depuis le commencement du ſaut iuſques à la fin, il faut que le fauteur y ſçache ac-

## LE II. DIALOGVE

commoder la proportion du temps par tout, sans lequel il ne pourroit iamais s'acquerir ceste disposition, qui est la vraye fin & perfection d'vn chacun faut; lesquelles trois choses je dirois plustost estre les principes de nostre Art du faut, que ce que vous auez nommé cy-dessus les fondemens de l' Art, à sçauoir, l'essancement, le tour & retour à terre à la fin du faut: car encor' qu'ils semblent estre les fondemens communs de tous vos fauts, puis que necessairement ils s'y recherchent; si est-ce que tous ces trois ensemble ne font qu'vn mouuement continuel du corps sautant; outre que l'acte de l'essancement du tour, & de la fin du faut avec proportion depend de sçauoir entendre bien ou mal les reigles de l' Art, & deles obseruer avec iugement, & non simplement de l'acte corporel se mouuant en l'air; & ne faut croire que chaque faut soit composé de l'essancement de la volte, & fin d'icelle, comme il faudroit qu'il fust, si ces actes estoient ses principes, puis que necessairement toutes choses sont composées, & dependent de commencemens, autrement les principes ne se pourroyent nommer vrayement principes.

BART. I'en ay parlé selon la meilleure intelligence, connoissance & pratique que i'en ay peu auoir toute ma vie, rapportant à ce propos tout ce que M. Pin en a discouru cy dessus, & luy & moy nous estans acquittez de nostre deuoir, & satisfait à ce que l'on pouuoit esperer & desirer de nous. Je voudrois pourtant M. Pin, que nous declarassiez vn peu plus amplement ce qui appartient à nostre art, outre ce que nous auõs commencé à proposer, diuiser & discourir.

PIN. Je desirerois fort entendre dequoy est donc composé le faut, si l'essancement, la volte & leur fin ne le rendent plus accompli & parfait.

COS. Je vous y satisferay incontinent, & espere vous rendre content, si de main en main, & de point en point vous me respondes aux choses que ie vous demanderay.

PIN. Je ne faudray à vous faire response le mieux que ie pourray.

COS. Dites moy doncques si vous pensez qu'il n'aye autre forme que celle que le mouuement du corps nous fait voir en



l'air du lieu d'où il part,iusques à son contraire, où le faut s'arreste estant finy; puis. qu'entre ces deux termes, estant tousiours le mouuement continuel, il va formant en l'air la figure qui fait estre, & necessairement paroistre la forme du faut tel qu'il est.

PIN. Je ne pourrois penser, ny imaginer qu'un autre que vous nous peult faire voir & représenter la figure, maniere,ou forme du faut autre que ledit mouuement.

Cos. Il s'ensuit que la cause formelle du faut n'est autre chose que le mouuement nécessaire du corps estant finy.

PIN. Je ne puis nier qu'il ne soit ainsi.

Cos. Or puis que l'on trouue que le corps est la cause materielle du faut, il nous faut sçauoir quel est celuy qui en effect va faisant ce faut par le moyen du mouuement, & de ladicte matiere, qu'il va receuant du corps depuis le commencement iusques à la fin, que vous semble que puisse estre cela, sinon vne idee ou conception qui est imprimée en l'entendement du sauteur, pour en sçauoir bien iustement gouverner les forces qui pouslent & font passer ledit corps par l'air.

PIN. Je sçay bien qu'auant que ie face le faut, il me semble tousiours en mon esprit me voir en l'air, pensant & meditant cōme ie dois faire ce faut, tant que i'en aye le modelle, & le patron imprimé en mon entendement.

Cos. Ce que vous nommez à ce propos modelle, c'est ce qu'on peut appeller idee, laquelle comme elle est en vostre entendement pour mettre en pratique vn chacun faut; ainsi est elle par le moyen de l'ame, la cause que l'on peut dire agente, ou faisante le faut, quant au corps, laquelle les Philosophes nomment cause efficiente. Or puis que nous auons trouué la forme, la matiere, & la cause de faire le faut, maintenant autre chose ne nous peut manquer pour auoir parfaite & entiere cognoissance de sa derniere fin & intention, qui guide & gouverne en chacun faut l'entendement du sauteur; Car il me semble que ce ne soit autre chose que la seule proportion qu'il pretēd auoir avec la perfection de bien sauter, comme vous nous auez aujourd'huy fait voir.

PIN. C'est celle-là mesme qu'il vous plaist de vostre gra-

## LE II. DIALOGVE

ce, annexer & conioindre à la louïange de mes fauts; toutesfois respondant à vostre demande derniere, ie dy que sans controuerse il est certain que la derniere intention de quelque fauteur que ce soit, en tout faut, est seulement celle de finir le faut avec vne iuste proportion, & non pour autre consideration que celle-là, y employe-onle mieux que l'on peut l'ame, le corps, le temps, & la peine ensemble.

COS. On ne peut donc dire que la cause finale de quelque faut que ce soit, soit autre que la iuste proportion que l'on y peut desirer dès le commencement iusques à la fin.

PIN. Cela est plus que raisonnable, & ne croy point que Aristote mesme le niaist, se trouuant beaucoup de ceux qui fautent, & ne laissent d'esleuer, tourner & finir le faut; Mais c'est sans aucune mesure & proportion limitee.

COSME. Qu'en dites vous S. Ferrand?

FERR. Ie me trouue plus prompt à admirer ceste vostre contemplation demonstratiue si haute & si docte, que propre aucunement à vous en pouuoir dire ce qu'il m'en semble, le plaisir & contentement que i'ay de vos beaux discours; Car vous auez non seulement cherché & trouué les quatre principales causes du faut, tirees du sein de la Philosophie: mais ce qui importe le plus, vous les auez esprouuees avec vn tel ordre & maniere de recherche, que si les fauteurs la peuuent bien entendre, il est impossible que d'artisans ils ne deuiennent vrais Philosophes de leur art. En somme pour conclurre ce discours, il est tres-certain que la cause materielle du faut c'est le corps; & la cause formelle, c'est le mouuement du faut finy; & la cause efficiente est l'idée qui se trouue en l'esprit de sçauoir bien gouverner ses forces corporelles; & la cause finale est la vraye proportion que l'on pretend en ce faut, & la perfection que tout bon fauteur doit rechercher en cest exercice: il est impossible que la nature les peust mieux & plus iustement diuiser. Que si quelqu'autre en auoit voulu traiter, ie ne pense pas qu'il l'eust fait plus heureusement & plus doctement, me representant les raisons que vous auez alleguees parlant des principes humains naturellement, laissant à part les fauts des animaux irraisonnables; pensez vous que la cognoissance des trois choses que vous auez alleguees

güees cy-dessus, du temps, du mouuement & des forces, soyent les vrais principes de l'art? Or pource qu'il y en a beaucoup d'autres que l'on pourroit mettre en auant, ie vous prie que nous les expedions le plus sommairement, & briefuement que faire se pourra, de peur qu'estant trop longs nous ne soyõs ennuyeux à toute ceste noble compagnie.

COSME. Si nous voulons prendre que l'art ne soit autre chose, comme plusieurs afferment, qu'une cognoissance raisonnable & certitude des choses que nous deüons faire ou mettre en œuvre, l'on peut dire que les trois cognoissances susdites soyent le vray fondement de tous les principes, ou plustost les mesmes principes de l'art du saut. Mais si nous voulons estre de l'opinion de Galien, que l'art soit vne certaine intelligence secrette, remplie de plusieurs preceptes, qui estans recueillis & vnis tous ensemble, se reduisent & appartiennēt à vn seul principe, & à vne seule fin; & si ne peut-on vrayement dire que la cognoissance du temps, du mouuemēt & des forces, soyent les seuls & principaux principes de l'art du saut, puis qu'il ne se trouue seulement d'eux composé, mais aussi est muni de plusieurs aduis, reigles & preceptes, qui y sont tous compris avec la proportion, & perfection qui y est requise, pour l'entiere cognoissance & intelligence d'un si bel exercice.

FERR. Il me semble que pour commencer & finir le saut, qui ne peut naistre que de la cognoissance certaine des forces, il faut que le mouuement du corps y interuienne, pour le faire iuste & avec proportion: & l'on ne peut nier que ces trois choses ne soyent les vniuersels & tres-certains principes de l'art du saut; puis que toutes les reigles ou preceptes en dependent, & sont comprinses plustost en tout qu'en partie. Qu'en dites vous M. Baptiste, & vous M. Pin?

BAPT. Vn chacun de vous estant attiré de ceste si nouvelle & douce speculation de nostre art, alloit disant à son compagnon, selon son opinion, comme il luy sembloit mieux adapter les trois dites cognoissances à la maistrise de l'art artificiel du saut; & à ce propos nostre Archange me, disoit qu'à son opinion de la cognoissance du temps, naist la vraye obseruation de la proportion & de la cognoissance du mouuement, le moyen

& la forme de faire le saut, & de la cognoissance des forces la determination & assurance de le deuoir & pouuoir cōmencer & finir.

COSI. Certes ie me resiouys, seigneur Ferrād, de voir que la relation & comparaison faite de nostre Gymnastique ne soit aucunement inferieure à la vostre. Mais vous S. Baptiste comment l'alliez vous accommodant?

BAPT. Ie ne puis, si ie ne veux errer & m'esloigner du tout de la raison, auoir autre opinion que vous; Toutesfois il me semble que de l'assurance des forces le sauteur ne peut douter & faire difficulté de finir le saut, ny de l'assurance de cognoistre le mouuement du saut: il ne peut mesmes douter de le pouuoir faire, ny de l'assurance de comprendre la quantité & proportion du temps, il ne peut aduenir qu'il faille, pour ne l'auoir fait ainsi que le S. Pin a fort bien discoursu cy dessus.

PIN. Vous auiez assez de raisons, sans qu'il fust besoin de vous proposer ma lourde Philosophie, & ayant de si hautes & si belles considerations, que voulez vous que ie vous die, voulez vous qu'en vain ie perde des paroles, pour n'auoir ny la grace ny le sçauoir de si bien dire que vous: ie diray toutesfois que du mouuement, de l'agilité, & proportion naist la perfection de l'art du saut, qui se doit faire en telle forme que le temps & le lieu le requierent.

TETTI. Ie vous assure que ceste responce est braue, & digne d'un galand homme, pour estre pleine d'une infinité de belles & doctes considerations.

FERR. Certes le discours de M. Pin a esté d'un goust si sa- noueux qu'il pourroit bien seruir de fausse à un banquet: mais ne vous voulant esloigner, ny nous de nostre propos, ie dy que tout ainsi que l'art ne se peut voir ny discerner, que par le moyē de l'artifice des choses faites en iceluy, ainsi sans alterer nos deux autres definitions, l'on ne peut cognoistre la diuision & difference des arts, que par le moyen de la fin de leurs oeures, & actions: Tellement que voulant sçauoir de quelle qualité & degré est cest art du saut, il faut cōsiderer la fin susdite: Car on trouue beaucoup d'arts qui ne se iugent que par la fin de l'oeuvre, comme l'art d'Architecture & de peinture, qui ne se peuuent

entièrement voir, sinon apres la fabrique del'Architecte & dernier trait du peintre fait par le pinceau. Il y a toutes fois d'autres arts, esquels on voit ce qui se fait : mais on ne le peut voir apres qu'il est fait du tout, & entièrement accomply, comme seroit la musique des instrumens ou chansons, ou la luitte, le saut, le bal, & autres telles choses : & non pour autre raison les arts de ceste seconde operation furent appelez actifs, & ceux que nous auõs alleguez cy dessus factifs : Pour laquelle chose il me semble que encor que l'art du saut ne soit si noble que sont les autres arts, lesquels s'arrestent seulement sur la speculation, & rendent leur fin derniere digne de perfection, sans autre curiosité d'operer, & de faire aucune chose ; neantmoins selon les termes accoustumez de la vertu, on peut affermer pour certain que cest art est beaucoup plus noble que tout autre que ce soit des factifs. Il est bien vray qu'il n'appartient à vne seule science de discourir, ou traiter particulièrement des effects du saut, puis qu'il n'y a doute que le Philosophe naturel qui gouuerne la Republique, & finalement le Gymnaste, ou Gymnasiarque, selon la dignité de ces anciens gouuerneurs & maistres des exercices Gymnastiques, ne pourroyent tous quatre ensemble discourir, & en faire & prononcer vn assez different iugement & sentence chacun à part soy, pour plusieurs raisons & diuerses considerations, les quatre professions sus alleguees n'ayants vne mesme fin en leur art ; Car le Philosophe naturel considere le mouuement au saut, & non autre chose, en disputant s'il est selon la nature, ou bien violent, ou s'il est l'un & l'autre ensemble ; puis le Medecin parlera du saut, le considerant seulement comme exercice, pour voir & contempler selon ses coniectures, s'il est, ou pourroit estre necessaire ou conuenable à aucun pour restituer ou conseruer la santé humaine : Car la medecine va considerant presque tous les mouuements & agitations tant de l'esprit que du corps, sous le tiltre & forme d'exercice pour l'enseigner aux hommes à le suiure, & s'y accoustumer selon la qualité & particuliere complexion d'un chacun : Tellement que quant à ce que vous me distes hier, que ce seroit folie de penser qu'un Medecin pour guarir vn malade, luy deust ordonner qu'il allast dancer ou baller, bien que les mouuements du bal & de la dance, se

## LE II. DIALOGVE

nomment exercices, ie vous laisse à iuger, & à toute ceste noble compagnie, si ce ne seroit pas beaucoup plus grande folie sans comparaison de conseiller à vn malade qu'il allast sauter, & faire la volte en l'air. Ce que ie ne dy pas pour blasmer l'art de médecine, lequel est assez de luy recommandable, honorable, & digne de loüange, voire mesmes nécessaire, selon les diuerses choses que l'on en pourroit dire d'auantage que nous n'auons fait. Ie ne puis pourtant vous accorder que ces exercices violents soyent propres pour conseruer la santé, tant s'en faut qu'ils la peussent restituer à qui l'auroit perdue, & si vous n'alleguez d'autres raisons que celles que vous proposez à present ie ne le crois point. Or retournant à mes autres raisons que j'ay intermises par ceste petite digression, ie dy que le Philosophe politique ou moral, qui doit vertueusement gouverner la Republique, en parlera seulement pour iuger & discerner si c'est chose digne de loüange ou de blâme, vne action vicieuse ou vertueuse, nécessaire, ou non nécessaire pour la guerre, pour la paix, pour le plaisir, pour le profit, conuenable ou non, tant en general qu'en particulier, sans se soucier si c'est vn mouuement, ou que c'est que mouuement, comme le Philosophe naturel, ny s'il est violent ou non, ny si le malade guairira en sautant, ou si le sain faisant des sauts de singe pourra bien conseruer sa santé, comme pourroit faire le Medecin, & en prononcer la sentence; n'estant autre l'office & soing du politique que permettre & defendre selon la diuerse consideration de plusieurs raisons, vsage & experience des choses qui semblent bonnes ou mauuaises, pour mieux sçauoir ainsi faisant maintenir & defendre la société commune des hommes, laissant à part le iugement, & consideration des choses qui appartiennent à toutes Republiques & à la iustice; car il n'est à propos d'en parler maintenant.

**B A P R.** Or ie vous prie, S. Ferrant, faites nous tost sçauoir ce que le sauteur peut ou doit dire du saut, puis que de si grands docteurs selon vos raisons n'en peuuent pas presque discourir & parler, ny mesme les Iurisconsultes nous iuger & faire nostre procès, & en donner sentence diffinitive. Car quant à moy, il me semble qu'il faudra quoy que ce soit que ces grands profes-

seurs viennent aux maistres de l'art, s'ils ne se veulent d'auenture contenter du sçauoir naturel de sauter sans art, comme sont les animaux.

PIN. Ouy bien en despit de Galien, lequel, comme nous auons dit cy dessus, s'estant gasté vne espaule à la Palestre, ie ne pourrois inferer que cela luy fust aduenü d'ailleurs, sinon que se confiant en ses sciences & arguments, il pensoit sçauoir bien sauter & lüister contre ceux qui le feirent trembler en l'art depuis la teste iusques aux pieds, avec l'estonnement des os de son espaule dont il se plaint.

FERR. Certes ce grand docteur en Medecine ne voulut dire pour son honneur tout l'affront qu'il auoit reçu à la Palestre en sautant, & lüistant avec les Palestrites, pour ne sçauoir leur Art: car il est à presumer qu'il en reçeut bien d'autres dont il ne se vante pas; tellement que l'on peut voir icy que la theorie & la pratique sont bien differentes l'une de l'autre. Certes, M. Pin, vous sçaez gentiment par vne docte responce, comme on dict à l'Italienne, vous esbattre; ce que laissant à part avec toutes les rusees correspondantes à la demande de M. Baptiste, ie me serois desjà acquitté de la promesse que ie vous ay faicte cy dessus, & dont i'auoy commencé à discourir. Parquoy retournant à mon propos, il vous faut sçauoir que les professeurs de l'Art du saut, qui anciennement en enseignoyent l'exercice par reigles és lieux destinez par le Gymnaste, comme à la Palestre, & autres lieux & places pour plusieurs autres exercices, lors qu'ils venoyent à parler du saut, ils n'en pouoyent iuger, ny dire autre chose que ce qui appartenoit aux reigles, aux preceptes & autres considerations necessaires pour bien sauter: Et en ces reigles, mesures & proportions avec le mouuement du corps consiste tout l'Art du saut. Ce qu'il faut diligemment obseruer, de peur que nous ne tombions au mesme danger que nous auons veu aujourd'huy avec vn assez notable exemple. Ce que nous eüterons, si nous considerons attentiuement les raisons, & l'experience ensemble par le moyen de la disposition & bon iugement de M. Pin, & le S. Baptiste son compaignon.

COS. On ne peut nier que vous n'ayez bonne raison de

## L E II. D I A L O G V E

vouloir accourir le discours de tant de cōsiderations de l'Art du saut que nous auons alleguees; d'autant qu'il me semble que nous en auons tantost fait assez ample mention, & à ce propos vous vous estes fort bien souuenu de l'ordonance des Medecins que j'alleguay hier sans y penser, & l'avez ramentuë en continuant le discours de ces exercices, pour lesquels traicter ainsi qu'il faut, vn iour tout entier ne suffiroit encores. Combien pensez vous qu'il y ayt eu de Philosophes & Medecins qui en ont escrit, & toutesfois ils se iugent plustost par la pratique & experience, que par la theorique. Nō pas qu'il n'appartienne bien aux Philosophes, & Medecins de parler des exercices qui appartiennent à la santé de l'homme, & qui concernent la conseruation d'icelle; & mesmes ceste cognoissance est vtile & necessaire à toutes sortes de personnes, de quelque sexe, aage, qualité & condition qu'elles soyent, puis qu'ils regardent directement ou la santé, ou la maladie, pour en bien vser, ou abuser. Voylà pourquoy les exercices estants si necessairés pour la conseruation de la santé, vous n'avez point eu de iuste subiet de calomnier le bal & la dance, comme vous avez fait cy-dessus, estant vn exercice louable & honneste, & digne de toute bonne compagnie. Et aussi vous ayant proposé mes raisons vous les avez en fin admises, & n'y avez pas d'auantage insisté. Qui fait que ie n'en diray autre chose pour ceste heure, en ayant, ce me semble, assez discouru en son lieu. Or n'estoit que le soupper appelle ces Messieurs, reprenant le fil de mon propos, j'eusse continué à traicter ce que nous auons commencé de la pratique, de la science, & de telles autres choses appartenantes à l'Art du saut, avec la responce que ie desire faire à vos dernieres raisons alleguees sur ce suiet. Allez vous donc mettre sur vos gardes & defences.

**T E T T I.** Vous voulez faire croire que vous soyez quelque grand escrimeur, & déterminé soldat, ou quelque vaillant champion pour nous liurer vn si dur combat: mais à bien assailly bien defendu. Toute ceste noble compagnie & moy employerons plustost toute la nuit, que nous ne contentions entièrement nos esprits de ces belles armes dont vous faites tant de monstre. Et ne desirons pas seulement que vous discouriez



de ces exercices en general , mais aussi en particulier , puis que vous nous auez fait entendre que la cognoissance d'iceux est de si grande consequence , qu'elle concerne toute la santé , & bonne disposition des hommes. Vous sçavez qu'il ne seroit ny seant ny honneste d'auoir commencé à parler de quelque belle matiere , si on ne vient à la finir. Voylà pourquoy ie vous prie de conclure le plus brieffuement que vous pourrez toutes les raisons cy-dessus alleguees. Mais ie voy icy vn seruiteur de la maison de Monseigneur de Fontaines qui a tiré à part M. Pin, lequel selon mon iugement , nous fait signe qu'il faut aller soupper, pour demener les mains, comme nous auons fait auourd'huy la bouche en nos discours. Qu'en dites vous M. Pin, n'est-il pas ainsi que ie le dis?

PIN. Messieurs, ce seruiteur m'a prié de vous dire au nom de son maistre , que vous ayez , s'il vous plaist , patience pour demie heure seulement, pour aller soupper , estant suruenu vn empeschement de plusieurs Seigneurs estrangers qui ne font que d'arriuer, pour faire la reuerence à sa Maiesté, où il faut que ie sois employé pour les accommoder de tout ce qui leur sera necessaire. Partant, S. Cosme, ne laissez de continuer, (pourueu que vous ne soyez pas trop long) à discourir que c'est que la grace, & en quoy cōsiste sa definition, selon ce que nous auons proposé cy-dessus.

COS. Ie vous veux obeyr en tout ce que vous desirerez de moy, & croyez que l'on ne sera plustost prest de m'ouyr , que moy prompt & appareillé pour m'acquitter de ce qui appartient à la matiere que vous desirez sçauoir. Et pour ne vous tenir long temps, ie dis qu'encores que la grace soit de tous desirée, & recherchée : il y en a toutesfois bien peu qui se puissent vanter de sçauoir que c'est: car aucuns ont creu que c'estoit vne espece de beauté , qui a fait que les Poëtes seignent qu'il y auoit trois sortes de graces qui estoient seruantes de Venus , & afferment qu'elles se lauent en la fontaine, *Occidation*, qui est en Archomede, ville de la Boëtie, & cheminent nuës, deux d'icelles tiennent leurs faces tournees vers nous , & la troisieme le dos; qui ne vouloit inferer autre chose , que se seruant des graces à vne bonne fin, à bon droit les dit-on filles de Iuppiter; &

## LE II. DIALOGVE

d'autant qu'elles seruent à Venus, c'est pour vouloir conclure que la grace est la cause de la conionction qui est attribuee à Venus. Car nous voyons ordinairement que par le moyen de la bonne grace on gaigne l'amitié d'un chacun; c'est pourquoy Pafitea qui est la premiere des graces, s'interprete attrayante; car en quelque chose que nous nous employons, nous sommes conduits par le desir qui naist en nous de quelque chose. La seconde nommee Egiale, s'interprete delectante, si ce que nous auons desiré ne nous delectoit, en peu de temps l'amitié se romproit. La troisieme se nomme Eufrosyne qui veut dire autant que retenant, afin qu'on cognoisse qu'en vain nous serions guidez à la delectation de quelque chose, & conduits vainement à cela nous delecterions nous, si un chacun n'entendoit par son travail ce qui l'auroit induit & poussé à ce plaisir: Mais quant à ce qu'on dit qu'elles se baignent en l'Occidation, qui en Grec signifie pensee; Cela veut inferer que pendant que nous desirons & nous delectons de quelque chose, nous sommes agitez de diuerses pensees. Et ce qu'elles vont nuës est pour donner à entendre que pendant que nous desirons gaigner l'amitié de quelqu'un, il ne faut point qu'il y ayt de dissimulation. Les Poëtes ont feint tout cela de la grace; & neantmoins ie ne suis point satisfait en ce que ie desirois sçauoir de ceste grace ou vertu, qui communément plaist & est agreable à un chacun. Et ce que Ciceron escrit de la nature des Dieux d'icelle, ne me contente nō plus, & ne me fait cognoistre comment il se peut faire que la Grace soit née d'Erebe & de la Nuit. D'auantage ceux qui ont creu que la grace fust vne espece de beauté, confondent en fin l'une avec l'autre, & la reputent generale & particuliere: Mais il y en a d'autres, qui non seulement ne sont pas de ceste opinion, mais separent du tout la grace de la beauté; & amenēt pour raison, qu'encor qu'il n'y ayt beauté apparente en quelque sujet, si ne laisse-elle d'engendrer souuent le mesme desir & amour que les choses belles ont accoustumé de faire: Car il y en a qui ont ie ne sçay quoy d'aimable, encore qu'ils ne soyent si beaux, ny autrement de bonne grace, toutesfois si n'ont-ils pas vne façon du tout si desagreceable, qu'ils n'ayent quelque attrait qui les rend aimables. Il est vray que le plus souuent l'amour qui est attribué

grace deust estre referé à vne autre chose, comme disent les Philosophes & Physiciens à vne conformité & ressemblance d'humeurs, & d'autres encores plus subtils à vne influence celeste. Mais sans parler de cest Amour, que les sages nomment passion; quelques-vns referent à la grace, ce que l'on doit attribuer à quelque cause occulte & cachée. Et d'ailleurs l'on voit bien souvent que la beauté sans bonne grace n'est point agreable. Comme les femmes, encore qu'elles soyent belles, si la bonne grace n'accompagne ceste beauté, elles n'en sont point si aimables. Qui voudra donc auoir vne excellente & parfaicte beauté, il faut qu'elle soit enrichie de toutes les graces; car ce qui est sans grace est sans amour. Or de dire que la grace soit vne partie de la beauté, il s'ensuiuroit qu'il n'y auroit que les beaux qui seroiēt de bonne grace, ce que l'on voit tout au contraire: car l'on en void qui ne sont pas beaux, mais de bonne grace, lesquels sont plus aimables que s'ils estoient beaux & de mauuaise grace: & faut conclurre avec le Poëte que la grace est vne vertu attrayante qui force à aimer ceux esquels elle est, & qui en demanderoit la raison, l'on ne pourroit dire autre chose, sinō qu'il y a vn certain instinct qui nous force d'aymer. Et d'autāt qu'il y a plusieurs suiets où la grace reside, il s'ensuiuroit qu'il y auroit autant de graces que de personnes aymeës. Et l'on en void encores qui sont aymez des vns que d'autres hayssent; ce que l'on doit imputer à l'ignorance; plustost qu'à vne cognoissance de la vertu. Et ne plus ne moins qu'en la peinture les pourtraits, quelques bien tirés qu'ils soyent, ne sont pas si beaux si les couleurs n'y sont appliquees; ainsi est il de la beauté du corps, laquelle si elle n'est accompagnée de la bonne grace, est fade, & mal agreable. Mais ce seroit interpreter trop estroittement l'essence de la grace, de la vouloir restraindre à la beauté des couleurs & superficie des lignes de la peinture; c'est pourquoy il me semble que il n'est pas mal seant d'auoir plustost esgard aux causes de l'affection, soyent generales ou particulieres, considéré que la beauté en toutes ses parties n'est la seule & principale cause de l'amitié. Il ne sera donc pas mal seant de dire que la grace est vne perfection de sçauoir faire toutes choses avec plaisir & contentement d'vn chacun; comme en particulier à celuy qui aime la

musique, vn bon chantré; à celuy qui aime la peinture, vn bon peintre; & en general ce qui est bien fait à l'humeur d'vn chacun & conioint à l'amour de son naturel. Or ceux qui iugent de la beauté sans la considerer en toutes ses parties, monstrent qu'ils sont ignorants, & sont comme les aueugles des couleurs; d'autant que ce n'est pas proprement la beauté qui rend la personne aimable; mais les actes vertueux qui donnent lustre & splendeur à la beauté. Vous ne verrez iamais vne Dame, quelque belle qu'elle soit, qui n'encherisse ceste beauté de quelques attraits de bonne grace, afin qu'elle paroisse tousiours plus belle; elle y adioustera mesme tous les artifices d'où elle se pourra aduifer pour se rendre plus agreable. Le beau discours la rend aussi plus recommandable; bref vne infinité d'autres gentilleses font qu'elle est bien venue en toutes sortes de bonnes compagnies; & ces belles parties là luy seruent comme d'vn voile pour couvrir les imperfections qu'elle pourroit auoir. Or la grace est naturelle en quelques vns, en d'autres elle s'acquiert par art & exercice, & en frequentant les bonnes compagnies, où il se trouue vne infinité de personnes de fort bonne grace, qui fait que l'on tache de se conformer & composer à leur façon. Il y en a encores d'autres qui sont si gentils en toutes leurs actions, que mesmes ils sont estimez de bonne grace, en representant la mauuaise grace d'autrui. Ce qui n'aduierendroit si la grace estoit quelque chose particuliere, & non ce qui c'est dit; Car il n'est possible d'accorder deux contraires en vn mesme suiet, comme seroit si la mauuaise grace & la grace estoient ensemble. Il n'y a nul de vous qui n'aye veu faire le Zani, le Franquatrippe, le Badin, & autres personages mal-gracieux en la Comedie, qui n'ayent aussi incontinent consideré que ceux qui ont honte de telles folies ne peuent représenter ces personages avec telle grace qu'il seroit à desirer, & pensans faire des sages ils gastent tout, & recherchant quelque grace artificiellement, ils la perdent entierement. Car c'est autre chose de représenter vn homme graue & sage, & autre de contrefaire le plaisant & le bouffon. Et d'autre part celuy plaist fort naturellement qui imite bien le personnage qu'il veut représenter; & neantmoins sçachez que les actions naturelles de tels hommes en la Comedie sont desplai-

santes & mal-gracieuses du tout. La grace doncques qu'à celuy qui represente quelqu'un en la Comedie, n'est autre chose que sçavoir bien faire le mal-gracieux; de sorte que nous concluons, que la grace n'est autre chose qu'une perfection de bien operer, & comme a desjà dit M. Baptiste, nostre sauteur se doit efforcer de représenter toutes choses gracieusement & pour le pouvoir faire, il faut qu'il l'ait parfaitement appris.

FERR. Leuons nous & prenons l'air par le jardin, iusqu'à tant que le soupper soit sur la table.

*Fin du second Dialogue.*



## LE TROISIEME

## DIALOGVE.



**E**N EFFECT l'on void qu'en quelque lieu que se trouuent les personnes honnestes & vertueuses elles sont incontinent honorees & admirees d'un chacun. Ce que nous pouons dire vrayement du sieur Baptiste, & M. Pin, comme aussi des S. Ferrād, & Cosme, lesquels ont parlé & discouru de ces exercices si doctement, que leur vertu a merité le prix de toutes sortes de loüanges; & chacun a apporté tant de raisons pour la preuue de son dire, qu'il est impossible de mieux. Or entre les autres vertus que l'on admire en ces messieurs, l'on exaltoit principalement la grande disposition, force & agilité du S. Pin, chacun l'estimant le plus disposé, & le plus fort qui fust entre tous les fauteurs. Bref l'on ne laissa rien en arriere de ce que l'on pensoit appartenir à la perfection du saut. Vne infinité de ces Seigneurs furent ravis d'admiration, quand ils virent un corps humain en l'air avec une si grande disposition qu'il sembloit qu'il eust des aïles pour voler. Ils s'estonnoient aussi de voir que sur un seul suiet du saut, il s'estoit présenté occasion de discourir de tant de choses & différentes l'une de l'autre, & auoit-on rapporté tant de belles & notables considerations, avec un plaisir singulier de tous ceux qui estoient trouuez en tels discours, qu'il est impossible de plus. C'est pourquoy apres qu'on eut souppé, chacun voulut enten-

dre comme auparauant, la continuation du discours des choses qui appartenoyent aux exercices de l'art du saut, comme ils pourront entendre plus amplement en ce troisieme dialogue, lequel suyuant les beaux discours qui y sont contenus, a esté le plus estimé & loué d'un chacun, tant pour estre le plus nécessaire à la vie & conseruation de la santé des hommes, cōme pour ce qu'on y traite plusieurs choses appartenantes tant à la Philosophie qu'à la Medecine: mais sur toute autre chose d'importance, la cognoissance & vsage des exercices, qui est si nécessaire à toutes sortes de personnes saines ou malades, sera sans doute d'autant plus agreable à toute ceste noble assistance, qu'elle appartient à tous en general, & à chacun en particulier, dont les plus grands, mesmes les Princes & les Roys deuoyēt estre plus studieux & amateurs soit en paix, soit en guerre, que tous les autres hommes. Et encores que l'on en ayt discouru fort ample- ment au Dialogue precedent, Neantmoins pource que la plus part de ces messieurs desirer encores d'ouyr quelques particularitez sur ce suiet, pour les contenter nous dirons tout ce que nous pensons faire à ce propos. Et pource qu'en souppant ils discouroyent particulierement de la nature, & du mouuemēt dont procede tout cest exercice & disposition de l'homme, traittant mesme de la vertu & valeur de nos ancestres, lesquels pour n'auoir esté si addonnez que ceux d'auourd'huy aux plumes paresseuses, ont laissé à leurs successeurs plustost vn exemple comme ils se deuoient gouverner, qu'une memoire bien reiglee de leurs institutions: & doit-on plustost imputer ces fautes au siecle corrompu des hommes, que de la reietter sur les plus fameux & sages Philosophes, Historiens & gouuerneurs de leurs Republicques. Or pendant que chacun en disoit sa ratielle, avec ioye & plaisir, le S. Tetti s'estant retourné vers moy au milieu du soupper, me dist, sçachez qu'il desplaist fort à toute ceste honorable compagnie, que vous ne vous soyiez trouué du commencement avec M. Pin, & M. Baptiste, pour prendre la charge à nostre priere de discourir des choses appartenantes à cest exercice de l'art du saut; Car elle estime que vous nous auriez peu faire entendre plusieurs autres raisons, par le moyen desquelles, ioinctes avec celles que nous auons ouyes pour l'in-

## LE III. DIALOGVE

struction du fauteur, nous aurions plus claire intelligence de la perfection du faut illustré & amplifié selon les merites d'une belle disposition, promptitude & agilité. C'est pourquoy aucuns de ces Seigneurs voudroyent mesmes entendre d'où peut venir la certitude & assurance de tant de fauts que fait vn bon fauteur<sup>1</sup>, mesmes de ceux qui se pourroyent nommer presque mortels, pour estre tres-dangereux. Car bien qu'il semble que de la continuelle pratique, ou bien ordinaire exercice, on en acquiere la promptitude qui y est requise, Neantmoins nous desirons ouyr de vous, qui vous estes estudié de tout vostre pouuoir d'amplifier la derniere definition de nostre art, quelle doit estre la disposition & assurance de tout bon fauteur, & enquoy il doit exceller principalement pour l'execution de chacū faut. Le dy qu'il en faut parler avec la distinction que l'on faisoit aux discours auant soupper, puis que l'on y peut recognoistre l'assurance qui est requise en cest exercice, comme procedee seulement de la longue pratique du faut, & de la cognoissance de l'art bien entendu; pource que la premiere qui naist dudit exercice ne se peut de vray nommer assurance entiere, & s'il m'est permis le dire, assuree; d'autant que le fauteur manquant de la cognoissance de l'art, ne peut qu'estre suiet à toute sorte d'accident, ne sçachant vsr d'aucune proportion, reigle & mesure, pour acquierir quelque perfection en l'art; ce qui n'aduiet, ny ne procede de l'assurance qui naist non seulement de la pratique, mais aussi de l'intelligēce des reigles de l'art; Car estāt le fauteur fortifié de ces deux choses, va esquivant, cuitant en partie, & dominant tous ces accidents qui le peuuent faire faillir, seulement pour auoir tousiours iustement fait avec reigle, & art le faut en son entendement auant que le corps contre la nature de pesanteur se remuē, obseruant au plus secret lieu de son ame, tous les moyens de pouuoir bien par reigles necessaires gouverner la materielle pesanteur de sondit corps, avec aussi toutes les circonstances qui sont requises à le faire bien sauter assurēmēt mesmes les moindres qu'il doit avec toute consideration & art premediter. Il n'y a nulle doute, respond le S. Ferrand, que celuy seul est vray Architecte, lequel auant que se disposer à fabriquer vn palais materiel, l'a fait en son entendement du tout im-



materiel; c'est pourquoy Aristote dit en plusieurs lieux, que de la maison qui n'est materielle, se fait la materielle, autrement l'Architecte tomberoit avec la maison faicte la part où la fortune le conduiroit, sans aucun aduis ou prouidence de son art. Or afin que nous ne sortions hors de propos du saut, on peut à bon droit dire avec le S. Archange, que du saut non encores fait, mais bien conçu & engendré avec proportion & art en l'entendement, il est nécessaire qu'on face le saut du corps, qui se doit monstrier en l'air en toute assurance; & à cela se cognoist le bon & parfait sauteur; & pour deuenir tel, il ne faut oublier & obmettre toutes les choses que nous auons aujourdhuy ouyes & entenduës discourir sur ce suiet: Mais d'autant qu'il me souuiuent d'une certaine considération de laquelle nous auons discouru cy deuant parlant des principes ou causes principales du saut, ie vous enveux dire quatre mots presentemēt, en la presence du S. Cosme, pour sçauoir ce qui luy en semble. De moy ie seroy d'aduis avec l'opinion des Philosophes, ou plustost comme la nature nous enseigne que les principes se pouuants diuiser des choses, ou considerer comme internes ou externes de celles qui sont pour vne plus grande preuue du saut, on luy pourroit faire entēdre d'une certaine façon, afin qu'il en deuint plus resolu & assuré, luy enseignant quels sont les principes internes & externes de toute sorte de saut que ce soit qu'il puisse faire; dont s'ensuit que pour estre les principes internes des choses premieres, & plus nécessaires qui se trouuent, les forces & proportions sont aussi les causes principales du saut, qui y sont nécessairement requises, encores que quand l'on commence & finit le saut selon l'art, apres que l'on a recherché les causes & principes de toute chose, l'on y adiouste les principales parties, qui sont la disposition, proportion & mesure que l'on y doit obseruer pour la perfection du saut; ainsi aussi pourroit-on dire du saut, que les causes ou principes externes sont le mouuement du corps ensemble avec le temps que produit la proportion; car ces deux choses ne se voyent point apres que le saut est finy, encores que de nécessité il fallust qu'elles s'y trouuassent: Mais on me pourroit dire qu'en telle distinction de principes ie n'ay pas obserué l'ordre demonstratif que le sieur Cos-

## LE II. DIALOGVE.

me comme vn vray Peripateticien nous a aujourd'huy enseigné quand nous recherchions la vraye & determinee nature du saut. A cela ie respons, que la disposition naturelle, la promptitude & agilité, avec la proportion, reigles & mesures sont les vrais principes internes & causes principales du saut; & quiconque est doüé de ces parties là, se peut dire auoir acquis la perfection de l'art du saut. Au contraire celuy qui manque de l'une de ces parties, ne peut pas atteindre au sommet de la perfectiõ, ains le plus souuent demeure court au milieu de sa course, & perd avec le temps le fruit & la peine ensemble. Parquoy il fera meilleur ce me semble, suiuant l'occasion de la pratique que le S. Archange a alleguee, que i'expedie en peu de paroles tout ce qu'on peut dire aujourd'huy de la science & de la pratique ensemble. Or il faut noter que ce mot de pratique vient du mot Latin *Praxis*, qui signifie proprement l'action, l'operation ou pour mieux dire faction ou negoce de quelque chose telle qu'elle soit. Partant en voulant parler ainsi qu'il faut avec ceste significatiue propriete, laissant à part ceste commune interpretation, qui nous fait seulement sçauoir que c'est vn vsage, & coustume operatiue, ou bien actiue des choses qu'on peut monstrier ou en acte ou en fait.

Ie dy que la pratique est necessairement entendüe de deux sortes, c'est pourquoy la pratique, comme pratique se doit distinguer en pratique parfaite & pratique imparfaicte, la parfaite n'est autre chose qu'une promptitude que l'on acquiert moyennant la multitude de plusieurs actes & operatiõs de pouuoir faire ou monstrier quelque chose en acte: & l'imparfaicte est celle qui des Philosophes est recogneuë pour vne prompte & certaine cognoissance de la chose que nous auons conceüe en nostre ame, appartenant tant à l'esprit qu'au corps, reputeë & entendüe avec la proportion de l'vsage, qui en effect est reduict en acte, qu'il a par plusieurs fois confirmé en nous, & asseuré amplement, laquelle pratique estant entendüe de ceste sorte, engendre la derniere perfection en l'homme, qu'on peut naturellement desirer en ceste vie. Voilà la seconde vraye pratique de l'assurance que dernièrement vous nous monstres avec le S. Archange, selon les paroles, & intelligence de sa conception

ception fort differente de toutes ces choses, laquelle on trouue estre la vraye & parfaicte science, puis que sa fin ne consiste que au seul contentement & felicité de sçauoir. Or ce sçauoir ne produit en nous autre chose que la certitude de cognoistre & entendre ce que nous desirons, & le sçachant le mettre en pratique, autrement on le deuroit plustost appeller sciēce, qu'art; d'autant que la nature de la science ou art ne depend pas de l'intention de celuy qui l'a voulu apprendre; mais bien seulement de la fin derniere, à laquelle se rapportent toutes les choses qui y sont comprinses: c'est pourquoy si celuy qui entend la medecine ne la veut mettre en pratique, encore qu'il entende bien la science, ne sera dit pourtant estre Medecin, ains seulement auoir estudié en medecine; car la pratique est la fin derniere de la medecine, sans laquelle pratique & experience le Medecin ne peut bien restituer la santé aux hommes. Or i'aduouē que ie ne deusse pas auoir tant discours de ces choses, cela appartenāt plustost au S. Ferrand, lequel, à voir sa contenance, me semble ne desirer autre chose. Lors vn chacun admirant la grande prudence & doctrine du S. Roger, incontinent le Seigneur Ferrand prenant le propos, dist, Je ne m'estonne pas si vous voulez que l'on vous prie de discourir des choses que vous sçaez importer grandement, puis que vous recognoissez que vous estes celuy qui en peut parler en meilleurs termes, & plus pertinemēt que nul autre: Mais encore qu'il fust ainsi, si est-ce que pour cela vous n'en estes pas plus agreable; d'autant que ce qui s'obtient avec tant de prieres s'achette assez chierement. Et puis il me semble, que comme la chandelle n'est pas allumee pour estre mise sous vn boisseau, ains dans le chandelier, pour esclairer toute la compagnie; ainsi l'homme sçauant doit departir son sçauoir à ceux qui en ont moins que luy, & qui desirent apprendre; & le plus sçauant mesme en enseignant apprend tousiours quelque chose. Or n'est-il pas possible que nous puissions estre dit sçauans, si l'on ne sçait que nous soyons tels, & pour le sçauoir il le faut auoir monstré & fait apparoirre; & me plaist fort que ne faites autre difference du sçauoir, de l'art, & de la science, qui est celle qui seulement depend de la derniere fin & intention de sçauoir, n'y ayant doute que l'vne aussi bien que

### LE III. DIALOGVE

l'autre n'ayt ses reigles, ses raisons, principes & preceptes foubz vne mesme certitude & forme inuentee & disposee aux actiōs de la vertu & actes de l'entendement humain. Et qui ne sçait que sçauoir l'art entre les vrais Philosophes se pourroit nommer science, si la fin de ce sçauoir ne s'y rapportoit & n'eust esté inuenté pour demonstrier quelque chose faicte en acte, ou en autre œuvre; ce qui ne peut aduenir en la science comme vraye science, puis que la derniere intention & fin de son sçauoir ne peut en nous engendrer autre chose que le seul plaisir & contentement d'entendre que nous sçauons. Ce que nous pouuōs dire que nous possedons, quand nous sommes assurez qu'il ne se pourroit autrement demonstrier ny estre pour le bien entendre, que moyennant la cognoissance de tous les principes, raisons, reigles & preceptes, suyuant la demonstration des choses qui y sont necessaires: Et me semble que cela seroit bien en ceste maniere. Or faut-il noter, afin que nous puissions incontinent discourir des exercices, que la Dialectique n'est du nombre de ces arts, lesquels distinguant cy-deuant selon la fin de leurs œuvres, nous auons nommez actifs & passifs, puis que la Dialectique ne prescrit rien touchant les actes materiels, comme la peinture, la sculpture, lesquelles avec plusieurs autres sont factiues, comme l'art du faut, du chant, de la luitte & autres que nous auons nommees actiues; d'autant que le seul artifice de la Dialectique est la seule fabrique ou composition des syllogismes, ou bien formes d'argumenter, avec autres choses necessaires à l'inuention, à la preuue, & autres tels enseignements de pouuoir sans erreur tant enseigner qu'apprendre la verité des choses diuines & humaines telles qu'elles sont, ce qui n'est autrement œuvre materielle, mais bien sans matiere, puis que la fabrique de toute la Dialectique n'appartient en aucune chose à la matiere, & encore moins tous les artifices, n'estans lesdicts artifices autres que certains instruments immateriaux de la puissance raisonnable de nostre ame, dont la derniere fin & vni-que repos en toutes choses n'est que la seule cognoissance de la verité, parlant tousiours de ce qu'elle entend appartenir au desir naturel de sçauoir. Or la Rhetorique est aussi vn art, mais non pas actif, ny factif, ains qui consiste seulement en raisons & ar-

guments pour monſtrer & prouuer ſes intentions, comme la Dialeſtique, dont auſſi les inſtruments ſont dits raiſonnables; d'autant que tout ce que la Rhetorique fabrique eſt pour raiſonner & rechercher la verité de ſes arguments & pretenſions, qu'elle ſe propoſe trouuer par le moyen de la cognoiſſance de ſes ſecrets, & l'ayant trouuee, la raiſon la pouſſe à faire vne exacte recherche des cauſes de toutes choſes, pour en ſçauoir diſcourir; & apres ceſte cognoiſſance des cauſes, nous venons aux effets, qui eſt la theorique & la pratique enſemble, qui nous fait finalement acquerir par vne certaine force & vertu, l'entiere & parfaite cognoiſſance de toutes les choſes du monde, & non ſeulement pour les ſçauoir, mais auſſi pour les mettre en pratique. Et c'eſt là où giſt la perfection de l'art. Et eſt choſe certaine que l'on ne pourroit bien guider ceſte force & vertu de l'ame, ny autres, à l'inueſtigation & recherche de la verité, ſi premier elle n'eſt inſtruite en ceſt art, qui ſert à la raiſon, laquelle non ſeulement giſt en la contéplation, mais auſſi en l'action, qui eſt de fabriquer les moyens qui la peuuent aſſeur de paruenir non ſeulement des effets à la cognoiſſance de leurs cauſes, mais auſſi de la ſpeculation & indagation des cauſes à l'inueſtigation des choſes, deſquelles elles peuuent eſtre, & non d'autres, les vrayes cauſes. Et pource les meilleurs Philoſophes n'ont pour autre raiſon dict que la Dialeſtique & Rhethorique forge l'inſtrument de la raiſon; Parquoy puis que la fin des inſtruments eſt l'œuure, & que la Dialeſtique & Rhethorique giſent ſeulement en la contemplation & non en l'actiō, il s'enſuit que l'on les doit nommer art & non ſcience. Et voilà la difference qu'il y a en l'art & la ſcience; l'art giſt en theorique, & la ſcience en pratique. Or d'autant que leurs artiſces ne ſont de choſe materielle, mais vuide de toute matiere, ſeruaſts ſeulement à la raiſon, les plus ſubtils Philoſophes ne les ont auſſi nommees actiues, ny factiues, mais raiſonnables, puis qu'e leur œuure ne ſe peut monſtrer en acte, ny en faiſt autre que pour le ſeruice de la raiſon. Et ne faut que ie m'arreſte d'auantage à dire la faute que commettent pluſieurs aux curieuſes recherches & obſeruations de la Grammaire, de la Rhetorique & Logique, y employans la pluſpart de leur temps, & ſe rompent la teſte aux

disputes de la Logique & Dialectique, les voulans distinguer à leur façon en mille manieres:ny mesmes comme aucuns font, lesquels compilent,& font vn grand amas d'arguments sans iamais en resoudre, ny finir vn seul, estans tous confus en leurs disputes,& le procès qui est entre-eux demeure immortel. Il nous suffit de sçauoir seulement que les arts & sciences doyuent auoir vne fin certaine, qui est l'action, autrement les arts & sciences sont vaines & mortes, ne produisans point de fruit. Or l'oeuvre qu'elles peuuent produire est ou materielle, ou immaterielle,& les arts dont la fin est de produire quelque oeuvre immaterielle, se nomment raisonnables, comme sont la Grammaire, la Rhethorique,& la Dialectique,& ceux qui produisent l'oeuvre materielle sont diuisez en actiue & factiue, suyuant la distinction que nous auons alleguee cy-dessus. Parquoy ie ne veux ayant ainsi conclu finir mes raisons sans vous aduertir que il me semble vous auoir ouy dire en la distinction que vous auez faicte de la pratique & definition d'icelle, que ceste pratique a esté premierement conceuë en nostre entendement, puis apres vient à produire ses effects:& cela importe la nature & l'habitude de nostre esprit, qui est certe pratique dont parloit n'agueres le sieur Tetti, selon la demande qu'il faisoit à nostre trescher Archange. Vous m'avez, respondit incontinent le non moins docte que prudent S. Cosme, faict vn singulier plaisir, d'auoir si briëuement & avec telle assurance & verité discouru des choses qui appartiennent à la distinction des arts & sciences, ensemble leur signification. Voilà ce que i'ay peu recueillir des sentences & plus graues propos des Philosophes, & entre autres de Platon & d'Aristote grand rechercheur de la nature,& ne me suis amusé à esplucher & examiner les raisons d'vne infinité de petits docteurs, qui veulent neantmoins paroistre plus iustes & plus seueres censeurs qu'Aristarque, Aristide, ny Catõ. Il s'en est trouué quelques-vns qui ont voulu nommer les arts & sciences au lieu de raisonnables, sermocinales, ou bien logicales, comme la Grammaire, la Rhethorique, & Dialectique ou Logique, ce qui est contraire à la cognoissance que nous en auons, disans que en λόγος Grec importe la force & vertu de l'intellect & entendement, que vous auez nommé

raison, de laquelle depend & la parole, & le discours, lequel acte est en langue Latine nomm<sup>é</sup> *sermo*, c'est à dire la parole, discours & sermon mesmes. Parquoy pouruen que l'on entende la verité de la chose, il n'importe qu'ils appellēt les arts & sciences sermocinales, ou bien logicales, que vous auez nomm<sup>é</sup> raisonnables, n'y ayant aucune difference entre la raison, qu'on nomme *ratio* en Latin, & en Grec λόγος & aussi *sermo*, pour faire que l'efficace de la verité soit esloigné de sa force & vertu. Et quant à la consequence que voudroyent tirer plusieurs de ces equiuoques, nous disons que c'est trop curieusement rechercher les mots pour laisser la substance de la verité, selon les raisons que nous auons alleguees cy dessus. Qu'il nous souuienne de ce que nous auons dit dès le commencement, que la pratique prise selon le vulgaire & commune signification, n'imporroit autre chose que l'action, exercitation, ou bien l'operation des choses, que l'on pourroit demonstrier en acte, ou en fait. Mais d'autant qu'il est impossible que ceste seule pratique puisse engendrer en l'homme l'assurance de laquelle auoit commencé à discourir nostre tres-cher Archange, respondant au sieur Tetti en la demande qu'il faisoit, sçauoir, si la personne auec la seule pratique ne peut pas bien auoir la vraye cognoissance de l'art; ne mesfouciant des raisons de ceux qui maintiennent ie ne sçay quelle fantastique & imaginaire pratique, fantasiant des imaginations en l'air, sans iamais produire aucuns effects de leurs conceptions. Or la vraye pratique & l'usage sont de mesme nature, & ne peuuent estre l'un sans l'autre, & c'est ce que vous auez cy-dessus nomm<sup>é</sup> coustume ou habitude des choses. Or l'on peut beaucoup mieux apprendre ceste pratique & usage des experts en l'art que des Philosophes mesmes, lesquels le plus souuent en sont ignorants. Il faut donc dire que puisque l'assurance du fait qui est requise au sauteur, ne peut venir que d'un long usage, pratique & experience de sauter, qui en fin donne la parfaicte cognoissance de l'art, il s'ensuit qu'il faut rechercher les maistres de l'art, qui peuuent apprendre & la theorique & la pratique tout ensemble de bien sauter. Il y en a toutesfois qui confondēt tellement ce mot de pratique qu'ils le separent de l'usage, & disent que la pratique est

### LE III. DIALOGVE

des choses immaterielles, & l'usage des materielles; attribuant à la pratique les choses qui appartiennent à l'esprit, & à l'usage celles qui concernent l'exercice du corps seulement : mais elle se nomme plustost habitude comme vous auez dit : & bien que ie l'ignore & ne m'y estudie à le sçauoir, si ne veux-ie pour cela, comme dit l'Arioste qu'un autre se soucie de ce que ie m'en travaille, il me suffit que vous entendiez bien la verité du faict, confessant bien, qu'entre personnes doctes, la pratique, l'usage, l'exercice & habitude signifient ordinairement vne mesme chose: Lors voyant le sieur Tetti qu'un chacun d'eux se raisoit, dit; Il est donc temps de nous apprester pour ouyr & remarquer vos discours que nous auez promis faire, touchant les exercices, puisqu'à mon iugement vous ne voulez plus parler ny de la pratique, ny de la sciëce, ny de l'art, dont se resiouissent tous ces Gentils-hommes, tant ils desirerent à present ouyr ce qui concerne la santé: pour autant que cela est d'importance, comme nous l'auiez dit: non pas que n'ayons receu vne grande satisfaction, de ce qu'auiez traité iusques à present, ayant, comme on dict, plus appris de Philosophie aujourd'huy sans contraincte, qu'un autre ne feroit avec les pedants en dix ans: parquoy ie vous prie l'un & l'autre de dire ce que vous pouuez & sçaez des exercices, à ce que receuions de vous l'instruction & la connoissance que nous esperons, & laquelle ardemment nous desirons, & vous assurez que nul de nous ne dira vne seule parole, iusques à ce que soyez venu à la conclusion de vos discours: car autrement ne pourriez vous arriuer à la fin de ce qui concerne les exercices, si un autre se vouloit entremettre d'en parler, soit pour vous aduertir ou requerir de quelque chose; voilà la volōté de toute ceste illustre compagnie, laquelle vous voyez vous prier & iurer le semblable.

Lors le sieur Cosme & le sieur Ferrand voyans qu'un chacun auoit finy son discours tant d'une part que d'autre, commēcerent eux deux à discourir de la nature, de l'utilité & usage nécessaire des exercices.

Cos. Tout ainsi que sans le mouuement toute la nature periroit, qui se conserue avec luy, comme font toutes les generations & corruptions alternatiues, des choses que nous



voyons en ceste machine inferieure; nous faisant par le mouvement, non seulement voir, sentir & cognoistre ce qui a mouvement, mais aussi comprendre & sçauoir la vertu & la cause mouuante, materielle, ou sans matiere telle qu'elle est; ainsi peut-on s'asseurer que sans l'exercice, la santé non seulement des hommes, mais aussi de tous autres animaux periroit avec leur vie, & se perdant peu à peu en partie, leur causeroit vne vie mal-heureuse, s'ils ne s'exercoient suiuant la propriété du mouvement qui est en nous iusques à la mort, pour la conseruation de toute personne de quelque sexe qu'elle soit; & n'est besoin que ie face plus long discours pour prouuer combien est l'exercice necessaire, l'accomparant au mouvement; n'ayant nature peu faire chose moindre qu'iceluy, veu qu'il est tres-certain que si nous osons de l'esprit ou du corps l'exercice, on n'y peut rien laisser en son lieu, on n'y peut substituer, mettre ou faire de necessité succeder autre chose que la seule oisiveté de tous reputeé abominable, meschante & mal-heureuse du tout, veu que l'oisiveté de l'esprit qui deuroit s'exercer es choses qui appartiennent à la sapience, & à la contemplation, cōtraint peu à peu les hommes à se rendre negligens, paresseux, ignorans, poltrons, s'oublians eux-mesmes, ne se soucians de rien, priuez de iugement, de conseil, & de toute autre vertu, ou gouvernement qu'on deuroit rechercher en eux, ou desirer d'eux. L'oisiveté du corps peu à peu rend la personne pleine d'humeurs, enuieuse, gourmande, adonnee à la panse, & à la gueule, foible, luy engendrant aux entrailles, aux veines, & autres membres principaux, plusieurs subiets de maladies diuerses, avec la perte de la couleur naturelle, y adioustât sur tout autre chose, l'humeur flegmatique, les catarres, la pituite, la colere & melancolie qui ont de coustume estouffer en vn instant les personnes, ou leur estroppier les iointures par le moyen de la goutte, de la chiraghe, chiragie, podagrie, & autres tels maux, dont tant les Philosophes, Medecins, que les Theologiens, ont tant escrit, detestans & abominans la vie qui pour ne s'employer à aucun exercice va se submergeant au mortel abyfme d'oisiveté. Il sera bon laissant à part les morales considerations, avec tous les opinions & iugemens de l'admi-

### LE III. DIALOGVE

nistrati<sup>on</sup> œconomique & politique, & tous les preceptes de la sacree Theologie Chrestienne, que discourions briue<sup>ment</sup> sans aucune digressi<sup>on</sup> de l'exercice appartenant seulement à la conseruation de la santé: car si nous voulions en discourir & disputer autrement, outre que ce seroit sans propos, tous ces Seigneurs s'ennuieroient, & nous aussi, pour n'auoir employé nostre temps apres le soupper à vn exercice vtile & delectable. Or ayant à discourir en toute briue<sup>té</sup> & promptitude, de cest exercice; il me semble qu'on peut reduire & restraindre en peu de mots tout ce qu'on pourroit esperer de belle resolution, en quatre choses, qui sont les plus necessaires à nostre entreprise; si nous voulons que tous ceux qui nous entendent s'en puissent seruir & ayder à leur contentement de nos discours; la premiere desquelles declare ce que c'est qu'exercice, & demontre en vn instant la nature de ses principales differences, les distinguant l'vne de l'autre; la seconde expose la maniere, ordre mesure & temps de chacune difference d'exercice, selon sa particularité; la troisieme est celle qui traite de chacune difference particuliere des susdicts exercices, & à quelles complexions elle est bonne, conuenable, ou non, enseignant le vray moyen & le plus assésuré de pouuoir soy-mesme cognoistre & iuger de quelle nature & complexion on est, afin qu'on sçache soudain cognoistre & eslire l'exercice qu'on iugera estre à soy plus conuenable & necessaire; la quatrieme & derniere, ou selon l'opinion d'aucuns, la premiere enseigne ce qu'il conuient obseruer & garder en l'aage de la personne qui voudroit s'exercer pour la conseruation de sa santé: Icelle aussi nous apprend à cognoistre la qualité, le temps, la mesure, l'ordre & la nature particuliere de chacun des susdicts exercices: car c'est sans doute que comme tous exercices estans differents les vns des autres, ne peuuent estre propres à la santé, ny en aucune maniere profitables à toute complexion, sans quelque distinction: ainsi vn mesme exercice ne pourra estre tousiours propre à vne mesme personne, en tout le temps de sa vie, & d'autant qu'avec vn long estude, & avec grande felicité de nostre naturelle inclination auez par vne continuelle experience vaqué à l'estude de la Medecine, ie vous en laisse la principale charge

charge d'en discourir, nous promettant toutesfois seconder l'ordre de vos raisons le mieux que ie pourray, si le defaut de la memoire, ou le sommeil ne sont cause de me faire tomber en quelque oubliance.

FERR. Bien que soyez doiüé d'un sçauoir, & pouuoir admirable, si est-ce que tousiours vous voulez paroistre, comme si en vous il y auoit moins de puissance & de science, vous cōportant de ceste façon, pour mieux nous asseurer du sçauoir d'autrui, & du vostre. Or puis que c'est vostre plaisir ie ne vous en veux dire mot, mais seulement vous obeyr, pour ne perdre le temps en paroles proferees mal à propos. Ie vous dis donc qu'on ne sçauroit mieux commencer pour proposer & declarer à toute personne la necessité de l'exercice, soit du corps, soit de l'esprit, que de la detestable nature de son contraire, qui est l'oisiueté, en laquelle il est necessaire qu'un chacun tombe s'il ne s'emploie à quelque exercice continuellement; C'est pourquoy Fulgence diët en ses œuuures, que l'exercice principalement du corps, n'est seulement la saine conseruation de la vie humaine, mais est aussi le gaing du temps, & le mortel ennemy de l'oisiueté (laquelle est la seule source de tous les vices) le comble & l'entier refueil de la chaleur naturelle, la fortification de toute la faculté & vertu vitale, le vray remede, la medecine parfaicte de tous les excrements de la superfluité du corps, est le vray deuoir & office de la jeunesse, la seule joye & repos de vieillesse: & sur la fin i'adiousteray que ce luy se doit abstenir & fuir de l'exercice, lequel ne se foudie du thresor ny des richesses, de sa propre vie & santé. Le premier pere & pontife general de tout l'art de la Medecine, Hippocras grand Philosophe & Astrologien, voulant monstrier combien est l'exercice necessaire à la cōseruation de la santé, diët en plusieurs endroits de ses œuuures, mesmes au sixiesme des Epidemies, & au cinquiesme des Aphorismes, qu'il nous faut vser de l'agitation du mouuement, ou l'exercice de nostre corps, du manger, du boire, du dormir, & de la conionction naturelle, avec vne modestie reiglee, tant pour maintenir & prolonger la vie, que pour la conseruation de la santé, disposant toutesfois de toutes ces choses, en sorte que l'une succede à l'autre, al-

### LE III. DIALOGVE

ternatiuement, ainsi que l'ordre & le besoin le requierent, obseruant, gardant tousiours la necessité, le lieu & le temps, afin que le profit & l'vtilité que nous en esperons s'en ensuiue. On peut clairement voir par ces prudentes paroles d'Hippocras, comme par ses liures il nous conseille, que la conseruation de santé se doit commencer, & tousiours continuer du mouuement, qui se trouue en chaque exercice & agitation du corps, y obseruant la vraye proportion conuenable au temps & au lieu; & cela s'entend auant que la personne boiue, mange, dorme, ou vse de la conionction; lesquelles choses doiuent estre pratiquées apres l'exercice, l'vne apres l'autre, moyennant l'ordre qu'on peut aisément tirer de ces parolles que ie viens de reciter; veu qu'à la proposition qu'il faict des choses qui conseruent la santé, il faict que l'exercice est le premier, puis luy succede le boire & manger, & puis le sommeil; dont en fin s'ensuit la conionction. Ce que Galien mesmes a confirmé en plusieurs lieux de ses oeures, avec la raison & certitude de l'experience, disant iceluy particulierement, en son cinquiesme liure, de la maniere de conseruer & deffendre la santé; que si le corps pour sa conseruation s'exerce modestement il en reçoit vn grand soulagement; comme au contraire il deuient fort maladiſ, par le repos, & par l'extreme vice de l'oisiueté, n'estant chose qu'on puisse trouuer plus dommageable, & contraire, que le repos d'vne paresseuse oisiueté; adioustant en apres la raison & reigle de l'exercice, il conclud que iamais personne ne seroit malade s'il se sçauoit garder de tomber en la generation des cruditez, & autres mauuaises humeurs, & de ne s'exercer violemment apres le repas: car tout ainsi que l'exercice qu'on faict auant le repas, est conseruatif de la bonne santé, apportant mille commoditez pour bien se maintenir: ainsi au contraire toutes sortes d'exercices & agitations violentes du corps, qu'on faict apres le repas, sont dommageables à la santé: il en dict la raison, qui est, que l'aliment du repas prins, descend de l'estomac auant que la digestion naturelle soit faite, qui est tousiours requise & necessaire auant tout exercice, & de là estant la viande ainsi à demy cuitte, ains plustost crüe, & nullement digeree, la nature tirant cest aliment du ventre, le va

distribuant à plusieurs parties & membres interieurs de nostre  
 corps; se formant par telle maniere dedans nos veines, tous-  
 iours vne grande quantité d'humeurs crues, qui ordinaire-  
 ment sont cause d'infinies maladies, ne pouuant la nature fai-  
 re moins, d'autant qu'à ce nous l'excitons incontinent apres le  
 repas, au lieu qu'elle deuroit peu à peu digerer par le moyen  
 de la chaleur naturelle: mais accroissant cestè chaleur par la  
 violence de tel exercice, nous destournons sa vertu digestiue  
 de l'estomac, ensemble toutes autres facultez des membres cir-  
 conuoisins, comme sont le foye, le cœur, le poulmon, & les  
 entrailles; excitant par le moyen de la vehemence de l'exerci-  
 ce, le doux mouuement interieur de la digestion naturelle, qui  
 se faict en nous: Pour laquelle chose si l'homme ne purgeoit  
 & ne faisoit resoudre par exercices plus conuenables l'abon-  
 dance de tels excrements, ou que ces crudittez ne paruin-  
 sent par la force & vertu naturelle du foye, & des veines,  
 à vne bonne concoction & digestion, se conuertissans en  
 bon sang, il est sans doute que la personne necessaire-  
 ment tomberoit de mal en pis, se trouuant mal disposé,  
 & tousiours subiecte à vne infinité de maladies. Il ne faut pas  
 pour cecy penser qu'aucun excellent Philosophe, ou Me-  
 decin fort expert aye iamais blasmé les exercices, ny l'vsage  
 d'iceux, soit pour le regard de la santé, ou pour le respect  
 de la Police inuentee & receüe par les hommes. Nous li-  
 sons qu'Auicene grand Philosophe, tref-subtil Metaphisi-  
 cien & Medecin excellent, afferme que sçauoir s'exercer à  
 propos est vn remede excellent & secret, de grande importan-  
 ce, pour se bien conseruer, sain & gaillard: D'autant que ceux  
 qui s'estudient à faire exercice en temps propre & conuenable,  
 peuuent s'asseurer de n'auoir iamais besoin de Medecin, ny de  
 Medecine, veu que les superfluitez de toutes les humeurs & au-  
 tres matieres contraires à la santé viennent tousiours à se dissi-  
 per par le moyen de l'agitation du mouuement corporel. Le  
 mesme Autheur en plusieurs lieux en raconte plusieurs autres  
 belles choses: Mais puis que i'ay parlé d'Auicene Arabe, i'ay  
 memoire que de la mesme secte & nation, ce bon vieillard do-  
 ct & tref-expert Haliablas parlant des exercices, preuuel l'vs-

### LE III. DIALOGVE

ge d'iceux estre bon & necessaire pour trois principales vtilitez qui en prouiennent. La premiere est, que de l'exercice conuenable s'accroist, se fortifie & renaist en nous la chaleur naturelle, laquelle estant ainsi bien disposee & confortee, reçoit, cuit & digere mieux les viandes, distribuant leurs allimens nutritifs à tous les membres du corps plus idoynes, plus purifiez & plus salubres. La seconde est, d'autant qu'il va conseruant les conduits des porres de toutes personnes en estat de laisser escouler les superfluitez du corps qui viennent à sortir par le moyen de l'agitation du mouuement de l'exercice avec resolution de plusieurs autres excréments nuisibles. La troisieme est d'autant que par le moyen de l'exercice toutes personnes deuiennent plus forts, & par la continuation d'iceluy plus impassibles, & moins subiects aux choses qui luy pourroient apporter quelque incommodité casuelle ou alteration de nature, outre la promptitude que la personne en acquiert, pour s'en seruir & aider en ses actions. Que diray-je d'auantage? Ce grand Arabe & esprit inestimable Auerrois ne dit-il pas que le propre mouuement des exercices est vne cause certaine pour se pouuoir conseruer sain & dispos? Parquoy reuenant aux Grecs, qui ne sçait, comme dit Hippocras & cōme plusieurs autres veulent, qu'il est impossible que l'hōme qui mange viue sain, s'il ne fait quelque exercice? n'estant l'exercice moins necessaire pour conseruer la santé que sont le boire, manger & dormir, pour se pouuoir seulement maintenir en vie. Mais ie ne puis que ie ne mette encor en auant la graue autorité d'Hippocras, lequel en quatre parolles dignes d'estre escriptes en lettres d'or, dit : *Qu'en deux choses seules consistoit toute la conseruation de la vie humaine.* La premiere est de se sçauoir tousiours bien garder de faire excez au boire & au manger. La seconde est de sçauoir exercer son corps conuenablement. Or si nous voulons comme vous auez commencé à dire (laissant à part les autoritez) parler de l'exercice le comparant au mouuement tant necessaire à la nature, nous voyons qu'elle mesme le nous enseigne dès nostre premiere & plus tendre ieunesse, quand estans encor enfans vn chacun va recherchant le plus qu'il peut le mouuement de l'exercice du corps, y estant excité par vne inclination naturelle qui

les y prouoque, si tost qu'ils ont beu ou mangé: & c'est cecy qui plus les peut faire croistre & se conseruer, sans que neantmoins nous cognoissions quelle est l'opération; estant ainsi, que le petit enfant se sentant plus dispos & gaillard après telle refection, s'accommode de soy-mesme à cheminer sans qu'aucun l'enseigne à ce faire, appuyant les mains à terre presque à la façon d'une beste à quatre pieds, ne cessant iamais de se mouuoir & agiter deçà & delà, se trainant, se haussant, & s'appuyant d'une maniere & d'autre: De façon que c'est une merueille quand on considere la continuelle agitation d'un tel enfant qui ne s'en lasse, ny retire iusques à ce qu'il soit contraint par le sommeil à dormir & reposer, tant il desire acquerir la perfection du mouuement, lequel la nature en l'excitant en fin recherche les moyens de le pouuoir trouuer petit à petit; comme quand il commence à se pouuoir soustenir droit vn peu plus fermement & à cheminer debout sur ses pieds, s'efforçant d'auantage à faire de petits sauts, courant plus violemment en auant & en arriere, se tournant de tous costez en rond & de trauers, tant qu'on le pourroit lors comparer aux cheureaux, aux petits agneaux & autres tels animaux, lesquels poussez de la nature croissent avec le mesme instinct de se preparer à l'exercice (s'il m'est permis d'ainsi le dire) le recherchant avec la mesme vtilité & plaisante agitation, sans en sçauoir entendre la cause, car lors l'enfant n'en reçoit autre fruit, selon son foible iugement que le seul contentement: Et comme cecy n'est en nous d'ailleurs que par la seule nature, ainsi par le moyen de la prouidence d'icelle, ceste inclination se trouue en chaque corps de toutes especes d'animaux suffisante pour tousiours leur faire desirer, distinguer & rechercher ce qui leur est plus necessaire, tant pour la conseruation de leur vie, que de leur propre santé: lesquelles deux choses ioinctes avec deux autres selon que nature sage nous enseigne nous deuons conseruer & maintenir suyuant les parolles d'Hippocras cy-dessus alleguees, à sçauoir, l'usage moderé des viandes en beuuant & mangeant, & la continuation alternatiue d'un exercice conuenable, lequel pour ne se pouuoir acquerir sinon par le moyen du mouuement du corps; pour ceste cause en la definition de l'exercice, le mouuement y est necessairement compris, com-

me estant le premier & principal fondement vniuersel de tous les exercices, non sans grand mystère de toute la nature, laquelle nous celebrons si hautement: puis qu'il ne se trouue autre chose que la mesme nature qui soit le mesme principe & cause qui se meut premierement, & puis se repose en la chose où elle se trouue estre premierement de soy-mesme, & non par accident. Parquoy comme tous les sages d'un accord afferment que toute chose se conserue mieux, moyennant l'exercice & la continuation de la chose qui l'a principalement produicte; ainsi est-il impossible qu'il s'ensuyue que la nature se puisse conseruer ny l'homme s'aduançant à acquerir & conseruer sa santé sans l'ay de du mouuement, cause vniuerselle & fondement principal de toutes les actions de la mesme nature susdicte; & de là naist ceste si estroite & nécessaire société, compagnie, vnion ou nécessité d'exercice enuers tous animaux; & principalement en l'homme, lequel dès son plus tendre aage, comme j'ay desia dit, ne s'arreste iamais en vn lieu, specialement quand il est vn peu grand et de l'aage de huit ans, le foïet, les menasses de luy faire pis ne sont suffisantes, ny mesme l'enfermer en vne chambre, de luy faire quitter l'exercice de courir & sauter par tout avec mille autres inuentions qu'il va inuentant en s'exercant par le moyē de l'agitation de tous ses membres, avec presque vn infiny changement du differend mouuement de son corps. Mais qui pourra avec sain iugement nier, que puisque tout mouuement est cause de produire & accroistre la chaleur, & qu'il n'y a vie aucune qui soit priuee de mouuement de chaleur, seroit-il iamais possible qu'on peut en ceste vie, bien conseruer la santé, sans faire exercice qui nous conserue & tousiours augmente par le moyen du mouuement, & avec la chaleur vitale de la nature, tant corporelle qu'animale: Aussi est-il certain que tous ont besoin d'exercice pour la conseruation de la santé, iusques aux enfans qui sont au ventre de leur mere; dont de là on void que les femmes grosses; si elles ne font quelque exercice, ou pour ne le pouuoir faire, ou pour ne le scauoir faire, comme plusieurs qui tousiours demeurent assises pour coudre ou travailler en soye, tapisserie, ou autre oeuvre, gagnans leur pain pour la nécessité de leur vie, sont coustumieres d'engendrer



des enfans bossus, ou foibles, ou demy estropias, & d'une telle nature si mal faicts, qu'ils ne vivent beaucoup, ou s'ils vivent, ils ne viennent iamais que rarement à estre de grande complexion, pour n'auoir peu estans aux entrailles de la mere estre secourus par l'ayde salubre & necessaire des exercices, lesquels il ne pouuoit (estant là dedans refermé) aucunement faire, si la mere pour son bien ne le recherchoit, avec la modestie qui est requise à vne femme grosse, selon les réigles & preceptes des plus excellens Medecins qui en ont escrit: outre que souvent il aduient que les femmes qui n'ont faict exercice aucun, du moins par l'espace de quinze ou de vingt iours auant leurs gesines, deuiennent plus foibles & craintiues; & pour ceste otieuse paresse, tombent en milles perils de leur propre vie & salut: laquelle il faut qu'avec promptitude elle se trouue lors plus que iamais aydee d'une disposition du mouuement forcé, & agitation des esprits & des facultez vitales & naturelles de tous ces membres: mais pour ne prolonger le discours de ce qui appartient à l'usage des exercices, pour l'utilité particulier d'un chacun, puis qu'ils sont de necessité requis pour acquerir & conseruer la santé, tant des hommes comme des femmes, il me semble que bien qu'ayez restrainct l'argument & matiere d'exercice en quatre chefs, avec l'usage d'iceluy, si pourroit-on disposer le discours dudit exercice en vne autre maniere, & proceder en ceste façon: laquelle paraquenture ne vous desplaira à ouyr & entendre: & voudrois premierement qu'ayant desfiny ce que c'est proprement d'exercice apres la distinction faicte de l'esprit & du corps, separer l'exercice du corps en deux parties differentes: la premiere sera de discourir de l'exercice generallement selon les plus vniuerselles conditions d'iceluy, comme pour exemple, la cognoissance & iugement de la qualité, de la quantité, de l'ordre, de l'aage, mesmes de l'accoustumance & de la complexion; lesquelles cinq ou six choses estant en la premiere partie de l'exercice déclaré en general, la seconde s'ensuiuroit en espee selon la particularité, de la maniere que nous voudrions nous exercer, à sçauoir de nous mesmes le faisant sans l'interuention d'aucun secours exterieur, sans estre aydez, poussez, ou portez, ou dedans vn co-

che, ou dedans vne litiere, ou dedans vne barque, ou à cheual, ou par autres telles manieres dont ie parleray plus à propos, veu qu'estans en ceste maniere les choses qui appartiennent à l'exercice & à l'usage d'iceluy, distinctes & declarees, nous aurons entierement embrassé & accomply tout ce qu'on en pourroit dire & esperer: c'est pourquoy ie desirerois auant que d'entrer en la definition de l'exercice, sçauoir de vous, cōme vous voulez que nous nous gouuernions, ou quel ordre nous tenions pour nous en declarer en bref.

Cos. Certes vostre ordre me plaist fort, car vous auez distingué toute la consideration qu'on sçauoit prendre de l'exercice avec les cōceptiōs d'iceluy, soit en genre soit en espee, donnāt en ce faisant moyen d'entrer par apres de main en main, sur la difference, propriété & accident de tout ce qu'on pourroit cōprendre d'iceluy. D'auantage sans la cognoissance des choses generalles, la particuliere narration & speculation de l'exercice ne seruiroit de beaucoup: Si voudrois ie neātmoins qu'auāt toutes autres choses nous parlāssions des complexions, & de leurs parties, moyennant lesquelles chacun (s'exerçant selon icelles) pourroit cognoistre la qualité & propre nature de sa complexion: car bien que vous l'ayez mis au sixiesme lieu des choses comprinses vniuersellement au discours que vous en auez fait generalemēt, si n'altererez vous pas pour cela tout ce qui a esté auant vous & sera apres vous: Mais puis qu'il faut diffinir l'exercice, auant toutes choses, ie voudrois que nous prinsions resolution sur deux choses qui me sont tombees en la memoire, d'autant qu'elles sont de grande importance. La premiere est, que si l'exercice, moyennant le mouuement accroist la chaleur naturelle, & luy ayde (estant ainsi augmentee) à estre plus viue, il semble par consequent que ce n'est bien fait de deffendre l'augmentation de la chaleur par le moyen de l'exercice, puis que de la plus viue & prompte chaleur, la digestion tousiours est meilleure, ce que preuue fort bien Plutarque au liure de la conseruation de la santé, ou il allegue l'authōrité du dictateur des sciences, Aristote, à sçauoir qu'apres disné le mouuement qui procede de l'exercice est fort conuenable à la santé, adioustant la raison que la chaleur par le mouuement estant lors augmentee, cuit & di-

& digere plus aisément la viande qu'on a pris.

FERR. Dites donc la seconde des deux choses que vous auez en memoire, afin que sans perdre temps ie puisse respondre plus promptement & à propos à tous deux.

Cos. La seconde doncques n'est autre chose que de scauoir si la santé se peut conseruer par le moyen des mesmes choses qui nous la font recouurer quand nous l'auons perduë, & si ainsi estoit, le repos nous seroit plustost necessaire à la conseruation de nostre vie & santé que l'exercice. Ce que ie ne vous veux maintenant prouuer avec beaucoup d'argumens: mais seulement attendre & ouyr premierement ce que vous en semble. Ne pensez pas que ie vous face ces obiections pour aucun' uoloir que i'aye de reuoyer en doute la necessaire & profitable verité des raisons cy dessus alleguees.

FERR. Il ne falloit point que vous m'aduertissiez que ie deusse penser cela de vous, car ie cognois & entens fort bien avec vostre ualeur, l'intention pour laquelle vous l'auiez fait, veu qu'il vous plaist que nous confirmions plus amplement ceste tant celebre & importante vtilité des exercices, puis qu'il n'y a aucun doute (selon la sentence latine) que d'autant que l'on combat & dispute contre la verité, d'autant plus est elle esclarcie, & mieux cognüe & entenduë d'un chacun: c'est pourquoy ie vous respons qu'il est fort aisé que la santé presente se puisse conseruer par les mesmes choses qui la font recouurer, estant perdues: & n'est aussi veritable que le seul repos, sans aucune espece d'exercice, soit necessaire à tous malades, pour les guarir. Et qui ne sçait que la diette, les Medecins, les vnguens, les emplastres, les clisteres, & autres telles choses par le moyen desquelles les malades reconurent leur santé, sont choses non seulement contraires, mais quelquesfois mortelles, comme elles le seroyent à la conseruation de la santé de ceux qui la possèdent sans aucune apparence de maladie? Que si on medisoit que le repos continuel & abstinence de boire & de manger par trois ou quatre iours, peuuent guarir toutes sortes de maladies selon l'opinion d'Asclepiade & d'Erasistrate, qui ne vouloyent seulement conceder que la seigneurie fust bonne & necessaire aux hommes: Je viendrois à vous respondre, si cela

n'estoit faux, comme il est pour le certain, qu'un chacun sçait qu'une telle diette gasteroit plustost la santé de celui qui l'auroit, qu'elle ne la conserueroit: ainsi que le tres-docte Mercurial a avec un grand iugement & doctrine exquise, dict & démontré, au quatriesme & cinquiesme liure de sa Gymnastique, confutant suiuant la plus ancienne doctrine d'Hippocras, Galien, & Auicenne, tous les erreurs faux, raisons & argumens de ceux qui suiuiroient & embrassoient ceste fauce opinion, laquelle eut pour ses fauteurs principaux, ledict Asclepiades & Erasistrate, lesquels d'ailleurs, comme vous sçavez, furent hommes doüez d'un grand entendement, & sçauoir en toutes choses, hors mis qu'ils se persuadoient que le repos, & non l'exercice estoit bon & nécessaire à la conseruation de la santé, blasmant le plus qu'ils peurent l'usage de tout exercice: contre laquelle fauce opinion, bien que le susdict Docteur, Hierosme Mercurial, aye suffisamment respondu, si vous voudrois-je toutesfois plus briueuement avec la responce suiuite, monstrier la vraye & derniere resolution de ceste dispute, en ceste maniere, que n'estant ny le repos, & encor moins le mouvement de l'exercice contraire à la nature de l'homme, puis qu'ils se trouuent en luy avec la force & principe de se pouoir mouoir & reposer; on ne peut absolument arrester que le repos ou le mouvement soit l'un plus que l'autre nécessaire à la conseruation de la santé humaine: car puis que la nature nous a generalement doüez, tant de la force & puissance du repos, cōme de mouoir le corps, Il faut cōclure que l'une & l'autre est nécessaire à la cōseruation de nostre santé, biē qu'ils ny soient tousiours propres, n'estant la consequence nécessaire que ce qui est nécessaire, soit tousiours propre: que si ces Philosophes & autres qui ont suiui leurs opinions, eussent bien considéré cela; ils ne fussent pas tombez en ceste ignorante oubliance, de soustenir contre la nature, que le mouvement qu'ils ont d'elle receu, n'est nécessaire pour pouoir s'en seruir & ayder, avec iugement, selon les accidens qui se presentent, y obseruant tousiours le temps, la qualité, la quantité, & le lieu & le subiet pour lequel il est requis le faire, desquelles observations considerables, pour ne s'en estre iceux apperceus ne sceurent iamais co-

gnoistre, ny la verité, & moins l'vsage de plusieurs choses; d'autant qu'ils nauigerent sans clarté, ou cognoissance de la verité, comme on peut voir particulièrement, au traité du mouuement & agitation prouenant de l'exercice, qui est autant nécessaire à l'homme qui desire se conseruer sain, comme est le repas, & non le repos seulement; mais non pas en la forte que comme ces choses soyent nécessaires, icelles soyent tousiours conuenables; car si aucun ne peut nier que le manger ne soit nécessaire, si pourra-il bien nier qu'il n'est conuenable, ny en quantité, ny en qualité, ny en lieu lors qu'il n'en est point de besoin. Or laissant ces disciples Erasistratiens & Asclepiadiens, nous dirons que le repos comme repos, & exercice comme exercice, sont nécessaires autant l'un que l'autre, à la santé humaine: mais non que tousiours suiuant les raisons susdictes, il s'en faille seruir: c'est pourquoy retournant à vostre premiere proposition, ie vous dis que le meilleur disciple & principal successeur de l'escole d'Aristote, ayant dict & appris de luy que la digestion du repas qui se fait en l'estomac, est empeschée par le mouuement. Il n'est vray semblable, ny par consequence croyable, que le mesme precepteur secretaire de la nature Aristote, aye iamais creu, ny esté d'opinion, que l'exercice qui accroist par le moien d'un mouuement violent la chaleur naturelle, soit propre ou nécessaire pour rendre la digestion parfaite; puis qu'il est tres-certain que la raison iointe à l'autorité, & experience nous enseigne le contraire; bien qu'on concedast qu'Aristote suiuant l'autorité de Plutarque, eust soustenu que le mouuement est nécessaire apres le repas, pour mieux le digerer, on peut de mesmes receuoir la response au lieu où il dict que la pourmenade qu'on fait apres soupper sert de beaucoup pour mieux pouuoir digerer les viandes, afin qu'elles n'aillent au dessus de l'estomac, presque voguants, & se suffoquans. D'autant qu'il y a plusieurs personnes qui ont l'estomac si foible de nature, que difficilement les viandes & liquours qu'ils ont receu, en beuuant & en mangeant, si peuuent accommoder: mais sont secourus par le modeste mouuement qu'ils font en se pourmenant; laquelle raison avec plusieurs autres, peuuent seruir de iustification à la dignité de nostre

### LE III. DIALOGVE

Prince Peripateticien; & n'a pas dict (si vous auez bonne memoire) que nul mouuement, mais bien que l'exercice n'estoit bon, ny propre pour le secours & aduancemēt de la digestion, quand on le faisoit incontinent apres auoir prins son repas: car ie ne pense point que tout mouuement du corps se puisse nommer vray exercice, sinon celuy qui selon l'opinion de Gallien, peut arriuer à ce but d'alterer peu ou beaucoup le foye de la personne, bien qu'il y en aye d'autres qui ont baillé vne autre deffinition de l'exercice.

Cos. Si on ne doit nommer tout mouuement du corps vray exercice, pourquoy donc les Medecins ont ils appelez exercice, cheminer, se faire frotter, mesmes lire, & parler haut, & autres tellès actions de l'homme? Il seroit besoin le declarer, à ce qu'un chacun demeurast satisfait de ces choses, qu'autres luy pourroient opposer. D'auantage bien que ie ne puisse non admirer vostre subtile & vraie raison, si ne puis ie que ie ne vous die encores mon opinion, que Gallien n'a pas bien deffiny proprement ce que c'est d'exercice; & ne vous doit paroistre telle chose estrange, veu qu'il y a vn fameux Docteur que nous auons quelquefois nominé, qui en a fait vne longue examination, ne pardonnant ny à Auicenne, ny à Auerroes, lesquels furent de luy ensemble reprins: à la fin il nous propose la parfaicte deffinition de l'exercice par luy composee en ceste forme, à sçauoir, L'exercice (duquel il appartient proprement au Medecin d'en parler) est vn mouuement vehement & volontaire du corps humain, alteré par l'aleine, fait, ou pour garder, ou conseruer la santé, ou bien pour acquerir le bon estat d'icelle: laquelle deffinition, qui comprend en general toutes les causes selon les preceptes de la Philosophie conuient iustement avec la chose definie, ce que la deffinition de Galien, ny celle d'Auicene, ny celle du grand Arabe Auerroës, ne fait & ne vous en veux icy dire autre chose, sinon que vous laisser à vostre iugement la deffence de Gallien, duquel vous vous monstrez si affectonné; car ie voudrois que nous parlussions des complexions, si tost que nous aurons finy, ou bien accordé ceste petite dispute controuerse, qui setrouue entre les Auteurs, sur la deffinition de l'exercice.

FERR. Puis que ne pouuez que ne m'admirez, encores que ie ne sois à admirer, ie vous laisse à penser s'il est possible que ie ne m'esmerueille d'aucuns qui n'ont pas honte, ny aucune crainte de reprendre librement vn Galien, vn Aristote, vn Hippocras, estant les trois principales lumieres de toute la Philosophie & Medecine. I'ay dit librement pour signifier leur audace, lesquels estans accompagnez d'un desir & gloire de paroistre plus sçauans se laissent eschapper sans aucune exception, telles paroles qu'ils font imprimer, disant Aristote s'est abusé, Galien a erré, il ne dit pas bien, & autres telles choses: que si au moins ils disoient: c'est mon opiniõ & iugemẽt: on pourroit par aduẽture remedier en ceste maniere, pour mieux dire: encores voudrois-je les excusans laisser l'admiration & louer le desir & le iugement de s'estre parauenture apperceu de quelque chose de beau. Ce que ne s'estant trouuẽ en aucune maniere, en ceste nouvelle deffinition de l'exercice, cecy est cause de me faire plus grandement alterer l'aleine sans exercice, vous voulant courir contre ma volunté & contre mon naturel, sa diffinition mal faicte & mal entendue, n'estoit le zele de la verité, & l'honneur & respect que nous deuons tousiours porter à la memoire & dignité des trois susdicts flambeaux anciens de tout nostre sçauoir humain. Premièrement vous sçavez bien qu'il est vray que toute deffinition pour estre parfaite ne doit necessairement comprendre tous les genres des causes, comme fait la sienne: car si cela estoit veritable il faudroit que la plus grand part des deffinitions donnees & receuës iusques à present par tous les Philosophes de plusieurs choses appartenant à la Philosophie & Medecine, fussent ou du tout fausses, ou du tout imparfaites, ce que ne pouuant iceluy nier, ie voudrois qu'il me monstast en quel liure de la Philosophie, il trouua iamaïs que les parolles de la deffinition doyuent soustenir ou nier que la chose par elles signifiée, soit, ou ne soit, se face, ou ne se face, ou bien soit faite, ou non presente, passée, ou à venir, comme on voit en sa deffinition contre les reigles & preceptes de bien deffinir les choses, selon qu'on voit és liures Analitiques d'Aristote, & en plusieurs autres siennes œuures, & aux commentaires de tous les Philosophes: mais il faut que ie rie, quand i'entends dire que

pour estre exercice il faut que celuy qui se fera alteré l'aleine en se mouuant aye eu intention de conseruer sa santé, ou biē d'acquérir le bon estre d'icelle, & qu'il appartiēt au seul Medecin de parler de cest exercice.

COS. Ouy mais il faut que vous sçachiez que plusieurs se peuent mouuoir & alterer l'aleine & respiration volontairement desquels on ne peut dire qu'ils ayent proprement fait exercice, comme les seruiteurs esclauēs & autres qui vōt faisant ce qu'il leur est commandé, comme aussi ceux qui vont fuyant & soustenant l'impetuositē de l'ennemy qui les poursuit pour les offencer, ou pour cause d'autrestels accidens ils viennent à s'alterer l'aleine violemment par le moyen de l'agitation & mouuement du corps, dont s'ensuit pour cela que l'on puisse ny doye dire qu'ils se soyent exercez, ne l'ayant fait pour faire exercice, mais pour auoir esté à ce contraincts, on pourroit plus tost dire qu'ils eussent trauaillé que fait exercice. Vous vous en riez pourtant.

FERR. Il ne seroit possible qu'on nen rist, comme fait le S. Charles de telles plaïsantes raisons que ce nouveau deffiniteur d'exercices va cherchant pour pouuoir enrichir & engraisser sa nouvelle deffinition par ces paraboles de l'intention qu'il demande pour conseruer & acquérir vn bon estat de santé avec vne volontaire affection de se mouuoir le corps, si on veut que l'on die aucun auoir fait exercice, comme si le mouuement du corps fait avec alteration de l'aleine, pour estre dit veritablement exercice, auoit besoin de la volonté de celuy qui ainsi se mouue avec intention d'acquérir & maintenir vne bonne & parfaicte disposition de santé: Il me souuiēt sans que i'eusse volonté de m'alterer l'aleine, ny aucune intention ou esperance de me guarir vne douleur de ratte qui me trauailloit excessiue-ment, s'augmentant dès l'aage de douze ans, que par conseil d'vn mien pere Medecin, ie fus contrainct par force de faire exercice chacune matinee par l'espace de trois mois montant & descendant plusieurs fois quelques degrez, & quelque fois montant sur certaines montagnes qui estoient proches de la ville, & m'ayant auparauant fait frotter l'endroiēt de la douleur de la ratte, & fait boire d'vne decoction: & apres l'exercice fait, me



faisoit oindre la moitié fenestre du ventre, depuis le haut iusques en bas, y comprenant la rate, sans toutes fois toucher à l'estomach, dont ie me trouuay ainsi faisant & m'exerçant peu à peu du tout guarý sur la fin de l'esté, & faisois cest exercice par force, comme j'ay dict, sans intention de guarir, que si vostre autheur susdit me vouloit dire que la volonté & intention du pere estoit cause de me faire faire exercice, ie luy demanderois volontiers, luy concedant cela pour vray si la seule intention de mon pere ou bien le mouuement de mon corps que ie faisois le plus souuent en pleurant, contre ma volonté, alterant l'alcine de ma respiration, faisoient l'exercice pour moy.

C o s. Il est certain que nous vous concederons que vostre propre mouuement du corps avec l'alteration de l'alcine, voulant, ou ne voulant, par force de bon vouloir, avec intention de guarir ou non, estoit le fondement principal de l'exercice que vous faisiez, & non la volonté ou intention du pere, car sans luy vous l'auriez peu mesmes casuellement, sans sçauoir, ny pourquoy, ny comme, mais luy ne l'auroit peu faire, pour vous, sans vous.

F E R R. Doncques il s'ensuit, que pour pouuoir toute sorte de mouuement du corps s'appeller exercice, il suffit qu'ice luy en se mouuant arriue au but, auquel il s'altere l'alcine de sa respiration, sans chercher si la volonté ou intention de celui qui se remüe, est pour acquerir ou conseruer vn bon estat de fanté, ou non, & non pour autre chose que celle-cy. Gallien soustient, que le mouuement doit estre volontaire, sans auoir intention d'obtenir ceste chose-cy, ou celle-là: d'autant que sans doute l'exercice estant simplement considéré, comme estant exercice, il n'y reste autre chose de plus, ny de moins que le seul mouuement du corps, qui peut alterer l'alcine; que s'il aduenoit que le seul mouuement ne fust volontaire, il ne laissera pourtant d'estre exercice, estant ladicte alcine alterée par la respiration, & ne s'ensuiura que la complexion & nature de l'homme ne s'en ressentent se trouuant mieux ou pis de telle agitatiõ & mouuemēt du corps, soit qu'il aie ou qu'il n'aye l'intention ou bon vouloir de s'exercer, car cela n'importe à la complexion de la personne, ny à l'essence & fondement de l'e-

xercice pour estre ainsi fait, ou non: Parquoy il sera bien conue-  
nable que ie vous recite à ce propos les paroles de Galien, par-  
lant de l'exercice, lesquelles sont celles-cy, comme on les pour-  
ra bien voir & lire au second liure, de garder & conseruer la fan-  
té, & icelles sont telles: car des choses lesquelles se peuuent di-  
re estre cause d'une autre que de celle par laquelle elles se voyét  
estre ainsi faites, on trouue le degré de plus grande ou moindre  
violence, de là peut-il aduenir qu'un mesme mouuement sert à  
vn exercice & non à vn autre; qu'on oste doncques du terme de  
vehemence, l'alteration de l'aleine: car en tous les mouuemēts  
où ne s'ensuit quelque apparence alteratiue de ladicte respira-  
tion, nous ne nommons tels mouuemens exercices. l'un plus ou  
moins, plustost, ou plus tard, ou plus souuent, se trouuera a-  
nourrir à alteré la respiration par son mouuement corporel: lors  
pourra-on dire assésurément qu'une telle quantité de mouue-  
ment, soit exercice. Chacū de nous, & tout autre, peut & pour-  
ra bien voir par ces doctes parolles de Galien, comme il a clai-  
rement déclaré la vraye deffinition de l'exercice, qui consiste  
seulement au violent mouuement du corps qui arriue au but  
d'alterer l'aleine, ne se souciant si aucun plus ou moins qu'un  
autre, plustost, ou plus tard, ou plus souuent, le voulant, ou nō,  
y soit arriué, ou l'aye fait: Parquoy comme le genre de l'animalité  
& l'espece raisonnable sont les seules essentielles choses qui  
forment & constituent la deffinition de l'homme, demonstrent  
qu'il est vn animal raisonnable, sans qu'il soit besoin pour le  
deffinir, déclarer, pourquoy, ny de quelle maniere, ny quand, ny  
auec quelle intention il aye esté fait, engendré ou produit; ain-  
si le seul mouuement du corps qui sert de genre, & le terme de  
la vehemence alteratiue qui sert d'espece, sont les choses qui en  
essence & non autre, sont faire l'exercice; lequel, encores qu'il  
soit fait contre la volonté de celuy qui par son mouue-  
ment sera arriué au but d'alterer sa respiration, se nommera tou-  
tesfois exercice, sans adiouster ce mot de mouuement volōtaire:  
mais si bien par force, ou par contrainte, & non volontaire-  
ment; & encores qu'il semble n'auoir esté fait auec intention  
d'acquiescer ou maintenir vn bon estat de santé, si ne laissera-il  
pour cela, moyennant le mouuement du corps d'estre exerci-  
ce,

ce, & d'auoir causé selon la nature & complexion du mouuant, le secours ou perte qui s'en pouuoit ensuiure pour le recouurement, ou pour la conseruation de sa santé: le voudrois sçauoir d'auantage de ce maistre Docteur, qui ose reprendre Gallien, en quel escolle il a appris qu'il n'appartient au Medecin traicter d'autre exercice, que de celuy qu'on faict volontairement, en se mouuant avec alteration, ou extension de l'aleine, & pour conseruer & acquerir ceste santé, que nous auons tant de fois nommee. Quel Autheur Grec, Latin, ou Arabe a iamais dit, pensé, ou escrit vne telle chose? n'est-ce l'office & deuoir d'un parfait Medecin, de non seulement traicter, mais aussi de discerner & iuger, & en fin déclarer l'ordre, le moyen, & la qualité de tous les mouuemens & exercices du corps, qui diuerfement y peuuent produire diuers effects, tant bons que mauuais, pour la santé de l'homme? Si on me disoit qu'il ne voulust traicter que de l'exercice volontaire qui se faict avec sa desfinie intention; & que pour ceste cause il auoit ainsi desfiny: ie voudrois que cestuy-la me respondit, pourquoy doncques ie repren Gallien, qui a comme vn precepteur vniuersel, traicté en general tous les exercices, duquel luy mesmes a tiré le principal fondement de son oeuvre? Pourquoy proposant vne desinition qu'il a particulierement inuentée à sa fantasie, d'un exercice borné, il veut que les Medecins doiuent discourir d'iceluy seul, & non d'autres, pour le seruice & instruction des hommes, qui se voudroient ayder de l'art de la Medecine, pour sçauoir que c'est exercice, & non exercice.

Cos. Vous estes asseurement le grand vengeur des iniures faites aux anciens Autheurs, & ne le pardonneriez pas mesmes au pere qui vous a engendré; & combien que ce-cy pour le zele que nous deuons porter avec tout honneur & respect de la verité, aux anciens, soit assez bien faict, afin que le sçauoir public des hommes ne soit deceu par les escrits d'autruy, en luy persuadant l'ombrage de la fauceté, au lieu de la chose vraie; si le pourroit-on toutesfois fort bien faire, sans tant s'alterer, comme vous auéz faict: c'est pourquoy en quatre paroles, ie vous veux faire ouyr, & à toute ceste compagnie vne plaisanterie, qui est la plus propre du monde à ce propos, comme elle

### LE III. DIALOGVE

me fut d'un mien cher amy, n'agueres racomptee; me disant qu'il auoit cognu en la grande Eglise del'Archeuesché de Tolete, vn fort riche Chanoine, lequel guarit vn esclau, qui luy auoit cousté trois cents escus, luy faisant faire vn exercice que les Medecins luy auoient monstré, d'autant que le Chanoine ay moit fort l'esclau, tant pour ce qu'il estoit vn bon Musicien, que pource qu'il auoit vne voix la plus excellente de toutes les autres qui estoient en la ville de Tolete: parquoy voyant qu'il s'en alloit peu à peu malade, ne luy sçachant plus que faire, apres quelques medecines, les Medecins conseillèrent au Chanoine de le faire trauailler, & que sans doute la continuation de l'exercice estoit plus que toutes autres choses suffisante; à le remettre au premier estat de sa santé: Or ledict Chanoine ne voulant à ce contraindre l'esclau, s'aduisa d'une finesse, par le moyen de laquelle l'esclau feroit cest exercice, sans contraindre, d'autant qu'il voioit qu'il s'addonnoit mal-volontiers à courir, cheminer, & sauter, pour faire exercice conuenable: ceste ruse fut qu'il promit à l'esclau de le marier avec vne belle fille de sa maison, laquelle il lay moit vniquement, pourueu que durant toute l'annee presente ledict esclau eust à chacune matinee, de bonne heure, & à chacune soiree auant le soupper, à apporter deux ou trois grands seaux d'eau, depuis le fleuve de Tago, iusques à son logis: Icy faut-il noter que depuis ledict fleuve de Tago, iusques au logis du Chanoine, il y auoit bien demie lieue de chemin, & pour mieux asseurer Balthasar, (ainsi se nommoit l'esclau) de son mariage, & luy faire croistre d'auantage les ardesntes flammes d'amour, es chaudes, ou plustost bruslantes entrailles de son corps Ethiopien, il fit que ladicte belle fille luy presenta avec vn doux-baiser, vn anneau, comme pour arre & signe tres-certain de ce que tant il desiroit: parquoy le pauvre Balthasar s'en alloit totalement amoureux, faisant soir & matin le voyage requis, de telle sorte qu'il luy failloit suer, pour estre le chemin de Tolete audiect Tago, comme est celuy du sommet d'une montagne au bas de son plain, y descendant pour amplier ses seilles; puis s'en retournoit le mieux qu'il pouuoit, montant la montagne à la faueur principale de l'amour, auquel sans autre pensee, il auoit sa volonté

fichee, ensemble le seul pensément detoute son intention, & ne se soucioit, ny de guarir, ny du trauail qu'il prenoit, s'exercant contre sa volonté, si ce n'estoit en considération du beau visage de la fille, & non d'aucune autre chose, ne voulant faillir ( iusques à ce que l'Esté fust passé) à tousiours porter les seilles plaines d'eau, afin de iouyr du frui&t de son amoureux mariage, lequel on luy auoit promis: mais il luy aduint tout autrement, parce que la nature de son corps qui estoit deuenue paresseux, & qui auoit les veines, les membres, & les iointures remplies de beaucoup d'extremes nuisibles, par le moyen de la force & vertu du mouuement qui le reschauffoit, & faisoit suer & digerer mieux les viandes, luy purgeant sans qu'il s'en apperceust les superfluitez de son corps paresseux, se vint peu à peu à trouuer dispose, saine & gaillarde sur la fin dudict Esté, apres que son maistre l'eust encores vne fois fait purger. Si est-ce que iamais l'esperance qu'il auoit en cest amour n'eust aucun effect, pour lequel il auoit sans aucun desplaisir prins tant de trauail, allant iusques à la riuiere, suant à grosses gouttes, & retournant presque sans aleine, à demy mort, avec ses seaux pleins d'eau.

FERR. En effect, il nous falloit encores ce plaisant compte du More amoureux pour nous faire à tous resiouyr les esprits: Certes vous auez prins au poil ce pauvre esclau qui ne fit cest exercice avec autre intention que de se pouuoir marier puis que n'ayant aucune volonté de se remuer, moins alterer son aleine, il y alloit tous les iours, selon l'opinion & deffinition de nostre moderne autheur, il faudroit dire qu'il n'auroit fait aucun exercice, & qu'il n'appartiendroit au Medecin de traicter d'un tel exercice, puis que la volonté & intention de trouuer ladicte santé, n'estoit point en cest amoureux Balthasar: mais il sera meilleur que laissant maintenant cela, ie responde à vostre premiere proposition; ie vous dis donc qu'encores qu'on ne peust proprement appeller exercice, quand on marche modestement, en se pourmenant, puis que selon sa deffinition, il y est requis vne telle quantité d'un violent mouuement du corps, qu'elle soit suffisante à pouuoir alterer l'aleine: ce neantmoins d'autant que tel marcher est un mouuement de la

### LE III. DIALOGVE

personne, qui est le fondement principal de l'exercice: on ne peut nier que l'homme marchant, ne participe à l'exercice, bien qu'il ne vienne à alterer sa respiration: mais la predication, la lecture, la parole, nous pourroit sans doute alterer l'aleine, si nous lisions ou parlâssions avec affection & vehemence, l'espace de trois bonnes heures, plus ou moins, selon les particulieres complexions d'un chacun: & bien que l'exercice n'assubiettisse tous les membres du corps en general, si ne laisse pour cela la nature de l'homme de se ressentir de l'vtilité & incommodité qui en peut aduenir. D'auantage les frottemens seruent d'exercice aucunement à celuy qui ne le pourroit pas de foy faire, pour ce que par le moyen d'un tel frottement on luy excite peu à peu la chaleur naturelle à la disposition des conduits des porres du corps, & à la resolution de plusieurs vapeurs & superfluitez que par leur moyen sortent hors de la personne. Cecy estant vne des principales vtilitez qu'on peut esperer de quelque vtilité que ce soit. Non sans raison les Medecins ont compris lesdits frottemens sous la signification generale du nom d'exercice, encores que le mouuement du corps ne cause tousiours l'alteration de l'aleine & respiration de l'homme, comme i'ay dict cy-deuant. C'est pourquoy nous ferons pour nous rendre plus intelligibles quatre differences de la qualité, de l'exercice corporel: Je dis de la qualité & non d'autre, pour sçauoir distinguer quel est l'exercice qu'on doit appeller foible, & quel celuy qu'on doit nommer temperé, & quel est celuy qu'on appelle robuste. L'exercice foible ou tardif & lent est cet exercice, le mouuement duquel ne fait ny suer, ny autrement alterer la personne qui le fait: & cest exercice n'attendrit, dissipe, diminue, consume, purge, ny ne resoult les humeurs & superfluitez du corps humain, parce que trop peu & trop lentement peut-il exciter ou accroistre la chaleur naturelle. La seconde difference de l'exercice est celuy qui est temperé, lequel on doit entendre estre celuy duquel le mouuement va sans aucune fureur, & auquel toute l'extreme force & valeur du corps ne s'employe, faisant suer la personne peu à peu, luy excitant & accroissant la chaleur naturelle iusques à ce qu'elle arriue à vne alteration mediocre de l'aleine: & cestuy est l'exercice tant necessaire à la prolongation & conseruatiō de la vie &

fanté des hommes: c'est celuy qui accroist la force & dispositiō de tous les membres: c'est celuy qui maintiēt la nature, qui la descharge & purge de toutes les superfluitez qui luy peuuent empescher l'office de gouverner avec vne saine proportion, la complexion de l'homme: c'est finalement celuy qui rēd peu souuent les personnes subiectes au Medecin & aux Medecines: C'est celuy qui attendrist les humeurs; qui resoud leurs excremens, qui nous fait bien digerer le boire & le manger, qui nous fait bien dormir, & nous conserue iusques à la mort, sans comparaison plus sains & dispos estant fait avec obseruation que nous declarerōs cy apres. La tierce differēce est celle de l'exercice furieux, qui est celuy duquel la vehemēce du mouuement change & altere la respiration & l'aleine avec fureur & promptitude, sans la sueur ou avec la sueur de la personne qui le fait, & sans la moderation du temps, auquel il faudroit peu à peu aller augmentant la vehemence & force du mouuement, cōme i'ay dict cy-dessus, parlant de l'exercice moderé de l'espece precedente. Les effects de ceste tierce difference d'exercice, sont pour enflammer le sang extraordinairement, pour troubler les humeurs, & consommer en partie la chaleur naturelle qui s'en va presque par la furieuse agitation en l'ardeur d'une flamme enflammant la nature du cœur, & de tous les autres membres de la personne: & pource ne s'ensuit qu'il purge, qu'il attendrist, ny qu'il resoue les excremens ou nuisibles superfluitez du corps humain. La quatriesme & derniere difference est de l'exercice robuste, fort & dispos, qui doit estre celuy, le mouuement corporel duquel se fait avec la plus-grande force de la personne, laquelle on y employe sans y espargner aucunement la disposition & force des membres, iusques à alterer fort violemment l'aleine: mais non pas avec la fureur & promptitude que i'ay déclaré, discourant de la tierce espece ou difference d'exercice. Au contraire les effects de l'exercice fort & robuste sont resoudre & attenuër toutes sortes d'humeurs, d'excremens & telles choses lesquelles sont ou seroyent causes du deffaut de la fanté, ou de sa bonne conseruation, bien que le corps ne soit pour s'en engraisser beaucoup, le continuant souuent; d'autant qu'il participe presque beaucoup plus de la na-

### LE III. DIALOGVE

ture, du trauail, & de la fatigue qu'il ne fait de l'exercice, encores qu'on ne passe le but & terme de ladicte violence alteratiue de l'aleine, veu qu'il est certain qu'employant toutes nos forces à faire quelque exercice, sans auoir esgard à la force & disposition de tout nostre corps, on peut dire que la nature estant agitée sans aucune conuenable proportion reçoit vne certaine peine & trauail plustost qu'un exercice secourable commode & gracieux.

COS. Vous ne voulez pas donc que la vehemence du mouuement corporel, afin qu'elle puisse estre proprement nommee exercice, passe la reigle de ceste qualité, qui peut sans fureur, & sans employer toutes les plus gaillardes forces du corps alterer la respiration de l'aleine; cōtraignant la personne à suer, luy excitant la chaleur & les esprits, tant vitaux que naturels; & que ce soit de mesme de tout tel autre mouuement qu'on voudra, qui en ceste sorte arriue au but de l'alteration de l'esprit, & de l'aleine de l'homme, estant fait à propôs, ou pour expressement s'exercer, ou pour non s'exercer, pourueu qu'il ne passe ce but: & pource que la qualité de paruenir à ce but peut aduenir en diuerses manieres, les quatre differences du mouuement (qu'on peut nommer exercice) cy-dessus exposez, se doiuent remarquer, encores qu'iceluy ne soit prins en vne mesme maniere, selon celuy qui peut arriuer par vne façon desdictes qualitez, lesquelles neantmoins toutes ensemble n'outrepassent la vehemence quantitatie (s'il faut ainsi parler) requise à pouuoir suffisamment alterer l'aleine: Donc il me semble que selon vostre distinction methodique: Toutes les fois que la personne qui faict quelque exercice, si le continuant il surpasse la force du mouuement & vehemence qui luy peut alterer la respiration beaucoup, ou vn peu plus que ne souffre la deffinition de l'exercice; on doit en tel cas dire qu'une telle personne s'est trauaillee, & non simplement exercee.

FERR. Voilà ce que l'on peut moyennant le iugement de la raison, avec l'experience & autorité de Galien, proposer generalement de la deffinition & qualité de l'exercice, gardant & obseruant encores les particulieres considerations, selon la reigle & ordre que nous auons proposee, dont voulant en ve-



nir tost afin, sans entrer d'auantage en autre dispute, ie voudrois qu'il vous pleust discourir des complexions, de l'indice, & des signes, moyennant lesquels chacun pourroit facilement, & asseurement cognoistre la nature de sa complexion; tant pource que ie sçay que vous estes fort bon amy de ce grand Philosophe, & tres-excellent medecin, nommé Leuinius Lemnius, lequel auant qu'il imprimast son œuure tres-digne, intitulé des Complexions, par luy nommees en latin Temperamens, vous les auoit (comme j'ay autrefois de vous entendu) communiquez, afin que pendant que vous en discourrez l'aille en ma memoire recherchant abbreger la narration des particularitez que nous auons alleguees, sans obmettre toutefois ce tant necessaire & singulier contentement qu'on attend des exercices, & de leurs vsages.

Cos. Si j'ay cognu fort familièrement le tres-docte Lemnius qui a singulièrement escrit des complexions, vous au contraire auez conuersé avec le docte & tres-subtil esprit du S. Iaqués Tabora, lequel auoit proposé de finir son volume, qu'il a fait de tous les animaux nutritifs, seruans à l'homme, avec la declaration partituliere de toutes sortes de complexions: œuure digne d'un tel docteur, & qui est sans comparaison plus que tous autres profitable au genre humain: c'est pourquoy il ne falloit point chercher le moyen de me faire plustost que vous mesmes discourir des complexions, par le moyen de l'amitié contractee avec Leuinius: mais puis que vous le voulez, pendant que m'aduiseray de vous preparer la memoire pour incontinent apres traicter en bref des obseruations particulieres, j'à proposees; ie vous deschargeray volontiers de ceste charge, & pensee; & pour cela preparez vous à nous satisfaire promptement pour le reste: ne pensez que ie sois icy pour dire, traicter, ou disputer des complexions, comme les meilleurs Medecins & Philosophes pourroient faire: car outre que ce seroit sans propos, la nuit auant que nous en eussions dict la moitié, seroit toute passée entierement; parquoy il m'en faut abbreger le discours, le plus briuesquement qu'il me sera possible, embrassant seulement ce que ie recognoistray estre plus necessaire pour paruenir à la cognoissance desdictes complexions.

### LE III. DIALOGVE

FERR. Sans doute ce seroit se vouloir rendre maintenant expressement enuieux, se destournant de nostre propos, des exercices: il suffit seulement que vous declariez les plus communs & certains termes des complexions, pour les pouoir distinguer & cognoistre generalement.

COS. Il est tres-certain, comme vous sçauiez fort bien, qu'une grãde partie de toute la medecine se gouuerne, moyennant le iugement & raison d'une reigle & coniecture qui nous conduict souuent à la cognoissance de la verité, des choses desquelles nous ignorõs l'estat certain; comme seroit pour exemple la science certaine de la nature & qualité du degré particulier d'un si grand nombre, & si diuerses & differentes complexions, lesquelles encores qu'on les puisse desfinir, proposer & considerer en neuf sortes & manieres, apres leur premiere generale desfinition, nous suiuant ce qui faict à nostre propos, declarerons les choses, moyennant lesquelles chacun pourra cognoistre quel est celuy qui est de complexion sanguine, c'est à dire, chaude & humide, & quel est celuy qui est de complexion cholerique, c'est à dire, chaude & seiche, & celuy qui est de complexion flematique, c'est à dire, froide & humide, & celuy qui est de complexion melancolique, c'est à dire, froide & seiche: car outre que ces quatre sont les plus vsitees entre les Medecins, quand on traicte de la conseruation ou restitution de la santé, elles sont aussi comme composees, & non simples, plus visibles & traictables entre toutes les autres complexions de l'humaine nature: or les signes de ladicte complexion sanguine, chaude & humide, sont (si j'ay bonne memoire) les cheueux noirs, & quelquefois presque roux, ou à present de chastaigne: les veines des yeux apparentes, la barbe de couleur noire, ou de chastaigne, le corps charnu, & non fort dur, moyennement chargé de poil, la couleur de la face & de tout le corps blanche, tirant un peu vers le roux, l'homme subiect à fiebres, & autres infirmitiez causees de chaleur, le poulx grãd, frequent & agile, l'esprit prompt aux actions, subiect à l'air, & non gueres à la cruauté, la voix plustost grande & haute que petite & effeminee, de bon appetit & digestion, de veines grandes par tout son corps, & d'une telle nature que les choses  
chaudes

chaudes luy nuisent fort, & les choses moyennement froides & seiches, avec le temps, luy sont plus profitables que les choses d'autre qualité: & les hommes qui sont de ceste complexion, ne se gastent point par la conionction venerienne, pourueu qu'elle ne soit trop immoderee, estant de nature doüez, de force, de promptitude, de puissance, & de quantité de la science qui est tousiours requise à l'acte venerien: l'indice de la complexion cholerique, chaude & seiche, se prend des cheueux noirs & poils durs, aspres & crespéz: les yeux roux, le corps fort peu blanc & chaud, au touchement, dur, sec, & plustost maigre qu'autrement; la teste souuent petite, ronde, & aigre, comme vn pain de sucre, d'une imagination furieuse, & prompte temerité: le sein ample & large, & fort pelu; le poulx fort prompt & grand; la voix fort mal sonante & agreable; l'appetit de chien; le cœur fier & fort cruel; l'esprit implacable, fantasque & fascheux; le corps subiect à plusieurs infirmitéz, presque toutes procedâtes des humeurs cholériques, & d'une telle nature, que de la moindre chose chaude & seiche, il est incontinent offensé, & au contraire aydé par les qualitez froides & humides: & non fort suffisant à l'acte venerien, encores qu'il en aye tousiours le vouloir & le desir fort ardât; pour cela ne faut-il pas conclure que quiconques n'aura toutes ces qualitez en luy, ou les precedentes se puisse exempter, de n'estre de complexion sanguine, ou cholerique; mais pour n'en pouoir icy parler, sinon en general on dira que celuy est plustost de complexion chaude & humide, ou chaude & seiche, qui participera à la plus grande partie des signes, qui appartiennent plus à une complexion qu'à l'autre.

FERR. Poursuyuez ie vous prie la declaration des signes de la complexion flegmatique & melancolique. Et parce qu'il seroit à present impossible d'en discourir particulierement, nous nous contentons que vous en discouriez généralement pour seulement en recevoir une cognoissance generale.

COS. Certes si nous voulions particulierement traiter d'aucuns qui estant de complexion sanguine, & non du tout cholerique, semblent toutesfois estre cholériques, pour auoir

la teste ou le cœur ou le foye dominez & maistrisez plustost par ceste qualité bilieuse que d'aucune autre que ce soit, & cōme souuent il aduient que l'estomach ou la teste soyent de cōtraire complexion, & d'une qualité differente à la particuliere composition des membres principaux du corps humain, il y faudroit employer, cōme on dit cōmunēmēt, vn Cāresme pour en faire vn entier discours. Et si ces Seigneurs vouloyent à plain entendre la nature & parfaicte cognoissāce de ces cōplexions mieux que ie ne pourrois le dire à present, ils pourrōt recevoir contentement de leur desir, lisant l'œuure fort docte qu'en a fait le rare. & excellent esprit dudit Docteur Letinius Lemnius. Donc passant outre pour declarer les signes de la complexion flegmatique qui est froide & humide, Ie dis que les signes d'icelle, sont d'auoir les cheveux de la couleur qu'ont les espies estans meurs, quelque fois tirant vn peu vers le clair, roux, & d'auoir le corps denué de poil, & la chair de couleur blanchatre, tirant presque à demy à ceste couleur qu'ont les taches des meurtrisseures de la personne, estant naturellement plustost maigre que fort charnuë ou grasse, & d'auoir le touchemēt mol & maniable, sans aucune fermeté entre cuir & chair : laquelle on recognoist en fin estre subiecte au froid, ceux qui sont de ceste complexion sont d'une imagination, deliberation & pensee tardifue, mais d'une memoire assez stable & ferme, fort subiects à dormir, & n'ont la parolle fort prompte, & ne deuiennent point chauues en leur vieillesse, ils ont le mouuement tardif & paresseux, les yeux blanchatres, non fort vifs, subiects avec le nez & les oreilles à beaucoup d'humidité & excremēs, ont le poulx petit, mol & lent, peu choleres, & faciles à appaiser, ont l'estomach subiect aux flegmes & humiditez, ont la voix basse, non fort prompte ny libre, si en parlant ils ne s'eschauffent, de veines non fort apparentes, ny grandes, & finablemēt subiects à vne indisposition pituiteuse & flegmatique, s'offensans fort de toute chose froide & humide, & au contraire leur sert ce qui est chaud & sec, ils sont fort peu addonnez, & ne sont prompts ou disposez à la conionction naturelle : mais surtout, ont ils de coustume en toutes leurs actions d'estre le plus souuent sans resolution. Les signes de la quatriesme & derniere

desdictes complexions, que nous auons appellez melancoliques, sont d'auoir les cheveux à couleur d'or, enflammé, ou bien à couleur de paille, rougissant à demy, d'auoir le corps tout nerueux, maigre, sans poil, dur & froid au touchement, de santé instable & incertaine, les yeux & toute la chair tirant sur la couleur liuide ou brun blanchastre, n'estans fort plaisans, ils ont la teste en leur viellesse, ny chauue, ny blanche, & leursdicts yeux, à demy enfoncez au front, plustost petits qu'autrement; le poulx ny fort prompt, ny fort grand, ils n'ont le cœur grandement enclin à courroux, mais y estant prouoqué, peu à peu il y peut estre conduit; ils sont d'une cholere qu'on ne peut appaïser, & d'une vengeance implacable & eternelle, d'une belle voix claire & delicate, les veines apparentes & non fort grandes, & d'une nature assez prompte & subtile en leurs actions; d'un entendement, iugement, memoire, & imagination fort bonne & excellente, iusques en l'aage de quarante ans; & depuis il commencent souuent, mesmes auparauant cest aage, à estre chagrins & subiects à mille soucis & pensees melancoliques, & à toutes autres fantasies, remplies de tristesse, de crainte & sollicitude brutale, telles personnes de ceste complexion sont peu enclins à la conionction venerienne, & peu souuent les voit-on rire & se delecter des ioyes communes, & parmi les compagnies; & ne vous puis dire autre chose, pour n'auoir en memoire à present ce qui fait à propos des plus communs signes desdictes quatres complexions, de la qualité humide & chaude, de la chaude & seiche, de la froide & humide, & de l'humide & seiche : & faut remarquer que ce sont celles mesmes qui se trouuent en la composition des qualitez elementaires de toutes choses composees naturellement, & qui entre les quantitez proportionnales qu'ils reçoïuent sont plus dominees, bien que ie die cecy à ceux qui le sçauent mieux que moy, comme vous.

FERR. Plusieurs laissant le mieux, se contenteroient seulement de le sçauoir bien : mais il est necessaire que ie m'expedie succinctement, touchant des particularitez qu'on doit considerer entre l'usage des exercices : Parquoy ie vous dis que iamais vne personne de complexion cholerique, a sçauoir,

chaude & seiche, ne se trouuera bien, si elle vse souuent d'un exercice temperé, ou peu, ou beaucoup, & de l'exercice furieux, ou de celuy qui est fort robuste & gaillard; d'autant que tel exercice luy dissiperoit l'humidité radicale, & le contraindroit en agitant & accroissant la chaleur, encourir plusieurs estranges accidens: c'est pourquoy la qualité foible de l'exercice de la susdicte premiere difference luy est propre & conuenable, estant tardiuë & lente, n'alterant aucunement la respiration de l'aleine, & non pour autre raison, ny pour autre cause. Hali au liure de sa pratique, a dicté que Galien auoit conserué la vie & santé d'une personne qui estoit malade tous les ans, luy deffendant seulement l'exercice, sans autre ordonnance: comme Hippocras mesme commande que les hommes qui sont de nature fort chaude, se doivent garder de toutes sortes d'exercice & trauail, par lequel est agité, le sang, les humeurs, & la chaleur naturelle: mais ceux qui au contraire sont de complexion froide & humide, sçauoir est, flegmatique, se trouueront sans doute tousiours plus sains, & de bien en mieux, d'autant plus qu'ils vseront de la susdicte seconde difference, & aussi souuent de la quatriesme, & aucune fois de la troisieme, de laquelle il faut que celuy qui est de complexion melancolique, à sçauoir, froide & seiche, ou bien sanguine, c'est à dire, chaude & humide, se garde. Si ne voudrois-je que la personne de complexion sanguine s'exercast beaucoup, ny souuent, selon la quantité de ladicte quatriesme difference, forte & robuste, mais qu'elle se contentast seulement de l'exercice temperé, & quelque fois de l'exercice foible & lent, selon que peut porter sa nature, & ainsi qu'il a de coustume, comme ie diray cy-apres plus particulièrement, traictant de la quantité du temps, de l'ordre, de l'age, & des autres considerations de l'exercice já proposees, veu que ce que nous auons iusques icy dict, se peut entendre vniuersellement: & pource retournant à la complexion de qualité froide & seiche, ie dis que ny l'exercice robuste, ny le fort, ny le furieux ne peuuent estre propres à sa santé, mais seulement l'exercice temperé de la seconde difference. Or puis que nous auons suffisamment traicté de la qualité de l'exercice propre à toutes complexions, il me semble qu'ayant

à parler de la quantité des exercices, il ne nous reste à dire beaucoup de choses de nouveau, puis que desdictes quatre différences on en peut tirer le iugement & consideration qu'on en doit auoir; & diray seulement que la quantité de toutes sortes d'exercices peut estre moderee ou immoderee: la moderee est celle qui peu à peu selon la proportion des forces du corps enflamme, & presque enfle par son agitation toute la personne, iusques à ce qu'il aye la couleur rouge, & que la sueur luy sorte chaude & gratieuse, par le moyen des mouuemens prompts, & faicts par mesure, par ce que tous les membres du corps, pourueu qu'il ne passe ces termes, deuiennent par cest exercice plus forts, plus dispos, plus robustes à soustenir le trauail, la chaleur qui conforte la vie s'en accroist, & fortifie la vertu naturelle, qui est pour attirer, digerer & nourrir, s'augmente & se conserue mieux par ce moyen, & se rend plus facilement parfaite. Les excremens estant par cest exercice amollis, se resoluent, & les petits conduicts des porres du corps se maintiennent, purgez & prompts ainsi qu'il leur est necessaire, selon le deuoir de nature: & l'homme en fin en deuient plus sain, plus frais, plus leger, plus gras, & plus dispos: mais si la quantité de l'exercice est immodéré, on peut penser que cest e immoderation procede tant de l'excés, comme du deffaut, c'est à sçauoir, en pechant tant à le faire trop peu du moins qu'il appartient, comme en le faisant beaucoup trop du plus qu'il est besoin. Parquoy si la quantité immoderee de l'exercice aduient pour estre tombé en vn vehement excés, obstiné, long, furieux & robuste, l'homme en seiche & en amaigrift, & en deuient temeraire, subiect à la cholere, aux fieures, & quelquefois à la frenaisie & autres maladies ardentes, & quelquefois à l'erisipile, & autres telles passions & accidens qui peuuent proceder de l'inflammation de la chaleur, & de tous autres humeurs agitez: mais si la quantité immoderee de l'exercice procede pour auoir peché en defectuosité d'un mouuement petit, lent, paresseux, court, sans aucune vigueur ou agitation de chaleur naturelle, la personne en deuiet peu à peu flegmatique, c'est à dire, subiecte aux maladies, de qualité froide & humide, & quelquefois aux melancolies, aux gouttes, grauelles,

### LE III. DIALOGVE

& autres telles infirmités, on obserue la consideration du temps de l'exercice, ou par l'an, ou par le iour: Par l'an, au temps d'Esté, il faut que l'exercice soit moins fort, moins long, & non tousiours cōtinué: Au temps d'hyuer, on le peut faire en consideration de la santé, vehement, long, fort à part soy, & en compagnie, en sautant, en courant ou luiçant, ou faisant autrement: Au temps des autres deux saisons opposites, qui sont le printemps & l'automne, on obseruera la moderation & reigle de la mediocrité: & quant au iour, on separe le temps auant ou apres le disner: Au temps doncques de deuant le disner & principalement de la matinee, iusques à neuf heures; trois heures auant midy, ledict exercice sera fort propre, sain & conuenable à toutes sortes de personnes, & ne faut entendre que mon intention soit qu'on se leue de bonne heure au matin, & qu'on s'en aille continuant l'exercice iusques à neuf ou dix heures; mais bien i'entends que depuis neuf heures iusques à midy, pour estre le temps plus propre & conuenable aux exercices, chacun se puisse disposer à en faire sa part, d'autāt que le corps se doit exercer quand la viande est descenduë en l'estomach, & que la digestion est faicte parfaitement au foye: Les signes de la digestion parfaite seront, si on sent son estomach allegé, ne le sentant chargé d'aucune chose, & ne prouenant aucune odeur des viandes, ny du vin, ny de toutes autres choses qu'on aye mangé ou beu, s'excitant ou poussant hors la bouche des vapeurs violentes, & sentant que l'on a faim & appetit plustost qu'autremēt: & si l'on voit que la couleur de l'vrine est moyēnement palle, ou bien de couleur d'or, c'est vn signe que la digestion est faicte; parce que ou la couleur del'vrine estoit plustost blanche que d'autre couleur, c'est vn signe certain que le suc de l'aliment du repos nutritif, se trouue encores aux veines, & n'est bien cuit, & digeré comme il faut, mais à demy cru. La couleur rougeastre est aussi signe que la parfaite digestion du suc de la viande qu'on a prise s'en va desia, & s'aduance fort es veines susdictes. D'auantage il faut prendre garde que non seulement au temps d'auant disner, mais aussi selon qu'il se presentera l'occasion en tout autre temps: il ne faut iamais que la personne commence aucun exercice, qu'elle n'aye auparauant



allegy le ventre, en le purgeant des excremens, & la vessie aussi par l'vrine, & la teste semblablement, la peignant comme de coustume, crachant, toussant, mouchant, & nettooyant ses oreilles: par le moyen desquelles choses & autres telles diligences, s'estant la nature du corps deschargee & nettooyee de toutes les superfluitez qui luy peuuent nuire à toute heure, à tout moment, & qui de iour à autre se vont multipliant, & font sortir la personne le plus qu'elles peuuent hors de la nature, l'homme se trouue plus dispos & plus apte au mouuement & à l'agitatio<sup>n</sup> qui se font par l'exercice: Ce qui est aussi necessaire, de peur que les excremens qui ne sont purgez ne se reschauffent dedans le corps, & deuiennent plus corrompus & pourris, & de peur aussi qu'ils ne soyent cause de gaster & corrompre les autres humeurs, alterant la nature qui est chargee & tourmentee de leur maligne qualite, pour ne s'en auoir peu l'homme allegir & nettoyer.

Cos. Certes cest aduis secōde la raison des plus fameux autheurs, & est necessaire tant à ceux qui veulēt s'exercer, comme à toutes autres sortes de personnes que ce soit; n'estant aucun doute que les excremens du corps estans retenus ou empeschez au dedans, peuuent estre cause de plusieurs & diuers accidents nuisibles à la santé humaine. Parquoy selon que souuentefois me souloit dire le fort docte Lemnius, Il faut que comme nous voulons que les seruiteurs ou seruantes soyēt chacune matinee diligents à ballier & nettoyer nostre chambre, nostre salle, & nostre maison, afin que toutes choses durent & soyent plus belles, & semblent plus dignes de nous, & de nostre habitation, qu'ainsi si nous voulons nous conseruer plus sains, plus forts, plus gaillards & moins valetudinaires à chacune matinee, nous nettoions la chambre, la salle, & en fin toute l'habitation de nostre ame, qui est le corps, les allegissant & purgeant tousiours de toutes les superfluitez & excremens, qui ordinairement y sont & y croissent, afin que la nature ne s'en puisse ressentir, n'en estant aucunement chargee, empeschee, ny alteree, mais estant tousiours allegie, nette & dispose à conseruer en estat sa vertu, tousiours prompte & gaillarde, d'où naist & procede la continuelle santé & longueur de vie.

### LE III. DIALOGVE

FERR. Je dois apres vostre digression fort bresue & vtile traitter du temps qui s'ensuit apres le disner, lequel, comme nous auons dict, est fort incommode, mal propre & conuenable à la personne qui se voudroit exercer, d'autant que l'estomach & le foyen'ayant encores digeré les viandes, sont empeschez en la vertu attractiue, defectiue, & distributiue de l'aliment nutritif: parquoy de tels exercices faicts hors le temps, la vertu qui digestiue est empeschee & destournee de son office & action, & est cause que le corps se remplit & abonde en general de plusieurs cruditez & de toutes autres sortes d'humeurs superflues, indigestes & confuses: Dont s'en ensuit par apres vne infinité de maladies & autres passions & semblables accidents contraires à la santé. Or discourant de l'ordre qu'on doit obseruer en s'exercant, il est necessaire sçauoir qu'auant l'exercice, & apres iceluy, doyuent precéder & suyure quelques agitations, mouuemens, & autres telles choses qui maintiennent la nature du corps plus prompte apte, & dispose à l'exercice. C'est pourquoy il faut noter qu'anciennement auant que les hommes commençassent à luyster, à courir, à combattre à coups de poing, & à s'esbattre avec plusieurs autres plus forts, plus furieux & plus robustes exercices, ils se faisoient frotter & oindre avec vne certaine composition faicte d'huile & de terre qui estoit aucunement blanche, subtile & delicate, & la conseruoient avec vn grand soing & diligence: d'autant que tels frottemens seruent de beaucoup à la nature de celuy qui s'exerce, luy rendant les nerfs, les muscles, les ioinctures, & tous les membres plus fermes, plus dispos, plus agiles, plus aptes, & plus prompts & vifs à l'office & exercice de toutes sortes de mouuemens, ce qui estoit necessaire à quelque exercice qu'on eust voulu faire: mais principalement pour l'exercice violent, long, obstiné & robuste, comme celuy que faisoient les Athletes si gaillards & fameux entre tous les autres: lequel exercice y a fort long temps qu'il ne se pratique és publics exercices. Et n'y a aucun doute que si aucun vouloit sans autre preparatiō à l'impourueu, faire ou reiterer vn long exercice vehement & furieux, n'ayant auparauant prins garde à la nature, ne s'estāt frotté les membres, ny rendu leurs mouuemens faciles, ny subtilié

tilié & allegy la pesanteur, l'estourdissement ou estonnement de toutes les parties de son corps, ouurant & preparant les conduicts des porres & humeurs d'iceluy pour le préparer à vne autre plus grande agitation & mouuement, iceluy pourroit le plus souuēt tomber en peril de se briser ou disloquer, quelques membres, ou bien de se rompre du tout, oultre que tous les excremens & superfluitez du corps s'esmouuans & reschauffans totalement, moyennant l'ardente & furieuse agitation des esprits naturels, vitaux, & animaux, seroyent occasion que la personne pour ne s'estre mieux preparee aux exercices s'en trouueroit fort mal, & plus encores mal disposee à les faire. Or il y a deux choses qu'on doit obseruer au frottement, à sçauoir, la qualité & quantité: la quantité, parce qu'au commencement les membres vn peu auant l'exercice doyuent estre en toute diligence frottez doucement, à loisir, avec frottoirs de toille deliée, & se doit le frottement continuer peu à peu, avec douceur & legiereté, iusques à ce que le corps soit reschauffé: apres se doyuent peu à peu faire les frottemens plus forts & gaillards, adioustant en fin si besoin estoit de l'huile, en laissant le frottoir de toille, & vsant d'vn tel frottement & fait en ceste sorte, iceluy ne resould les forces, mais les conforte & rend plus dispos, fortes & promptes, excitant & fortifiant la nature & mouuement des nerfs, des muscles & des ioinctures de tout le corps humain qui en deüient plus agile, plus souple, plus prôpt & dispos pour toute action & mouuement requis à l'exercice: que si au contraire on n'obseruoit l'ordre de ceste quantité de frottement, l'effect contraire s'ensuyuroit, le sang s'enflammeroit, les humeurs se confondroient, la disposition & santé du corps s'altereroit; ce que bien qu'il n'apparoisse si tost, ny qu'on s'en apperceioie & ressentie si promptement, si est ce que la personne vient peu à peu à s'en trouuer toute indisposée & fort mal: combien qu'à present nous n'vions plus de tels frottemens, & qu'iceux ne soyent fort necessaires, puis que l'vsage de ces exercices, forts, vehemens & furieux ne se trouue qu'entre les barbares de la Cour du Turc: C'est pourquoy passant à la qualité du frottement on lit qu'on le doit premierement faire de long & estendu de haut en bas, puis apres de trauers, le frot-

teur fera les frottemens à la forme d'une demie croix obliquement & de trauers, les continuans en ceste maniere, & en autre peu à peu, selon les differences des lieux par où le frottoir passera, d'un costé & d'autre, ce qui aduendra avec vn chatoüillement plaissant & gracieux: car on ne scauroit croire combien profite à la nature de tous les membres ces caresses reiglees, accroissant leurs forces sur la moytié de ces frottemens, non pas trop, mais avec vne douce disposition, finissant ces frottemens avec les mains oinctes d'huile, les passant sur les membres legerement sans fort les appesantir ny presser dessus, en sorte que tel frottement ne contraigne, ny contourne la personne, parce que faisant autrement on feroit plustost retirer les nerfs en offensant les ioinctures & les muscles, que de les rendre comme il est requis, soupplés, disposés & prompts à tous mouuemens qui sont requis à l'exercice. Quant aux frottemens qui se doyuent faire apres les exercices, chacun scait qu'ils sont necessaires, tant pour s'essuyer & nettoyer la sueur & crasse, comme pour la recreation repos & soulas des membres; & de toute leur nature, vsant pour cet effect de frottoirs de toile delicate, plustost chauds que froids, chauffez au feu, & faut ce faire en vn lieu temperé, & selon la saison en s'approchant du feu, comme on void que font aujourd'huy les plus aduisez apres auoir joué à la balle & autres tels exercices qui font suer la personne. Et parce qu'il n'est besoin que ie discoure plus amplement de ceste particularité, attendu que l'vsage public des exercices, tant estimé anciennement, est aboly entre nous, & que si par curiosité aucun en vouloit entendre l'entiere pratique, tant en general qu'en particulier, il pourroit en receuoir vn parfait contentement, lisant les belles œures qu'en a fait l'excellent Docteur Mercuriale, intitulez Gymnastique. Je dis pour entrer au traictement particulier de l'aage de l'homme, requis aux exercices, qu'il ne faut estimer que les enfans dès leurs premiere & plus tendre enfance, succant encores le lait de la nourrice, puissent de leur nature supporter avec entiere santé, l'agitation, mouuement, ou reuirade, que leurs folles nourrices & mal aduisez peres leur font, manians indiscre-

tement les foibles membres de leurs petis enfans, pour rire & s'esbattre avec eux, sans aucun iugement, estant les iointures encores fort foibles, & à la forme d'un fromage caillé fort mol & delicat; il ne faut les froter, manier, ny en aucune maniere les efforcer follement: mais en ceste premiere aage laisser faire nature d'elle mesme, ce qu'elle sçait mieux que nous estre necessaire pour la conseruation & aduancement de son indiuidu. Nous voyons suyuant ce que nous auons dict cy-dessus, que, si tost que l'enfant se peut vn peu ressentir de bien en mieux, croissant plus gaillard, il ne va tout le iour cherchant autre chose que le moyen de s'exercer, courant, sautant, cheminant, ou faisant autrement, sans qu'aucun luy enseigne; mais aussi tost qu'ils sont arriuez à l'aage de sept, huit, ou neuf ans, comme tous les meilleurs Medecins & Philosophes ont dict, escrit, & conseillé; il sera bon que les enfans aucunesfois s'exercent à l'escrime, & quelquefois à manier des cheuaux, autrefois sautant, courrans & esprouuans en eux-mesmes, tous les exercices que leur nature pourra mieux supporter, tant pour la conseruation de la santé, cōme pour la disposition, promptitude, force, agilité, veille & diligence qui s'en ensuiuent; & que l'homme & chacun de ses membres peut acquerir: lequel en la ieunesse, qui est l'aage la plus agile, dispose & gaillarde, & entre toutes les autres la meilleure, se trouue plus apte pour supporter & endurer aisément toute sorte d'exercice & travail vehement, fort long, fascheux, ainsi qui luy vient à l'entendement, ou à la fantasie, tantost pour vne chose, tantost pour autre: mais il est bon besoin qu'un chacun soit aduertý par sur tout qu'autant qu'il s'approchera de la vieillesse, en declinant son aage, d'autant moins il employe la plus grande partie de ses forces, vsant follement des agitations & mouuemens de ses membres: mais que plustost il s'abstienne tousiours de tout exercice vehement, furieux, fort & penible, & autres semblables. I'ay seulement dict qu'il se doit abstenir de ces exercices violans, mais non pas de tout autre, car il faut que l'aage & nature, tant de la vieillesse que de la ieunesse, s'exerce; estant à vn chacun d'eux, requis le mouuement de quelque exercice, pour-

ce qu'autrement la chaleur naturelle des vieilles personnes viendroit plustost à defaillir & s'anichiler, & s'esteindre, pour n'estre aydee de l'exercice conuenable, qui est si propre aux vieillards, que le mesme Hippocras, entrant en telle consideration, a dict que plusieurs personnes en leur ieune aage, n'ont pas grand besoin d'exercice pour se conseruer, mais qu'on ne trouue, ny ne trouuera-on iamais aucun viellard qui se puisse longuement maintenir en santé avec vne longue & ioyeuse delictation de sa vie, s'il ne fait & continuë quelque exercice. Il est bien vray, que comme leur chaleur naturelle se console fort, & se confirme en l'excitant, & presque la renflamant par le moyen d'un doux & plaissant mouuement, ainsi au contraire elle se perdroit du tout, si l'agitation & mouuement estoit vehement, long ou furieux. Et si on le practiquoit autant & plus habillement qu'il est fascheux & penible, mesmement si tels vieillards se vouloyent exercer, comme plusieurs font, és choses qu'ils n'ont apprises en leur ieune aage, dançans immoderément, luisant, ou bien maniant avec trop grande opiniastrété un cheual, n'ayans auparauant iamais accoustumé leur corps à un tel exercice. Estant nécessaire que la vieillesse face seulement les exercices desquels elle a la cognoissance & l'usage, soit ou pour les auoir autresfois apprises & continuees, ou soit pour s'y estre peu à peu accoustumee, prenant garde de laisser à part leur trop longue vehemence & continuation, & n'oubliant aussi à s'y exercer trop, si tost qu'il sent mouuoir les membres lesquels il recognoist estre les plus forts & gaillards de tout son corps, car les autres parties de la vie s'en seruent, & s'en maintiennent mieux les excitant de leur estourdissement & lascheté. Cecy est tout ce qui m'a peu venir en la memoire à present, pour discourir des aages, pour l'usage & pratique des exercices, les considerant seulement en general, ainsi que i'auois proposé: reste que ie vous en discoure autant briefuement qu'on le scauroit obseruer en espee, selon les distinctions subsequentes: Car en special ou nous faisons l'exercice de nous mesmes, ou par le moyen de l'ayde ou appuy d'autre chose. Si nous le faisons de nous-mesmes, sans aucune ayde, nous le faisons, ou estans sains & disposés ou bien estans malades & indisposés: si

nous nous exerçons sous l'appuy & ayde d'autres choses, c'est ou à cheual, ou en coche, ou en vne litiere, ou bien en vne barque sur l'eau, ou bien sans nous mouuoir seulement, nous faisans frotter, comme nous auons dit cy dessus.

Cos. Il ne faut plus que vous alliez vous enuiant à poursuivre les particulieres considerations des chefs proposez en special que tous ces Seigneurs peuuent par les precedentes raisons & par leur bon iugement & conseil des Medecins & lecture des bons auteurs qui en traittent, sçauoir aisément & en tirer la meilleure & plus saine partie: car outre ce que l'heure est fort basse & proche de minuiet, ie ne croy point que toute ceste illustre assemblee se soucie fort des particularitez infinies que vous poursuidez par le menu: car elles seroyent plustost cause de nous enuier que de nous contenter d'auantage de ce que vous nous auez (de vostre grace) monstré avec tât de doctrine & bresuieté, attendu que nous n'auons discouru ny disputé, ny peu ny trop, de l'exercice de l'esprit.

FERR. Quand à ce qui appartient à l'exercice de l'esprit, tant pour ce qu'en breson en pourroit dire quatre paroles comme pour autant que vous vous y estes exercé plus qu'en toutes autres choses, ie vous en voudrois laisser la charge pour en discourir sans plus grande ceremonie, afin que nostre Dialogue nocturne print fin.

PIN. Certes ce Dialogue icy est vraiment nocturne, duquel ie n'ay tiré autre fruiet sinon que de me ressouuenir que le coq entre les autres animaux va signifiant avec son chant, les principales & plus remarquables heures du iour & de la nuit, mieux que ne font souuent les artisans d'Architas, ou d'Archimades.

TETTI. Certes ie pensois que le Pin dormist à bon escient, mais à ce que ie voy, sa sommeilleuse apparence ne l'a priué aucunément de la veille de l'esprit, non plus que de la promptitude du corps.

Cos. Ie ne voidrois vous contredire n'estoit que ie me doute que nostre gentil Pin parle en dormant, cōme font plusieurs autres, qui non seulement font le semblable, mais aussi se leuent du liēt, cheminent & montent à cheual, & autres vont

à la riuere pour se baigner, ce que comme c'est chose extraordinaire & admirable, ainsi d'icelle, ny d'autres semblables effets n'en peut-on rendre aucunes raisons diffinitives selon la nature.

FERR. Le S. Cosme voudroit avec vne telle digression s'excuser paraenture de traiter de l'exercice de l'esprit : ce qui reste seulement pour conclure avec vn entier contentement à toute ceste honorable compagnie, le discours que nous auons fait des exercices iusques à present. Quant à ce que le Pin dorme ou non, qu'il parle en dormant, ou qu'il dorme en parlant, encores qu'il aye les yeux & les temples rouges & enflés, & la voix enrouée, si ne nous fera-on accroire, comme ie m'asseure, que nous soyons d'auenture (ainsi qu'on lit es histoires anciennes) comme aucuns Agrigentins, lesquels pour auoir trop beu, & plus que nous n'auons fait, ayant entr'eux honoré la liqueur du Dieu Bacchus, mieux que ne pourroit faire en ce temps icy vn esquadron de bons beueurs Allemans, ayans souppé entr'eux, sans estre embarquez en aucun vaisseau de mer, estimoient estre neantmoins en peril d'un grand & eminent naufrage, encores qu'en ce temps là ne fust erigee la coustume de s'inuiter à boire l'un l'autre.

PIN. Ie me plains infiniment de ne sçauoir cōme vous non seulement deffendre & picquer les autres, mais aussi de ne pouuoir comprendre ou entendre aucunement les allegories & histoires des choses passées, ainsi que sçait faire le S. Ferrand, quand à moy pour ne me taire, & me faire en quelque chose entendre, ie vous diray comme ie l'entends, ie ne parle point en dormant, & ne dors point en parlant, encores que ie vous aye respondu, & que ie parle, car certes ie ne pourrois iurer que ie dorme puis que ie veille il y a presque plus d'une heure & demie.

COS. Maintenant apres que Pin nous a respondu comme vn Philosophe, & qui plus est, comme les Theologiēs d'Egypte, il nous a proposé vn Enigme, que, laissant là à part la Sphinx, ny Dauus, ny Edippus ne pourroyent expliquer, & duquel vous en laissant la charge S. Ferrand avec l'histoire de vos Agrigentins que le Pin n'entend point, mais vous en demande



l'allegorie en quelque façon, luy estant aduis que ce soit vn point de la cabale Hebraïque.

FERR. Je veux obeissant à vos commandemens, me despeschier de dire en bref ce qui appartient à l'exercice de l'esprit: l'exercice donc de l'esprit ne peut estre, ny se trouuer avec les hommes qu'en quatre sortes differentes: la premiere desquelles est la contemplation en nostre entendement, des choses passées, presentes & futures, par le moyen de la coniecture ou inuention, & selon les fins de nostre contemplation & discours particulier des choses naturelles, ou artificielles, selon qu'il nous semble estre pour le meilleur: la seconde difference est le discours: la tierce, l'ouye: la quatriesme, l'escriture en composant, nō comme font les Tabellions, le trauail desquels est plustost vn exercice du corps que de l'esprit, en copiant ainsi les affaires d'autrui. Encores que la quatriesme difference que ie vousay proposee de l'escriture, qui est de composer pour exercer l'esprit, n'est du tout exempte de l'office du corps, ny mesmes (quibien le voudroit considerer) l'exercice qu'on tire de l'esprit en deuisant, n'est sans l'interuention de l'exercice corporel; ce que i'ay voulu donner à entendre, afin que quelques nouueaux Aristarchiens, ne s'opposassent contre nous, avec vn Persian en main.

COS. L'vtilité de ces exercices spirituels, est si manifeste à tous, que sans traicter de leur forme, il me semble qu'il n'est requis que ie m'aduanee plus auant à la declarer, ou louer comme elle le merite dignement: seulement diray-je que la maniere consiste en la qualité, au temps, & en la quantité necessaire à s'exercer, fuyant tousiours le trop: & voylà tout ce qu'il me semble pouuoir briefuement estre dict, & obserué pour l'exercice de l'esprit. Si vous S. Ferrand ne nous le voulez plus amplement expliquer promptement, & mieux que ie ne pourrois faire, en dormant comme le Pin faict.

FERR. A ce que ie voy, vous nous avez monsté la voye de finir nos propos, ayant avec briefueté dict ce qui peut appartenir à l'exercice de l'esprit.

TETTI. Je ne peux que ie ne me souuienne du iour precedent, & ensemble de la nuit presente. Aussi ne me pour-

### LE III. DIALOGVE

ray-ie taire en quelque lieu que ie me trouue, les louanges, nō seulement que ceste Court merite, mais aussi celles que sur toutes choses merite ceste fort honorable compagnie, ayant inuenté, trouué, & pourfuyui vn tel subiect, iusques à la fin, moyennant les amis de nostre gentil Archange, lesquels ont discouru de l'exercice, & de l'art du saut, avec la demonstration de tous les effects que la disposition accoustumee du corps humain, peut faire avec art, avec assurance, & avec proposition, bien que nostre bon Pin se trouue maintenant ayant la teste basse, & nageant parmy les champs Elisiens.

PIN. A propos de nageant, ie vous iure que la memoire du saut que i'ay faict, avec le traicté qu'a faict le S. Ferrand de ces Agrigentins, i'ay esté presque sauté en dormant, & fautois, non pas en terre, mais selon l'opinion de mon cerueau assoupy, au milieu de la mer, entre plusieurs barques & nauires.

TETTI. Tous ces Gentils-hommes sont comme vous voyez appareillez à se retirer; ie parle à vous S. Ferrand, mais ils vous prient, comme ie fais aussi avec eux de vouloir favoriser le Pin, pour nous declarer l'histoire de ceste nauire des Agrigentins: car encores que ie l'aye autrefois ouye, si aurois-ie neantmoins pour agreable l'entendre de vous derechef, puis qu'il vient à propos.

FERR. Je diray volontiers ce que i'en ay autrefois remarqué, en la fameuse & ancienne ville d'Agrigente se trouuerent certains ieunes hommes qui s'estans peu à peu enyurez à la celebration de la feste de l'vn de leurs iours solempnels auquel ils auoient accoustumé faire de fort somptueux banquets, accompagnez de toutes sortes d'instruments musicaux; il aduint qu'apres auoir bien sauté, dancé, chanté, & sur toute chose apres auoir auallé plusieurs barils de vin, la nuit s'approchant, vn de ces ieunes hommes qui auoit la teste pleine de vin, & toute fumante, de sorte qu'il luy sembloit que toute la maison tournast, & tremblast, commença à crier avec vne voix vineuse & enrouee, le plus haut qu'il peut, entre tous les autres compagnons, qui se trouuoient aussi bien que luy en vn grand danger d'estre tous noyez: ne voyez vous pas disoit-il, que

que ceste galere en laquelle nous sommes mal embarquez, est poussee des ondes orageuses de la mer: O Dieu ne voyez vous pas qu'elle s'abisme, n'entendez vous pas le sifflement & bruiet des furieux vents qui nous rompent les cables & menus cordages? Ne voyez vous pas que le voile & les auirons se brisent, croyant cest yurongne insensé que les bruits du vin fumant qui luy remplissoient la teste & les oreilles des ventositez qui y bruioient fussent les vents contraires qui auoyent troublé la mer en laquelle il pensoit estre avec les autres en ce naufrage, voyant à son iugement que rien ne s'arrestoit, mais que tout se tournoit & remuoit du haut en bas: Ses compagnons qui estoient comme luy yures, insensez, estonnez & priuez de tout clair iugement, voyant qu'à la forme des ondes les murailles & toutes autres choses, sans aucune exception, se tournoient & mouuoient, comme font les nauires en la mer agitee de la tempeste, ayans iceux à ceste occasion peur & apprehension de la mort se meirent comme le premier à crier, & à requérir la misericorde & secours des Dieux, & à courir deçà & delà avec vne voix haute & confuse, disans qu'on abbaissast les voiles ou qu'ils estoient perdus du tout, ou qu'on couppast le mast, qu'on abbatist le trinquet, qu'on tint bien le timon, le penchant quelquefois à Poge, autrefois à l'ourse-Ponant, & qu'on n'abandonnast pas les rames, dont aucuns s'en vouloyent ayder, comme s'ils enfonçoient & criant, scie, coupe, vogue, tire à cest airon, accommode l'autre, tomboyent ainsi criant par terre, pensoient toutesfois estre tombez au profond de la mer, vous les eussiez veu si tost qu'ils se trouuoient à terre ne dire vn seul mot, & estans ainsi estendus de leur long hausser vn peu la teste, estendre les bras, remuer les iambes, croyans qu'ils nageassent au milieu des ondes agitees d'une grande tempeste, entre lesquelles ils pensoient estre fermement, demandans ayde & secours aux autres, lesquels estoient d'autre-part transportez hors de toute cognoissance & raison: & estimans iceux qu'ils estoient desjà presque perdus & engloutis par les impetueuses vagues de la mer, s'aduiferent de ietter en bas par les fenestres du logis, (estimans allegir beaucoup le pesant

fardeau de leur nef ainsi tourmentee) tous leurs sieges, la table, les lits, les plats, les bassins & autres tels meubles, ainsi que ledict premier ieune homme qui faisoit le patron de galere, sage & accort leur commandoit en criant le plus qu'il pouuoit parmy eux qu'ils ne laissassent rien dedans la nauire qui fust pesant & non necessaire au vaisseau: & bien que plusieurs se fussent assemblez deuant le logis, en partie pour regarder & ouyr non sans grande admiration, ce cry, ce bruit, & autres telles insolences & debris de ces meubles que ces gens icy iettoient les mettant en proye à vn chacun, si est-ce que pour cest amas de peuple, ces ieunes hommes forcenez ne se peurent recognoistre ny apperceuoir leur erreur, maistouours continuans leurs cris, pensoient estre tombez de mal en pis, & estre en plus grand danger que iamais de se voir abysmez. Ce trouble s'augmenta d'auantage en leurs esprits, à raison que pendant qu'ils se trauailloyent ainsi, le temps, comme il aduient souuent, se vint tellement à troubler qu'apres quelques esclairs & tonnerres il se mit à tomber vne grosse gresle, à cause dequoy à chaque coup de tonnerre & à chaque esclair ces pauures yurongnes baissans la teste du tout crioient, Garde l'antenne, le mast se rompt & cracque, la nef & la galere se heurtent & perdent, à l'ayde, ô Dieu, misericorde. & autres telles parolles effroyables & espouuentables à ouyr au iugement de leurs cerueaux offusquez. Le lendemain au matin le Podestat estant venu en ce lieu avec son iuge & autres gens de iustice pour informer selon les loix & gouuernemens des anciennes Republicques, des choses mal-faictes, iceux trouuerent (ayans faict faire ouuerture par force, en l'vne des plus basses chambres du logis) vn de ces ieunes hommes, lequel sembloit estre plus aagé que les autres; iceluy les ayant apperceus, & croyant qu'ils fussent du nombre de ces hommes marins, qui estoient grandement reuerrez selon la religion des anciens, & estimez par entr'eux pour semi-dieux de la mer, apres Neptune, il leur dist, O saint Triton sçachez que de cest orage & tempeste qui a si mal traicté ce vaisseau, i'ay esté contrainct sauuer ma vie au mieux que j'ay peu en ce lieu icy de la Sentine qui est vn lieu

au plus profond de chaquenauire couuert, & le plus asséuré contre l'eau, car autrement i'aurois esté comme plusieurs autres miens compagnons englouty & suffoqué au gouffre des eaux fallees: Ce que voyant le Iuge avec son Podeslat, & cognoissant que cestuy-cy n'estoit encores guarý de ceste vineuse frenaisie passerent oultré pour veoir ce que faisoient les autres, lesquels ils trouuerent tous retirez en la salle, & aucuns d'eux en partie, comme s'ils eussent eschappé quelque grande fortune & naufrage, & sortis de nouueau hors de la mer, se secoüoyent le corps de tous costez, & tiroient leurs cheueux comme s'ils eussent encores esté humides & mouilleez, tordans leurs vestemens & les espurant, se nettoyant les bras, les jâbes & la barbe, vomissans la salure des eaux marines qu'ils pensoient auoir beu, cherchans avec ceux qui nageoyent encores les auirons comme s'ils eussent esté tombez à terre. Ces Senateurs s'estonnans infiniment de telle chose & leur demandant ce qu'ils pensoient faire, Ils leurs respondirent avec vne voix enrouée, iettans des sanglots, & faisans quelques rots deshonnestes, n'estans encores libres, ny du vin, ny de sa vapeur, qu'ayans esté grandement trauaillez par la cruelle furie & impetuosité des vents, & de la mer, ils auoyent au moins sauué leur vie, bien que toute leur marchandise & tout ce qu'ils auoyent de plus exquis en leur nauire fut perdu & ietté en la mer, pour ne se voir entierement noyez & engloutis avec le vaisseau au profond de la mer. Atheneuse escrit qu'estans iceux reprins par le Iuge, & estans reputez par luy aussi dignes d'excuse, puis qu'ils estoient si alienez de leur entendement, les aduertissant que de là en auant ils eussent à s'abstenir de plus tant boire de vin, sans raison, ny sans mesure; ils respondirent (croyans n'estre encores libres du tout, de la fortune, & de la tēpeste, & que ces hommes qui parloiēt à eux fussent au vray des Tritons) apres les auoir honorablement tous remerciez, que si tost qu'ils feroient deliurez de ceste dangereuse tēpeste, & arriuez sains & sauues à port de salut, ils promettoyent de bon cœur qu'avec tout honneur & reuerence, ils feroient eriger & dedier au riuage de la mer, en public, vne honorable statue, entre les Dieux du Royaume de Neptune, tant pour l'a-

greable souuenance de leur deuoir, comme pour la miraculeuse souuenance d'auoir esté secourus & aydez par ces hommes, avec lesquels ils parloyent, estimans que ce fussent semi-dieux de la mer, & qui leur estoient apparus, pour les consoler; se presentant à eux opportunement, pour les sauuer: Toutesfois que ce cas soit aduenü, comme on voudra, si est il digne d'estre remarqué avec admiration: c'est d'oü vient que puis apres telle maison a tousiours esté nommee la galere ou nauire.

COS. En effect quand le sieur Ferrand se dispose à vouloir racompter quelque histoire, il ne laisse en arriere-aucune partie de l'ornement qui y est requis: i'oserois bien iurer que ie n'ay iamais de luy entendu aucune chose antique, que ie ne m'y sois rendu plus affectionné, que si ie l'eusse receu és mesmes liures des Historiens Grecs & Latins.

TERTI. Assurez vous sieur Ferrand que vous ne pouuez avec meilleure occasion, ny plus agreable souuenance, finir le discours des choses plus graues qu'en nous representant, si au vif, vne si plaisante & notable histoire, ie vous promets que si la Maieité diuine me permet de retourner sain & saue, comme i'espere, en la Court de l'Empereur, Monseigneur, qu'entre autres choses, desquelles ie parleray quand l'occasion se presentera, ie feray vne particuliere mention de ceste galere ou nauire, qui est ainsi fabriquee & composee de pierres dedans les histoires, faisant memoire d'Agriente, & de vous aussi, mon cher Archange, qui auez esté tant agreable à l'inuincible Empereur Maximilian, qui a esté premierement Seigneur & Patron de vous, & de moy: ie luy veux faire vn recit de ces discours, que nous anons faict du vray art du saut voltigé, duquel on n'a iamais approché, estant sa Maieité, comme vous sçauéz par experience fort desiruse de tout autre exercice corporel, comme aussi de tout autre qui appartient à vn parfaict Gymnaste, ou comme dict est, Gymnastarque; encores que ie croye pour certain que l'Empereur ne croira pas toutes les choses que ie luy pourrois rapporter, des beaux discours de ces Seigneurs, tant ils ont esté prompts & remplis de delectation.

ARCANGE. Encores que ie ne puisse à present vous remercier infiniment, comme ie desirerois, pour le desir que vous auez de faire memoire de moy, si tost que vous ferez retourné vers sa Maiesté, comme aussi pour le subiect qui a esté par ces Seigneurs traicté avec diuers discours; ie vous prieray que m'excusiez maintenant, sçachant bien que ie vous suis seruiteur affectionné, d'autant que i'ay entendu pour le certain, que le Roy part demain, pour s'en aller à Vau-jours, qui est vn chasteau appartenant au Comte de Sanferre, frere. du sieur de Fontenes, lequel est situé au milieu de tres-grandes forests; auquel lieu sa Maiesté espere passer le temps, par quelques iours; à la chasse du Cerf, Il me semble qu'il est heure qu'un chacun se retire à son logis, afin que demain matin dès la pointe du iour, chacun, comme on dict, aduise à foy. Alors tous les Gentils-hommes se leuans, & se donnant la bonne nuit, les vns aux autres, se retirèrent en leurs logis.

*La fin du troisieme & dernier Dialogue.*